

I

GÜLŞEN-İ ŞU'ARÂ (BAĞDATLI AHDÎ)

Yayına Hazırlayan:

Süleyman SOLMAZ

B

Metin

Denizli 2009

ÖN SÖZ

Edebiyat araştırmacısının asıl hedefi, edebiyatın tarihini yazmaktır. Edebiyatın tarihi edebî olayın bizzat kendisi ile başladığına göre, ona ait bütün eserlerin incelenip gün ışığına çıkarılma gereği de ortadadır. Tarih boyunca hiç bir millet bizim kadar çok alfabe değiştirmemiş ya da değişik alfabeler kullanmamıştır. Göktürk, Uygur, Arap, Kril ve nihayet Latin alfabesi... Yıllar itibariyle en çok eser verdiğimiz alfabe, Arap alfabesidir. Bu alfabeyle oluşturduğumuz eserler, bugün kütüphanelerde, araştırmacısını beklemektedir. İşin bir başka yönü daha vardır, bu eserlerin bir kısmı çeşitli yollarla yurt dışına çıkarılmış ve araştırılıp incelenmesi ancak bulunduğu ülkedeki yetkililerin insafına kalmıştır. Üzerinde çalıştığımız eserin de başına böyle bir iş gelmiştir. İngiltere ve Mısır'da bulunan nüshalarımız bir çok defa müracaat etmemize rağmen elde edilememiştir .

İslâm medeniyeti çerçevesinde oluşan edebiyatımızın bugün incelenip anlaşılması bir çok insan için mümkün değildir. Alfabe değişikliği, kelimelerin eskiliği gibi bazı hususlar sahayı zorlaştırmaktadır. Kendine has zorlukları olan bu sahanın araştırılıp incelenmesi kültür ve edebiyat tarihimize büyük oranda ışık tutacaktır. Üzerinde çalışılan eser, bir şâirler tezkiresidir. Bilindiği gibi tezkireler, bir devrin edebî ve kültürel faaliyetlerini tek başına içermeye hatta temsil etme konumuna sahiptir. Konularını şâirlerin hayatları, şahsiyetleri, edebî faaliyetleri ve bunların eserleri oluşturur. Bu konularda hem bilgi verilmekte, hem yorum ve değerlendirmeler yapılmakta, hem de eserlerden örnekler verilmektedir. Bütün bunların yapılmasındaki amaç bu insanların unutulmamasıdır. Ahdî bunu kûşe-i nisyânda kalmamak olarak ifade etmiştir. Tabiidir ki bu yapılırken müellif de kendi hünerlerini göstermek durumundadır. Bu vesile ile kullanılan dil ve üslup biraz sanatlı ve âhenkli olacaktır.

Arapların tabakat geleneğinden edebiyatımıza geçen tezkireciliğin bizdeki modelleri Alî Şîr Nevâyî (ölm.1501)'nin **Mecâlisü'n-Nefâis** adlı tezkiresi ile Devletşâh (ölm.1507)'in **Tezkiretü's-Şu'arâ** isimli eseridir. Tezkireciliğin edebiyatımızdaki ilk örnekleri on altıncı yüzyılda görülmektedir. Daha doğrusu elde bulunan en eski örnekler bu yüzyıla aittir. Ahdî'den önce Sehî Bey ve Latîfî Anadolu'da tezkire yazmışlardır. Bu iki tezkire üzerinde akademik seviyede çalışma yapılmıştır. Gülşen-i Şu'arâ ilk tertip tarihi itibariyle (H.971-M. 1563) Anadolu sahasında yazılmış üçüncü tezkiredir.

III

Ahdî tezkiresinin önemini içindeki, başka kaynaklarda yer almayan, şâirler tayin eder. Çoğunluğu devletin doğu kesiminden olan diğer tezkirelerin hiç birinde yer almayan 175 şâir bunun en bariz delilidir. Irak mihver olmak üzere bugünkü İran ve Azerbaycan hatta Buhara'yı içine alan, Suriye ve Mısır'a kadar uzanan bir bölgede yetişmiş bir çok şâir ilk defa Ahdî ile edebiyat dünyamızdaki yerini almıştır. Edebiyat araştırmacıları bilirler ki, biz Fuzûlî'yi, bu şâirin hastalık ve ölümünü, Fuzûlî'nin aynı zamanda şâir olan oğlunu ilk defa Ahdî'den öğreniriz. Yine İstanbullu Tab'î'nin **İstanbul Şehrengizi**'ni, Zamirî'nin **Leylâ vü Mecnûn** mesnevisini, Mecdî'nin **Mecmuatü'n-Nezâyiri**'ni ilk olarak Ahdî haber vermektedir. Amacımız bu denli orjinalite taşıyan bu eserin ortaya çıkması, Türk kültür hayatına yeni bir ışık ve soluk getirmesi idi. Bunu yaparken yurt içi ve dışı kütüphanelerde bulunan ve ulaşılabildiğimiz 16 nüshadan faydalandık.

Eser Atatürk Kültür Merkezi Başkanlığı Yayınları arasında 2005 yılında tarafımızdan yayınlandı. Bu yayından sonra İsmail PARLATIR ve György HAZAI tarafından hazırlanan ve TÜBA tarafından yayımlanan Macar Bilimler Akademisi Kütüphanesi'ndeki Türkçe El Yazmaları Kataloğu (Ankara 2007) isimli eserde adı geçen kütüphanede bir nüshasının daha olduğunu öğrendik. Bu nüsha henüz incelenemedi.

Eserde bir takım yanlış okuma veya baskı hataları varsa bunlardan dolayı özürlerimi sunarken eserin ortaya çıkmasında büyük rolü olan hocam Prof. Dr. Mustafa İSEN Bey'e şükranlarımı arz ederim.

DENİZLİ 2009

Süleyman SOLMAZ

I. BÖLÜM

A-AHDÎ'NİN HAYATI VE EDEBÎ ŞAHSİYETİ

Ahdî, 16. yüzyılda yaşamış bir Osmanlı tezkire yazarı ve şâiridir. Edebiyatımızda Bağdatlı Ahdî olarak bilinen müellifinin bugün elimizde 381 şâiri kapsayan bir tezkiresi ile küçük bir divanı (divançe denilebilir) vardır. Tezkiresi elinizdeki bu çalışmaya kadar incelenmemiş ve yayımlanmamıştır. Şiirleri üzerine de Prof. Dr. Hasibe Mazıoğlu bir makale yayınlamıştır.¹

Ahdî hakkında bilinenler eserinin baş tarafında, kapalı ifadelerle anlatılanlardan ibarettir. Aşağıda vereceğimiz bilgiler, incelediğimiz nüshalardan çıkarabildiklerimizdir. Bu bilgiler nüshaların incelenmesi neticesinde elde edilmiş olduğu için çok fazla geniş değildir. Hakkında yazılan bilgiler ise, birbirinin kopyası durumundadır. Bunlardan sadece Prof. Dr. Ömer Faruk Akün'ün **Türkiye Diyanet Vakfı İslâm Ansiklopedisi** (TDVİA)'nin Ahdî maddesinde yazdıkları bir takım yeni bilgiler ve bulgular içermektedir. Kendi tespitlerimizin dışında Akün'ün verdiği bilgilerden de geniş olarak istifade ettiğimizi burada belirtelim. Hemen şunu da ilave etmek lüzumunu hissediyoruz: Tezkirede yer alan birbiriyle çelişkili ifadeler, zaman zaman, Ö. Faruk Akün'ü de tereddüde düşürmüştür². Bunlardan bir tanesini şöyle tespit edebiliriz. Prof. Dr. Ömer Faruk Akün, Ahdî'nin Temerrüd Ali Paşa(1550-1552'de Bağdat valisi) ile tanışıklığını adı geçen paşanın Konya'da valilik yaptığı dönemle irtibatlandırmaktadır. Halbuki Ahdî, Bağdat'tan Paşa ile birlikte Sivas'a geldiklerini bazı nüshalarda (Ü12b ve B 11 b) belirtmektedir.

Ahdî'nin yetişme dönemi Osmanlıların Bağdat'ı fethi dönemine rastlamaktadır ve bu dönem hakkında elde hiçbir bilgi ve belge yoktur. Tezkiresinde de bu konuda herhangi bir ipucu yoktur. Tezkiredeki babası Mevlânâ Şemsî, kardeşleri Rızayî, Murâdî, amcası Hüseyinî ve onun oğlu Rindî ve akrabalarından Hürremî ve Zühdî gibi şâirler göz önüne alınırsa, mensuplarının çoğu şiirle yakından ilgilenen bir ailedendir.

Tezkirenin mukaddimesinde yer alan **Sebeb-i Te'lif** kısmında anlatıldığına göre Ahdî, Hicrî 960 (M. 1552)'ta Hüsrev isimli bir şâirle diyâr-ı Rûm'a gitmek üzere Bağdat'tan yola çıkmıştır. Bir müddet sonra bu arkadaşından ayrılmıştır. Arkadaşıyla nereye kadar gelmiştir, kimlerle görüşmüştür ve hangi yılda arkadaşından ayrılmıştır, bu soruların hiçbirine cevap vermek mümkün değildir. Arkadaşından ayrılması Ahdî'yi bir hayli üzmüştür. Arkadaşıyla birlikte uğradığı yerlerde epeyce faydalı bilgiler öğrendiğini ve aralarında bir ünsiyet

¹ Hasibe Mazıoğlu, Ahdî-i Bağdatî ve Şiirleri, **Türk Dili Araştırmaları Yıllığı, Belleten**, 1978-79 s. 95-150

² Ömer Faruk Akün, Ahdî, **Türkiye Diyanet Vakfı İslâm Ansiklopedisi**, s. 510.

oluşturduğunu tezkiredeki ifadeden çıkarmak mümkündür. Bu ünsiyetten ötürü Ahdî arkadaşından ayrıldığına üzölmüştür. Ahdî bu ayrılışı, eserde şu beyitle dile getirmiştir:

Budur devr-i zamânun ittifâkı

Ki olur her visâlün bir firâkı

Arkadaşından ayrıldıktan sonra nerelere gittiğini, ne yaptığını Ahdî anlatmamaktadır; fakat Anadolu paşası Temerrüd Ali Paşa'nın biyografisinde, Ali Paşa'yla Bağdat'tan birlikte çıktıklarını ve Sivas'a geldiğini, orada adı geçen paşanın bir çok lütfuna mazhar olduğunu belirtmektedir. Yazarın İstanbul öncesi hayatıyla ilgili tezkirede yer alan tek ipucu budur. Bunlardan başka Adana'da Pîrî Paşa (ö. 970/ 1562)'ya bir kaside sunmuş olması, Pîrî Paşa biyografisinde, adı geçen paşanın Adana'daki faaliyetlerine geniş yer vermesi Adana'da da bir müddet kaldığını göstermektedir; fakat bununla ilgili ne yıl, ne de zaman belirtmiştir. Tabii ki bu faaliyetler adı geçen paşanın 958 / 1551'de Adana'ya üçüncü kez beylerbeyi olduğu dönemle ilgilidir³.

Ahdî'yi bir anda İstanbul'da görüyoruz. İstanbul müellifimizi, âdetâ, büyülemiştir. Bunu tezkirede şu cümlelerle anlatır: ... *üftân ü hîzân mânend-i gerd-i nâtüvan be-tarîk-ı müsâferet ve sâlik-i râh-ı siyâhat olup pâ-yi taht-ı sultân-ı kişveristân ve dârü's-saltanate dârâ-yı leşkeş-keş-i İrân u Turân ve şâhen-şâh-ı kitî-penâh dergâhına ya'ni Kostantiniyye'ye gelüp gördüm ki bir câ-yi şerîf ve me'vâ-yı latîf ki âb u hevâsı hûb ve her cânibde mesiresi mergûb ve ol mekân-ı pür-eşvâk-ı dil-cû cevânân-ı mâh-rûyân ile bir haddede memlûdur ki esvâk u çârşûsından geçilmez. Niteki dil-rübâları vâsfında şâ'ri-i hoş-edâ bir matla'-ı garrâ buyurmuşdur ki vird-i zebân-ı âşıkân-ı şeydâdur. Bâkî fermâyed*

Dil-rübâlarla 'aceb kesreti var her yoluñ

Geçemez hûblarından gönül İstanbul'uñ

El-hak ta'rifden müberrâ ve tavsîfden mu'arrâdur zerre vü şemme mikdârı sitâyîşe hiç ihtiyâç yokdur...

Ahdî, İstanbul'da bilgin ve şâirlerin çok olduğunu, bunların tarif ve tavsiflerinin zorluğunu, hatta ne kadar tavsif edilirse edilsin ancak binde bir mesâbesinde kalınacağı kanaatindedir. *Siyâk-ı kelâm mutavvel olmasun diyü muhtasar kılındı* diyerek sözü uzatmak istemediğini de açıkça söyler. Ahdî, uzun bir süre bu şehirde kaldığını şu sözlerle dile getirmiştir. Burada dikkatimizi çeken husus kesinlikle süresinin belirtilmemiş olmasıdır ki bu tezkirede genel üsluba da uygundur (bkz. Dil ve Üslub): *Müddet-i medîd ve ahd-i ba'id bu bende-i müsâfir şehir-i mezbûrda mücâvir olup...*

Bu şehirde büyük âlimlerin hizmetinde olduğunu, ileri gelen devlet adamlarıyla görüşüğünü, şâirlerle, fasîh ve belîğ kişilerle biraraya geldiğini, onlarla müzakere ve müşa'erede bulunduğunu ve onlardan çok istifade ettiğini tezkirenin önsözünde anlatmaktadır; fakat bu bölümde isim vermemektedir. Ayrıca bu kişilerin sohbetlerine devam

³ Bkz. Mehmed Süreyya, **Sicill-i Osmânî**. C. II s. 44 Matbaa-i Amire, İst. 1311

ettiğini hatta bunu fırsat u ganimet bildiğini dile getirmiştir. Bu bildirdikleri arasında dikkate değer bir nokta da şudur: Ahdî bu dönemde Anadolu Türkçesini öğrenmiş, bu şivenin darb-ı mesellerine kadar ayrıntılarına vâkıf olmuş ve bu şive ile şiir yazacak seviyeye gelmiştir. Yine bu dönemde Anadolu kazaskeri Pervîz Efendi'den epeyce bir ilgi gördüğünü şu sözlerinden anlıyoruz: *Ol kân-ı mürüvvet ve ma'den-i sehâvet mü'ellif-i tezkîreye enva'-ı ri'âyet ve eltâf-ı bî-gâyet itmeden hâlî degüldür.*

971 (M.1562-63)de vatan sevgisinin gönlünde iyice yer etmesi üzerine İstanbuldan ayrılmıştır. Bunu da *Vatan sevgisi imandandır* düstûru ile desteklemiştir. Ahdî'yi İstanbul'dan ayıran sebep sadece vatana duyduğu özlem değildir. Burc-ı evliyâ olarak vasıflandırdığı Bağdat'ta bulunan büyük meşâyihe olan hasreti de bunda önemli bir rol oynamıştır. Ayrıca Rûm hûblarının vefâsızlığından da dem vurmaktadır. Bu hususlar Ahdî'yi üzmüş ve İstanbul'dan ayrılmıştır.

İstanbul'dan ayrılırken şâh-zâde-i rûzgâr olarak vafettiği Sultan Selim'in huzuruna hediye olarak ancak şiirin gidebileceğini şu sözlerle dile getirir: *...ve dahi şâh-zâde-i rûzgâruñ âsitânına be-resm-i tuhfe alup gitmege eş'âr-ı âbdârdan gayrı bir nesne pâ-y-dâr ve pesendide-i âşıkân-ı hâk-sâr ve makbûl-i ehl-i rûzgâr degüldür.* Bu vesile ile yazdığı eseri şehzâde Selim'e Kütahya'da sunmuştur. Bunu şu kıt'a ile de anlatmıştır:

*Cem idüp erbâb-ı nazmı itdüm ol sultâna arz
Idet olmuşdur sunar bende şeh-i devrâna arz*

*Hâk-i pâyinden biter maksûdı erbâb-ı dilüñ
N'ola sunsa hâk-i pâye Ahdî-i ferzâne arz*

Bu eserin Ahdî'ye nasıl bir itibar ve mevki sağladığı bilinmemektedir. Prof. Dr. Ömer Faruk Akün'ün de belirttiği gibi⁴ Ahdî'nin İstanbul dışındaki hayatı hakkında hiçbir bilgi ve belge yoktur; yani İstanbul'a gelmeden önceki hayatı gibi Bağdat'a döndükten sonraki dönemle ilgili bir ipucu yoktur.

Ahdî, Anadolu'da kaldığı süre içerisinde İstanbul dışında bazı şehirlerde de bulunmuştur. Bunu tezkirenin çeşitli yerlerinde özellikle dile getirmektedir. Edirne, Bursa, Dimetoka bu şehirler arasında yer almaktadır. Biz bu hususu Tezkirenin Kaynakları bölümünde Görüştüğü Şâirler bahsinde ele aldığımız için burada tekrar etmeyeceğiz.

İstanbul'dan başka Edirne'nin de Ahdî'nin hayatında önemli bir yeri vardır. Burada Emrî, Mecdî gibi bazı şâirlerle bir araya gelmiş ve malzemesini toplamıştır. Bunların büyük bir kısmında zaman ve süre yoktur. Ancak **Şakayık** mütercimi Mecdî'nin evinde bir yıl kaldığını özellikle belirtmiştir. Tezkiyesinde Edirne ili ilgili manzum bir medhiye de vardır .

⁴ Ömer Faruk Akün, a.g.m, s. 510.

Ahdî, Bağdat'a döndükten sonra otuz yıl kadar daha yaşamıştır. Ahdî'nin hayatının bu dönemi hakkında da bilgimiz yoktur. Bu esnada boş durmamış, eserini genişletme cihetine gitmiştir. Bu yüzden tezkirenin yazmaları arasında çok büyük ve önemli farklılıklar vardır. Bir nüshada olan bir şâirin diğer nüshalarda olmaması, bazılarında *elan kayd-ı hayatda olup* ibarelerinin ötekilerinde olmaması gibi hususlar bunun önemli delilleridir.

Ahdî; Âşık Çelebi⁵, Hasan Çelebi⁶, Beyânî⁷, Riyâzî⁸, Kafzâde Fâizî⁹ tezkirelerinde ve Gelibolulu Âlî'nin **Künhü'l-ahbârı**'nda¹⁰ şâir olarak yer almıştır. Âşık Çelebi ve Riyâzî isminin Mehdî olduğunu söylerken Beyânî ve Gelibolulu Âlî, Ahmed olduğunu bildiriyor. Tezkirenin bazı nüshalarında ise, Ahdî Ahmed bin Şemsî-i Bağdâdî olarak kayıtlar vardır. Bu kayıtların kaynağı ise bilinmemektedir; yani müstensihlerin mi yoksa müellifin kendi kaydı mı, bu anlaşılmamaktadır. Âşık Çelebi'ye göre Ahdî önce Mehdî olan adını mahlas olarak kullanmış, başka şâirlerin de aynı mahlası aldıklarını görünce Ahdî'yi mahlas olarak benimsemiştir. Mazıoğlu, bu konuda Riyâzî'nin Bağdat'ta Ahdî ile görüşmüş olmasına istinaden Mehdî adının doğru olabileceği kanaatini taşımaktadır¹¹. Fakat Gelibolulu Âlî de, Bağdat'ta görev yaptığı esnada Ahdî ile görüştüğünü belirtiyor¹². İsmi konusunda bu yüzden sağlıklı bir şey söylemek mümkün olmadı.

Ahdî, hemşehrisi Rûhî'nin divanında da *sâhib-tezkire*, *Şemsî-zâde*, *suhen-gû*, *suhen-dân*, *gazel-hân*, *şuarâ eskisi*, *köhne-vücûd* gibi çeşitli vasıflarla geçmektedir¹³.

Ahdî, H. 1002 (1593-1594) Bağdat'ta ölmüştür. **Keşfü'z-Zünûn** (C.I. s.387)'da Ahdî'nin ölüm tarihini 980 olarak verilmektedir, ki bu tarih yanlıştır. Yine Mısır Kahire Millî Kütüphanesi Katalogu (**Fihrisü'l-Mahtutâtu't-Türkiyye El-Osmaniye** C.3. s.322)'nun El-Hey'etü'l-Mısıriyetü'l-âmmetü'l-Kitab Bölümü'nde Ahdî'nin ölüm tarihi Keşfü'z-Zünûn'da olduğu gibidir. Bu katalogun, bu bilgileri buradan aldığını sanıyoruz.

⁵Filiz Kılıç, **Âşık Çelebi Tezkiresi**, G.Ü. Sos. Bil. Ens., Basılmamış doktora tezi, s.619-620.

⁶Kınalı-zâde Hasan Çelebi, **Tezkiretü's-Şu'arâ**, C 2, s.714 Yay. Haz. Dr. İbrahim Kutluk, Ank. 1981.

⁷Aysun Sungurhan, **Beyânî Tezkiresi**, G.Ü. Sos. Bil. Ens. Basılmamış yüksek lisans tezi, s.109.

⁸**Riyâzî Tezkiresi**, Nuruosmaniye Ktp. 3724 s.

⁹Kaf-zâde Fâizî, **Zübdetü'l-Eş'âr**, Ank. Millî Ktp. Yz. A. 679, s.82.

¹⁰Mustafa İsen, **Künhü'l-Ahbar'ın Tezkire Kısım**, Ank., 1994, s.319.

¹¹Mazıoğlu, a.g.m. s. 96.

¹²Mustafa İsen, a.g.e. s. 319

¹³Cemal Kurnaz, Rûhî'nin Dostları, **Türk Kültürü Araştırmaları Oktay Aslanapa Armağanı**, Ank. 1995.

B-AHDÎ'NİN ŞÂİRLİĞİ

Yaşadığı dönemde şâir olarak da tanınan Ahdî'nin şâirliği üzerine bu zamana kadar yapılan tek derli toplu inceleme, daha önce de belirttiğimiz gibi, Prof. Dr. Hasibe Mazioğlu'na aittir. Mazioğlu, Ankara Üniversitesi Dil Tarih ve Coğrafya Fakültesi Kütüphanesi'nde bulunan bir yazmadan hareketle Ahdî'nin şâirlik yönünü değerlendirmiştir¹⁴. Biz bu bölümde bu yazıdan hareket ederek Ahdî'nin tezkiredeki şiirlerini de inceleyeceğiz.

Ahdî, daha önce de bahsettiğimiz gibi Anadolu'ya geldikten sonra Anadolu Türkçesi'ni öğrenmiş ve bu şivede şiir yazacak kadar ilerlemiştir. Bu yüzden Anadolu seyahati sırasında çeşitli meclislerde bulunmuş, bu meclislere edebî mahfel diyebiliriz, bir çok şâire nazire yazmıştır. Nazire yazdığı şâirlerin sayıları bir hayli kabarıktır. Bu şâirleri şöyle sıralayabiliriz: Nişânî Bey, Abdülgani Efendi, Pîr Mehemed (Azmî) Efendi, Bâkî, Nihânî, Germî Bey, Fikrî Bey, Keşfi Bey, Emrî, Ümîdî, Behiştî, Sâni Beg, Harimî Beg, Ref'î Çelebi, Zînetî, Sa'yî Çelebi, Sehâbî-i Acem, Sâmî, Şevki Çelebi, Tarzî, Tarîkî, Ârif Çelebi, Âşık Çelebi, Edirneli İzârî, Gınâ'î, Fuzûlî, Kelâmî, Lem'î, Mecdî, Muhitî Efendi, Misâlî, Murâdî-i Acem, Üsküplü Vâlihî ve İstanbullu Vâhî.

Tezkiresinden anlaşıldığı kadarıyla Farsça şiirleri de vardır. Yukarıda saydığımız şâirlerden Nişânî Bey, Sehâbî-i Acem, Tarzî, Fuzûlî, Murâdî-i Acem'e yazdığı nazireler adı geçen şâirlerin Farsça yazdığı şiirlere Farsça nazirelerdir. Ayrıca mukaddime ve hatimede yazdığı bazı şiirleri de Farsça'dır. Bu yüzden Ahdî'nin Türkçe'ye olduğu kadar Farsça'ya da hâkim olduğunu söyleyebiliriz.

Ahdî'nin yazdığı şiirlerde aruz kusuru yoktur. Konuşma dilinden şiire aktardığı atasözü ve deyimler şiirlerine bir canlılık ve âhenk katmıştır. Divan şiirinin geleneğine sâdik kalan Ahdî, Osmanlı Türkçesi'ni en iyi biçimde şiirlerinde kullanmaktadır.

Ahdî, Fuzûlî'den bahsederken oldukça saygılı bir ifade biçimini tercih etmiştir. Bu hemşehrilik gayretinin ötesinde, onun Fuzûlî'yi iyi tanıdığını, şiirlerinde onu örnek aldığını gösteren bir ifade tarzıdır. Mazioğlu'na göre, Ahdî, Fuzûlî'nin şiirlerini belleğine iyice işlemiş ve içine sindirmiştir. Mazioğlu cümlemin devamında *bu yüzden Fuzûlî'nin şiir atmosferinden kendisini kurtaramadığı zaman bile, aynı mazmunları söylerken yalnızca öykünebilen, taklit düzeyinde kalmış yetenezsiz bir kişi olmadığını gösteriyor... Edebiyatımızda etkisi bu kadar yaygın ve sürekli olan Fuzûlî'ye yazılan nazireler arasında Ahdî'ninkileri başarılı olanlar arasına almanın abartma olamayacağı kanısındayım* diyor.¹⁵ Bu görüşlere katılmamak mümkün değildir. Gerçi Ahdî'nin tezkirede Fuzûlî'nin Farsça bir şiirine bir beyitlik bir naziresi vardır; ancak, Mazioğlu'nun da işaret ettiği gibi, Emrî'ye yazdığı nazire ve diğer şiirlerindeki hava bunu teyit eder mahiyettedir. Mazioğlu, adı geçen makalede, Ahdî'nin

¹⁴ Hasibe Mazioğlu, Ahdî-i Bağdadî ve Şiirleri, **Türk Dili Araştırmaları Yıllığı Belleten**, 1978-79 s.95- 150.

¹⁵ Mazioğlu, a. g.m. s. 102

nazirelerini tam tespit edememiştir. Buna sebep de incelemeye esas aldığı Fatih nüshasında nazire beyitlerin veya şiirlerin başına nazire yazısının eklenmemiş olmasıdır diye düşünüyoruz. Biz bu tip eksiklikleri diğer nüshalarla karşılaştırma sonucu çıkarabildik.

C-GÜLŞEN-İ ŞU'ARÂ'DA DİL VE ÜSLUP

Türk nesrinin başlangıcı, Türk dilinin ilk yazılı metinleri olan Yenisey ve Orhun kitabelerine kadar inmektedir. Biz burada esas itibarıyla 16. yy. daki Osmanlı nesir anlayışı üzerinde durmak istiyoruz. Bu konuda **Türk Dili ve Edebiyatı Ansiklopedisi**'nin Divan Nesri¹⁶ maddesinde verilen bilgileri özetle buraya aktarıyoruz:

Bilindiği gibi İslamiyetin kabul edilmesinden sonra, nesir alanında bir yavaşlama ve gerileme görülmektedir. 15. yy. sonlarına gelindiğinde bu faaliyetin şiire paralel olarak hız kazandığı da bir gerçektir. Arapça ve Farsça'dan yapılan tercümeler bunda önemli bir rol oynamıştır. Bu eserlerin hemen hepsi aydınlatıcı, yol gösterici ve telkin edici amaçlar taşımaktadır. Bu eserlerin konularını ise başlıca din ve tasavvuf, terbiye, ahlâkî değerler oluşturmaktadır. Bunların yanısıra te'lif eserlerin de artık bir ihtiyaca cevap olarak verilmeye başlandığı da gözlenmektedir. Bu dönemde dinî, ahlâkî, tasavvufî, tarihî, ilmî, edebî her alanda te'lif, tercüme veya adapte, bolca eser verilir.

Bu gelişim çizgisi içerisinde XV. yy.dan itibaren kısaca, sade ve sanatkârâne diye isimlendirebilecek iki tür nesir ortaya çıkmıştır. Bunlardan sanatkârâne olanına süslü, artistik, edebî nesir gibi isimler de verilmektedir.

Arap ve İran edebiyatlarındaki nesrin gelişimi bizim edebiyatımızda XVI. yy.da yankısını bulmuştur. İlk örneklerine Sinan Paşa, Mahmud Paşa(Adnî Bey), Nişânî gibi aynı zamanda birer şiir olan devlet adamlarının yazışmalarında görmek mümkündür.

Bu dönem nesrinin en bariz özelliği secidir. Bu bir nevî nesir kafiyesidir. Arka arkaya ritmik bir şekilde değişerek devam edip giden bu kafiyeli söyleyiş, cümleye mûsikîli bir ahenk ve ifade gücü verir. Bu tesir, bir birini, muvazî bir şekil içerisinde kuvvetlendirerek takip eden ve değişen ölçülü cümle ya da cümleciklerle daha da artar. Başta teşbih ve mecazlar gelmek üzere , çeşitli mana ve söz sanatlarının, parlak ve renkli tasvirlerin ihmal edilmeksizin her vesilede bolca kullanılması, bu nesrin özelliklerinden bir diğerini teşkil eder. Bu özelliklerin hemen her üçü de esas itibarıyla nesre değil, şiire ait olmakla birlikte , o devrin edebî faaliyet ve anlayışına şiirin hâkim bulunması dolayısıyla nesirde de kendini göstermiştir. Yazar, bir taraftan, üslubunu, belirtildiği şekilde ahenkli ve sanatlı yapabilmek, bu vesileyle diğer taraftan sahibi olduğu edebî bilgi ve kültürü de göstermiş olmak için, Arapça ve Farsça bu tür eserlere baş vurmak, dolayısıyla, bu dillerden en duyulmamış ve görülmemiş olanına kadar kelimeler, sözler ve terkipler almak mecburiyetini duyar. Böylece dili, yabancı kelime, terkip ve kaidelerle doldurmuş olur. Türkçemizin kelime ve cümle yapısıyla, söz hazinesini doğrudan doğruya ilgilendiren, daha doğrusu onu bu yönlerde, tabîî gelişiminden ayırıp zorlayan (ve zamanla bozan) bu durum sanatkârane nesrin dördüncü özelliğini teşkil eder. Bir beşincisi ise, nesir cümleleri arasına, duruma ve manaya uygun olarak, Arapça, Farsça (ve nadiren de olsa Türkçe) beyitler, mısralar, başka manzum parçalar; âyetler, hadisler, Arap atasözleri ve deyimleri, İslâm'ın ve Şark'ın büyüklerine ait sözler, vecizeler serpiştirmeye dayanır.

Bütün bu özellikler XVI. yy. nesrinde aynen devam etmiştir.

Eski Türk nesrini bir başka açıdan ele alan, Prof. Dr. Fahir İz¹⁷ , şu şekilde bir tasnif

¹⁶ Divan Nesri, **Türk Dili ve Edebiyatı Ansiklopedisi**, C.II, s.340 Dergah Yayınları, İst. 1977.

¹⁷ Fahir İz, **Eski Türk Edebiyatı'nda Nesir**, C.I, s. III, İst. 1964.

yapmaktadır:

1- Halkın konuştuğu dili esas tutan sade nesir

2-Arap ve Fars sözlüklerinden gelişi güzel her kelimeyi alıp onları bu dillerin gramer kurallarına göre kullanan, buna karşılık Türkçe sözlere pek az yer veren, divan şiirinin lafız san'atlerinden çoğunu benimseyen, secii esas tutan süslü nesir (inşa)

3-Orta nesir

Prof. Dr. Fahir İz, Orta nesir için şunları söylemektedir: *Eski edebiyatın yüksek topluluktan yetişen yazarları çokluk bu orta yolu izlemişlerdir. Bu yazı dili halkın konuşma dilinden epey ayrılmıştır. Yine de sadece lafız san'atleri ile hüner göstermek amacı güdülmemiştir. Yazar, esas olarak anlatmak istediği şeyin peşindedir. Yabancı söz ve tamlama oranı yazardan yazara değişir. Kimi yazarlar arasına 'seci' merakına da kapılırlar. Bunun dışında orta nesir eski edebiyatın her türünde çoğunluktadır.*

Bilindiği gibi tezkireler, manzum ve mensur karışık eserlerdir. Nesir kısmı tamamen müellife aittir. Manzum kısımda ise, yazar genellikle, eserine aldığı şâirlerin şiirlerinden örnek verdikten sonra yer yer bir fırsatını bularak kendi şiirlerini de esere katmaktadır. Bu söz arasında bir mısra, beyit, kıt'a, mesneviden bir parça, bir tarih beyti ve kıt'ası ya da mevcut şâirlerden birine söylediği nazire biçiminde ortaya çıkmaktadır. Burada nazireyi tezkireciliğin mütemmim cüzü olarak değerlendirmek mümkündür. Tabii bunu daha çok Ahdî'ye has bir durum olarak değerlendirmek daha doğru olur.

Ahdî'nin **Tezkire-i Erbâb-ı Safâ** ya da kısaca **Gülşen-i Şu'arâ** adını taşıyan eseri daha önce ifade edildiği gibi bir mukaddime, dört bölüm ve bir hatimeden oluşmuştur. Mukaddime ve hatimede yukarıda sanatkârâne olarak adlandırılan nesrin özellikleri görülmektedir. Bu bölümlerde müellif, hüner gösterme peşindedir. Dil yer yer ağırlaşmakta; ikili, üçlü terkipler çok kullanılmaktadır. Secileri fazla kullanma gayreti de ayrıca dikkat çekmektedir. Birinci, ikinci ve üçüncü bölümlerde kullanılan dilin belli bir standartı yoktur. Bu bölümlerde yer alan şahısların sosyal statüleri ile ilgili olarak, zaman zaman sanatkârâne nesirde olduğu gibi ağırlaşmakta, zaman zaman da orta ve sade nesrin özelliklerini göstermektedir. Yani bu bölümlerde dilin kullanılış biçimini şiirin sosyal statüsü belirlemektedir. Tezkirenin devrin şâirlerinin alfabetik olarak anlatıldığı dördüncü bölümünde ise, dil sâdedir. Bu sadelik, basitlik mânâsına alınmamalıdır; zira burada yazar vermek istediğinin peşindedir. Daha çok orta nesrin özellikleri görülmektedir.

Mukaddime ve hatimede, yoğun olarak, ikili terkipler kullanılmıştır. Bu terkipler, evc-i kudret/ burc-ı rif'at gibi gerek ses, gerek manâ ve gerek vezin bakımından seci olabilecek tarzıdır. Ahdî'nin kullandığı seciler hakkında rasyonel bir bilgi verme imkanı yoktur. Çünkü yukarıda da belirttiğimiz gibi, biyografiden biyografiye bunların sayısı değişkenlik arz etmektedir. Ahdî bu bölümlerde, yerine göre, üçlü terkiplere de başvurmuştur. Bilhassa başlıklarda Arapça ve Farsça ibareler çok geniş yer tutar. Bu ifade tarzı diğer bölümlerde de aynı olmak şartıyla, duâ cümlelerinde de aynen devam eder.

İlk üç bölümde şâir sultan ve şehzâdeler, beyler, âlimler, defterdarlar anlatılırken kullanılan dil hem ağır hem de saygılı, mübâlağalı ve yücelticidir. Bu da geleneğe uygundur¹⁸ Ayrıca hal tercümelerinde şairin doğduğu yer ile mesleği, bulunduğu son durum, şiiri veya diğer eserleri üzerinde bazı tavsifler yapmaktadır. Yapılan bu tavsifler birbirine çok benzer. Şairlerin eserleri üzerinde fazla durmumuştur.

Gülşen-i Şu'arâ'da yer yer konuşma dilinden alınmış ifadeleri görmek mümkündür. Bilhassa, şâirlerden nakledilen anekdot ve nüktelerde bu, açıkça görülmektedir. Usûlî, Enverî, Behiştî, Tâbî-i Büzürg, Cevrî, Sâdık gibi bazı şâirlerde anlatılanlar ve kullanılan ifade tarzı bunun en bâriz delilleridir.

18 Mustafa İsen, XVI. yy. Sonuna Kadar Osmanlılarda Biyografi Geleneği, **Atatürk Üni. Sosyal Bilimler Ens. Dergisi**, Erzurum, 1993 s.41

Ahdî, Osmanlı Türkçesi'ni oluşturan üç dilin imkanlarını en iyi şekil de kullanmıştır. Eserin kelime kadrosuna bakıldığı zaman, hiç bir ayırım yapılmaksızın, el-sine-i selâseye ait kelimelerin rahatlıkla kullanıldığı açıkça görülecektir. Burada özellikle belirtmemiz gereken bir husus vardır: Türkçe kelimeler, daha çok; fiil, isim-fiil, sıfat-fiil(partisip-ortaç) ve zarf-fiil(gerindium-ulaç) olarak kullanılmıştır. Bunun yanısıra yigrek, gökçek, çok, yok gibi kelimelerin de kullanılmış olduğuna işaret etmek gerekecektir. Tabiidir ki eserde kullanılan Türkçe kelimeler bunlardan ibaret değildir. Ayrıca; ırgürmek, kayırmak gibi bugün kullanılmayan arkaik kelimeleri de zaman zaman kullandığını söylemek lazımdır.

Ahdî cümle başlarında; *el-hak, hakkâ ki, hakkâ budur ki, hadd-ı zâtında, âkıbetü'l-emr, âhirü'l-emr, sâbikan, mukaddemâ, hâliyâ, el'an, zîrâki, min-ba'd, ba'd-e'z-zamân* gibi kelimeleri çok sıklıkla kullanmıştır. Bunu devrin dil anlayışına uygun olarak telakki ediyoruz. Yine çok fazla karşılaştığımız *hiç, gûyâ, henüz, şimdi, yine, dahi, gâyet, lâkin, maa'da, ammâ, çün, çünki* gibi kelimelerin de aynı kategoride değerlendirilmesi gerektiğini düşünüyoruz. Bunların yanısıra *hadd-ı zâtında, hadd-ı nefsinde* tâbirlerini de cümle başı edâtı olarak kullandığını görüyoruz. Bunlardan başka; o günlerde çok kullanılan bazı âyet, hadis ve kelâm-ı kibarların kullanıldığı cümlelerden sonra *muktezâsınca, fehvâsınca, hükmünce, gerezince* gibi cümle bağlayıcıları olarak isimlendirebileceğimiz bağlaçlar da kullanmıştır. Bunun da geleneğe uygun olduğunu düşünüyoruz.

Ahdî'nin devrin şâirleri hakkındaki kanaatleri genellikle müsbettir. Şâir eğer genç ya da bu vâdide yeni ise veya Ahdî o insanda bir kâbiliyyet görmüş ise o zaman *ümmîddür ki* ile başlayan cümlelerle başarılar temennisini görürüz. Bu tip cümlelerin bir hayli fazla olduğunu da belirtelim. Ayrıca bu hususta Kütahyalı Rahîmî Bey'in iki beytini örnek olarak verdikten sonra söylediği şu sözler, Ahdî'nin kanaatlarını göstermesi açısından kayda değerdir:

Eş'âr-ı mütekaddiminde bunuñ gibi nesneyi câ'iz görmüşlerdür. Bu gazel-i pür-mesel ol şâir-i bî-bedelüñdür.

Yine bu meyanda söylememiz gereken bir husus da şudur: Ahdî'nin şâir seçiminde titiz bir ölçüsü yoktur. Şiirle az çok uğraşan şahısları eserine almıştır. Bunlar arasında değişik meslek erbabları da vardır. Bilhassa tezkirenin son tertibinde Bağdat ve çevresinden çok sayıda şâir eserinde yer almıştır. Bunda Ahdî'nin esere yöneltilecek tenkitleri göz önüne alması da söz konusu olabilir. Çünkü tezkirenin hatimesinde yer alan özür beyanı bize bu konuda bir fikir vermektedir.

Bir yazar için en zor ifade tarzı menfî (olumsuz) olanı anlatmaktır. Ahdî, bir iki şâirde kullandığı bu ifade tarzını zorlanmadan, ustaca ifade etmiştir. Ahdî, menfî kanaatlerini herkesin menfiliğini ittifakla kabul ettiği şahsiyetler üzerinde yapmıştır. Bu yüzden ifadesinde bir kendinden eminlik söz konusudur. Galatalı Sıyâmî için söylediklerini aşağıya alıyoruz. Burada Ahdî kendine bir mesned de bulmuştur :

...tabi'at-ı şî'riyyesi bir mertebede su gibi cârî vü revândur ki bir gicede beş yüz beyt dimege kâdirdür zîrâ ki sâir erbâb-ı nazm gibi ma'âni bulmaga mukayyed degüldür ve ekser-i şî'ri bî-mânâ vâkî' olmuşdur. Ahyânen eger bir beytde ma'nâ bulunsa hiç şüphe vü şâibe yok ki gayri kimseden çalmışdur. Niteki hakkında bir kıt'a-ı rengin mânend-i dürr-i simîn Sadri dimişdür. Kıt'a

*Şâ'irüm diyü alursuñ biregü ma'nîlerin
Be Sıyâmî niye ki nef'i bu nakkâlligüñ*

*Çeşm-i tâtârını vâsf eylemeden cânânüñ
Yeg idi saña göreydüñ yine remmâlligüñ*

Nevâlî Çelebi'de de benzer bir ifâde vardır. Erbâb-ı hasedin Nevâlî Çelebi hakkında söyledikleri tevârüd iddialarını dile getirdikten sonra, Nevâlî Çelebi'nin ne yaptığını yani

nasıl bir tevarüd yaptığını söyler ve sonunda *ümmîd budur ki ol fâzıl-ı cihân 'ankaribü'z-zamân şiir şu'arâ-yı suhen-perver gibi kişver-i nazmda hüner-güster ü dilâver-i bahr ü berr olup erbâb-ı hussâd-ı bed-nihâddan âzâd ola ma'ânî hisârın feth ü fütûh ide veyâhud böyle şi'r dimesden tevbe-i nâsûh eyleye* biçiminde iyi dilek ve temennilerle bitirir.

Ahdî, bu tip dilek ve temennilerin dışında, Hınnalızâde Ali Efendi'nin yazdığı bir şiire yönelik bir tenkitte de bulunmuştur. Bunu şu ifadelerle dile getirmiştir: Râkım-ı hurûfuñ i'ti-kadı budur ki eger mısra'-ı evvel böyle okunsa evlâ idi.

Din mî bered zi halk be âşûb u kîn heme

Yine bu hususta Tab'î Efendi'nin Gelibolulu Za'îfî'nin bir beytine yazdığı bir nazireyi beğendiğini şu cümlelerle dile getirmiştir: Gelibolıdan olan Za'îfî Beg bu matla'ına ki dimişdür

Kıble yiter kûy-i dildârum baña
Saña ey Ka'be ırakdan merhabâ

Çok kimseler cevâb dimişlerdür feemmâ sâbıkü'z-zikr a'lâ intikâl itmişlerdür budur sâkî-i sîm sık vasfında tâkdür ki

Bâde yiter la'l-i dildârum baña
Saña ey sâkî ırakdan merhabâ

Metinde, bazı kelimelerin imlâsında **ikili şekiller** vardır: dag/ tag, dursun/ tursun, yoksa /yohsa, akşam /ahşam gibi.

İsimden isim yapım eki olan **-lık** ekinin zaman zaman büyük ünlü uyumuna uymadığını görüyoruz: sipâhilik gibi.

Diğer taraftan bazı kelimelerin orta hecelerinde **ünlü** (vokal) **düşmesi** görülmektedir: anuñçün, anuñla, üzre, burda gibi.

Belirtme durumu (akkuzativ) eki, üçüncü şahıs iyelik ekinden sonra **-n-** ile belirtilmektedir: evsâfın, keyfîyyet-i hâlin, eş'ârın gibi.

Şahıs ve işaret zamirlerinde üçüncü teklik kişi **o, ol** biçimindedir. Tek başına kullanıldığı zaman ol olan bu kelime çekime girdiğinde a biçimine girmektedir. Çokluk eki olarak da Türkçe kelimelerde **-lar/-ler** kullanılmaktadır. Bu ekin saygı ve nezaket için de kullanıldığını belirtelim: mahlas-ı hümayûnları, mahlas-ı hâlisleri, kendüleri, hasb-i hâlleri, ferzend-i ercmenleri gibi.

Ahdî, geleneğe uygun olarak, hiç bir zaman *ben* demez. Bunun yerine *râkım-ı hurûf, râkım-ı hurûf-ı tezkire, bu bende-i nâçiz, bu fakîr derviş* gibi tevazulu ifadeler kullanır.

Ahdî, şahıs ve yer tavsiflerinde *a'ni* ve *ya'ni* kelimelerini çok kullanmıştır. Tavsif için önce söylediklerini bu kelimeleri kullandıktan sonra açıklama cihetine gitmiştir.

Ahdî, bir kişi ile uzun süre beraber olduğunu veya bir kişinin herhangi bir konu üzerinde çok çalıştığını, bir yerde uzun zaman kaldığını *müddet-i medîd ve ahd-i ba'id* kelimeleriyle ifade etmektedir; müddet-i medîd yerine *amedd-i medîd* kullandığı da olmuştur. Bu ifade tarzında kesinlikle gün, hafta, ay ya da yıl gibi bir zaman sınırlaması yoktur. Bizce bu kelimeler, çokluğu ifade etmek için kullanılmıştır.

Ahdî tezkiresinde çok geçen tabirlerden biri de ârâste ve pirâste kelimeleridir. Bu kelimeler zaman zaman sıfat, zaman zaman da hüküm bildiren yüklem (predikat) olarak kullanılmıştır. Mukaddime'den:

... *ravza-i dârü's-selâm Bagdâduñ gül gibi reng ü bûy-ı hüsn-i cemâl ile ırîste nev-civânlarına ve enva'-ı fazl u kemâl ile pirâste olan pîrân-ı nâtüvânlarına ...* (sıfat) Nişânî Beg: *Eben 'an ceddin ahlâk-ı pesendide ile ârâste ve hilye-i zât-ı şerîfleri evsâf-ı hamîde ile pirâste...* (yüklem)

Şâirler hakkında hüküm verirken Ahdî'nin kullandığı bir kelime grubu da *ma'rûf* ve *mevsûf* tur. Ayrıca *meşhûr* ve *makbûl* kelimeleri de sıkça karşılaşılan kelimelerdendir.

Ahdî'nin biyografilerde tekrar ettiği bir kelime grubu da *bî-hadd ü lı-yu'ad* dır. Genellikle şâirin şiirinin veya diğer hünelerinin çokluğunu belirtmek bu tabir kullanılmıştır. Gülşen-i Şu'arâ'da tekrar edilen bir diğer kelime de *bir şeyden hâlî olmamak* tır.

Ahdî, anlatımda monotonluğu önlemek amacıyla Osmanlı Türkçe- si'nin imkanlarından faydalanmıştır. Meselâ, bazı şâirlerde *evsâfin gûş itdigümüz* derken bazılarında gûş etmek yerine *işitdigümüz* kelimesini kullanır. Bu özellik, bilhassa, örnek şiire geçilirken kullanılan cümlelerde daha fazla görülmektedir. Yalnız burada nüshalar arasında farklılığın çok fazla olduğu ve bunun müstensihlerin tercihi olabileceği de göz önüne alınmalıdır. Bu cümleleri şöyle sıralayabiliriz: *sebt olundu (oldı), ketb olundu, nakş u nigâr olundu, mestûr olundu, takrir ü tahrir olundu (olur)...* Örnek verme cümleleri bütün şâirlerde yoktur. Yine bu minvalde şâirin doğum yeri belirtilirken kullanılan *mevlid* ve *neşv ü nemâ* tâbirleri de kullanılmıştır.

Ahdî, tezkirecilik daha doğrusu 16. yüzyılın nesir geleneğine uygun olarak, bazı âyet, hadis, kelâm-ı kibar ve atasözlerini iktibas biçiminde eserinde kullanmıştır. Bunu geleneğe uymanın yanısıra kendi sözlerine bir mesned teşkil etmesi açısından da değerlendirmek gerekir.

Tezkirede cümleler, şâirin sosyal statüsü ile ilgili olarak, uzunluk kısalık bakımından değişiklikler gösterir. Aynı biyografi içerisinde uzun ve kısa cümleleri yanyana görmek mümkündür. Bazı biyografilerde çeşitli bağlaçlar ve zarf-fiillerle birbirine bağlanmış bir kaç cümleyi birarada görebiliyoruz. Edirneli Emrî ve Mevlânâ Ahmed Harirî'den aldığımız şu örnekler bunu göstermesi bakımından önemlidir:

Emrî: Edirnevîdür. *Lutf-ı tab' ve safâ-yı zihn ile mevsûf ve fûnûn-ı mu'ammâda mahâretle Mir Hüseyinî gibi ma'rûf ve kemâl-i tahayyûlat birle Şeyh Kemâl Hucendî ve mazmûn-ı belîgat-meşhûn ile Dervîş-i Dehkî ve hüsn-i edâ-yı dil-efrûz ile Hasan-ı Dehlevî ve ma'nâ-yı dakîk-i pür-sûz ile Rûmuñ Hüsrevî-i Kendi...*

Mevlânâ Ahmed Harirî: *Turuk-ı tarîkati ma'rifete iletüp ve kemâl-i hakikati şeri'ate ırgürüp güzide-i 'ulemâ-yı 'izâm ve pesendide-i hükemâ-yı zevi'l-ihirâm kâşif-i hakâyık-ı müşkiât-ı ma'âni a'ni Mevlânâ Efdâl-i Isfahânî hizmetlerinden esâlib-i 'ulûmı kemâhüve hakkıha görüp mütâla'a-i rasihe hâsıl idüp âsân-sâz-ı her müşkil ve mantık u kelâmı sâhib-edâ ve nikât-ı hey'et ü hendesede bî-hemtâ ve remz ü imâ-ı mu'ammâda bî-karîne-i devrân ve 'aruz ü kâfiyede makbûl-i yârân-ı suhendân ve ma'âni-i mübhemi kasaid-i mütekaddimini fîkr itmede dûr-bîn ve âvâz-ı hazîn ile tahrîr-i dil-peziîrî âteş-endâz-ı dil-i gamgîn ve tab'-ı bülend-i dil-pesendi üç zebân ile nazma mâvil ve hallâl-ı mesâil-i erbâb-ı dildür. Ebyât-ı muhakkikâne-i 'âşikâne dimeden bigâne degüldür.*

Bu konuda Ahdî'nin her iki şâirle de görüşüğünü eklememiz gerekir. Çünkü nâmını işittiği şâirlerde cümleler yukarıdakilere göre daha kısadır. Meselâ Usûlî hakkında söylediklerine bir göz atalım:

Vardar Yeñicesindendür. Evsâf-ı hamîdesin gûş itdigümüz şu'arıdandır. Dervîş-sıfat ve âdemî-hıkat ve sûret-i zâhirde tahsil-i ma'rifet-i cüz'î vü küllî tahsil itmiş ve zihn-i pâkinde kâbiliyyet eseri olduğu ecilden Mısırda Şeyh İbrâhim Gülşenî hazretlerinin hizmetine vâsıl olup hankâh-ı şerîflerinde defe'at ile erbâin çıkarup tasfiye-i bâtın kılmuşlar. Âhir Rûma avdet idüp geldüğünde kendü şehrinde tavattun itmişler...

Vasfını işittiği şâirlerde hemen hemen bu ifade tarzı hâkimdir ve genelde cümleler kısadır. Görüştüm dediği şâirlerde ise cümleler hem uzun hem de, daha çok, övgü mâhiyetindedir. Bunu yazarın bilgi kaynak- larının fazlalığına bağlayabiliriz.

Ahdî, yüklemi bakımından cümle konusunda isim ve fiil cümlelerinin her ikisini de kullanmıştır. Fiil cümlelerinde, genellikle, yardımcı fiillerle kurulmuş cümleler göze çarpmaktadır. Ânî Efendi'nin biyografisini bu yönden inceleyelim:

Bursalı'dur (İsim cümlesi)

Kuzât-ı 'ızâm ve vâli-i fihum zümresinden re'y ü tedbîr ile sâhib-'adl ü dâd ve asl ü neseble âli-nijid Zîrek-zâde dimekle ma'rûf ve evsâf-ı hamîde ile mevsûf zât-ı latîfî kemâl-i ma'rifetle ârâste ve zihn-i mustakîmi fehm ü firâsetle pirâste ve kütüb-i mütedâvilede mütâla'a-i pâki dil-pezîr ve zebân-ı fûrsüñ durûb-i emsâli zabtında bî-nazîr ve sanayî-i şî'rden habîr ve mu'ammâ ve 'aruz ü kâfiye bilmede dilîr ve hâtır-ı deryâ-mü'essiri nazm ü nesr cânibine mâyl ve her birinde gereği gibi kâmil ve tevsen-i tab'ı vâdî-i şî'rde cüst ü çılık ve eş'âr-ı 'âşıkinesi sûznâk ve güftâr-ı rindânesi 'uyûbdan pâk ve ser-â-ser hasb-i hâl-i derdnâk vâkı' olmuşdur. (Bağlaçlar ve secilerle yardımcı fiille oluşmuş bir fiil cümlesine bağlanmış isim cümleleri). Cümlesinden bu gazel-i pür-mesel ol yâr-ı bî-bedelüñdür (İsim cümlesi). Kalem-i anber-bîzle nakş u nigâr oldu (Yardımcı fiille oluşmuş fiil cümlesi).

Gülşen-i Şu'arâ'da cümleler yapı bakımından da değişiklikler gösterir.

Beligî: *Dergâh-ı mu'allâ yeñiçerilerindendir* gibi basit cümlelerin yanında, mukaddimeden aldığımız şu cümlede olduğu gibi ara cümle de kullanmıştır. Buna ki' li birleşik cümle de denilebilir: ...*Hicret-i Nebevîñ sene sittin ve tis 'amî'esinde 'azm-i diyâr-ı Rûm ve cezm-i safâ-yı her merzbûm kılup bir yâr-ı zarîf ve bir şâ'ir-i latîf ile ki mahlas-ı şerîfî remz ü imâ ile bu matla'dan serv-i sehi gibi neşv ü nemâ bulup sâye-güster ve kübk-i hırâmân gibi cilvege olmuşdur li-mü'ellifihi mu'ammâ be-Hüsrev*

*Çeşm-i giryânda hayâl-i kaddüñ ey serverân
Serv bitmiş arasında çü misâlidür hemân*

refîk-ı şefîk olup..."

Bu konuda ikinci örneğimiz Nişânî Bey'in biyografisinden : *Ol zât-ı bî-nazîr âhirü'l-emr hüsn-i ihtiyârıyla ol umûr-ı hatîreden ferâgat eyleyüp evkât-ı bâ-berekâtın takvâ vü tahâretle ta'at-ı Rabbinî ve ibidit-ı Yezdîniye ki maksûd-ı icid-ı sakaleyn ve âferiniş-i evveldür di'imü'd-dehr sarf itmek üzredür. Tesâñif-i mensûrları bî-hadd ve te'lif-i manzûmları lâ-yu'addur. Cümlesinden bir gazel-i 'âşıkâne ile bir kaç matla'-ı rindâne ki vird-i zebân-ı bûlbûlân-ı hoş-gû ve semenberân-ı dil-cû ve gül-ızârın-ı hoş-bûdur sebt olundu.*

Ahdî, bugün şartlı birleşik cümle dediğimiz cümle türünü de kullanmaktadır. Emrî'den aldığımız şu cümle bunu göstermektedir : *Hakkâ budur ki eger Rûm'a tarz-ı mu'ammâyı kü-şâyış virmese kimse tahsil ü tekmiî idüp ol fende ad çıkarmaz idi ve her bir mu'ammâsıñuñ akdinde ve hallinde 'akl-ı 'ukde-küşâ agız açamaz...*

Ahdî, sözdizimi bakımından cümle konusunda bir iki yer haricinde kurallı cümleler kullanmıştır.

Ahdî'nin üslubu konusunda söylemek istediğimiz son sözler yine Ahdî'nin cümleleriyle olacaktır: *Ümmîd-i sâdik ve recâ-yı vâsık oldur ki bu gavvâs-ı deryâ-yı ma'rifetüñ ve bâb-ı şehir-i fazîletinde derbeder olan kem bizâ'etüñ bu resme Gülşen-i Şu'arâ ve Tezkire-i Erbâb-ı Vefâ olan hazef-pâre-i bî-bahâñuñ ser-geştân-ı vâdî-i ma'rifet ve kûşe-i nisyân şehir-i muhabbet ve sarrafın-ı bâzâr-ı güher ve cevheriyân-ı çarsû-yı ruh-perver nâm-ı dürer-bârıñuñ bir mikdârına ve nesr-i leâli-âsârıñuñ kelimât-ı perîşân-etvârına nâzâr oldukda sehv olan elfâzın iltifât-ı bî-nihâyet ve eltâf-ı bî-gâyetlerinden rakam-ı muslih ile ıslah idüp ashâb-ı halâsdan bulup kerem-i vâfirlerinden kalem-i 'afv çekeler.*

Şî'r : İltimâsum bu ki erbâb-ı salâh
Kıla lutf ile hatâsın ıslah

'Avn-i hakk ile bu nâme oldı
Nazm ü nesr ile çü dürr-i meknûn

Yaraşur gûşına dürr itse anuñ
'Ahdîyâ her birin erbâb-ı fûnûn

Hudâvendâ be-hakk-ı Âl-i Ahmed
Be-nûr-ı pâk-i ashâb-ı Muhammed

Be-dest-i herkesi kîn ravza-i oftend
'Aziz ü muhterem kon belki emced

Sonuç olarak diyebiliriz ki Gülşen-i Şu'arâ 16. yüzyılda yazılan diğer tezkireler gibi kendinden önce teşekkül etmiş olan biyografi geleneğine uygun biçimde yazılmıştır. Yazarının bugünkü Anadolu dışından olması, eserin Anadolu sahası dışına çıkarılması için bir sebep olamaz. Gerek dil ve üslubu gerek ihtiva ettiği şâirler, bu eserin Anadolu sahasında yazılmış bir eser olduğunun en bariz delilidir. Yüzyılın bundan önce yazılan diğer tezkirelerinden hiç bir farkı yoktur; farklı yanı sadece ihtiva ettiği şâirlerdir. Bunun da sebebi bu tip eserlerin müşterek bir medeniyete mensup insanlar tarafından, yine bu kültür ve medeniyetin insanlarını anlatmasıdır.

D- GÜLŞEN-İ ŞU'ARÂ'NIN KAYNAKLARI

Çeşitli tezkirelerden elde edilen bilgilere göre bir tezkire yazarı böyle bir biyografiyi hazırlarken; daha önce bu sahada yazılmış olan tezkirelerden, tezkire dışında kalan mecmua, risale ve değişik meslek alanlarını içine alan diğer tezkire türleri ile şiirlerin kendi eserleri ve şiirle ilgili duyduklarından faydalanmaktadır.

Ahdî eserini yazarken hangi kaynaklardan yararlandığını belirtme- miştir. Ancak, eserin mukaddimesinde şehzade Selim'in yanına giderken şiirden daha güzel bir hediye götürüle-yeceğini söyledikten sonra şu bilgileri vermektedir: *ol vilâyete 'azîmet kıldukda hâtır-ı pür-fütûre bu lâyh ü fâyh oldı ki selâtin-i 'ızâmuñ ve 'ulemâ-yı fihâmuñ ve sâhib-devletân-ı hûb-cemâlûñ ve 'ıyş u nûş itdüğüm şîrîn-makâlûñ ve hıdmetlerine irişüp sohbetlerinden müstefid olan kimesnelerden evsıf-ı hamîdesin gûş kıldugum nigû-hısâlûñ memhâ-emken tettebbu'-ı ahvâl idüp dört ravza tarîkı ile 'alâ-kadri't-tâke bu bir nîce perişân evrâka cem' kılup* **TEZKİRE-İ ERBÂB-I SAFÂ** a'ni **GÜLŞEN-İ ŞU'ARÂ** diyü nâm virildi.

Ahdî, eserinde, yeri geldikçe, kaynakları hakkında bize bilgi vermektedir. Bu vesileyle bazı şâirlerle konuştuğunu, onların eserlerini tettebbu' ettiğini, bazılarında ise aralarında hukuk-ı sâbika bulunduğunu kaydetmiştir. Bir kısım şâirlerde ise evsâfin gûş itdigümüz şu'arâ'dandır biçiminde çok genel bir ifade kullanmıştır. Bu bilgileri kimden ve nereden aldığını söylememiştir. Bir kaç şâirde başka bilgiler vermektedir; bazıları ile mektuplaşmış, bazılarının yakınlarından birinden bazı bilgiler almıştır. Bazılarında ise aralarında dostluğun kardeşlik (uhuvvet) mertebesine vardığını söylemektedir (Ref'î Çelebi). Bu şâirlerden şiirlerini istediğinde, bu şâirlerin şiirlerini kendilerinin seçip verdiğini belirtmektedir (Emânî, Tarikî). Emânî'de geçen örneği aşağıda veriyoruz:

Mahfî olmaya ki râkım-ı hurûf kendülerinden eşâr-ı dürer-bârların taleb-kâr olduklarında mezkûruñ bu matla'ı hayli i'tikâdı olup cem'-i eş'ârından ihtiyâr idüp virmişlerdi. Nezâket-i tab'ları bu matla'uñ rekâketinden rûşen ü mübeyyendür. Sâbikan diyâr-ı Rûm'da ba'zı şu'arı buña beñzer edâyı câiz görmişlerdür.

a-Görüştüğü şâirler: Bu maddede önce şâirin adı veya mahlası, sonra da eğer görüştüğü yeri belirtmişse, bu yer parantez içinde verilecektir:

Pîrî Paşa (Adana), Temerrüd Ali Paşa (Sivas), Pervîz Efendi, Sürûrî Efendi, Rızâyî Efendi, (Dimetoka, Edirne ve İstanbul) , Emrî Çelebi (Edirne ve Bağdat), Emânî, Behiştî

(İstanbul), Cüdâyî, Hamdî-i Bursevî (Bağdat), Hâtemî Beg (Edirne ve İstanbul), Sâmi, Rûhî Çelebi (Bağdat), Ref'î Çelebi, Tufeylî (Bağdat), Tarzî (Bağdat), Tarikî (Bağdat), 'İzârî Çelebi (Edirne ve İstanbul), 'Adnî (Bağdat), 'Ârifî, Fânî (Bağdat), Lutfî-i 'Acem (Bağdat), Mecdî (İstanbul ve Bursa), Mahfî (İstanbul ve Bursa), Nev'î Çelebi (Edirne ve İstanbul), Vâlihî Çelebi (Edirne ve İstanbul), Visâlî Çelebi (Edirne ve İstanbul).

Ahdî bu şâirlerle nasıl görüşüğünü de anlatır; bir kaç örneği buraya alıyoruz: Temerrüd Ali Paşa: *Sabıkan diyâr-ı Bagdâd'dan münfasıl oldukda bu bende-i fakîr ol yâr-ı bî-nazîr ile Sivasa gelüp müddet-i medîd hizmetlerinde olup... Rızâyî Efendi :...bu bende-i sergeşte ekser-i evkat Dimetoka ve İstanbul ve Bursada hâk-i pâ-yî şerîfleri ile müşerref olup dürlü dürlü istifâde idüp nazm-ı dürer-bârların gûş-ı hûşe gûşvâr kılmışdur. Emrî Çelebi: Râkım-ı hurûf Edirne ve İstanbul'da hizmetlerine mülâkat idüp sohbet-i hâsları ile merreten ba'de uhrâ müşerref olmak müyesser olmuşdur. Mecdî'de ise görüşmenin ötesinde bir yıl mikdârı evinde kaldığından bahsetmektedir: Râkım-ı hurûf Edirne'de bir yıl mikdârı sa'âdet-hânesinde mütemekkin olmuşdur ve İstanbul ve Bursada defe'ât ile mülâkat idüp ekser-i zamân 'alâ rugm-i zamânihi yârâne hemdem ü hem-hâne olmuşdur. Hamdî-i Bursevî: âhirü'l-emr seyr ü sefer iderek diyâr-ı Bagdâd'a gelüp yârân-ı safâ ile ve mü'ellif-i tezkire ile musâhabet idüp keyfiyyet-i hulinden âgâh olundu.*

Yukarıdaki örneklerin dışında İstanbullu Sıhrî hakkında söyledikleri de şirin tezkireye alınma sebebini göstermesi bakımından ilgi çekicidir:

Ümenâ tâifesinden iken sâbıkan diyâr-ı Haleb'de töhmed-i 'azîme ve bir zâlimün zulmüne mukârin düşüp sâf ü bak mâmelekin terâş itmiş. Ol sebeble huzûzât-ı nefsanîden müberrâ ve tekazâ-yı nefsi zâlimden mu'arrâ olmuş. Hikmet bu ki ol rind-i cihân u pür-hurde-dân yine rûz u şeb şevk-i cevânân-ı bî-misâl ve taklîd-i ehl-i hâl itmeden hâlî degüldür. Ve ol vak'a vâkı' oldukda gerdiş-i devr-i gaddârûn ve âyin-i cevri çarh-ı sitem-kârûn kahrından terk-i kayd-ı dünyevî idüp sermâye-i devlet-i uhrevî için tecrîd tarîkı ile âsitân-ı 'âlîşân ve ravza-i kuds-âşiyân-ı Hazret-i Gülşenî'ye kuddise sirruhu yüz sürüp tasfiye-i bâtın itmegi arzu kılmış. Âhir yine seyr ü sülûk ile diyâr-ı Rûm'a gelüp her an erbâb-ı 'ulûma elünden geldiği hizmeti dirîg itmez ve hemîşe mülizemet-i cevânân-ı hûb-sûreti eksük komaz. Anuñ için râkım-ı hurûf-ı tezkîre anları hâdim-i şu'arâ ve zürefâ lakâbıyla mülakkab itmişdür. Erbâb-ı safâ içre bu nâm ile ma'rûf ve hizmet-i nüdemâda lutf ile mevsûfdur.

Tufeylî'den aldığımız örnek ise müellifin şâirle irtibatı bakımından ilgi çekici bir örnektir: *Sene elfde Bagdâd Beglerbegisi Hızır Paşa ile Bagdâda gelüp yârân-ı safâ ve şu'arâ-yı hûb-edâya mülâkât-ı ferhunde sa'ât müyesser ü mukadder oldukda mü'ellif-i tezkire ile meveddet ü muhabbeti sâdık üzre musâhabeti küllî olup mezkûruñ zihni mustakîm ve tab'-ı selîme kâdir ve fûnûnda mâhir olduğundan gayri 'Acem ü Rum üslûbında a'lâ muferrik cildler peydâ idüp ve tarz-ı vassâllükde bî-hemtâ ve hoş hat kıt'alara rengîn hâşiyeler idici üstâd-ı a'lâ olup ve kendü tasnifinde muhterî'-i zamân ve nahl-bende-i mübdi'-i cihândur.*

Ahdî'nin kaynaklarını tesbit açısından Rum İli'nden Tarîkî'de verilen bilgiler de dikkat çekicidir: Bu gazel mü'ellif-i tezkire ile esnâ-yı musâhabetinde ihtiyâr idüp her birimiz bir gazel-i dürer-bâr bu evrakda nakş u nigâr idüp tahrîr olundu.

b-Vasfını İşıttığı Şâirler : Bu bölümdeki şâirler, genellikle, evsâfın ışıttığımız şu'arâdandır biçiminde bir ifadeyle anlatılmıştır. Fakat kimden duyulduğu asla belirtilmemiştir. Bu bilgileri bilhassa görüştüğü şâirlerden, başka tezkirelerden veya diğer biyografi kaynakları ile edebî mahfellerden aldığımızı düşünüyoruz. Vasıfları ışıtilen şâirler şunlardır:

Usûlî, Enverî, Hâfız, Hayretî, Hüsâm Beg, Hısâlî, Riyâzî-i Üskübî, Sıhrî-i Üskübî, Sâfî, Sarfî, Za'ifî, Kudî, Meşrebî, Mu'idî, Hilâlî ve Yetim Alî Çelebi. Bu şâirler hakkında söylenenlerden üç örneği buraya alıyoruz:

Hayretî: *Ehl-i timâr tâifesinden evsâfın ışıttığımız şu'arâdandır. Hâfız: Âvâzesi hoş-nevâsın ve eş'arı dil-küşâsın görüp ışıttığımız şu'arâdandır. Hısâlî: ...nisf-ı evsâfın gûş itdigümüz şu'arâdan ve manzûmâtın gördüğümüz fusahâdandır.*

Ahdî, bunlardan başka Ülfetî, ‘Ârif Çelebi ve Gafûrî Çelebi adlı şâirlerin hakkında bilgiyi başka birilerinden aldığını söylüyor.

Ülfetî: *Mukaddemâ Bagdâd Beglerbegisi olan Ferhad Paşa’nun oğlu Mehemed Paşa’nun kethüdâsı Behrâm Kethüdâ ile küllî ülfeti olmanın anlardan keyfiyyet-i ahvâline muttali’ olup yazıldı. ‘Ârif Çelebi : Sene tis’a ve semânin ve tis’ami’ede ferzend-i ercmendleri ‘Ârif-zâde dimekle iştiâr bulan Mustafâ Çavuş sâhib-hoş-emr sultân-ı cihân metâ’-ı Sultân Murâd ile Bagdâd’a gelüp hizmetlerine müşerref oldukda vâlid-i erşedlerinüñ nazmın istima’ idüp bu tezkireye yazılmasına tâlib oldu. Bu bende dahi tahrîr olunmasını münâsib gördi. Gafûrî Çelebi: Sene ihdâ ve tis’in ve tis’ami’enüñ Muharreminde emr-i Sultân Murâd Hân ile ferzend-i dil-bendi ve a’yân u erkânüñ dil-pesendi sâhib-’akl u hoş fakîh Mehemed Çavuş diyâr-ı Bagdâda gelüp bu bende-i nâşâd ile mülâkat idüp evsâf-ı vâlid-i büzürgvârların zebân-ı fesâhatü’l-beyânından ısga kıldum.*

Bu ifadelere benzemese bile Dellâk-zâde Bâkî’de geçen şu ifade tarzı bilginin ikinci elden alındığını göstermesi bakımından önemlidir: *Bu matla’ u beyt anuñdur dirler yazıldı.*

c- Ahdî’yle Mektuplaşan Şâirler:

Ahdî, iki şiirle mektuplaştığını ve haklarında söylediği bilgileri ve şiirlerini kendilerinden aldığı mektuplardan elde ettiğini tarihleri ile birlikte bildirmektedir:

Ahmed Paşa (Na’tî): *Musâhabet-i yârâna râgıbdur ki fevîd-i ‘ulûmdan ve kavâid-i manzûmdan behrever ve esâlib-i inşâdan bâ-haber tab’-ı latîfi savb-ı şi’re âşinâ ve zihn-i derrâki dürretü’n-nazma ve lisân-ı selâsede nazma mâyl eş’âra kâmil ve semt-i gazelde dili kâyl ve peyrev-i merdüm-i efâzıl ve sene hamse ve tis’in ve tis’ami’ede diyâr-ı Bagdâd’a bu bende-i nâ-şâde bir mektûb-ı dürer-bâr ile bu gazel-i âbdârları gelüp tezkîre-i erbâb-ı nazma nakş u nigâr oldu.*

Murâdî-i Bagdâdî: *Sabıkan seb’in tis’amiede bir mektub-ı muhabbet-efzûn bu diyâr-ı gurbetde cigeri pür-hûn ve kûşe-i bî-tûşede diger-gûn olan bende-i mahzûne irsâl kılmış.*

Ahdî’nin kaynakları şüphesiz bu kadar değildir. Kendinden önce yazılmış tezkireleri görmemiş, hatta incelememiş olması düşünülemez. Bilakis mesela Latîfi tezkiresini gördüğünü, fakat beğenilmediğini eserinde belirtmektedir: *Kastamonıdan ehl-i kalemden üslûb-ı inşâda kendü re’yi ile bî-misl ü bî-hemtâ olduğün mukaddemâ tezkire-i şu’arâ yazmışdur. Lakin pesend-i zurefâ ve makbûl-i fuzalâ olmamışdur zîrâ ki çok yirde ta’assub itmişdür.* Verdikleri biyografik bilgiler Latîfi ile örtüşmese bile, verilen örneklerden bazılarının benzeşmesi (mesela, Basîrî’den şu iki beyit,

‘Âşıklarını âh o Mesihâ-dem öldürür
Bu âdem öldürür ki Mesih âdem oldurur

Gerçi kim dirler cihânda ‘ârife bir gül yeter
‘Ârife bir gül yeterse baña yarım gül yeter¹⁹

Enverî’den iki beyit,

Zülfûnle hatın ilm-i vefâ bahsin ider hep
Biri kara câhil birisi cehl-i mürekkep

İki destüm tolı mey destümi sındurma benüm
Tutalum iki elüm kanda imiş kanı kerem²⁰

¹⁹ Latîfi’nin beyitleri için bkz. Mustafa İsen, **Latîfi Tezkiresi**, Ank. 1990, s.128

²⁰ Mustafa İsen, a.g.e., s 161-162

Fevrî'den bir beyit,

Emvâc-ı kulzüm-i 'ışk bu nüh-kıbâbe sığmaz
Ehl-i dile ne mahfî deryâ habâbe sığmaz²¹

Firâkî'den üç beyit;

Gülşeninde 'âlemüñ bu sırra irmez hîç kes
Zağlar ızıde vü bülbül giriftâr-ı kafes

Kanlu yaşum dem-be-dem deryâ gibi eyler hurûş
Bilmezem kandan gelür ya Rab bu kanlu hurûş

'İşk pul pul dağ ile zeyn itdi 'üryân sînemi
Oldum İbrâhim-i Edhemdem Firâkî hırka-pûş²²)

Latîfî'yi gördüğünün delili sayılabilir.

Kendisinden önce yazıldığı bilinen Taşköprüzâde Ebulhayr İsamüddin Ahmed'in Şakayık(yazılışı 1558)'ını görüp görmediği hususunda ise hiç bir ipucu yoktur. Fakat Şakayık mütercimi Mecdî Efendi ile görüştüğü hatta evinde bir yıl kaldığı göz önüne alınırsa, adı geçen eseri görmemiş olması çok uzak bir ihtimaldir.

Müellifin kaynak belirtmemesi yüzünden tam olarak hangi kaynaklardan faydalandığını tespit etmek mümkün olamadı.

²¹ Mustafa İsen, a. g. e. s.175

²² Mustafa İsen a.g.e. s. 179

II. BÖLÜM (METİN)

GÜLŞEN-İ ŞU'ARÂ

Bismillahirrahmanirrahîm
Hest reh-i râst be-bâg-ı na'îm²³

Râh-ı cinân olduğına bes bu dâl
K'oldı anun her elifi bir nihâl

Sıdk ile her kim ki gire ol yola
Hâdî-i menzil gele maksûd ola

Sâlik-i râh-ı hak olana yiter
Cezm ile noktaları zâd-ı sefer

Şükr ü sipâs ol sâni-i bî-çûne ki ketm-i sahrâ-yı 'ademden mükevvenâtı nâ-bûd iken
şehristân-ı vücûda getürdi. Beyt li-mü'ellifihi:

Sâni'î kîn heme sun' ez kerem-i himmet-i ûst
Şekl-i matbu'-ı cihân ez kalem-i kudret-i ûst²⁴

ve hamd-i bî-kıyâs ol Hâdî-i râh-nümûna ki râh-ı Bismillâh ile râh-nümâ olup kâfile-i
mevcûdâtı menzil-i maksûda ırgürdi. Li-mü'ellifihi

Râh-ı bî-havf u hatar ez eser-i rahmet-i ûst
Tûşe-i râh-ı neverdân semer-i hikmet-i ûst²⁵

Tahmîd-i nâ-ma'dûd ol kâdir-i bî-zevâle ki cism-i insâne gün gibi ünsiyyet-i rûh ile merâtib-
i 'ulyâ virdi. Beyt li-mü'ellifihi :

Rûh ile kıldı müşerref ten-i hâki revân
Anun içün kamudan oldı mükerrem insân

ve mehâmid ü nâ-mahdûd ol hakîm-i hikmet-âyîne ki künc-i târîk içre cehl ile tîre olan dilleri
envâr-ı kelâm-ı belâgat-meşhûn ve nazm-ı selâset-nümûnun nûr u ziyâsı ile musaffâ vü
mücellâ kıldı. Matla' :

İtdi mir'at-ı dili gün gibi nazm ile 'ıyân
Hamdinün binde birin ider isen n'ola beyân

²³ Besmele nimet verilen bahçeye giden doğru yoldur.

²⁴ Öyle bir yaratıcı ki bütün bu yarattıkları onun himmet keremiyledir. Dünyanın güzel şekli onun kudret kalemiyledir.

²⁵ Korkusuz ve tehlikesiz (emin) yol onun rahmetinin eseriyledir . Yolcuların azığı onun hikmet meyvesidir.

ve minnet-i bî-'add ol dâna-yı bî-hemtâya ki çâr 'unsûrdan ten-i za'ifi tûvâna ve anunla cân-ı âdemi peydâ idüp ve ademe **alleme'l-esmâ i küllehâ**²⁶ ile dâna itdi Mısra'

Benâm-ı hudâvend-i cân-âferîn²⁷

ve sitâyîş-i bî-had ol mütekellim-i nutk-âferîne ki dehen-i teng içre dili kelime-i tayyibe-i tevhîd ile gûyâ ve tûtî-i şeker-hâ gibi hoş edâ kıldı. Mısra:

Hakîm-i suhen der-zebân âferîn²⁸

ve cevâhir-fevâid-i hamd ol Kird-gâr-ı geşt ü kâre ki sahîfe-i pür nigâr-ı sebze-zâre **fenzurü ilâ âsârı rahmetillah**²⁹ ile hikmetin izhâr itmege gayret-i gülzâr-ı huld-ı berîn olan gülistân-ı zemîn içre dıraht-ı huşki âb-ı rahmetle neşv ü nemâ ve çihre-i dil-küşâ ve reng ü bûy-ı zîbâ ve her bir şecerün envâ'-ı esmâın hayret-efzâ-yı çeşm-i sığâr u kibâr ve ibret-nümây-ı dîde-i 'ulû'l-ebşâr eyledi. Matla'

Bilmede zât-ı şerîfîn dil-i dâna hayrân
Göremez kudretini dîde-i sâhib-nazarân

Zevâhir-i fevâid-i manzûme-i dürûd ol hâlık-ı cân-bahş ve rûh-sitân-ı ma'bûde ki şiddet-i bâd-ı harîfden nebâtâte elvân-ı emrâz ile emvât-ı diğer-gûn-ı virmiş iken ve basît-ı arzı ihtirâklarından magbûn kılmışken Mısra' :

Keyfe yuhyi'l-arzı ba'de mevtehâ³⁰

mazmûniyla emvâc-ı bihâr-ı kudretin zuhûra getirüp besâtîn-i pür-reyâhin içre enhârı revân ve nesâyim-i eltâf-ı bihârı vezân kılup ü harekât-ı ferhunde-âyât ile hayât virdi. Kıt'a :

Gül gibi gülzâr-ı âlem hurrem olmazdı eger
İtmiyeydi terbiyet lutfi nesîmi bir nefes

Eyledi mihr-i 'atâsı âb-ı lutfi terbiyet
Tâze vü ter mîve vü güller bitürdi hâr ü has

Celbet-i celâl-i 'azîmete ve 'illet-i kemâl-i kudrete na't-ı Resul 'aleyhi's-selatü ve's-selâm nesâyim-i reyâhîn-i senâ ve şemâyim-i du'â ki 'ıkd-ı cevâhir-i merâm ve rabt-ı nevâdir-i kelâmdur. Ol şâh-beyt-i dîvân-ı ıstifâ ve matla'-ı kasîde-i mecmû'a-ı sıdk u safâ ve makta'-ı kitâb-ı mihr ü vefâ merkad-i münevver ve ravza-i mutahharına nisâr olmaga lâayık u sezâ-vârdur. Esâlib-i âyât-ı vahy-i intizâm-ı Furkan ve tarz-ı nazm-ı mu'ciz-nizâm-ı Kur'an ile min-'indillâh nâtk-ı sâdık olup ve zebân-ı hâlî fasâhat-beyân ile tûtî-i şekeristân-ı ene efsah³¹ ve

²⁶ - Allah Âdem'e bütün isimleri öğretti. Sonra onları önce meleklerle arz edip eğer sözünüzde sâdık iseniz, şunların isimlerini bana bildirin dedi. (Kur'an 2/31)

²⁷ - Canı yaratan Allah'ın adıyla.

²⁸ - Dil içinde söz (konuşma) yaratan Hakîm

²⁹ Allah'ın rahmetinin eserlerine bir bak (Kur'an 30/50)

³⁰ Arzı, ölümün ardından nasıl diriltiyor! (Kur'an 30/50)

³¹ En güzel konuşan benim . Hadis, El-Aclunî, **Keşfü'l-Hafa**, Daru İhyau't-Turas, Beyrut, 1351. C.I, s.200

lisân-ı makâli ‘uzûbet-i zebân ile bûlbûl-i gülistân ene emlah³² ve selâset-nâme-i kelâm-ı vemâ yentiku ‘anil hevâ³³ kirâmı inhüve illâ ve hayyün yuhyi³⁴ dūr. Mesnevi li-mü’ellifihi

Şeh-i dîn ü dünyâ habîb-i Hudâ
Ki elkâb-ı pâkeş bûd Mustafâ³⁵

Ruheş mazhar-ı nûr-ı Yezdân şode
Dileş mahzen-i genc-i Kur’an şode³⁶

Be zülfeş senâ-h^vân çü ve’l-leyl h^vâst
Delîl-i ruheş hest ve’ş-şems râst³⁷

Boved hâk-i dergâh-ı û çün behişt
Meh ü mihr zi-eyvân-ı kadreş dû hışt³⁸

Guseste zi-zülfeş yekî târ-ı mû
Mu’attar dimâg-ı cihân şod ez û³⁹

Benefşe koned z’ân ser-efgendegî
Ki û râ nümâyed perestendegî⁴⁰

Berû Hak çü bahşîd hulk-ı nikû
Şefî’-i heme mücrimân geşt û⁴¹

ve dahi hezârân hezâr tuhaf-ı tahiyyât-ı nâ-miyât ol hülâsa-i mevcûdâta ve hezerân hedâyâ-yı berekât-âyât-ı Rabbânî ve kelâm-ı mecîd-i Subhânî ve etbâk-ı nûr-ı Yezdânî ol eşref-i kâ’inâte ki sadr-nişîn-i suffe-i safâ ve gül-i hadîka-i vefâ ve kâfile-sâlâr-ı enbiyâ ve muktedâ-yı asfiyâ ve etkîyâdur. Fî Na’t-ı Resul ‘aleyhi’s-selâm

Rehber-i halk be-sûy-ı rahmet
Hâdî-i dîn ü şefî’-i ümmet⁴²

Hak be-levlâk be-kerdeş tahsîn
Zi âferineş garaz u bûd hemîn⁴³

Şân-ı û mazhar-ı kül âmede est
Hâtem-i hayl-i rüsûl âmede est⁴⁴

³² En güzel konuşan benim . Hadis, El-Aclunî, **Keşfü'l-Hafa**, Daru İhyâü't-Turas, Beyrut, 1351. C.I, s.200

³³ Arkadaşınız (Muhammed) sapmadı ve bâtıla inanmadı; O, arzusuna göre de konuşmaz (Kur'an 53/2-3)

³⁴ Arkadaşınız (Muhammed) sapmadı ve bâtıla inanmadı; O, arzusuna göre de konuşmaz (Kur'an 53/2-3)

³⁵ Dinin ve dünyanın şahı, Allah'ın sevgilisi ki onun temiz lakabı Mustafa'dır.

³⁶ Yüzü Allah'ın nuruna mazhar olmuştur, gönlü Kur'an hazinesine mahzen olmuştur.

³⁷ Saçıyla (zülfüyle) ve'l-leyl gibi (Allah'ı) övmeye başladı. Güneşe onun yüzü delildir (Saçı geceye, gündüze delildir).

³⁸ Onun dergahının toprağı cennet gibidir. Güneş ve ay onun yanında iki tuğla kadar bir değer taşır.

³⁹ Saçından bir tel koptu. Dünyanın dimağı onunla kokulandı.

⁴⁰ Menekşe ona tapınmak için başını eğer.

⁴¹ Hak ona iyi bir yaratılış bağışlayınca bütün günahkarlara şefaati oldu.

⁴² Halkı rahmete yönlendiren, dinin yol göstericisi ve ümmete şefaati edici

⁴³ Hak, onu levlak ile övdü. Yaratılıştan maksat oydu.

Beşer ez rütbe-i û pür-dûr est
K'âdemî ez gil ü û ez- nûr est ⁴⁵

Ahmed ez nâm-ı âhed şod müştak
Hak be û 'âşık ü û 'âşık-ı Hak ⁴⁶

Sallallahü 'aleyhi ve alâ âlihi ve ashâbihi ilâ yevmi'l-ba'si ve'l-cevâbi verzukenâ minhü's-şefâ'ate hînel-haşri ve'l-hisâb ⁴⁷ husûsâ dürûd-ı firevân ber-terîn-i cân-ı ashâb-ı güzîn ve gufrân-ı bî-pâyân be-rûh-ı revân-ı ahhâb-ı mihîn ki bânî-i bârgâh-ı şer' ve neyyir-i kârgâh-ı tab' ve hulefâ-yı rûy-i zemîn ve şefâ'at-h'âh-ı erbâb-ı dîn ve makbûl-i dergâh-ı Rabbi'l-'âlemîndürler. Rıdvânullahi Te'alâ 'aleyhim ecmâ'in ⁴⁸

Der-vasf-ı pâdişâh-ı sa'âdet-fercâm ve hâmî-i ehl-i İslâm medde zıllehu ilâ yevmi'l-kıyâm ⁴⁹ Sultân-ı kişver-küşâ-yı cihân ve Dârâ-yı din-ârây-ı zamân ve Hakan-ı âsmân-mekân ve şehensâh-ı felek-âşiyân ve âftâb-ı ehl-i imân ve mâhtâb-ı mülk-i İrân u Turân Müşteri-hil'at u 'Utârit-rütbet-i Mirrih-heybet ve Keyvân-rif'at a'nî 'ibâdullah üzre zıll-ı Rahmân a'nî **Hazret-i Sultân Süleymân Hân** ibni Sultân Selîm Hân ibni Sultân Bâyezîd Hân ibni Mehmed Hân-ı Gâzî ve 'adl ü 'adâletle cümle'nün ser-efrâzı der medh-i Sultân Süleymân ez güftâr-ı Mevlânâ Şemsî-i Bagdâdî 'aleyhi'r- rahmetehu

Sâye-i lutf-ı Hudâvend-i cihân
Şâh bin şâh Süleymân-ı zamân ⁵⁰

Pâdişâhî ki beher kûşe hezâr
Çün Sikender bûdeş âyîne-dâr ⁵¹

Her ki ân Husrev-i Pervîz cenâb
Pây-i devlet be-resânet be-rikâb ⁵²

Sad çü Ferhâd be-zîr-i 'alemeş
Tîşe berdûş reved der kademeş ⁵³

Bâ heme kadr ü şükûh ü şevket
Dâred ân dâver-i 'âlî-himmet ⁵⁴

Der reh-i bendegî-yi sâni'-i pâk
Rûz ü şeb rûy-i 'ibâdet ber-hâk ⁵⁵

⁴⁴ Onun şanı külle mazhar olmuştur. Peygamberler haylinin sonuncusu olmuştur.

⁴⁵ İnsanlık onun derecesinden çok uzaktır. Çünkü insanlık çamurdan, O nurdandır.

⁴⁶ - Ahmed, ahed isminden türemiştir, Hak ona âşık, o Hakk'a âşık.

⁴⁷ (Allah, ona, soyuna ve ashâbına kıyamet (diriliş ve cevap) gününe kadar salat ve selam eylesin).

⁴⁸ (Allah hepsinden razı olsun).

⁴⁹ (Allah onun gölgesini kıyamete kadar uzatsın)

⁵⁰ Dünyanın rabbinin lütuf gölgesi, şah oğlu şah zamanın Süleymanı

⁵¹ O öyle bir padişah'tır ki her köşede İskender gibi bin tane ayna tutanı vardır.

⁵² Hüsrev-i Perviz gibi devlet ayağını (devletin işlerini) düzene koyar; üzenkiye çıkarır.

⁵³ Ferhad gibi yüzlercesi omzunda baltayla onun sancağının altında yürür.

⁵⁴ O yüce himmetli padişah sahip olduğu onca azamet ve yüceliğe rağmen

Kes nebîned zi-sipâheş zûrî
Yekser-i mûy nerenced mûrî ⁵⁶

Bâd mülkeş be-'adâlet ma'mûr
Leşkereş nîz be-'işret mesrûr ⁵⁷

Taht-ı pâdişâhiye ve bârgâh-ı şâhenşâhiye sezâ-vâr ve şehir-i yâr-ı sâhib-vekâr olalıdan kâffe-i enâm ve havass ü 'avâm âvân-ı devletinde ve eyyâm-ı sa'âdetinde âsûde-hâl ve müferrihü'l-bâl olmuştur. Edâme'llahu 'ömrehu ilâ yevmi'l-cevâbi ve's-su'âl ⁵⁸

Der medh-i şâh-zâde-i nîk-baht ve vâris-i tâc ü taht dâ'imâ sâye-i sa'âdetes ber-fark-ı 'ubbâd-ı memdûd bâde'l-minnetü li'llah ki ol şeh-i serîr-i heft kişver ve husrev-i nîkû-güher olan pâdişâh-ı dervîş-perverün havass-ı hams-ı zâhire gibi rûşen-tenvîr ve havass-ı hams-ı bâtine gibi kavî-te'sir olan ferzend-i ercmendleri içre zâhir ü bâtın re'y ü tedbîr ile hûşmend ve sehâvet ü şecâ'atle sa'âdetmend-i ihvân a'nî Sultân Selîm Hân'un necm-i tâli'-i rûz-efzûnları evc-i kudretde ve kevkeb-i baht-ı hümayûnları burc-i rif'atde tâli' u lâmi olmasına istidlâl ü şâhid-i hâl budur ki rûz u şeb mutî'-i re'y-i pâdişâh-ı velâyet-penâh ve dem-â-dem Sultân-ı Feridûn-bârgâh hazretlerinin rızasında olup anların hayr du'âları berekâtıyla irâdet-i tevîk-i Rabbânî ve meşîyyet-i te'yidât-ı Yezdânî ile zât-ı şerîfi ve 'unsûr-ı latîfî dîn ü diyânet ve 'adl ü 'adâlet ve emn ü emânet ve fehm ü firâset ile ârâste vü pirâste olup her an mürebbi-i fuzalâ ve melce'-i sulehâ ve kehf-i şu'arâ ve me'vâ-yı zurafâ vü nüdemâ ve melâz-ı gurebâ ve murâd-bahş-ı 'ulemâ-yı fihâm ve dest-gîr-i selâtin-i 'izâm olmuştur. Mesnevî fî medh-i şeh-zâde li-mü'ellifihi

Felek rütbe şehzâde-i nîk-baht
Ki zîbed ber ü zîver-i tâc ü taht ⁵⁹

Ser-i pâdişâhân-ı 'ahd-i kadîm
Şeh-i heft iklim Sultân Selîm ⁶⁰

Be-asl u neseb şâh-ı nikû-nejâd
Be-lutf ü kerem sâhib-i 'adl ü dâd ⁶¹

Zamân-râ zi-'adleş boved zîb ü fer
Cihândâr geşte çü nâm-ı peder ⁶²

Zamîreş çü âyîne-i dil-güşâst
Dileş mazhar-ı nûr-ı feyz-i hüdâst ⁶³

⁵⁵ Temiz yaratıcıya (yüce Allah'a) kulluk yolunda gece gündüz ibadet için yüzünü toprağa koyar.

⁵⁶ Ordusundan hiç kimse zulüm görmez, bir kıl ucu bile karıncayı incitmez (karınca bile incinmez).

⁵⁷ Onun mülkü adaletle ma'mur olsun, ordusu da eğlence ile mutlu olsun.

⁵⁸ Allah onun ömrünü sorgu sual (cevap) gününe kadar devam ettirsin.

⁵⁹ -Gök kadar rütbeli (olan) iyi bahtlı şehzadeye tac ve taht süsü yaraşır.

⁶⁰ Eski devrin padişahlarının başı, yedi iklimin şahı Sultan Selim

⁶¹ Aslı ve nesebiyle iyi soylu padişah, lütuf ve keremiyle adalet sahibi.

⁶² Zaman onun adaletiyle süslenip azamet kazanır. Babasının adı gibi o da dünya padişahı oldu.

⁶³ - Gönlü iç açıcı bir ayna gibidir. Kalbi Allah'ın feyz nuruna mazhardır.

Boved in du'â herkesî râ zi cân
Ki bâşed be- 'ayş u tarab kâm-rân ⁶⁴

Müdâmeş Hudâ yâver ü yâr bâd
Zi âfât-ı 'âlem nighdâr bâd ⁶⁵

Dergâh-ı Rabbü'l-'izzetden ümmîddür ki serîr-i saltanât ve mesned-i âfiyet üzre ilâ-yevmi'l-mizân ve inkırâzı'd-devrân dîn ü diyânetle şehir-yâr-ı kâmkâr ve 'âyin-i 'adâletle nâmdâr-ı rûzgâr ola. Zîrâ ki bir mertebede ra'yyet-perver ve 'adâlet-güsterdür ki 'ale'd-devâm kâffe-i enâma in'âmı şâmil ve ihsân-ı bî-nihâyeti çâre-sâz-ı merdüm-i efâzıldur. Bâb-ı 'azimü's-şânından ashâb-ı ümmîd ü recâ bir bâbla tesellâ bulup nevmîd ü mahrûm ve bî-nevâ gitmiş degüldür ve sebze-zâr-ı 'âlem emtâr-ı bî-şümârlarıyla gayret-i gülzâr-ı irem olmuşdur. Kıt'a :

İlâhî da'imâ 'ayş u tarâbla
Ola sıhhat serîri üzre Sultân

Ki devrinde nesîm-i lutfi ile
Olupdur gül gibi 'âlem gülistân

ve lehu : Taht-gâh-ı zamânede oldı
Dest-i cûd ü keremle bî-hemtâ

Ol durur dehre sâ' î vü bânî
Halledallahu mülkehu ebedâ ⁶⁶

Sebeb-i te'lif-i Gülşen-i Şu'arâ: Zamîr-i münîr-i erbâb-ı mihr ü vefâya ve re'y-i fazîlet-ârây-ı ashâb-ı sıdk u safâya mahfî olmya ki bu bende-i fakîr dervîş ve efgende-i hakîr-i dil-rîş ve çâker-i sâhib-devletân-ı dûr-endîş ve mülâzım-ı hânkâh-ı sâlikân-ı nîk-kîş ve sergeşte-i her vâdî '**Ahdî bin Şemsî-i Bagdâdî** Hicret-i Nebevî'nün sene sittin ve tis'â mi'esinde 'azm-i diyâr-ı Rûm ve cezm-i dîden-i safâyı her merzbûm kılup bir yâr-ı zarîf ve bir şâ'ir-i latîf ile ki mahlas-ı şerîfî remz ü îmâ ve terkib-i mu'ammâ ile bu matla'dan serv-i sehî gibi neşv ü nemâ bulup sâye-güster ve kebk-i hıramân gibi cilveger olmuşdur. Mu'ammâ be-ism-i Husrev

Çeşm-i giryânda hayâl-i kadûn ey serv-i revân
Serv bitmiş arasında cû misâlidür hemân

refîk-ı şefîk olup her sûye su gibi revâne ve her yana yelmekden gird-bâd-ı bî-ser ü samâne dönüp râh-ı pür hatarda enîs ve kûşe-i hazarda hem-celîs olup menzil-be-menzil gâh rind ü zâhid ile gâh şem' ü şâhid ile gâh pîr ü cevân ile ve gâh dervîş ü Sultân ile hem-dem ü mahrem geçinüp seyr ü sülûk ve temâşâ-yı diyâr-ı her mülûk kılup mülâzemet-i erbâb-ı mihr

⁶⁴ - Herkes candan böyle dua etsin (söylesin) ki mutluluk ve neşeyle istediğine ulaşsın.

⁶⁵ - Her zaman Allah ona yardımcı olsun, âlemlerin âfetlerinden korusun.

⁶⁶ Allah onun mülkünü ebedî kılsın.

ü vefâ ve hıdmet-i ashâb-ı sıdk u safâya sıdk ile ikdâm eyleyüp makdem-i şerîflerine yüz sürüp defa'âtle mukadder olan mülâkât-ı ferrûh-sâ'ât müyesser oldukda her birinün hâk-i pâ-yi sa'âdet-bahşlarından ve esnâ-yı musâhabetde kelimât-ı dil-keşlerinden mesrûr olup murâdât-ı dünyevî ve isti'dât-ı uhrevî tahsîl ü tekâmîl iderken nâgâh gerdiş-i devr-i gaddâr ve âyin-i çarh-ı sitem-kâr ber-karâr olmayup ol enîs-i cândan ve mûnis-i revândan a'nî ol yâr-ı dîrinden ve ol şâ'ir-i sihr-âferînden beni dûr u mehcûr ve mihnet-i firkat ile rencûr kılıcak Beyt :

Budur devr-i zamânun ittifâkı
K'olur her visâlün bir firâkı

vâdî-i hayret ve sahrâ-yı firkate bıragup üftân u hîzân mânend-i gerd-i nâ-tüvân be-tarîk-ı müsâferet ve sâlik-i râh-ı siyâhat olup pâ-yi taht-ı Sultân-ı kişver-sitân ve dârü's-saltanâta dârâ-yı leşker-keş-i İrân u Turân ve şâhenşâh-ı gîtî-penâh dergâhına ya'nî Kostantiniyye'ye gelüp gördüm ki bir câ-yi şerîf ve me'vâ-yı latîf ki âb u hevâsı hûb ve her cânibde mesîresi mergûb ve ol mekân-ı pür-eşvâk-ı dil-cû cevânân-ı mâh-rûyân ile bir haddede memlûdur ki esvâk u çarsûsından geçilmez. Niteki dil-rübâları vasfında şâ'ir-i hoş-edâ bir matla'-ı garrâ buyurmuşdur ki vird-i zebân-ı 'âşıkân-ı şeydâdur. Bâkî fermâyed :

Dil-rübâlarla 'aceb kesreti var her yolun
Geçemez hûblarından gönül İstanbul'un

El-hak ta'rîfden müberrâ ve tavsîfden mu'arrâdur. Zerre ve şemme mikdârı sitâyîşe hiç ihtiyâç yokdur. Zîrâ ki me'men-i Sultân-ı selâtin-i sâhib-tâc olduğuçün içinde fuzalâ-yı zevî'l-istihrac ve şu'arâ-yı nâzûk-mizâc şöyle çok ki farazâ eger ta'rîf ü tavsîf olursa binde birinün debîr-i[...]kalem-i seri'ü'l-beyânla tesvîd ü tahrîr idüp gün gibi bir zerre 'ıyân idemez. Mısra '

Âncâ ki 'ayân est çi hâcet be-beyân est ⁶⁷

Siyâk-ı kelâm mutavvel olmasun diyü muhtasar kılındı. Niteki dinmişdür. Beyt

Kem gûy u güzîde gûy çûn dūr
K'ez endek-i tu cihân şevêd pūr ⁶⁸

Müddet-i medîd ve 'ahd-i ba'îd bu bende-i müsâfir şehri-i mezbûrda mücâvir olup Mısra ' :

Nihâdem ber zemîn raht-ı selâmet tâ çi pîş âyed ⁶⁹

muktezâsınca rûz ü şeb hıdmet-i 'ulemâ-yı 'izâm ve mülâkât-ı ümerâ-yı kirâm ve mülâzemet-i şu'arâ-yı nîk-nâm ve tûtîyân-ı şekeristân-ı fesâhat ve 'andelibân-ı gülistân-ı belâgatler ile gâh müşâ'ere ve gâh müzâkere idüp elfâz-ı ferah-efzâlarından ve edâ-yı hoş-nevâlarından ve gül gibi kelimât-ı safâ-bahşlarından ve mül gibi ebyât-ı bî-gışlarından bahş alup ve her birinün sohbet-i hâsın fırsat u ganîmet bilüp cân u dilden mâyl ü râgıb olup el-hâsıl tâlib-i hıdmet ve

⁶⁷ Görünen (belirgin olan) yerde açıklamaya ne gerek vardır?

⁶⁸ Tıpkı inci gibi az söyle, seçerek söyle, senin az sözünden dünya dolar.

⁶⁹ Selâmet yükünü yere koydum, bakalım ne olacak?

bende-i ehl-i ma'rifet geçinüp zebân-ı Türkî'ye müdâvemet gösterüp bir mikdâr durûb-ı emsâlün zabtına taklîd kılup fûnûn-ı şî'rde ferîd olup hâlâ ki sene ihdâ ve seb'în ve tis'â mi'edür Hubbül-vatan mine'l-imân ⁷⁰ fehvâsınca mihr-i vatan-ı aslî gönülde gün gibi 'ıyân olup ve burc-ı 'ulyâda âsûde olan meşâyih-i kirâmun âsitân-ı felek-âşiyânlarına nigerân olup ve Rûm hûblarının vefâsızlığından yürek biryân ve dil perîşân düşüp şöyle ki vâkı' olmuştur. Makta

Dil ez tavr-ı bütân-ı Rûm çün 'Ahdî perîşân est
Hevâ-yı dîden-i Bagdâd u hûbân-ı 'Acem dâred ⁷¹

gitmege niyyet ve ol vilâyete 'azîmet kıldukda hâtır-ı pür-fütûre bu lâyh ü fâyh oldı ki selâtin-i 'ızâmun ve 'ulemâ-yı fihâmun ve sâhib-devletân-ı hûb-cemâlün ve 'ayş u nûş itdügüm şu'arâ-yı şîrîn-makâlün ve hıdmetlerine irişüp sohbetlerinden müstefid olan kimesnelerden evsâf-ı hamîdesin gûş kıldugum fusahâ-yı nîkû-hisâlün memhâ-emken tettebbu'-ı ahvâl idüp dört ravza tarîkı ile 'alâ-kadri't-tâke bu bir nîce perîşân evrâka cem' kılup **Tezkire-i Erbâb-ı Vefâ** a'nî **Gülşen-i Şu'arâ** diyü nâm virildi.

RAVZA-İ EVVEL Pâdişâh-ı 'âdil ve şâh-zâdegân-ı hûb-hasâ'il ve sâhib-devletân-ı deryâ-dil eş'ârındadır. RAVZA-İ SÂNÎ mezkûr pâdişâh-ı nîk-nâm zamânında olan 'ulemâ-yı 'izâm ve mevâlî-i kirâm ve müderrisîn-i hûb-kelâm güftârındadır. RAVZA-İ SÂLİS Sultân-ı zamânun 'ahdinde altun başlu sancak begleri ve defter-dâr Efendilerün ebyât-ı huceste-sıfâtlarındadır. RAVZA-İ RÂBÎ mezkûr Dârâ-yı felek-medâr devrinde olan şu'arâ-yı nâmdârun tertib-i hurûf ri'âyeti ile nâmların ve bir kaç nazmların tahrîr kılup dergâh-ı gerdûn-âsâr olan şâh-zâde-i 'âlî-tebâr ve Sultân-ı selâtin-penâh ve şâhenşâh-ı felek-dest-gâh Sultân Selîm Hân-ı sipihr-iktidâr ve hûrşid-âsâr ve şehriyâr-ı kesîrû'l-efzâl ve kâmkâr-ı ferhunde-etvâr bî-nazîr ü misâlân niteki vasfında nakş u nigâr olmuştur. Kıta' li-mü'ellifihi :

Nûr-ı Yezdân kurretü'l-'ayn-ı Süleymân-ı zamân
Hazret-i Sultân Selîm a'nî şeh-i şeh-zâdegân

Ahter-i burc-ı sa'âdet âsmân-ı mülk-i dîn
Âfitâb-ı evc-i 'izzet mâh-ı keyvân-âsmân

Cûd-ı feyz-i fikreti mâ-fevk-ı hadd-i i'tibâr
'Adl ü dâdî mâverâ-yı iktidâr-ı ins ü cân

Fevz gül-zârında kaddi sâye-perver nahl-i ter
Feyz deryâsında bir pâkize cevherdür o cân

Rûm'a ihsânun getürmişdür 'Acem'den 'Ahdî'yi
Yohsa ol âvâre n'eylerdi idüp bunda mekân

ve dahi mezkûr şâh-zâde-i rûzgârûn âsitânına be-resm-i tuhfe alup gitmege eş'âr-ı âbdârdan gayrı bir nesne pây-dâr ve pesendide-i 'âşıkân-ı hâk-sâr ve makbûl-i ehl-i rûzgâr degüldür. Der ta'rîf-i suhen ez güftâr-ı Mevlânâ Şemsî-i Bagdâdî Rahmetullah

Dürr-i deryâçe-i 'irfân suhenest
Gevher-i mahzen-i insân suhenest ⁷²

⁷⁰ Vatan sevgisi imandandır

⁷¹ Ahdî Rum güzellerinin tavrından perişan olduğu için gönül Bağdat ve ÖAcem güzellerini görmeyi arzuluyor.

Ez suhen geşt müzeyyen ‘âlem
Ez suhen geşt mükerrerrem âdem ⁷³

Ez suhen yâft ehâdîs revâc
Suhen âverd Nebî ez Mi’rac ⁷⁴

Mûsâ ez feyz-i Hudâvend-i kerîm
Ez suhen geşt müsemma be-Kelîm ⁷⁵

Fusahâ râ zi suhen pâye bülend
Bülegâ râ zi suhen sâye bülend ⁷⁶

ve dahi ravza-i dârû’s-selâm Bagdâd’un gül gibi reng ü bûy ve hüsn-i cemâl ile ârâste nev-cevânlarına ve envâ’-ı fazl u kemâl ile pirâste olan pîrân-ı nâ-tüvânlarına hediye ola ve dahi bu cânibde mürûr-ı devr ile hâtır-ı âtır-ı erbâb-ı sürûr ve ashâb-ı ‘ayş ü huzûrdan zâyil olmayup bu bende-i du’â-gûy-ı fakîrden bu risâle-i hakîr hâtır-nişân-ı ehl-i dil ve ma’rûz-ı zamîr-i münîr-i hûrşîd-tenvîri şâh-zâde-i nîkû-hasâ’il olsun diyü hâk-i pâ-yi kimyâ-eser ve âyine-i tab’-ı safâ-güsterlerine ketb olunup ‘arz olunur Kıt’a li-mü’ellifihi:

Cem’ idüp erbâb-ı nazmı itdüm ol Sultâna ‘arz
‘Âdet olmışdur sunar bende şeh-i devrâna ‘arz

Hâk-i pâyinden biter maksûdı erbâb-ı dilün
N’ola sunsa hâk-i pâye ‘Ahdî-i ferzâne ‘arz

Lillahi’l-hamd ki ol şâh-zâde-i güzîn rûz u şeb evkât-ı ferhunde-sâ’âtin emr-i pâdişâh-ı rûy-i zemîne ve hâcât-ı ‘ulemâ-yı dîne ve mesâlih-i müslimîne mebzûl ü masrûf idüp her an ri’âyet-güster-i erbâb-ı ‘îrfân ve hâmi-i ehl-i imân olup ‘ale’l-husûs ehl-i nazmun tâli’i necmi gurûb idüp künc-i târik içre zâr ü zebûn olmuş iken ol kevkeb-i ‘âlî-şânun nazar-ı ‘inâyâtı ile ve hakan-ı hâtem-sıfâtun terbiye-i bî-gâyâtı ile sa’d-ı ekbere irüp gün günden efzûn ve huçeste vü meymûn olmakdan hâlî degüldür. Ana binâen cân u gönülden pâdişâh-ı rûzgârın du’â-yı devletine ve mezkûr şâh-zâde-i ‘âlî-mikdârun senâ-yı rif’atine meddâh u vassâf olan ‘ulemâ ve şu’arânun bi-hasebi’l-imkân isimleri bi’t-tamâm ve bî-güzâf tesvîd olunup şâh-zâde-i devrânun nâm-ı şerîfleri ve ‘unsûr-ı latîfleri ile şeref-i küllî hâsıl kılup şöhrat-i tâmmı ba’de’l-itmâm iş bu târih-i nîk-nâme-yi mestûr düşdi. Târih-i Gülşen-i Şu’arâ :

Gül gibi nazmı ile ehl-i dilün
Olsa reşk-i cinân bu ravza n’ola

Eyleyüp cem’ bir yire ‘Ahdî
Didi târih GÜLŞEN-İ ŞU’ARÂ [971]

⁷² İrfan gölünün incisi sözdür, insan mahzeninin mücevheri sözdür.

⁷³ Âlem sözle süslendi, âdem (insan) sözle üstün oldu.

⁷⁴ Sözden dolayı hadisler revaç buldu. Nebi, miraçtan söz getirdi.

⁷⁵ Musa, kerim olan Allah’ın feyziyle, sözden dolayı Kelîm adını aldı.

⁷⁶ Fasihlerin makamı sözden dolayı yüksektir. Belagat sahiplerinin gölgesi sözden dolayı uzundur.

RAVZA-İ EVVEL Pâdişâh-ı ‘âdil ve şâh-zâdegân-ı hûb-hasâ’il ve sâhib-devletân-ı deryâ-dil eş’ârındadır.

Der Evvel Sultân Süleymân Hân ‘aleyhi’r-rahme şâhenşâh-ı zamân ve hâkân-ı cihân a’nî Hazret-i Sultân Süleymân Hân ibni Sultân Selîm Hân ibni Bâyezîd Hân bin Sultân Mehmed Hân Edâmallahü ‘ömrehu ve medde zillehu ⁷⁷ ol hâfız-ı dîn-i Hudâ ve hâmî-i şer’-i Mustafâ emn ü emânetle rub’-ı meskûnı şöyle hıfz u masûn kılmışdır ki ahâd-ı nâsdan ahad-ı bî-kıyâs mâl-ı Karûn idinse efrâd arasından bir ferd ana su’âl ü cevâb itmege kâdir olup hisâb u ‘itâb idüp şikeste-bâl ü haste-hâtır idemez. Niteki râkım-ı hurûf-ı tezkirenün babası Mevlânâ Şemsî pâdişâh-ı mezkûrun vâsfinda üç zebân ile mülemma’ bir kasîde-i musanna’ sebt kılmışdır ki cümlesinden bir beyt gün gibi zuhûra gelüp ketb olundu. Beyt:

Ber ser ez maşrık be magrîb mî bered tast- ı zerrîn ⁷⁸
Şöyle emn itdi cihânı kim güneş yoldaşsuz

Hakkâ budur ki ol pâdişâh-ı felek medâr ve şâhenşâh-ı Cem-mikdâr ve ol Süleymân-haşmet Ferîdûn-devlet mâl ü menâl ve câh u celâle ve hayrât-ı bî-gâye ve ‘asâkir-i bî-nihâyeye mâlikdür. Rûz ü şeb ta’mir-i medâris ü mesâcid ü büka’ u ‘imârât ve her an ri’âyet-i ehâlî ve müderris ü mu’âbid ve envâ’-ı ‘ibâdete sâlikdür ve ma’lûm-re’y-i erbâb-ı himmetdür ki ol sutân-ı hâtem-sîretün vekâyı’ u tev’âbın ehl-i ma’rifetün kimi nazm ile ve kimi nesr ile yazmışdır. Bu bende-i senâ-hân yazmaga ihtiyâc yok zîrâ ki ziyâde çokdur. Elhak ol kân-ı ma’rifetün ve menba’-ı adâletün tab’-ı şerîfleri şî’re mâyl ve zihn-i latîfleri gâyetde nazm ile kâmil ve muhibb-i fukarâ olduklarına binâen mahlas-ı hümâyûnları Muhibbî’dür. Türkî dilinde eş’âr-ı bî-nihâyesi hûb ve zebân-ı Fârisî’de güftâr-ı bî-gâyesi mergûbdur. Bu bir iki Fârisî ve Türkî gazel-i bî-bedel anlarındur. Kelâmu’l-mülûki mülûku’l- kelâmî⁷⁹ fehvâsınca teyemmünen dürretü’t-tâc-ı havass u ‘avâm olundu.

Dîde ez âteş-i dil garka-i âb est merâ
Kâr-ı în çeşme zî ser- çeşme harâb est merâ ⁸⁰

Bî hodem bî tu vü der âteş-i gam mî süzem
Zinde der bahr-ı tu çün morde ‘azâb est merâ ⁸¹

Sâkiyâ mey be-kesî dih ki ne-dâred ‘ışkî
Mestem ez ‘ışk çi hâcet be şarâb est merâ ⁸²

Dîde ber ham nihem u rûy-ı tu bînem be-hayâl
Der şeb-i hicr megû dîde be-hâb est merâ ⁸³

⁷⁷ Allah onun ömrünü uzun etsin, hükmünü uzun tutsun.

⁷⁸ - Altın leğen (güneş) doğudan batıya gider.

⁷⁹ Meliklerin sözü sözlerin melikidir.

⁸⁰ Gözüm gönül ateşiyle göz yaşına boğuldu, bu çeşmenin işi kaynağından bozuktur.

⁸¹ Sensiz kendimde değilim ve gam ateşinde yanarım, senin denizinde diriyken ölü gibi azap görürüm.

⁸² Saki, şarabı, aşkı olmayana ver. Ben aşktan sarhoşum, benim şaraba ne ihtiyacım var?

Nâle k'âyed zi-reg-i cân-ı Muhibbî şeb-i gam
Ez pey-i hâl bih ez çeng ü rebâb est merâ ⁸⁴

ve lehu eyzân

Bâz âşufte em ez kâkül-i 'anber bûyî
Beste şud cân u dilem der girih-i ebrûyî ⁸⁵

Ez ki pursem habereş yâ zi ki cûyem çi kunem
Dil-i âvâre ki gum sâhteem der kûyî ⁸⁶

Âh ez în dil ki şud âşufte-i zûlf-i siyehî
Dâd ez în dîde ki âmuhte şud bârûyî ⁸⁷

U be-sad lutf derûn-ı dil-i men cilve-künân
Men-i divâne nazar mî-konem ez her sûyî ⁸⁸

Halk gûyend dil-i zâr-ı Muhibbî ki rûbûd
Râst gûyem ki füsûnhâ-yı leb-i dil-cûyî ⁸⁹

ve lehu gazel-i Türkî

Serîr-i mülk-i hüsn üzre seni her kim emîr itdi
Beni zencîr-i 'ışkunla kapunda bir esîr itdi

Komazsam tan mı bir dem ben 'asâ-yı elemi elden
Cevân idüm gam-ı 'ışkun çekelden beni pîr itdi

Egerçi sîne sadrında karâr itmedi müjgânun
Velî geçdükde ey kaşı kemânum dilde yir itdi

Yolunda merdüm-i çeşmüm düketdi gevher-i eşki
Dirigâ kalmadı kudret beni yokluk fakîr itdi

Meger bâd-ı sabâ irdi Muhibbî zûlf-i dil-dâre
Dimâgın subh-dem dehrün yine müşg ü 'abîr itdi

Der zikr-i güftâr-ı **Hazret-i Sultân Selîm Hân** Meddallahu Te'alâ 'ömrehu ilâ yevmi'l-mîzân ⁹⁰Dürr-i sade-i yegâne-i devrân ve halef-i ferzâne-i âl-i 'Osmân zât-ı kerîmleri ve hulk-ı 'azîmleri ve tab'-ı selîmleri dîn ü diyânetle ma'rûf ve 'adl ü 'adâletle mevsûf dâimâ kemâl-i lutf ile ri'âyet-i erbâb-ı dil ve hemîşe ihsânı bî-dirîg ile iltifât-ı mer-

⁸³ Gözümü kaparım ve senin yüzünü hayalimde görürüm, (yoksa) ayrılık gecesinde gözlerimin uykuda olduğunu sanma.

⁸⁴ Gam gecesı Muhibbî' nin can damarından gelen inleme, benim için çeng ve rebabdan daha iyidir.

⁸⁵ Anber kokulu kakül yüzünden yine perişanım, canım ve gönlüm kaşının kıvrımına (düğümüne) bağlandı.

⁸⁶ Bir mahalde kaybettiğim gönlümün haberini kimden sorayım, ne yapayım?

⁸⁷ Siyah bir zülfe tutulan bu gönlün elinden ah, bir yüzü görmeye alışan bu gözün elinden imdat.

⁸⁸ O, yüzlerce lütufla gönlümün içinde cilve ederken, ben deli her taraftan bakmaktayım.

⁸⁹ İnsanlar derler ki Muhibbi'nin ağlayan gönlünü kim çaldı? Doğru söylüyorum, bir gönül alıcının dudağına efsunları (çaldı).

⁹⁰ (Allahü Teala mizan gününe kadar ömrünü uzun etsin).

düm-i efâzıl kılup vâdî-i sehâvetde sâni-i Hâtem ve meydân-ı şecâ'atde mânend-i Rüstem ve hasenât-ı bilâ-nihâyeti bir mertebededür ki sıyt u sadâsı memâlik-i 'âleme irişmiş ve rezm-gâh-ı a'dâda feth ü zaferi bir derecededür ki âvâz-ı pür-mehîbi âsmân-ı heftüme velvele bırakmış. Ol şîr-şerze-i rûz-ı heccâv ol bebr-şiken-i a'dânun kemân kullanmakda kuvvet-i bâzû-yı zûr-bâzı mânend-i Sa'd Vakkas Gâzî şöyledür ki kemân-ı Rüstem-Dâstânı çeküp destine alsa ol kemân-ı fetânet-nişânı bir çekmek ile şikeste ve müşâhadesinden ol pehlevân-ı zamânı dem-beste kılması mukarrerdür. Beyt

Kemân râ çûn ân şeh berâred be zih
Zi her gûşe-eş na'ra âyed be zih ⁹¹

ve hiddet-i nazarı ok atmada bir hudûddadur ki hadeng-i kavs-ı kazâ vü kader anların tîr-i müşikâfı yanında zerre kadar kâr-ger olmaz. Niteki vâsfında zübde-i erbâb-ı fazl ü kemâl olan bende-i dâ'îleri Celâl bir beyt-i pür-hayâl dimişdür sebt olundı. Matla ':

Gerçi dirler o şehün kavsi kazâ tîri kader
Tîr-i per-tâv idemez kavs-i kazâ tîri kadar

Zîrâ ki bin tîr-i per-tâvı birbirinün ardınca atsa kılca nişânı şaşurmaz. Beyt Hilâlî güyed:

Ustuhân râ eger nişân gerdî
Tîr râ magz ustuhân gerdî ⁹²

Mânend-i ejder-âteş-feşân olan tûfeng-i cân-sitânun isti'mâlinde şöyle kâmindür ki ele aldıkda kûh ü sahrâda olan nahcîrlerin bin cânı olsa kaçup önünden biri cân kurtaramaya ve nezzâresinden bir rûh-ı Behram-gûr ve yüz bin cân-ı gîv-veş hacel olur ve 'arsa-i belâgatde suhen-güzâr ve mesned-i 'izzetde şehir-i yâr-ı kâmkâr ve ol deryâ-yı ma'ârife dürr-i yekdâne olan Sultân-ı zamânun ve ol umûr-ı saltanâtında re'y ü tedbîr ile yegâne olan pâdişâh-ı cihânun her diyârda hezerân münşiyân-ı fasâhat-güzâr ve şâ'irân-ı belâgat-şî'âr gül gibi gülistân-ı efkârda bülbül-i gülzâr ve şekeristân-ı ebkârda tûtî-i şeker-güftâr olup her dem medh ü senâ itseler binden birini 'ıyân u beyân idüp takrîr ü tahrîr idemez. Mısra' :

Ey der evsâf-ı kemâl-i tu zebânhâ ebkem ⁹³

Zât-ı huçeste-etvârı 'ilm-i edvârde pîşrev-i ehl-i Hicâz u 'Irâk ve makâmât-ı 'Acemi bilmede büzürg ü kûçek içre tâk ve tab'-ı güher-rîzleri ve hâtır-ı âtır-ı 'anber-âmîzleri cânib-i nazma mâyil ve mahlas-ı ferhundeleri Selîmî idügi ma'lûm-ı merdüm-i efâzıldur. El-hak kalb-i selîmlerine mutâbık ve hulk-ı 'azîmlerine muvâfık olmuştur. Niteki eş'âr-ı dürrer-bârı vâsfında dinilmişdür. li-mü'ellifihi :

Yiridür nâm-ı şerîfi sebt olursa surh ile
Yazılır 'âdet durur altunla ekser ser-suhen

⁹¹ O şah okunu çekince her yanından yaşa diye na'ra gelir.

⁹² Eğer kemiğin nişanı olsaydı, okun özü kemik olurdu.

⁹³ Senin kemalini vasfetmede diller tutulur.

Nazm-ı pâkinün gören saf saf sûtûrun didi kim
Mülk-i nazmı tutmaga çekmiş durur leşker suhen

Tab'-ı pâki her kaçan şevke gelüp dirse gazel
Ana peyrevlik idüp erbâb-ı dil söyler suhen

Künc-i zulmetde yaturdı ey felek rif'at yine
'Âlemi nazmunla itdi gün gibi enver suhen

Yaraşur rengîn edâlarla bulursa zîb ü fer
Oldı evsâfunla erbâb-ı dile dilber suhen

Pâdişâh-ı 'adl-perversün anuñcün Husrevâ
Her kişi bildürmege hâlin sana yazar suhen

Ey şeh-i 'İsî-nefes nutka gelürsün lutf ile
Makdemünde mürdeler zinde olup dirler suhen

Nazm-ı devletde ola ism-i şerîfün şâh beyit
Nitekim nazm ile virür 'âleme zîver suhen

Ma'lûm-re'y-i zurefâ-yı rûzgârdur ki ol şâh-zâde-yi gerdûn-medâr ve Sultân-ı 'âlî-tebârun eş'âr-ı dürer-bârı ve kevkeb-i nazm-ı pür-envârı gün gibi meşhûr u 'ıyân ve efvâhda mezkûrdur ve fuzalâ-yı zamân ve sahâyif-i rûzgârda mestûr ve makbûl-i tab'-ı pîr ü cevân olmışdur ve bu bir kaç gazel-i pür-mesel anların netâyic-i tab'ındandır. Kalem-i letâyif-nigâr ve kilik-i sehâr-fisârla sebt olundu. Gazel :

Yüzünden zülfi sür keşf-i hicâb it
Cemâlün mihr ü mâhın bî-nikâb it

Nazar kıl çeşm-i mestânunla bir dem
Anı gel şevk ile mest ü harâb it

Lebün emsem olur mı haste câna
Tabîbüm gel mürüvvet kıl cevâb it

Sakın göz degmesün hüsnün güline
Rakîb-i bed-nazardan ictinâb it

Dilâ zulmetde budur âb-ı hayvân
Nihânî şebde nûş-ı la'l-i nâb it

İrişdi hadd-i gülgüne hat-ı yâr
Gönül şerh-i gamın yaz bir kitâb it

Leb-i meygûnı sun cânâ Selîme
Yeter hicrân ile yaşum şarâb it

ve lehu eyzân:

Leyli zülfün sihr-i gamzen ‘akl u cânım aldılar
Eyleyüp mecnûn beni sahrâ-yı ‘ışka saldılar

Görelî hüsn ile sen Yûsuf-cemâli gözlerüm
‘Akl u dil çâh-ı zenehdâna düşüben kaldılar

Cân ü gönlüm leblerün şevkine kanzîl mest olup
Sabr elinden şîşe-i nâmûsı yire çaldılar

Leblerün cânâ şarâb imiş görünür su gibi
Şevk ile ‘atşân idüp yok yire cânım aldılar

Dişlerün dürrin Selîmî vasf idelden ‘akl u dil
Baş u cânı terk idüben bahr-ı ‘ışka taldılar

ve lehu eyzân :

Hâlün ile zülfün el bir eylemiş
Dilleri dâm ile nahcîr eylemiş

Hulk ile sen bir meleksin kim Hudâ
Sûret-i insânda tasvîr eylemiş

Hân-ı vaslî halka kismet idicek
Hicrûni Hak bana takdîr eylemiş

Sanasun nakkâş-ı kudret kaşunı
Nûndur nûr üzre tahrîr eylemiş

‘Ârız-ı dilberdeki hat ey Selîm
Dûd-ı âhundur ki te’sîr eylemiş

Sultân MURÂD HÂN : Nûr-ı çeşm-i şeh-zâde-i âfâk ve sürûr-ı sîne-i Sultân-ı bî-nifâkdur. Zât-ı şerîfleri câ-nîşîn-i Husrev-i rûy-i zemîn ve şâhenşâh-ı cem-âyindürler. Hakkâ ki Hak celle ve ‘alâ cevâhir-i ervâhı ecvâf-ı asdâf-ı eşbâhda terbiyyet ile hüveydâ ve sâni’-i bî-çûn rûkûm-ı sûrî elvâh-ı ecsâmı kudret eliyle peydâ ideli bunların gibi bir gevher-i pâk ve bir ahter-i sa’âdet-mend-i bî-bâk âsmân-ı rif’atünde rahşân u tâbân itmemişdür. El-hâsıl ol kân-ı mürüvvat ve pesend-i selâtin-i pür-şevket envâ’-ı ‘ulûma bi’t-tab’ mâyl ve her bir fende âbâ vü ecdâd-ı pâkize nihâdları gibi kâmil ve şâh-zâde-gân-ı pâk-sîret içre sâhib-ma’rifet ve meydân-ı şece’âtde kavî-himmet ve bezmgâh-ı ‘âlemde iltifât-ı bilâ-nihâyât ile dest-gîr-i üftâde-gân-ı nâ-şâd ve murâd-bahş-ı bende vü ‘azâddurlar. Zîrâ ki bâb-ı hâcet revâsında erbâb-ı maksûd gibi Hâtem bir gedâ-yı dîn ü kemter ve ‘arsa-i zemînde zamânun kahramânları bî-nevâ-yı zebûn ü ahkar ve hîdmet-i şerîfinde olan bende-i nâçizlerin en ednâsı Feridûn-ı cihân ve dergâh-ı bî-iştibâhlarında her bir kimesne çâkerlerinin efkendesî Keykubâd-ı zamân ve tâc-bahş-ı pîr ü cevândur. El-hakk kevâkıb-i âsmân-re’fet ve âftâb-ı tâbân-ı ‘azmet rûz ü şeb tâlib-i fazîlet olup üç zebân ile isti’âr buyurmayup nûkte-dân olmanın eş’ârı der-gûş-ı sâhibân-ı vakâr ve vird-i zebân-ışâhân-ı ‘âlî-tebârdur. Bu gazel-i mülemmâ ki fenn-i şî’rde gâyetle musanna’ vâkı’ olmuşdur sebt olundu. Gazel :

A'samtu ilâ rabbî hüve'l-hayyü'l celîlu
Ferden âheden muktedîrullahi cemîlu ⁹⁴

Hâlûmi ne hâcet ki beyân ide zebânum
Eddem'u mine'l-'aynî ilâ hâli delîlu ⁹⁵

Elbetde bu hâlûmden o yârûn haberi var
El kalbû minel kalbi ile'l-kalbi sebîlu ⁹⁶

'Âşık nîce sag ola çü senden ola ayru
El 'âşiku min hicrike fânin ve 'alîlu ⁹⁷

Haşâ ki Murâd ayruya meyl eyleye senden
Kalbün leke min mehdin ile'l-lahdi yemîlu ⁹⁸

Bu bir iki beyt dahi anlarundur.

La'lünden aldı âl ile gonce letâfeti
Zülfünden aldı sünbül-i garrâ tarâveti

Bekle Murâdî işigüni dâim ol şehün
Bulmak dilersen iki cihanda sa'âdeti

Sultân MUSTAFÂ : Tâlib-i erbâb-ı kemâl ve râgıb-ı ashâb-ı câh u celâl ve bezl sâz-ı mâl ü menâl idi. Ol kân-ı mürüvvet ve sadr nîşîn-i 'işret 'ale'd-devâm şürb-i 'âm ve câm-ı Cem nûş idüp bâde-i gafletle bî- hoş düşüp güftâr-ı bed-kirdârı gûş kılup hılâf-ı re'y-i Sultân-ı 'âlem ve zübde-i selâtin-i Cem-haşem-kâr olmuş anuñçün pâye-i saltanâtdan ve pirâye-yi devletden nahl-i vücûdı ber-hûrdâr olmamış. Sene tis'in ve tis'â mi'ede emr-i pâdişâhî ile bogıldı. Mekk-i Rüstem târih vâkı' olmuşdur. Mezârı Burûsa'dadur. Tabî'at-ı şî'riyyesi bed olmamağın mahlas-ı hâlisleri Muhlisî vâkı' olmuşdur. Bu bir iki beyt anlarundur ki tahrîr ü takrîr olunur Beyt :

Mû-be-mû gîsûların kılmış ihâtâ gerdenün
Mâhtâbı sanasun kim kaplamışdur hâleler

Bağrumı pergâle pergâle kılupdur tîg-ı gam
Muhlisî çeşmümden akan kandur ol pergâleler

⁹⁴ Diri ve şanı yüce olan Rabbime sığındım. Bir tek Allah'ın muktedirliği güzeldir.

⁹⁵ Gözümden akan yaş halime delildir.

⁹⁶ Kalp kalpten kalbe yoldur

⁹⁷ Âşık senin ayrılığından perişan ve hasta olmuştur.

⁹⁸ Kalp senindir, beşikten mezara kadar sana meyleder.

Sultân MEHEMMED: Pâdişâhımızun halef-i ercmeni ve püser-i hûş-mendi idi lâkin âsmân-ı devletün kemâl-i bî-misâli ve şekeristân-ı belâgatün tûtî-i şîrîn-makâli ve gülzâr-ı cemâlün nev-res nihâli iken sarsar-ı bâd-ı fenâdan gülbin-i kaddi şikest ve dest-bürd-i ecele pây best olmuş. Ol pertev-i dîn-i nûr-ı Muhammedî şehzâdelerün ser-âmedi idi ‘âlem-i fâniden dârü’l-bekâya rihlet idüp kûşe-i ‘uzlet ihtiyâr idindi. Ol şehriyâr-ı nâmdârun mezâr-ı şerîfi İstanbul içinde vâkı’ olmuşdur. Bu eş’âr-ı hazîn anlarundur. Haylice ‘âşıkâne ve hasb-i hâl-i dil-i dîvâne olmagın bî-bahâne sebt olundu. Beyt:

Ol saçı leylî umardum bana mecnûnum diye
Gezmesün gelsün belâ tagında mahzûnum diye

Yoluna cân virmege anunçün ikrâr eyledüm
Habs idüp çâh-ı zenehdânunda medyûnum diye

Diğer : Her kaçan ruhsârını ‘arz itse dilber gül gibi
Nâleye başlar görüp bî-çâre dil bülbül gibi

Sultân BÂYEZÎD: Şâhî mahlas iderdi. Fünûn-ı ma’ârifle ferîd iken âhirü’l-emr bermukteza-yı mahlas ol nîkû-nijâd emr-i şerîfe inkıyâd itmeyüp eşhâs-ı bed-nihâdun mekr ü hîlesine i’timâd ü i’tikâd idüp pend-i peder-i ercmenin gûş kılmayup birâder-i hûşmendine ‘adâvet ü husûmet itmiş hukuk-ı sâbıkayı ferâmûş kılmış. Keyfiyyet-i hâli meşhûr kütüb-i **Tevârih-i âl-i ‘Osmânî**’de mestûr ve mezârı Sivâs’dadur. Ol merhûmdan bu gazel merkûm olundu. Hasb-i hâli oldugı ma’lûm-ı merdüm-i her merzbûmdur. Gazel :

N’ideyin zâyî’ idüp tûl-i emelle nefesi
Kalmadı zerre kadar dilde bu dünyâ hevesi

Kârbân-ı reh-i iklîm-i ‘adem menzilinün
Tokınur oldu dilâ sem’üme bang-i ceresi

Iztırâbı ko gel ey murg-ı revân sabr eyle
Eskiyüp işte harâba varıyor ten kafesi

Gâfil olma gözün aç dîde-i hak-bîn ola gör
Hor görme has ü hâşâk ile mûr ü megesi

Şâhî-i bî-kes ü bî-mâr u kîne-kâre ne gam
Sen olur isen eger bâr-ı Hudâ dest-resi

Sultân CİHÂNGÎR: Pâdişâh-ı Süleyman-bârgâh ve Sultân-ı Cem-penâh hazretlerinin ferzend-i dilbendi idi. Evân-ı cevânide devr-i zamâneden asîb irişüp ol şeh-zâde-i cihâna ‘arsa-i rûzgâr-ı nâ-hemvâr teng ü tar görünüp cihân-ı bî-vefâdan bûy-i vefâ görmeyüp şehir-i Halep’de ‘âlem-i bekâya cân atup revâne oldu. Târih-i mevte sene sittîn ve tis’â mi’edür ve merhûm-ı magfûrun mezârı İstanbul mukâbelesinde Top-hâne’dedür ve mezkûrün mahlas-ı şerîfi Za’îffî’dür. Hey’et-i ten-i nahîfi ma’lûm-ı ehl-i hâl ve kuvvet-i zihn-i latîfi ber-kemâl

imiş. Ahyânen tab’-ı vekkaddan nazm-ı belâgat-mazmûn mânend-i dürr-i meknûn rişte-i nazma çeküp der-gûş-ı erbâb-ı hûş kılmadan hâlî olmaz imiş. Bu matla’ u beyt anlarundur sebt olundu.

‘Akl ü fikrüm târumâr iden bu gîsûlar mîdur
Yohsa ruhsârundaki bu hâl-i hindûlar mîdur

Dir gören müjgânların altında cânâ gözlerin
Hançer altında yatur sayd olmuş âhûlar mîdur

ŞEMSÎ AHMED PAŞA : Ol âftâb-ı burc-ı kemâl ve mâhtâb-ı câh u celâl eş’âr-ı dürrer-bârda gevher-şi’âr Şemsî mahlas ihtiyâr itmiş. Pâdişâhımızun devâm-ı devletinde ve eyyâm-ı sa’âdetinde hâlâ ‘izzet ü hürmetle Rûm İli beglerbegisidür. Kevkeb-i tab’-ı mustakîmi âsmân-ı ma’rifetde mâh-ı tamâm gibi tâbân ve gevher-i zihn-i selîmi ma’den-i fasâhatde mihr-i dırâhşân gibi rahşândur ve hadd-ı zâtında pâk-neseb ü ‘âlî-hasebdür. Zîrâ ki ecdâd-ı büzürg-vârı ve âbâ-yı ferhunde-âsârı ashâb-ı seyyîd-i yevmü’l-va’id olan Hâlid bin Velîd neslindendir. Cân u dilden samîm-i kalbden rûz ü şeb hîdmet-i pâdişâh-ı vâlâ-güher ve mu-sâhib-i Sultân-ı felek-dest-gâh zerre perver atduğı azharu mine’ş-şemsi ⁹⁹ dır. Ebyât-ı ‘âşıkânesi gün gibi meşhûr-ı ‘âlem ve kelimât-ı rindânesi pesendîde-i benî-’âdem ve şu’arâ içre sâhib-dîvândur. Bu gazel ki hep hasb-i hâl-i ‘âşıkândur mihr gibi zuhûra gelüp leme’ân u dırâhşân olup sebt olundu. Gazel :

Sîneme yâre uran hançer-i dil-cûyundur
Dili medhûş iden ol kâkül-i hoş -bûyundur

Tolanursun ne ‘aceb uçmaga kûy-i yâre
Çeken ey dil seni ya hâkûn ya suyundur

Ser-be-ser vâdî-i gülzâr-ı mahabbetde bugün
Bülbülü mest iden ey gonce dehen rûyundur

Beni katl itmege kasd eyler imiş gamzelerün
‘Âşık öldürmek ezelden bilirüz hûyundur

Nice bin bendeni sen dâm-ı belâya saldun
Bend iden Şemsî’yi zülfündeki bir mûyundur

CENÂBÎ PAŞA : Pâdişâh-ı âsmân-menzilet ve Sultân-ı keyvân-rif’atün sâye-i himâyet ve pirâye-i devletünde Anadolu paşası iken fevt oldı. Fikr-i bülendi sarây-ı ma’ânide ‘âlî-cenâb ve tab’-ı pür-zîveri hall-i mu‘ammâda peyrev-şihâbdur. Zamân-ı hayâtında rûz ü şeb tettebbu’-ı eş’âr-ı şu’arâ-yı selef idüp deryâ-yı ma’ârifetde dürr-i sade-i hüner olup sözleri makbûl-i bahr ü berr olmuşdı ve şâhbâz-ı himmeti hüma-pervâz olduğına bu gazel şâhid-makâl ve mübeyyen-i hâl vâkı’ olmuşdur sebt olundu. Gazel :

⁹⁹ Güneşten daha açık.

Şâhbâz-ı himmetüm kim evc-i istignâdadur
Âşiyân-ı dehre konmaz menzili a'lâdadur

Hor bakma dürr-i eşk-i dîde-i hûn-bâruma
Kim ser-i peyvendi anun bir ulu deryâdadur

Bâl açup seyr eyledüm şâhbâz-ı kâf-ı kudreti
Bu kerâmet sanma tenhâ şehper-i 'ankâdadur

Dil kesilmezse 'aceb mi sen kamer-ruhsârdan
Zerrenün ser-riştesi mihr-i cihân-ârâdadur

Kays-ı bî-dil semtine çekdi Cenâbî rahtını
Kâbil-i şâgird olanun gayreti üstâdedür

PÎRÎ PAŞA Yesserallahu mâ yeşâ ¹⁰⁰ : Ramazân-zâde diye efvâhda meşhûr ve elsîne de mezkûr asl u ensâb ile kâmbîn ü kâmyâbdur. Zamân-ı evâ'ilden âbâ ve ecdâd-ı nîkû-nejâdî ile pâdişâh-ı 'âlem ve Sultân-ı Dârâ-haşemün âbâ ve ecdâd-ı pâkize nihâdlarına ihlâs u sadâkatle hıdmet ide gelmiş eben 'an ceddin server ibni serverdür. Zât-ı huceste-sıfâtı bî-nazîr ve tedbîr ü re'y ile perveriştin-zamîr ve baht-ı hümayûnı âsmân-ı hünerde mihr-i münîr gibi pâk tenvîr olup hemîşe tâlî' u lâmi' olmuşdur. Ol mîr-i nîkû-nihâdun nahl-i vucûd-ı hüner-nümâsı şehir-i Adana'da neşv ü nemâ bulmagın mezkûr şehirden ta'dâd olunur. Ana binâen hasbete'n-lillâh tarîk-ı hayr u hasenât ile mescîd ü medrese vü imârât binâ itmege çok dînâr sarf kılmış ve anların mühimmât u meremmâtı için ba'zı yirlerde emlak vakf itmiş. Mukeddemâ pâdişâhun emr-i 'âlisiyle ber-güzîde-i emâsil ü akrân olup diyâr-ı Karaman'a ve iki nevbet vilâyet-i Şam'a paşa ve 'adl ü dâd ile sâhib-livâ ve girû-dâr ile ferzâne ve ihsân ile herkesi murâda irgürmede bî-nazîr-i zamân ve makbûl-i pîr ü cevân olmuş ve her câyi makdem-i şerîfinden reşk-i riyâz-ı berrîn ve gayret-i hûr u 'ayn itmiş ve müşârünileyhün şehir-i Adana mevlid-i latîfleri olmagın gâh u bî-gâh şehir-i mezbûrda olan 'imârâtun ahvâlin tecessüs ve ne hâlde idüğün su'âl itmeden hâlî olmazlar imiş ve ba'zı beglerin zulm ü töhmedisinden harâb u bî-tâb olmag üzredür diyü mesmû'-ı şerîfleri olmuş hemân nûr-ı merhamet ve ziyâ-yı 'atûfet ile ol me'vâ-yı ferâh-bahş ve ol cây-i dil-keşi ta'mîr ve her kûşesinde bir temâşâ-gâh-ı dil-pezi ü pür-safâ itmek müdde'â itmişler. Mahabbet-i vatan-ı aslî bir hadde gönlünde gâlib imiş ki mezbûr şehirde sancaga tâlib olup pâdişâh-ı câh u celâl dergâhına 'arz-ı hâl isâl itmiş. Ol dergâhda 'arzı makbûl ve murâdâta vüsûl bulmuş. On dört kerre yüz bin akçe ile beg olmuşlar. Bu bende-i sergeşte ol şehre irdükde evsâf-ı hamîdelerinin binden birin bir kasîde-i şikeste-bestede nazm idüp hâk-i pâ-y-işerîflerine ve 'izz-i hubûr-ı latîflerine revâne itdükden sonra bir nîce beyt kalem-i dü zebân ile bu evrâk-ı perişâne sebt olundu. Nazm :

Zübde-i pîr ü cevân eşref-i ebnâ-yı zamân
Sâhib-i asl u neseb hazret-i Pîrî Paşa

Tuyî ân şâ'ir-i pâkîze suhen kez ser-i lutf

¹⁰⁰ -Allah umduğunu (istediğini) kolaylaştırsın

Lezzet-i zevk-ı kelâm-ı tu buved rûh-fezâ ¹⁰¹

Kîst gayr ez tu der îñ şehir eben ‘en ceddin tâ
Mescid ü medrese sâzed zi ‘atâ zi behr-i Hudâ ¹⁰²

Reh-revân-râ neresed memleket-i hîş be-bâd
Geşte îñ şehir be-devrân-ı tu bih ez heme câ ¹⁰³

Kes ne-nâled diğ er ez bîm-i garîbî hergiz
Z’ân ki geşttest cenâb-ı tu melâz-ı gurebâ ¹⁰⁴

Hakkâ budur ki celle ve â’lâ cevâhir-i ervâhı asdâf-ı eşbâhda tertîb ile hüveydâ ve sâni’-i bî-hûn ki rukûm-ı sûrî elvâh-ı ecsâmıda kudret eli ile peydâ ideli bunların gibi asl u nesebi gibi bir güher-pâk ve merâtib ile bir ‘âlî-hasebi hâkden tevâna atmamışdır. Mezkûrun tab’-ı dürrer-bârı tarz-ı eş’ârda hûb ü mergûb mahlas-ı pâki Riyâzî ve güftâr -ı âbdârından herkes müterâzı olmuştur. Hazret-i pâdişâh-ı mülk-ârânun şâh-zâdeleri Sultân Selîm Hân ve Sultân Bâyezîd Hân ceng ü cidâl idüp ara yirde nice dilâverler katl ü pâmâl olup ‘âkıbetü’l-emr Sultân Selîm Hân nâsır u mensûr ve ‘adâyı makhûr kıldukda Sultân Selîm Hân mezkûrun medhinde paşa-yı müşârünileyh bir kasîde-i pür-me’âl nazm kılmış. Cümlesinden üç beyt rakam olundu. Şi’r :

Gird-i râhun gözlerüme sürme-i feth ü zafer
Eyledüm ihlas ile husrev ü ‘âlî-güher

Asdikâ-yı devletün olsun hemîşe ser-firâz
Gerden-i a’dânı maktu’ eyleye tîg ü teber

Pençe-i kahrundan a’dâya halâs imkânı yok
Pîşe-i rezm içre şâhâ şîrîn ersin şîrîn er

Bu gazel-i bî-bedel-i pür-mesel anlarındur sebt olundu. Gazel :

Dilberâ esrâr-ı la’lünden olupdur hayretüm
Mest-i ‘ışkun olmayan bilmez benüm keyfiyyetüm

Tal’atünle zerre-veş bizi getürdün hâkden
Sebze yirden göge vardur âftâbum minnetüm
Tâb-ı mihrünle ne var rif’at bulursam ben gubâr
Hâk-i pâyündür şehâ başumda tâc ü devletüm

Başum ol servün ayagına koyardum cehd ile

¹⁰¹ O temiz sözlü şair sensin, öyle ki lutf ile, senin sözünün tadı ruhu güzelleştirir, rahatlatır.

¹⁰² Allah rızası için, bu şehirde atalarından bu yana, bağış yoluyla mescit ve medrese yapan senden başka kim vardır?

¹⁰³ Yolcuların memleketlerine rüzgar zarar vermez. Bu şehir senin devrinde her yerden daha iyi hale geldi.

¹⁰⁴ Kimse garip kalma korkusuyla inlemez artık, çünkü senin zatın gariplerin sığınağı olmuştur

Gör ki nîce devlete ırgürdi ‘âlf-himmetüm

Göz ucu ile nazar kılmag umarum öliceğ
Ol güzeller şâhınun yolunda eylen tertîbüm

Temerrüd ‘ALÎ PAŞA : Sultân-ı kişver-küşâ ve pâdişâh-ı ‘âlem-ârânun ‘inâyât-ı bî-gâyâtı ile Anadolu paşasıdır. Sâbıkan diyâr-ı Bagdâd’dan münfasıl oldukda bu bende-i fakîr ol yâr-ı bî-nazîr ile Sivas’a gelüp müddet-i medîd hıdmetlerinde olup envâ’-ı lütûflarına mazhar düşmüşdür. Hadd-ı zâtında tarîk-ı ‘ulûmda ma’ârifle pür-ma’rifet ve meydân-ı şece’âtde ‘âlf sıfat

Tanrı aslanı ‘Alî hakkı ki a’dâ gözine
Pîşe-i rezm ü şece’âtde odur şîr-kadem

zebân-ı Fârisî’de bî-nazîr ve Şâh-nâme ile tevârih-i selâtin-i mâzî bilmede gereği gibi dilîr kütüb-i şürût-ı fıkıhda mütâla’ası dil-pezi ve mü’ellif-i tezkîre hıdmet-i şerîflerinde müddet-i medîd olmuşdur. El-hak rûz ü şeb tahsîl ü tekmîl-i fazîlet idüp muhibb-i ehl-i tecrîd olmagın akrânı içre kemâl ile ferîd ve hadd-ı zâtında emâret ü eyâlet ile dervîş-nihâd u pâk- i’tikâd ve sâhib-’adl ü dâd kimesnedür. Zîrâ ki hemîşe evkât-ı hamsede sâ’âtin takvâ vü tahârete ve savm ü ‘ibâdete sarf itmegi kendüye farz-ı ‘ayn bilüp ana binâen Haccü’l-Harameynü’ş-Şerîfeyn ile müşerref olmuşdur. Bu matla’-ı Fârisî ol nîkû-şî’âr-ı ‘âlf-himmet-i gülzâr-ı ‘âlemün cefâ-yı hârından be-tarîk-ı şikâyet sebt itmişdür

Ruste ber gird-i dü çeşmem her taraf sad hâr-ı gam
Mî-hored her lahza sad âb-ı gam ez seyl-i sitem ¹⁰⁵

Menem ân ‘andelîb-i gam keşîde
Gulî ez gülşen-i ‘âlem ne-çîde ¹⁰⁶

Diğer: Şâh-ı hayâl-i yâr dile her kaçan gelür
San şehri-i Mısra Yûsuf-ı gül-pirehen gelür

HASAN PAŞA Ahsenallahu Te’âlâ şânehu ¹⁰⁷ : Âb-rûy-i memâlik-i ‘âlem ve mesned-i şâhân-ı gerdûn-haşem olan Kostantiniyye’ dendür lâkin vâlid-i eremendi sadr-nişin-i serâçe-i hâtır-ı selâtin ve mahrem-i halvet-serây-ı zamâyir-i erbâb-ı dîn olmagla vezîr-i Sultân-ı bâ-temkîndür

Âsaf-ı pâdişeh-i Rûm Mehmed Paşa
Görmemiş sadr-ı vezâretde nazîrin âdem

El-hakk vüzerâ silkinde ana benzer bir umûr-dîde ve ef’âl-i pesendîde vezîr-i sencîde bu dîde-i remed-dîde görmemişdür. Sâbıkü’z-zıkr anların nazar-ı himmeti ile sâhib-’izz ü ikbâl

¹⁰⁵ İki gözümün etrafında yüzlerce gam dikenini bitti, her an gözüm zulüm selinden yüz gam suyu içiyor.

¹⁰⁶ Ben gam çekmiş ve âlem gülşeninden bir gül dermemiş bülbülüm.

¹⁰⁷ Allahu Te’âlâ onun şanını güzel etsin.

ve ahlâk-ı hasene ile bî-misâl ve nihâl-i hayât-efzâsı esmâr-ı hünerle bârver ve neşv ü nemâ resân-ı nahlistân-ı bahr u berredür. Hakkâ ki ‘âlem-i şebâbda mânend-i Efrâsiyâb ve Kahramân-ı zamân fehm ü firâsetle Sührâb-ı yegâne-i cihândur. Bu gazel-i bî-bedel anlarundur sebt olundu.

Âteş-i hasret-i dil-dâr ile dil yanıkdur
Dem-be-dem dîdelerüm subha dek uyanıkdur

Seni sevdigüme düşmen n’ola inkâr itse
‘İşk hâlâtına ancak o Hudâ tanıkdur

Kızılırmaga nice benzedeyin eşkümi kim
Bu dem-i sâfdur o sâfi su bulanıkdur

İşigün itleri ile n’ola yoldaş olsam
Bu kulun ululuga pâdişahum lâyıkdur

Hasan’a kılma cefâlar güzelüm ihsân it
‘Âşık-ı sâdika cevri eyleme kim yazıkdur

MEHEMMED PAŞA : Dâmallahu zılâlehu ilâ yevmi’l-bekâ ¹⁰⁸ Husrev-i gîtî-küşâ-yı gerdûn serîr-i fermân-fermâ-yı be-istiklâl-i ‘adimü’n-nazîrû’d-dârec ilâ-rıdvân El-meliki’l-mennân magfûr-ı mebrûr Sultân Süleymân’un eyyâm-ı ma’delet-encâmlarında peder-i besât-ı hüviyyet-güsterleri Kapudan Sâlih Paşa demekle ma’rûf ü meşhûr ve elsîne-i eyyâmda tedbîr-i isâbet-i gâyet ve şecâ’at ü şehâmet ile mevsûf u mezkûrdurlar. Ber-muktezâ-yı en’amü’l-mâlû’s-sâlih kendüleri dahi vâlid-i nîkû-sîr pâkize-güherleri gibi sabbâh-ı rûy-i deryâ ve bâdbân-ı himmet ile menâzil-peymâ deryâ-yı cezâyir vilâyet-i Rûm’a sâye-i iclâl salup emsâl ü akrânından mümtâz ve huşk ü ter ve belki sefid ü siyâha fermân-rân ü ser-efrâz olmuşlardır. Merreten ba’de uhra şevket ü efâl ve rif’at ü ikbâl ile Lahsa’ya hâkim-i kâm-revâ ve âvâze-i ‘adl ü insâfları i’râb ü ahşam berârî vü sehârinün etrâfına tâ sevâd-ı e’âzım-ı Hindistân’un eşher-i âmâkin-i eknâfına vüsûl bulup sükkânın zikr-i hayrları ile ratbü’l-lisân itmişlerdür. Hakke’l-insâf bir zât-ı kavsü’s-sıfât-ı müfidü’l berekâtdur ki vücûd-ı pür-cûdlarında le’âlî-fazl u ‘irfân-ı meknûn u mahzûn sîne-i ma’ârif-i sefîneleri cevâhir-i nefîse-fünûn-ı mütedâvile-i müte’ârif ile meşhûn tedâvüm ile in’ikâd-ı mecâlis-i fuzalâya mâyil ü râgıb ve muhıll-ı ihsân olanlara gaym-i hâtil ve vâhib-i evkât-ı fâyizü’l-müheyyâları ahsen-i tarîk üzre hüsn-i cereyândadır. Allahümme eyyidhu bi’d-devleti’l-’uzmâ ve’l-ubbuhetü’l-esnâ bi-sâhibi’l-makâm ve’l-bathâ mâ hebbet bihi es-sabâ ve’l-varkâ fi’l-agsânî ve tegannâ ¹⁰⁹ ve ‘Arabiyetleri nihâyetü’l-hükkâmda ve lisân-ı Fürs’de cevalân-ı tab’ları bir makâmda ki ebnâ-yı derînün fârisleri kemiyyet-i fasâhat ü belâgatleri önünde piyâde belki zîver-i nezâket-i tasarrufundan sâde efkâr-ı te’ammuk-endîş ile memdûh u müselleme ve ‘akl-ı mefâlik-ı mübheme küşâ ile bi’l-ittifak vâliyân-ı sâhib-alûya tâyi’ân dudmân-ı ‘azîmü’s-şân-ı

¹⁰⁸ Allah bekâ gününe kadar onun gölgesini devam ettirsin.

¹⁰⁹ Allah’ım onu sahib-i makama, saba rüzgarı ve kumru dalda öttükçe (ömür) boyu, en büyük devlet ve üstün üstünlükle güçlendir.

‘Osmânî’den ekmel ü a’lem bu cümleden fazl-ı buhûr-ı şî’re tabâyi’-i mustakîmeye hutûr idenden eziyed-i dest-resi ve hazz-ı vâfirle fenn-i latîfun bi’t-tab’ sâhib-mûsî mâlik-i memâlik-i vâsi’-i nazm u inşâ ve sâhib-aksâm-ı eş’âr-ı belâgat-ı eş’âr-ı dil-küşâ olup sâhib-livâ-yı nusret-intihâ olduklarından ma’ada nâzım-ı le’âlî-i müte’âlî-i dîvân-ı sihr-beyândurlar. El-hak selâset-i eş’âr ve letâfet-i güftârları mâ-i câri-vâr bir mertebe selîs ü revân ve mahsûd-ı çeşme-i hayvândur. Bî-tekellûf ne divân bilâ-tevakkuf zihn-i dakikadân

Bu bahr-ı bî-kerân ki le’âl ile pür durur
Her beyti oldı gevher-i tâc-ı Sikenderi

Dâline şâh-ı Sidre n’ola egse başını
Rif’atle oldı ravzada Tubâ berâberi

Yâsına n’ola zevrak-ı ümmîddür dir isem
Mazmûnı oldı bahr-ı necâtun çü lengeri

Yir itse vâvına n’ola gönlüm visâl umup
Çün şeş cihetle eyledi ‘uşşâka yâveri

Çün kim nihâl-i kâmet-i havrâdur ol elif
Bâg-ı ümîdün olsa n’ola sâye-güsteri

Nûnı ki oldı mahzen-i genc-i nihân-ı ‘ışk
‘Ahdî noktadır anda ma’ânî cevâhiri

Ümmîd-gâh-ı fuzalâ-yı bedâyi’-nigâr ve mültecâ-yı şu’arâ-yı makbûl-i etibba’-ı rûzgâr olmanın Ümidî mahlas itmişlerdür. Bu bir nice nücûm-ı şârika-i zâhire ve derârî-i bârika-i bâhire ve ol ‘ilm-i bi’l-’adl-i fi’l-âfâkdan tulû’ u işrâk bulmuşlardır. Gazel :

Öldürüp girdi şafâk-veş kanuma ol âftâb
Şimdi görünmez meger kim itdi kanumdan hicâb

Dil ruh-ı zîbânı gördükce yürek yansa n’ola
Penbe yanar sırçaya olsa mukâbil âftâb

Derd-i ‘ışka yaz devâ-yı vasl yâ merk-i rakîb
Ey tabîb-i cân buyur ben hasteye şâfi cevâb

Kebkebün nakşıyle zînet bulalı rûy-i zemîn
Reşk idüp dir âsmân yâ leyteni küntü türâb ¹¹⁰

Ey Ümidî görmek ile yâri oldum kâm-bîn
Câme-h’âb içre uyur bulsam olurum kâm-yâb

¹¹⁰ Keşke toprak olsaydım (Kur'an 78/ 40)

NIŞÂNÎ BEG: Vâris-i hulk-ı Nebî nîkû-hısâl Mustafâ Çelebi ibni Celâl demekle ma'rûf ve envâ'-ı hayrât-ı bâ-berekâtı kemâl ile mevsûfdur. Eben 'an ceddin ahlâk-ı pesendîde ile ârâste ve hilye-i zât-ı şerîfleri evsâf-ı hamîde ile pirâste 'âlim-i kâmil ve şâ'ir-i fâzıl ve ekser-i 'ulûmda ve ehâdis ü tefâsirde bî-nazîr-i zamân ve tarz-ı şî'r ü inşâda yegâne-i devrân her birinde tevâmân u Selmân ve H'âce-i Cihân'dur ve bu devrde lutf ü 'ibârât ve hüsn-i isti'ârat ile inşâ-yı dil-küşâ ve bu zamânda elfâz-ı nefîs ve edâ-yı selîs ile manzûmât-ı ferah-fezâ seyr itmek istiyen anların inşâ-yı fasâhat-güzârın ve nazm-ı dürer-bârın mütâla'a kılsun. Elfâz-ı garîb ve elkâb-ı dil-firîb ü ma'ânî-yi pâk ve edâ-yı sûznâk nîce olur görsün ve ol felek-destgâh sâbıkan pâdişâh-ı 'âlem-penâh hazretlerinin dîvân-ı 'âlî-şânlarında müddet-i medîd ve 'ahd-i ba'îd sadr-ı 'âlîye-i sudûra nişâncı idüp mansıb-ı tugra-keşi ve nişân-ârâ-yı Sultân-ı kişver-küşâ-yı Dârâ-yı Cem-sipâh olmuş idi. Pâdişâh-ı mezkûrdan ve vüzerâ-yı umûrdan 'inâyât-ı bî-nihâyât ve iltifât-ı bî-gâyât görmüşlerdür ve erbâb-ı dîvân ve a'yân u erkân içre hüsn-i hulk ile mühimmat-güzâr ve kânûn-şinâs-ı devr-i rûzgâr kimesnedür ve bu denlü kemâl ü fazl ile rûz u şeb kaffe-i enâm ve havass ü 'avâm birle envâ'-ı tevâzu' ve tekrîm ü ta'zîm ile zindegânî ider ve ihsân u cûdı bir mertebededür ki sıyt u sadâsı ekâlim-i seb'âya yetişmiş ve sehâyâ-yı bî-nihâyâtı bir derecededür ki âvâzesi âsmân-ı heftüme gulgule bırakmış. Niteki vasfında bu kıt'a vâkı' olmuş

Mustafa-hulk ü 'Ömer-haslet ü Bû-Bekr-sîret
Murtaza-meşreb ü 'Osmân-hayâ fahr-ı kibâr

Hüsn-i hulkla bu ihsânını görseydi anun
Hâtem irüp kapusına olur idi cerrâr

Ol zât-ı bî-nazîr âhirü'l-emr hüsn-i ihtiyârıyla ol umûr-ı hatîreden ferâgat eyleyüp evkât-ı bâ-berekâtın takvâ vü tahâretle ta'ât-ı Rabbânî ve ibâdât-ı Yezdânîye ki maksûd-ı icâd-ı sakaleyn ve âferîniş-i evveldür dâ'imü'd-dehr sarf itmek üzredür. Tesânif-i mensûrları bî-hadd ve te'lif-i manzûmları lâ-yu'addur. Cümlesinden bir gazel-i âşıkâne ile bir kaç matla'-ı rindâne ki vird-i zebân-ı bûlbûlân-ı hoş-gû ve semenberân-ı dil-cû ve gül-'ızârân-ı hoş -bûdur sebt olundu. Gazel :

Bahâr irdi safâ kesb idicek demdür çemenlerde
Husûsâ salına yanunca şol sîmîn bedenler de

Zebûn olma nedendür gam şarâb iç devr-i gülşende
Kavî himmet gerekdür bu cihân içre erenlerde

Sarılr her gül endâme çeker pehlûya mehrûyı
Ne hâletler nezâketler komuş Hak pirehenlerde

Kayıрма ey gönül bend olduğına târ-ı zülfüne
Sınuk diller hezarân bağlıdur her bir şikenlerde

Firâkunla Nişânî bendenün hâli mükedderdür
Visâlin va'de itmişdün behey âfet geçenlerde

Diğer: Bahâr eyyâmıdır açıldı gonce
İder bülbül figan açıldı gonce

Diğer : Agladugum gördi cânan yüzine tutdı nikâb
Olsa bâran gizlenür görünmez olur âftâb
Şâm-ı hicrân oldu âhir subh-ı vasl ister gönül
Lâyık-ı cennet olur bir bende ger çekse ‘azâb

Diğer : Ey cebîni mahv iden mâh-ı münîrün pertevîn
Rûşen eyle nûr-ı ruhsârunla gel gönlüm evin

Bu gazel-i Fârisî dahi anların eş’âr-ı âbdârındandır sebt olundu. Gazel:

Devr-i gül şod sâkîyâ câm-ı şarâb-ı nâb dih
Cân şevved mahmûr be-nümâ ‘ârız u râ âb dih ¹¹¹

Ger be-purseme ey tabîb ez la’l-i nâbet yek devâ
În dil-i bîmâr râ ez şerbet-i cüllâb dih ¹¹²

Yâ Rab ân mihr-i dil-fîrûzem merâ bahşed visâl
Âteş-i mihreş be-sûy-i ‘âşıkân hem tâb dih ¹¹³

Çeşm-i mesteş her zamân dil râ harâbî mî dehed
Yek demî âsûde bâşem ez cefâyeş hâb dih ¹¹⁴

Ân kemân ebrû girifte ez Nişânî sabr u cân
Der harîm-i hüsn-i hûbân gûşe-i mihrâb dih ¹¹⁵

Nazîre li-mü’ellifihi

Sebze ser zed ez lebet sâkî şarâb-ı nâb dih
‘Âşık-ı leb-teşne râ ez çeşme-i Hızır âb dih ¹¹⁶

Men be-telhî hû giriftem dîgerân-râ ba’d ez îb
Ez leb-i şîrîn tabîbâ şerbet-i ‘unnâb dih ¹¹⁷

¹¹¹ Ey saki gül devri geldi, saf şarap kadehini ver, can mahmur olsun, göster yanağını, ona su ver.

¹¹² Eğer güzel dudağından bir deva sorarsam ey tabib, bu hasta gönle gül şerbetinden ver.

¹¹³ Ya Rabbi o gönül aydınlatan sevgin bana kavuşma bağışlasın; onun aşkının ateşi aşıklara doğru da ışık tutsun.

¹¹⁴ Baygın gözü her zaman gönlü yıkıyor, bir uyku ver de bir an olsun cefasından kurtulup huzur bulayım.

¹¹⁵ Ey Nişânî, o keman kaşlı, senin sabrını ve canını aldı, güzellerin güzellik haremde bir mihrab köşesi var (?)

¹¹⁶ Yeşillik çıktı (bahar geldi) ey saki dudağından saf şarap ver. Dudağı susuzluk âşık Hızır çeşmesinden su ver.

¹¹⁷ Ey tabib ben acıya alıştım, bundan sonra sen tatlı dudağından başkalarına innâb şerbeti ver.

Ger ne-mî hâhî ki gerded tîre devr-i mâ çû şeb
Ruh me-tâb ey meh zi mâ vü zülf-i hod râ tâb dih ¹¹⁸

Çün be-bidârî müyesser nîst zâhir dîdenet
Tâ be-'ayn-i bâtinnet bînem be-çeşmem h^vâb- dih ¹¹⁹

Hem çü 'Ahdî secde-gâhem hâk-i pâ-yi tust u bes
Herkesî kû ser fûrû nâred bedû mihrâb dih ¹²⁰

EBU'L-FAZL EFENDİ: 'Acem-zâde'dür. Fazlî mahlas iderler. Nahl-i hayâtı ercmendi ravza-i Rûm'da perverde olmuş. Pâdişâhımızun dîvân-ı hümayûnunda nice müddet defter-dâr-ı 'âlî-mikdâr u huceste-etvâr ve kânûndân-ı devr-i rûzgâr olmuş. Âhir ol emr-i hatîreden ferâgat kılup teka'üd tarîkıyla kûşe-i vahdet ve me'men-i ibâdet-i Rabbi'l-'izzet ve takvâ ve tahâretle ünsiyyet itmiş. Hadd-ı zâtında ol nahl-i hüner şecere-i haseb-i 'âlî-neseble gülşen-i 'âlemün ser-bülendi a'nî Mevlânâ İdris Efendi'nün mahdumudur. Mezkûr Mevlânâ İdris Sultân Mehmed Gâzî devrinde devr iderek merhûm Sultân Bâyezîd Hân'un evâilinde Rûm'a gelmiş mevâlî-i fihâm içre mevleviyyet ile benâm ve ehliyyetle ahâlinün ser-efrâzı olmuş ve mezkûr Sultân Bâyezîd'ün tergîbi ile âl-i 'Osmân'un vekâyî'in ve mu'asırları olan selâtin-i İrân u Turân'un ser-güzeştlerin ve tevâb'ın şöyle dakîk ü muhayyel inşâ ile beyân itmiş ki 'akl-ı pür-hayâl mütâla'asında zâr ü hayrân olması mukarrerdür. Müşârünileyh Ebu'l-Fazl-ı nîkû-sîr kava'id-i pür-feva'id-i 'ulûmı ve kütüb-i tefâsir ü ehâdisi tertîb üzre görmüş ve her birin niçe niçe mütâla'a-i şerîfle gözden geçürmüş ve beyne'l-fuzalâ kemâl ü fazl ile zâtı ma'rûf ve 'inde's-şu'âra mazmûn-ı latîf ile kelimâtı mevsûf ve aksâm-ı şî're üç zebân ile sâhir-i üstâdân-ı zamân ve şâ'irân-ı cihân gibi kâdir 'ale'l-husus Hâce-i Hâfız-ı Şîrâzî'nün bi't-tamâm dîvân- huceste-fercâmlarına kâfiye- ber-kâfiye nazîre-i bî-nazîr belki dil-peziîr tahrîr ü takrîr itmişdür ve tarz-ı nazmda musanna' ve mülemma' gazelleri lâ-yu'addur. Cümlesinden bir iki matla'-ı Fârisî-i rengîn kalem-i müşkîn-sevâdun imdâdıyla rakam-ı 'anberîn oldı. Nazm:

Ez hâl noktahâ be-hatt-ı 'anberîn me-nih
Sad dag-ı 'ışk ber-ciger-i müşk-çîn me-nih ¹²¹

Ber berg-i gül zi nergis-i ter âb mî-zenî
V'ez leb-i gülâb ber şeker-i nâb mî-zenî ¹²²

CELÂL EFENDİ: Rûm İli'nde Manastır'dandur. Zât-ı refiû'd-derecâtı câh u celâl ile ârâste ve hilye-i cemâl-i bî-misâli fazl u kemâl ile pirâstedür. El-hak bu devrde kutb-ı felek-i hakîkat ve merkez-i da'ire-i tarîkat ve güzîde-i meşâyih-i kibâr ve nûr-ı dîde-i ulû'l-ebsârdur. 'İlm-i

¹¹⁸ Devrimizin gece gibi kararmasını istemiyorsan ey ay, bizden yüz çevirme ve saçını parlat.

¹¹⁹ Seni uyanırken görmek müyesser olmadığı için, batın gözüyle seni görebilmek için gözümeye uyku ver.

¹²⁰ Ahdi gibi, secdegahım senin ayağının toprağıdır, başka değil, başını eğmeyen herkese ver.

¹²¹ Anberli yazıyla benden noktalar koyma; aşkın yüz dağı için miskinin üzerine koyma(?)

¹²² Gül yaprağına, taze nergisten su verirsin; dudağından, saf şekere gül suyu verirsin.

te'vilde kâşif-i esrâr-ı **Küntü kenzen mahfiyyen**¹²³ ve vâkıf-ı envâr-ı **Kâbe kavseyni ev ednâdur**.¹²⁴ ve hemîşe eltâf-ı fazl-ı kibriyâ ile âyîne-i ehl-i vefâda keder komayup münevver itmeden hâlî degüldür ve hadd-ı zâtında hoş -sohbet ü bülend-himmet ve şi'r ü inşâda bî-misl ü bî-mânend ve envâ'-ı hatt yazmada bir derecede mâhirdür ki kâtib-i kazâ vü kader sahâyif-i eyyâmı kalem-i sun' ile meşk ideli misâlin yazmamışdur ve rüsûm-ı nükûşâ bir renk ile kâdirdür ki Nakkâş-ı ezel kilik-i bedâyi'-nigâr-ı lem yezel ile tarh-ı zemîn ü zamânı çekeli ol nakkâş-ı nakş-nigârün nakş-ı pür-hayâline 'aklı irmemiş ve ekser-i kütüb-i meşâyihî mütâla'a-i şerîf ile gözden geçirüp görmüşlerdür. Anun için elfâz-ı nefis ile meclis-ârâ ve kelimât-ı selîs ile sâhib-edâ lisân-ı 'Arabî'de Hassân-ı fasihü'l-beyân gibi sâhir ve zebân-ı Fârisî'de Hâce-i Selmân-ı ma'ânî-perver gibi mâhir ve Türkî dilinde tab'ı Nevâyî gibi mazmûn-ı hâssa kâdir ve şi'ri Nesimî gibi vâfirdür. Sâbikan memâlik-i 'Arab'ı seyâhat ve cüst ü cüy-ı meşâyih-i tarîkat ü hakikat idüp erbâb-ı ma'ârif ve ashâb-ı letâyifden çok ekâbir ü eşrâf nazarından behremend olup lutf-ı sîret ve hüsn-i serîret ile fâidemend olup ba'dehu el-emrû biyedillahi¹²⁵ hükmünce yine 'azm-i diyâr-ı Rûm kılmış. Ol zamânda pâdişâh-ı âlem-penâh Sultân Süleymân Hân-ı felek-bârgâh hazretlerinin şeh-zâdeleri ki Sultân Mustafâ ve Sultân Mehmed ve Sultân Selîm Hân ve Sultân Bâyezîd ve Sultân Cihângîr cümlesi serîr-i sıhhatde ve mesned-i âfiyetde kâmrân idiler. Sâbıkü'z-zikr bu hâlde mütereddid olup 'acaba bu penc-i güher-senc şeh-zâdelerün kangısının âsitân-ı felek-âşiyânlarına intisâb itmek savâb ola diyü mütefekkir ü mütehayyir iken ol derde çâre için hâtır-ı fâtırlarına istihâre hutûr idüp hâb-ı nûşîn ile huzûra vardukda bir pîr-i rûşen-zamîr müşîr-i beşîr olup bu hadîs-i şerîf-i vâcibü't-ta'zîmî ta'lîm yüzinden tefhîm itdirdükden sonra bî-ihtiyâr bî-dâr olup vâkı' olan işâret-i pür-beşâret cevâhirin silk-i nazm-ı âbdâra çeküp hıdmet-i şeh-zâde-i âlî-tebâr a'nî Sultân Selîm Hân-ı kâmkârün âsitân-ı felek-medârlarına müteveccih olup bu kıt'a-ı bedî'iyi 'arz-ı 'izz-i huzûr-ı pür-hubûrlarına vüsûl buldurmuşlar. Kıt'a :

Bir gice vâkı'amda bir püsere
Didüm ey şeyh-i 'âkil ü dâna

Hazret-i pâdişâh-ı devrânun
Penç şeh-zâdesi ki var zîbâ

Biri bebr ü biri esed biri şîr
Biri simurgdur biri 'ankâ

Kangısı taht ü tâca mâlik olur
Kangısıdur cihanda Hızr-ı bekâ

Bana bu sırrı didüm i'lam it
Didi hayrû'l-umuru evsâtuhâ

¹²³ (Ben gizli bir hazine idim) Aclunî, **Keşfü'l-Hafâ ve Muzile'l-âlbâs**, (3. bs.) Beyrut 1352, C.II. s. 132

¹²⁴ O kadar ki (birleştirilmiş) iki yay arası kadar, hatta daha da yakın oldu. Kur'an 53/9

¹²⁵ İşler Allah'ın kudret elindedir .

Müşârunileyh çâk ol zamânda şâh-zâde-i cevân-bahtun sohbet-i şerîflerine ve meclîs-i latîflerine leylen ve nehâren yüz sürüp müşerref olmakdan hâlî olmaz ve mezkûr şâh-zâde-i ‘âlfî-mikdârün nazar-ı himmet-i bâ-’inâyâtı ile bir mikdâr zamân Anadolu vilâyetine defterdâr-ı timâr olmuşlar. Âhir tab’-ı hü mâ-pervâzı ol mansıb-ı ‘âliyeden şâh-bâz gibi pervâz itmeden vaz gelüp hevâ-yı âsitân-ı kuds-âşiyân-ı hazret-i şeh-zâdede hezerân ‘izâz ile ârâm ü karâr tutup akrân içre ser-efrâz u mümtâz olup ol dergâh-ı ‘âlem-penâhda makbûl olmuşlar. Hâlâ ki pâdişâh-ı ‘âlfî-himmetün devletinde ve şâh-zâde-i nîkû-hılkatün nazar-ı ‘inâyetiyle müteferrika bölüğünde yüz bin akçe ze’âmete mutasarrıf ve umûr-ı devlete vâkıf kimesnedür. Ol bülbül-i gülistân-ı ma’ânînin ve ol tûtî-i şekeristân-ı hoş -edânun güftâr-ı şeker-rîzi ve eş’âr-ı gülbîzi bî-nazîr ve ma’ânî-i has bulmada ve sûz ü güdâz ile mânend-i Hassân ve vâdî-i nazmda her zamân bir tarz-ı nev peydâ itmede dilîr ve şu’arâ-yı zamân ve zurafâ-yı cihân ekser-i gazel-i bî-nazîrlere peyrev olup nazîre diyüp câizesine ve iltifât-ı bî-dirîgına mazhar düşüp manzur-ı ulû’l-eb sâr olmuşlardır. Netâyic-i tab’ından münâzara tarîkıyla **Sa’d u Sa’id** nâm bir kitâb-ı sürûr-encâm ve bir manzum **Şerh-i ‘Avâmil** ki makbûl-i efâzıdır ve bir ‘arûz-ı kavâ’id-güster ki pesendide-i erbâb-ı hünerdür ve dahi **Hüsni Yûsuf** nâm bir risâle tasnîf-i hûb ve te’lif-i mergûbdur ki elfâz-ı rûh-efzâsı rengîn ü hoş şîrîn-edâsı derece-i tahrîr ü takrîrden müberrâ vü mu’arrâdur. Ser-â-pâ a’zâ-yı şâhid-i ra’nâ vâfında yigirmi tokuz ‘aded gazel-i bî-bedel ve bir kaç nazm-ı pür-mesel ile sahîfe-i beyânı murassa’ u mülemma’ kılmışdur. Ol dürr-i nâ-süftelerün cümlesinden biri budur ki sıfât-ı dehendür ehl-i suhen olan yârâna rûşendür. Gazel :

Mürde ihyâ eyler açsa ol Mesîhâ-dem dehen
Deyr-i hüsninde lebi ‘Îsî durur Meryem dehen

Bûseler sunsa leb-i la’lünden eksilmez müdâm
Bezm-i hüsninde lebi Cemşîd câm-ı Cem dehen

‘İyd-ı adhâdur visâli âsitân-ı müdde’î
Fî’l-hakika Ka’be’dür hüsnî çi zemzem dehen

Emrine râm u musahhar olsa tan mı ins ü cân
Hatt-ı yakûtı Süleymân mührîdür hâtem dehen

Görinür kand-i mükerrer her nazarda lebleri
Anlarun benzer ki mâbeynindedür müdgam dehen

Hat degüldür lebleri etrâfını olan muhît
Küştesi çün kareler giymiş tutar mâtem dehen

Lebleri hûnhâreliklerle dile düşdi tamâm
Saklasun Hak hakkına açmış durur ‘âlem dehen

Dil kemer gibi dehânın kor tolaşur beline
Kılca hod mûy-ı miyânından degüldür kem dehen

Varlığı yokluğu bir oldı Celâl’ün gördi kim

Mazhar-ı esmâ gibidür nokta-i mübhem dehen
 Mezkûrun nazm-ı dürer-bârı ve güftâr-ı âbdârı beyne'n-nas bî-hadd ü bî-kıyâsdur. Bu bir nice
 gazel-i bî-bedelleri tahrîr olundı. Gazel :

Ey sevâd-ı hatt-ı ruhsârı zulâm-ı şeb-i 'ışk
 Nokta-i hâl-i lebi güm-şüdeye kevkeb-i 'ışk

Ten-i hâkide sanur 'ışkı mukarrer zâhid
 Kalıpdur kâlib-ı cân kâlib-ı cân kâlib-ı 'ışk

Zerrece sırr-ı dehânına bulunmazdı vukûf
 Dür-feşân olmasa ger bezm-i cinanda leb-i 'ışk

Tâbiş-i 'ışka dil-i zerre getürmez tâkat
 Âftâbı düşürür lertzeye tâb-ı teb-i 'ışk

Yazdı fetvâyı kodı 'uşşâka Celâlî Mansûr
 Kendü kaniyla vuzu' itmek imiş mezheb-i 'ışk

ve lehu eyzân :

Gamzene Hak ki şehâdet ider kâtildür
 Bir nazarda nice yüz bin kana gire Kâbil'dür

Vech-i eşyâda hat-ı nâmun okur 'ârif olan
 Hılkatün anlamayan yüzi kara câhildür

Zâhidi sanma havass-ı gam-ı 'ışkuna emîn
 Dinini dahi edâ idememiş 'âmildür

Mekre el sunma demek zülfüne inkâr degül
 Sihr Hakdur velî amma 'ameli bâtıldur

Şimdi bu şi'r dinilür de bulunmaz mislün
 Dir demez sana Celâlî fasâhat iledür

ve lehu eyzân :

Olmak istersen nigârâ cân ile tenden yakın
 Benligi terk eyledün oldun bana benden yakın

Yirde gökde gerçi kim bir şey degül benden ırag
 Gökleri tokuz tolandum bulmadum benden yakın

Kurbını idrâk ider cânân ile cân u tenün
 Mâliki mülki bilenler mâle mahzenden yakın

Dâmen-i dil-dârı elden komasam kılman 'aceb
 Pây-bûsuna vesîle var mı dâmenden yakın

Çeşm-i cân ile Celâlî gördi nûr-ı vahdeti
 Hûb-rûya şîveden 'uşşâka şîvenden yakın

ve lehu eyzân :

Halka hak gelmedi Mansur'un Ene'l-hak didügi
Görinür münkire küfr ehl-i Hak'un hak didügi

Ehl-i cezbe dimez ancak sana ahmak zâhid
Belki 'âkilleredür anların ahmak didügi

Biz anı milket-i nâ-sûte mukayyed görürüz
Sûfiyenün 'âlem-i lâhûte mutlak didügi

Gönül alçakda didükse bizi alçakda koma
Âsmândan yücedür 'ârifün alçak didügi

Dest-gîr oldu getürdi bizi Cemşîd itdi
Başımız tâcı durur sâkînün ayak didügi

'Amel ü fi'lüni bilsen yine benzer zâhid
Nahviyunun müte'allık müte'allak didügi

Her ne dirlerse disünler ko Celâlî sana halk
Didügi kimsenün olmaz olur ol Hak didügi

Hakkâ budur ki ol server-i efâzıl-ı 'âlemün bî-hadd icâd-ı hâsı vardır. Cümlesinden bu gazel-i pür-sûz dahi çün mihr-i dil-efrûz-ı maşrık-ı tab'ından tâli' u lâmi' olup her beytinde ikişer ma'nâ muzmer ve birisi mânend-i dürr-i gevherdür. Vâkı'a mezkûr gazelün edâsı mertebe-i i'câz ve nazîre dimeden mu'arrâ ve mümtâz vâkı' olmuştur ve ma'lûm-ı şerîf-i erbâb-ı kalem ola ki mezbûr gazelün matla'ı şeh-zâde-i 'âlem ü âdem ve Sultân-ı encüm-haşem ve nûr-ı dîde-i ashâb-ı himem vafında rakam olmuştur. Gazel :

Gerçi dirler o şehün kavs-i kazâ tir-i kader
Tîr-i per-tâv idemez kavs-i kazâ tiri kadar

Darb-ı dest egdirür anun başını egmez ise
Serv-i ser-keş kadd-i bâlâsını görse baş eger

Hande kılssa ol lebi gonce göreydün n'eyler
Güllerin bâd-ı sabâ defter-i hüsnini dürer

Göz terâzusına urmak ikisin kıymetden
Cevher-i hâk-i kudümün görürüz kuhl-ı basar

Âhımız şu'lelenür da'vet-i agyâr itse
Korkaruz vara düşe hirmen-i hüsnine şerer

Erre-i mihnet ile turmadı deldi dilümi
Şöyle benzer o perîşân saçına şâne deger

Anmaz agyâre visâlin o şehün olsa Celâl
Havfî budur ki tolaşmıya miyânına kemer

Bu kıt'a-ı zîbâ dahi ol efsah-ı fusahânun ve emlehu's-şu'arânundur ziyâde a'lâ ve gün gibi mücellâ vâkı' olmuştur. Kıt'a :

Bakdum sipihr-i hüsne bir gün bir ay gördüm
Gönlüme meyl ü mihrin anlarun eyledüm 'arz

Adıyla biri Mûsâ nâmıyla biri 'Îsâ
Dil virmek ana vâcib teslîm-i cân ana farz

Gerçi biri melekdür biri perîdür ammâ
Nisbetleri Celâlî beyne's-semâi ve'l-'arz

Bu bir nice beyt-i mülemma' ve matla'-ı murassa' dahi anlarundur tesvîd olundu.

Göz yaşı degül yoluna harc itdügi çeşmüm
Bin derd ile kesb eyledügi alnı deridür

Diğer: Sa'id-i sîmîn-i sâkîdür bizi mest eyleyen
Bâdeden sanman kerâmet ol yed-i beyzâ durur

Diğer : Dil-i gümrâhum izünden gözi gitmezse n'ola
Kebkebün nakşı ana necm-i hidâyet görünür

Diğer : Ölecek demde vasiyyet kılayın her sem kim
İşigün itlerine râhat-ı rindân olsun

Diğer : Gözüm sûfî safâ mir'at-ı hüsn-i yârda
Keşf-i hâl olmaz kişiye sûret-i inkârda

Diğer : Ahkâmuna Sikender ü Dârâ kulak çeker
Tevkî-i çîn-i zülfüne tugra kulak çeker

AHMED Efendi: Zât-ı ferhunde sıfâtı ve nahl-i vücûdı pür-cûdı sa'âdet-simâtı gülzâr-ı İstanbul'da mânend-i serv-i dil-ârâ neşv ü nemâ bulmuştur. Nâm-ı kirâmı ve ism-i sâmilere Sümî seyyidü's-sakaleyn olduğu erbâb-ı 'irfân mâbeyninde azharu mine's-şemsi ve ebyenü mine'l-emsî ¹²⁶ dür. Haseb ü neseble kemâl-i edeble ekâbir ve akrânından mümtâz ve zekâ vü ferâsetde gâyet teferrüs ü taharrüs ile kavâbil-i rûzgâr arasında ser-efrâzdur ve şân-ı şerîfleri müstevcib-i atûfet olmanın pâdişâh-ı gerdûn-ı dest-gâhun da'imâ manzûr-ı hümayûnları ve vüzerâ-yı 'izâm-ı himemdür. Sadâret ü 'uzmâ-yı erkân-ı devlet ü sa'âdetün yevmen fe yevmen âsâr-ı terbiye-i sa'âdet-makrûnları olup bidâyet-i hâlden ilâ hâzihi'l-eyyâm bî-infisâl ü insirâm menâsıb-ı 'âlîyeden hâlî olmayup el'an sevâd-ı e'âzım-âmedde mâl defterdârlığı

¹²⁶ Güneşten daha parlak ve dünden daha açık.

umûrına me'mûr olup hulk-ı 'azîmle herkesi hoş -hâl kıldığından gayrı hıdmet-i pâdişâhîde idrâk-i tab'-ı hurşîd-tenvîrin kendüye rehber-i delîl bilüp her vechile zabt-ı emvâlde sa'y-i cemîl göstermek ile makbûl-i dergâh-ı Sultân ve pesend-i vüzerâ-yı 'âlî-şân olmuştur. El-hak vücûd-ı şerîflerinde bir mertebede kâbiliyyet ü istihkak ve zât-ı latîflerinde ol derecede isti'dâd ve emsâl içre haysiyyet ile tâkdür ki pâye-i emârete belki mesned-i eyâlete kadem basmaga cümleden akdem ü ehakk olduğın hazret-i pâdişâh-ı Cem-câh ve hâkân-ı Süleymân-bârgâh ve vüzerâ-yı 'âlî-makâm defa'at ile iş'âr u izhâr buyurmuşlardır. Ümmîddür ki 'ankâribü'z-zamân netîce-i nazar-ı şâhen- şâh-ı gerdûn mekân zuhûr bulup me'âric-i imâret bel medâric-i eyâlete su'ûd ideler. hakkâ budur ki vücûd-ı pâki ve tab'-ı derrâki kanûn-ı âl-i 'Osmânîde bî-hemtâ ve zihn-i mustakîmi tarîk-ı nazmda sâhib-edâ ve fehmi selîmi üslûb-ı inşâda münşiyân-ı sâbika-i lâhikadan merâtib ile a'lâ zîrâ ki eyyâm-ı cevânîde rûz ü şeb tahsîl-i ma'ârif idüp fûnûn-ı 'ulûma vâkıf ve zebân-ı Fûrs ve Nevâyî'de olan kütüb-i mütedâvileye cidd ü cehd idüp her birinden lezzet-i tâm ile mütelezziz olup meşhûr-ı eyyâm olmuştur. Hususâ nagz u mu'ammâda nâmî ve fenn-i 'arûz u kâfiyede sâni-i Câmî'dür. Bî-tekellûf üslûb-ı gazelde mânend-i Emîr-i Husrev ve sözleri pür-sûz ve tarîk-ı kasîdede Enverî-i dil-firûz gibi ma'ânî-endûz ve 'arsa-i tevârihde müverrih-i rûzgâr-ı rûşen-i selîs ü hem-vâr sohbet-i hâssı ferah-bahş-ı dili bî-karârdur. Bu bir nice beyt-i güher-bâr ol 'âlî-tebârundur takrîr ü tahrîr olundu. Gazel

Düşde zülf-i yâri yunmada görüp fâl eyledüm
Dâl geldi devlet-i vasla anı dâl eyledüm

Nakd-i câme bûsesin azırganan cânâneyi
Râyeğân pehlûya çekdüm bir 'aceb âl eyledüm

Nâsihûn kavline meşgûl olmuş iken câm ile
'Âlem-i ıtlâka düşdüm terk-i işgâl eyledüm

Dest-bûs-ı yâre sa'y ile irişmez gördüm el
Pâyine düşdüm bu cism-i zerdümi âl eyledüm

Ehl-i 'ışkun olmaga kâmil 'ayârı Hâlî'yâ
Cism-i zerdüm pûte-i 'ışka salup kâl eyledüm

ve lehu: Çün mahzen oldu mihrüne gel kaçma sîneye
İrgür meta'-ı vaslunı tapşur hazîneye

Girdâb-ı eşküm içre tenüm döndi âh ile
Bâd-ı muhâlîf ile atılmış sefîneye

Diğer : Sevdüm seveli cân ile ol şûh dilberi
Derd ü belâdan olmadı bir lahza dil beri

Sûz-ı derûn-ı sîneye rûşen delîldür
Par par yanan fitîle-i dâgum 'alevleri

‘İyd-ı visâle eylemedüm te’hir bûsesin
Ta’lîk ider muhâle idüp şîve ol perî

Döymeز doyunca baka ruh-ı yâre gözlerüm
Girse sehâb-ı zülf dahi mihr-i enveri

Sor leblerinden ol sanemün Hâlî’yâ haber
Dünyâda bilmek ister isen zevk-ı kevseri

Müşârünileyhün ebyât-ı hâlet-bahşları hâlden hâlî olmamagun e’âlim-i ‘ulemâ-yı mütecerrin
ve efdal-i fuzalâ-yı rûy-i zemîn olan Muslihiddin Lârî hıdmetlerinün gûş-ı hûşına irdükde
Hâlî mahlasın erzânî buyurmuşlar ve bu bir nice beyt dahi berâ-yı tab’-ı mustakîmlerindendür.
Nazm

Nişân idüp cefâ tîrine her dem cism-i sad-çâki
Kaşı yayum yiter urdun tîr-i sehm-i sihem-nâki

Boyadı gökleri göge duhân-ı nâr-ı dil-sûzum
‘Alevler eyledi peydâ çıkup yagmaya eflâki

Diğer : Firâk-ı la’l-i nâbunla belâ irişdi çok câna
Terahhum cân-ı ‘âlem şol iki gözden akan kana

Hayâl-i yâr her dilde levend olmuş gezer Hâlî
Sana vardukda habs idüp anı ‘arz eyle Sultâna

RAVZA-İ SÂNÎ Mevâlî-i ‘izâm ve ‘ulemâ-yı fihâm ve müderrisîn-i nîk-nâm güftârındandır.
İBNİ KEMÂL AHMED Efendi: Kemâl ü fezâyil ile ser-âmed a’nî Mevlânâ Ahmed Kemâl
Paşa-zâde dimekle ma’rûf ve ‘ulûm-ı zâhire vü bâtine ile mevsûf zât-ı şerîfi bir güher-
rahşândur ki âftâb-ı cihân tab’ kemâl-i fasâhatde ‘inâyet-i edeb ile perveriş kılmış ve ‘unsûr-ı
latîfi isti’dâd ile bir cevher-i tâbândur ki mâhtâb-ı ‘âlem-tâb menba’-ı belâgatde te’yidât-ı ser-
medi ile perverde itmişdür. Beyne’l-‘ulema’ü’l-‘izâm mecma’ü’l-hakâyık ve’inde’l-
mevâlîü’l-kirâm mütecemmi’ü’d-dekâyık ve tahrîr-i tefâsirde bî-nazîr-i zamân ve takrîr-i
ehâdisde dil-pezi-i ‘ulemâ-yı cihân ve fûnûn-ı ‘ulûma gereği gibi resâyil yazmışdur makbûl-i
tabâyî’-i merdüm-i efâzıl olmuş ve zebân-ı Fârisî’de **Hakâyıku’d-Dekâyık** sebt kılmış bir
hadde kava’id-i pür-fevâyid göstermiş ki mütâla’asında hîred-i hurdedân hayrân kalup engüşt-
i hayret der-dehân ve zâr ü ser-gerdân olur. Eger ol dürr-i deryâ-yı hünerün te’lîfâtını ve
tasnîfâtını birer birer yazup beyân idersek gâyetde söz uzadur. Zîrâ ki lâ-yu’add ü bî-hadd
vâki’ olmuşdur. Şöyle ki eyyâm-ı vilâdetinden zamân-ı mevtine dek günde bir cüz ü tasnîf
kısmet olmuş cümlesi mümkün-i tahrîr ü takrîr degüldür. Bir derecede tesvidleri gün gibi şuyu’
ve iştiâr bulmuşdur ki azharu mine’ş-şemsi ¹²⁷ dür. Vasfindan müberrâ ve medhinden
mu’arrâdur. Cemi’-i tesânifi ehâlî içre meşhûr ü mu’teber ve elsîne-i efvâhda mezkûr ü rûh-

¹²⁷ Güneşten daha parlak

perver ve şî'r ü inşâda tevâmân-ı H^vâce-i Cihân ve hem-zebân-ı Kemâl-i Isfahân yanında tıfl-ı ebced-h^hân degüldür. Mısra'

Her çi gûyem bih ez an est çi gûyem û râ ¹²⁸

El-hâsıl asnâf-ı 'ulûmdan şöyle habîrdür ki cem'-i fuzalâ-yı 'Arab u 'Acem anun bî-nazîr olduğına kâyıl ve ol server-i efâzıl nice zamân pâdişâhımızun eyyâm-ı devletinde müftî-i devrân olup belki zümre-i ins ü cânı iftâsıyla ihyâ itmegin müftî-i sakaleyn olduğu ve günde bin fetvâ-yı mesâyil-i dîn seyyîd-i hafıkayn virdüğü hadd-i tevâtüre irmişdür. El-hak ol yegâne-i rûzgâr her bir fende fâzıl-ı fuzalâ-yı nâmdâr olmışdur. Lâkin şu'arâ-yı şeker-güftâr gibi mahlas ihtiyâr itmemişler egerçi gazeliyyâtın tertîb-i dîvân üzre sebt itmişdür. Cümlesinden bir iki matla' u beyt-i zîbâ bir nüshâ-yı dil-küşâ-yı pür-ifşâya teyemmünen yazıldı. Şî'r :

Nice toyunca görem sen gül-i nâzûk bedeni
Kendü kirpigüm olupdur bana gözüm diken

Diğer : Gülşenün âb-ı revânı sana öykünmek neden
Oldı ise n'ola ger sengîn-dil ü nâzûk beden

Diğer : 'Aks-i hilâli düşse suya dir gören anı
Peyk-i revâne benzer elinde nacak tutar

Diğer : Dâmen-i himmetüm altında felek bir fânûs
Lâ-mekân şehri içinde bu gice bir 'asesin

Diğer : Agzına urmasa la'lün hâtemi mühr-i sükût
Sözlerüm sûzı salardı hırmen-i devrâna ot

Diğer : Gülşene servünden iletmış haber peyk-i sabâ
El uzatmış kim çenâr ide anunla merhabâ

ve sarây-ı 'âlem-i bî-bekâ olduğına binâen bu kıt'a-ı nasîhat-âmîzi ta'mir-hâne-i 'âriyet bâbında kalem-i 'anberînerden kitâb-hâne-i 'âlemde zuhûra getirüp rakâm kılmış. Kıt'a :

'Aklı yokdur cihanda anun kim
Taşa topraga harc ide mâl

İş bu dâr-ı gurûra nen sıgmaz
Nene yitmez bu kubbe-i 'âlî

HÂCE Çelebi : Hulasâ-i erbâb-ı vücûd ve zübde-i ashâb-ı fazl ü cûd Mevlânâ Ebu's-Su'ûd eban 'an ceddin dürlü ma'ârifle meşhûr ve ahlâk-ı kerîme ile makbûl-i tabâyi'-i cumhûrdur. Müddet-i medîd ve 'ahd-i ba'iddür ki pâdişâh-ı devrân ve Sultân-ı ehl-i imân ve Süleymân-ı mekânun zamânında 'ulemâ-yı ins ü cân ve re'is-i fuzalâ-yı cihân ve muktedâ-yı pîr ü cevân

¹²⁸ - Her ne söylesem ondan daha iyidir, ona ne diyeyim.

a'nî hazret-i müftî-i zamândur. Ol zât-ı 'azîmü's-sıfât kemâlat-ı bî-nihâyet ile Hazret-i Ebû Hanîfe-i sâni ve ol menba'u'd-derâcât ma'lûmât-ı bî-gâyetle müfessir-i âyât-ı Rabbânî ve şârih-i ehâdis-i Mustafâ ve vâris-i 'ulûm-ı Nebvî'dür. Hattâ Kur'ân-ı 'azîm-i fasâhat-âyât-ı mu'ciz-nişân ve Furkân-ı kerîm-i belâgat-ı gâyatı celilü's-şâne bir tefsîr-i bî-nazîr-i Şâfi ve şerh-i dil-peziîr-i vâfi kılmışdır ki Keşşâf-ı müşkil-küşâ hâll-i hakâyıkında hayrân ve Kâdî-i Beyzavî fehm-i dekâyıkında ser-gerdândur. Elhamdülillah ki sene isnâ ve seb'in ve tis'â mi'ede sa'y ü ihtimâmları ile ihtimâme irişüp pâdişâh-ı nîkû-fercâm hazretlerinin be-tarîk-ı hediiye-i 'izz ü pür-cûdlarına irişdükte makbûl-i hazret-i Sultân ve pesend-i fuzalâ-yı zamân vâkı' olup bir dâirede mazhar-ı 'inâyet ü ihsân olmuşdur ki kâbil-i ta'bir ü beyân degüldür ve bu kadar fezâyil ile ve bu denli câh ü celâl ile gâh gâh hâtır-ı şerîflerine ve tab'-ı latîflerine fâyiğ ü lâyiğ olur ki nazm-ı mevzûn-ı belâgat-meşhûn mânend-i dürr-i meknûn sahîfe-i rûzgâra kalem-i güher-bârlarından zuhûra gelüp mestûr ola. Şöyle ki kasâyid-i muciz-nişânları reşk-i Sahbân u Hassân ve inşâ-yı bediyü'l-beyânları gayret-i Vassâf u Hâce-i Cihân'dur. Bu kıt'a-i zîbende-me'âl anlarundur ki mâsadak-ı hâl ve şâhid-mâkaldür. Kıt'a :

Mahv olup gitmez mürûr-ı dehr ile bâkî kalur
Hâme ile safha-i evrâkda mezbûr olan

Safha-i 'âlem ne resme levhdür kim altına

Neşf eyler bir nefesde üstine mestûr olan

Bî-ser ü sâ mân gider nâ-bûd ü nâ-peydâ olur
Haşmet ü câh ü celâl-i 'âleme mesrûr olan

Hâb-ı gafletden uyan fehm it cihânun hâlini
Ey zamâne devlet ü ikbâline magrûr olan

Bu matla'-ı pâk eş'âr-ı sûznâklerindenür hayli 'âşıkâne ve rindâne vâkı' olmuşdur. Zîrâ ki sâbıkü'z-zikr 'âlem-i şebâbda bir şehvâr-ı zerrîn-rikâbun 'âşık-ı bî-karârı olup inân-ı ihtiyârı elden virmiş gâh u bî-gâh cevelângâh yirlerin seyr ü temâşâ için dolanurmuş. İttifâken bir kere mülâkat-ı dîdâr müyesser olmayup 'arsagâh içre sümm-i semend-i sabâ-refâtın bî-tereddüd ol üftâde-i dil-dâde hâk-i râha düşüp pâmâl-i rûzgâr olup bu matla'-ı bedi'yi bî-ihtiyâr hasb-i hâl-i dil-i zâr diyü nakş u nigâr kılmış bu evrâkda sebt oldu. Matla' :

Bî-hod oldum eser-i sümm-i semendin göricek
Hâlüm ey dil 'acebâ nic'ola kendin göricek

Fuzalâ-yı zamânun hûşmendi a'nî **PERVÎZ EFENDİ**: Güzide-i 'ulemâ-yı 'izâm ve pesendide-i fuzalâ-yı kirâmdur. Tab'-ı mustakîmi istikâmetle mevsûf ve zihn-i selîmi selâset-i güftâr ile ma'rûfdur. Sâbikan rikkât ile merhûm Sultân Mehmed Gâzî evkâfına mütevellî olan mürebbi'-i ezhâr-ı ravza-i letâif ve müretteb-i eşcâr-ı devhâ-i ma'ârif a'nî magfûren Nişancı Mehmed Beg'e müntesib olup anlardan Sultân-ı kişver-küşânun vezîr-i a'zâmı olan merhûm İbrâhim Paşa hîdmetlerine ihtisâs-ı 'ubudiyyet iktisâb idüp anlardan dahi müşârünileyh pâdişâh-ı nîkû-nijâdun 'ibâd-ı hâlisü'l-fu'adları silkine münselik olmuşlar ve

ekser-i ‘ulûmı merhûm Kemâl Paşa-zâde hıdmetlerinden tahsîl ü tekmîl itmekle ferîd-i dehr ve vâhid-i ‘asr olup mütâla’a-i dakîki tahrîr-i dürer-nisâr ve mülâhaza-i ‘amîki kalem-i ‘anberîne mukârin olmagla ma’ânî-i âsârı envâ’-ı ‘ulûmda tasnifât-ı mu’ciz-âyâtı ve asnâf-ı fûnûnda te’lifât-ı belâgat-ı gâyatı beyne’l-’ulemâ şuyû’ bulup ve ‘inde’l-fuzalâ mütedâvil ü matbu’ vâkı’ olmuştur ve merâtib-i menâsıbı tertîb ile bilâd-ı e’âzımda kemâl-i ‘adâlet ve nihâyet-i istikâmetle bir dâ’irede kazâ ve hükûmet eylemiştir ki havass ü ‘avâm kendüden hoş nûd u râzı ve belki kâffe-i enâm icrâ-yı şer’inden müterâzı olup eyyâm-ı ‘adâlet-şi’ârında âsûde-hâl ve müferrihü’l-bâl olmuşlardır. Hâlâ Sultân-ı zevî’l-ihtirâmın eyyâm-ı sa’âdet-fercâmında ‘izz ü fer’ ile Anadolu kâdî-’askeridür. Zât-ı hümayûn-sıfâtı melek-haslet ü dervîş-sıfât ve evkât-ı huceste-sâ’âtı ibâdât-ı Rabbânî ile ûmûr-ı ‘âmme-i zamâne mebzûl ve emn ü emânet ve dîn ü diyânet ile fuzalâ-yı devrân içre makbûl ve kemâlat-ı bî-nihâyet ile serâmed-i efâzıl ve isti’dâd-ı bî-gâyetle yegâne-i devrân ü bî-nazîr-i mevâlî ve zübde-i emâsil ve ehâdis ü tefâsirde şöyle zebân-âverdür ki nice nice ‘ulemâ-yı zamân yanında tilmîz-i bî-zebândur ve tab’-ı vekkâdî kemâl mertebede ve zihn-i pak-nihâdî bir derecede şöhet-i tâm bulmuştur ki kalem-i dü-zebân sahîfe-i devrânda ‘ale’-d-devâm pûyân u cûyân olsa binde birin beyân idemez. Ol kân-ı mürüvvet ve ma’den-i sehâvet mü’ellif-i tezkîreye envâ’-ı ri’âyet ve eltâf-ı bî-gâyet itmeden hâlî degüldür. El-hak zebân-ı Türkî ve Fârisî’de eş’âr-ı ‘âşıkânesi hûb ü mergûbdür. Bu ebyât anların cümle-i eş’ârındandır ihtisâr olup izhâr olundu. Ebyât :

Geldi bahâr n’eylesün ‘uşşâk bâdesüz
Yâ râh-ı ‘ışka nice gidilsün zevâdesüz

‘Uşşâk-ı mest-mendi kemendünle yed yûri
Zîrâ seg-i şikârî yaraşmaz kılâdesüz

Diğer : Hatt-ı ruhsâr-ı yâre gussa çekme
Olur zâhir çerâg dibi karanu

Diğer : Gelüben gıtdügi bir oldı hadeng-i gamzen
Kim umardı bu cefâyı bana mihmânumdan

Diğer : Ol hilâl ebrû meta’-ı hüsnini garrâ satar
Gah ‘arz eyler cemâlin gâh istignâ satar

Bana turup kıssa-i Ferhad ü Mecnûn söyleyen
Derd esrârını ol benden alur bana satar

ve müşârünileyh için akrânından birisi ba’z-ı kelime-i nâ-sezâ eyledügi mesmu’-ı şerîfleri oldukda bu kıt’a-i latîfi hûb buyurmuşlardır zerâfetden hâlî degüldür. Kıt’a :

Bize kâfir dimiş bir ‘âlim-i dehr
Yalanun yok durur hergiz fûrûgı

Müselmân diyelüm biz dahi ana

Dürûgî râ ne-şâyed cuz dürûgî ¹²⁹

Vâris-i ‘ulûm-ı Nebî **MEHEMMED Çelebi**: İstanbullî’dur. ‘Abdülkerim-zâde demekle ma’rûf ve ehâlî-i kibâr ve mevâlî-i ‘âlî-mikdâr içre ehliyyet ü mevlevîyyet ile mevsûf sâbikan pâdişâh-ı dîn-perver ve şâhenşâh-ı heft-kişverün ‘asâkir-i muzaffer-âyînine Anadolu kâdî ‘askeri olmuş hâlâ ol ûmûr-ı pür-hatardan dûr düşmüştür. Hadd-ı zâtında tab’-ı safâ-âyîni cânib-i nazma mâyl ve zihn-i pâki edâ-yı hûb ile pesendîde-i şu’arâ ve güzîde-i fusahâ olup ‘ulemâ-yı ‘izâm içre nazm-ı belâgat-nizâm ile şöhret-i tâm bulmuşdur. Zîrâ ki zebân-ı Türkî ve Fârisî’de gazeliyyâtı bî-hadd ve lisân-ı ‘Arabî’de kasâyid-i pür-fevâyidi lâ-yu’addur. Cümlesinden bir kaç matla’-ı ‘anber-âmîz ol tûtî-i şeker-rîzûn netâyic-i tab’ındandır sebt olundu . Matla’ :

Hâk-i ‘anber hevâsı hoş -bûdur
Kûy-i yârün güzelliği budur

Be-gû cân kun fedâ der-pîş-i men bes
Kunem hâhem zi la’let yek suhen bes ¹³⁰

Eşk der kûşe-i uzlet mey-i nâb est merâ
Ciger-i rîş dem-âlûde kitâb est merâ ¹³¹

MEHEMMED Efendi : Kara Çelebi demekle ma’rûf ü meşhûr Karaman’dandır. Sâbikan taht-ı Kayâsıra pâdişâhı olan Sultân Bâyezîd merhûmun vezîri olan Mehmed Paşa’nun babası mu’takâsından imiş. Rûz ü şeb ‘ilme iştigâl gösterüp ol devrde kuzât zümresinden ‘add olmuş ve mezkûr Kara Çelebi Karaman’da neşv ü nemâ bulup ‘ulûmı tahsîl idüp ‘ulemâ-yı Rûm içre ser-âmed olmuşdur ve bu devrde pâdişâh-ı âlem-penâhun ve Sultân-ı bârgâhun üç pâre tahtına kâdî-i nîk-baht olup kâffe-i enâm ve havass ü ‘avâm eyyâm-ı ‘adâlet-şi’ârında asûde-i rûzgâr olup mezkûrdan hoş nûd ü râzı olmuşlar. ‘Âkıbetü’l-emr dârü’l-fenâdan cânib-i serây-ı âlem-i bekâya ‘azîm ve taraf-ı huld-ı berîne ve sû-yi hûr ü ‘ayna müteveccih olmuş ve hadd-ı zâtında ehâlî-i fihâm ve mevâlî-i ‘izâm ve beyne’l-hası ve’l-avâm arasında sâhib-ma’ârif ü esrâr-ı ‘ulûma vâkıf imiş. Tabî’at-ı şî’riyyesi gâyetde hûb ve ekser sözleri ehl-i dil içre mergûbdür. Zîrâ ki ebyât-ı âşıkânesi tahayyül ü kelimât-ı rindânesi pür-mesel ve mahlası Bahrî vâkı’ olmuşdur. Ber-muktezâ-yı mahlas cümle-i eş’ârı firkat-âmîz ü mahabbet-engîzdür. Cümlesinden bir iki matla’ sebt olundu. Matla’ :

Gerçi her mehrûya dil virmekde mâhirdür gönül
Sen sanemden gayrıye baş egse kâfirdür gönül

Diğer : Baş egmez sen sanemden gayrıye dil
Döğerlerse Efendi tâb-ı deyince

¹²⁹ Yalana yalandan başkası yaraşmaz.

¹³⁰ Canını benim huzurunda feda et de yeter, feda ederim, yakut dudağından bir söz yeter.

¹³¹ Uzlet köşesinde göz yaşı saf şaraptır benim için, yaralı ciğerim kana bulanmış kitaptır benim için.

Diğer : Didi meh gün yüzüne bende olup
Kuluna da begüm bed-rû dirler

MEHEMMED Çelebi : Müftî-i zamân ve zübde-i cihân ve Sultân-ı fuzalâ-yı kirâm ya'nî şeyhülislâm Monlâ hazretlerinün büyük oğludur. Niteki vasfında dinilmiştir. Kıt'a li Bâkî :

Hâsıl-ı 'ömr-i girân-mâye-i şeyhü'l-islâm
Pertev-i lutf-ı Hüdâ nûr-ı Hüdâ revnâk-ı dîn

Menba'-ı mekremet ü lutf-ı Mehemed Çelebi
Vâhib-i fazl u 'atâ sâhib-i 'izz ü temkîn

Pâdişâh-ı nîk-nâm ve Sultân-ı hûb-fercâmun eyyâm-ı devlet-encâmında kâdî-i Şâm olmuş idi. Bu denlû fazl ü kemâl ile yine rind ü lâubâli şûrb-i meyden hâlî olmayup sâhib-meşreb kimesne idi. Şâm'dan 'azl olup âhir kazâ-yı Haleb'e vâli olmuş idi. Ol zât-ı 'âlî-mikdâr fûnûn-ı ma'ârifle nâmdâr ve zebân-ı Fûrs'de mûmâreseti bir haddedür ki kâbil-i imkân degüldür. Zîrâ ki güftârı gâyetde selâset üzre vâkî' olmuşdur ve hutut-ı muhtelif tahrîrine sâlik 'ale'l-husus nesta'lık yazmaga mâlikdür. Tedâvin-i şu'arâ-yı zamânı ve fuzalâ-yı cihânı cem' idüp her birisinden istifâde hâsıl itmiş idi. Hayfâ ki ol gül-i gülistân-ı ma'ânî olan evân-ı cevânide terk-i 'âlem-i fânî kılup ravza-i câvidânı makarr idindi. Mezârı şehir-i Haleb'dedür. El-hak tab'-ı tarab-engîzi nefîs ve zihn-i ferah-âmîzi güftâr-ı sûznâk ile selîsdür. Eş'âr-ı dürer-bârı üç zebân ile efvâhda cârî ve Fârisî'de kemâl-i mertebede tahayyüle kâdir ve sûz ü güdâz ile şâ'ir-i sâhir ve bi't-tab' hâtır-ı şerîfi şî're mâyil olduğundan Meylî mahlas ihtiyâr itmişler idi. Bu bir iki matla'-ı Fârisî anundur. Metâlî' :

Be-âyin-i vefâ bestî miyân râ yâ hıyâl est îñ
Çunîn nâzûk hıyâlî key tevân besten muhâl est îñ ¹³²

Ey der dilet be-ehl-i vefâ cevîr ü kîn heme
Çeşmet be-nâz reh-zen-i merdân-ı dîn heme ¹³³

KÂMÎ Efendi : Mevâlî-i 'izâm ve ehâlî-i fihâm zümresindendir. Mevlid-i şerîfi Edirne'dür. Hâlâ pâdişâh-ı kâm-bahşun nazar-ı 'inâyât-ı berekât-âyâtı ile kâm-bîn ü kâmrân olup şehir-i mezbûrda kâdî-i 'adâlet-nişândur. Ehliyyetde ehâlî içre akrânı nâdir ve fuzalâ-yı 'asr arasında fazl ile şâ'ir ve üslûb-ı inşâsı bî-nazîr olmanın pâdişâh-ı sa'âdet-encâm nâmına **Kimyâ-yı Sa'âdet**'i nesr ü nazm ile Türkî'ye terceme kılmışdur. Fi'l-hakika mezbûr kitâb kalem-i müşkîn-rakamdan dil-peziir olmuşdur. Bu bir kaç beyt-i 'âşıkâne vü rindâne anundur. Ebyât :

Esîr-i bend-i zülf ü kâkül-i 'anber-feşânum ben
İki zencîr ile baglu yatur şîr-i jiyânnum ben

¹³² Vefa yoluna kayıtlıdır ya da bu hayaldir, böyle ince düşünceye nasıl kayıtlanılabilir, bu muhaldir.

¹³³ Ey sen ki gönlünde vefa ehline karşı hep cefa ve kin var; gözün naz ile hep din adamlarının yolunu keser.

Diğer : Gülnâr-ı ruh-ı dilbere her kim ki semen dir
Âteş ola anun yiri mânend-i semender

Öykündügiçün sana çemende gül-i bî-har
Sûsen dil uzadup seni v'ey bunda dikene dir

Zühd ü salâhla sulehânun ercmendi a'nî **SÂLÎH Efendi**: Celâl-zâde Nişâncı Beg'ün birâder-i ercmendidür. Sâbıkan pâdişâhımızun 'asrında Mısır'a kâdî olmuş. Hâlâ kûşe-i 'uzletde teka'üd ihtiyâr idüp şâm ü subh takvâ vü salâh ile tahsîl-i amel-i sâlih ve terk-i fi'l-i tâlih itmeden hâlî degüldür. Ol efâzıl-ı zamân mevâlî-i 'âlî-şân mâbeyninde ferzâne-i akrândur. ve üslûb-ı inşâsı dil-küşâ ve tarz-ı gazel-i ferah-fezâ vâkı' olmuşdur. Cümlesinden bir iki matla' u beyt sebt olundu. Matla' :

Cism-i zerdüm kara kara daglardur bî-kıyâs
Şâh-ı 'ışk egnüme geydüirdi pelengî bir libâs

Diğer : Âhir oldu 'ömr çün geçdi hevâ şimden girü
N'eyleyin el virdüğün dünyâ bana şimden girü

Ben cihân sevdâlarından çekdüm el ey müdde'î
Ser-te-ser dünyâ gamını al sana şimden girü

Mevâlî-i 'izâmun hûşmendi a'nî **MEHEMMED ŞÂH Efendi** : Silsile-i neseb-i pâki Sultân-ı meşâyihü'l-kibâr ya'nî Hazret-i Mollâ Hudâvendigâr'a muttasıldur. Halbuki ol şehvâr-ı 'âlî-himmet evân-ı cevânîde ve gülzâr-ı fânîde gül-ruhsâr cevânlar ile 'ayş ü 'işret idüp cân ü dilden tâlib-i erbâb-ı meşreb olmagın şevk ü zevkden rûz ü şeb hâlî degülken yine Vâhibü'l-âmâl ve Feyyâz-ı müte'âlün 'inâyetiyle kesb-i kemâlât-ı dünyevî ve isti'dât-ı uhrevî tahsîl ü tekâmül kılup tefâsirde makbûl-i efâzıl ve ehâdisde kelâm-ı belâgat-nümâ ile güzîde-i emâsil ve ekser-i 'ulûm-ı menkûl ü ma'kûlde ser-âmed-i 'ukalâ ve her bir fende mümtâz u ser-efrâz ve akrân içre bî-hemta olmuşdur. Hâlâ ol 'azîz-i fuzalâ-yı zamân kazâ-yı Mısır ile kâmrândur. Egerçi tab'-ı latîfleri şi're mâyil ve nazma şâmildür ammâ çendân maksûd ü murâd idinmezler. Ahyânen berâ-yı hâtır-ı yârân bir gevher-i tâbân peydâ ider. Beyt :

Tagılur gam leşkeri oldukca kâkûl âşikâr
Nitekim ceys-i 'adû görünse tûg-ı şehriyâr

Vâris-i 'ilm-i Nebi a'nî **'ÂLÎ Efendi Hınnalı-zâde**: Ehliyyetle ehâlî-i fihâm ve mevleviyyetle mevâlî-i 'izâm zümresindendir. Pâdişâh-ı 'âlem-penâhun devâm-ı devletinde ve eyyâm-ı sa'âdetinde hâlâ 'izz ü ikbâl ve câh u celâl ile kâdî-i Medîne-i Şâm ve 'adâlet-güster-i kâffe-i enâmdur. Ol zât-ı kerîmetü's-sıfât Hınnalı-zâde dimekle ma'rûf ve dîn ü diyânetle mevsûf vücûd-ı şerîfî kemâlât-ı reng-â-reng ile ârâste ve 'unsûr-ı latîfî envâ'-ı ma'ârifle pirâstedür ve tab'-ı dürer-pâşı vâdî-i nazmda üç zebân ile şi're kâdir ve her 'ilme şürûh u havâşi yazmada mâhir ve fûnûn-ı 'arûz ü mu'ammâda ser-âmed-i ehl-i hüner ü müşkil-küşâ ve her birinde fevâid-güster ü kavâid-nümâ ve üslûb-ı inşâda Hâce-i Cihân gibi ferzâne-i zamân ü makbûl-i münşiyân-ı cihân ve eş'âr-ı Tâzî vü Fârisî ile meşhûr-ı 'Arab ü 'Acem ve güftâr-ı Türkîsi ma'nâ-yı rengîn ile gamzedâ-yı dil-i pür-gamdur. Zîrâ ki ser-â-pâ

hasb-i hâl-i ‘âşıkân-ı hazîn ve vasf-ı cemâl-i mâh-rûyân-ı zühre-cebîndür. Cümlesinden bu bir kaç Fârisî ve Türkî ebyât anlarundur. Ebyât

Goftem suhenî gûy merâ goft dehen nîst
İbrâm ne kerdem çi konem cây-ı suhen nîst ¹³⁴

Dil mî bered zi halk be-âşûb u kîn heme
Horsend hem nemî şeved ân meh be dîn heme ¹³⁵

Râkım-ı hurûfun i’tikadı budur ki eger mısra’-ı evvel böyle okunsa evlâ idi.

Dîn mî bered zi halk be-âşûb u kîn heme ¹³⁶

Bu bir kaç Türkî matla’ u beyt anlarundur.

Sabra kâdir ‘âşık u bî-nâz dilber görmedüm
Az ‘âşık olmadum ben az dilber görmedüm

Diğer: Her ne dirse dir gözün katl-i dil-i ahabda
Kimse tınmaz n’eylesünler arkası mihrâbda

Diğer : Ensesinden bilirüz hattı gülen mahbûbı
‘Ârif olan begüm ardından okur mektûbı

Diğer : Tâze ‘âşık ölice dâg ile zeyn it kolun
Yeni sikke çıkıcak eskisi geçmez pulun
Dil-i lâ-ya’kıl ile ol büt-i ma’kûl-şinâs
Hem-dem olsun diyelüm mi kulıyuz ma’kûlün

Diğer: Kabâ-yı lâle-gûnun üzre zerrîn hançerün cânâ
Şafakdan âşikâr olmuş hilâl-i ‘ıyddur gûyâ

Diğer : Ey hatun kâfirlerinden kişver-i imân harâb
Gevher-i mihr ü vefâ dürc-i lebünde teng-yâb

Diğer: La’l-i güher-engîzün bir âbdur âteş-reng
Ruhsâr-ı arak-rîzün bir âteş-i âb-âmîz

Bu mu’ammâlar dahi anların netâyic-i tab’larındandır. Bu dürc-i gence derc olundu.
Mu’ammâ be ism-i Ahmed :

Şevk-i la’lünle ey dürr-i nâ-yâb
Hûn-ı dil oldı dâmen-i ahabâb

Be ism-i Pir ‘Alî :

¹³⁴ Dedim bir söz söyle. Bana dedi ağız yok. Diredim ne yapayım sözün yeri yok.

¹³⁵ Bunca kargaşa ve kin ile insanların kalbini çalıyor, o ay yüzlü bununla da yetinmiyor.

¹³⁶ Kargaşa ve kin ile insanları dinden ediyor.

Bâr-ı derdümden benüm ey meh olupdur ham sipihr
Ser-nigûn oldu gamumdan müştêrî vü mâh u mihr

ve lehu benâm-ı Bekr

Kendüyi mürşîd-i 'ışka şu kim vâsıl ider
İki üç mertebede nâm-ı nîkû hâsıl ider

Diğer : Halk ider cennet hisâbın cümle olmuş şâd ana
Bir bütün dâmânın almış ol ider feryâd ana

AHMED Efendi: Konevî'dür. Pâdişâh-ı İslâm ve Sultân-ı 'âlî-makâm ve şâhen-şâh-ı zevi'l-ihtirâmun eyyâm-ı 'adâlet-şî'ârında zübde-i enâm ve nûr-ı dîde-i ümem ve seyyid-i Benî Âdem 'aleyhi's-selatü ve's-selâm bi'l-'izzî ve'l-ikrâmun Medîne-i Münevveresine nevverallahü kadî-i nîkû-nâm ve vâlî-i huçeste-fercâmdur. Beyne'l-mevâlî fezâyil-i bî-gâyeti fevka'l-had ve 'inde'l-ehâlî kemâlâtı bî-nihâyeti lâ-yu'addur. Bu matla'-ı mahabbet-engîz bir dilber-i hûn-rîz-i pür-sitîz elinden şikâyet-âmîz vâkı' olmuşdur el içinde meşhûr ve elsîne mezkûrdür Beyt :

El yüze tutup geçen cânân elinden el-gıyâs
Bana gün göstermez ol fettân elinden el-gıyâs

Vâkıf-ı esrâr-ı künûz-ı Nebî a'nî Hazret-i **Beşiktaşlı YAHYÂ Efendi** : Kevkeb-i âsmân-ı ma'ânî ve matla'-ı âftâb-ı nûrânî ve zâtî-i fezâyil-i rûhânî ile ârâste ve pirâstedür. Ol kıdve-i erbâb-ı necât leyl ü nehâr evkâtın tahsîl-i kemâlât-ı berekât-âyâta bezl idüp ehliyyet ü mevleviyyetle medrese-i Semâniyye'de müderris olmanın Müderrisî mahlas itmiş ve zümre-i müfessirîn ü muhaddisîn içre bî-misl ü ser-âmed-i efâzıl ve ma'lûmât-ı mu'ciz-beyân ile kâmil olmuş âhir Mevlânâ 'Abdurrahmân-ı Câmî'nün bu rûba'î-i kirâmı fehvâsı ile 'âmil olmuşlardır. Ruba'î

Ey dil taleb-i kemâl der medrese çend
Tekmîl-i usûl ü hikmet ü hendese çend
Her fîkr ki cuz zîkr-i Hudâ vesvese est
Şermî zi Hudâ be-dâr in vesvese çend ¹³⁷

Meydân-ı kesretten kenâr özleyüp İstanbûl karşısında Beşiktaş'ında bir cây-ı dil-keşi ihtiyâr idüp 'ibâdet-i Hak ile sülûk-ı meşâyih-i kibâra sâlik ve keşf-i kerâmât ile hakâyık-ı muhakkıkînün esrârına mâlikdür. Vâdî-i sülûk ile tarîk-ı tasavvufda tâk u yegâne-i âfâk olmuşdur ve pâdişâh-ı 'adl ü dâd ol hûb-nihâdânlar hüsn-i i'tikad idüp hâtır-ı 'âtırın ri'âyeten güftârına inkiyâd göstermişlerdür. Ana binâen ol bî-nazîr-i zamân niçe niçe bî-kes ü nâ-murâdların cüz'ice iltifât u işârâtla murâdât-ı küllîsin her ne vech ile olursa hâsıl kılup bermurâd u kâmrân itmeden hâlî degüldür. Hâlâ bu 'asrda 'ulûm-ı zâhire vü bâtne ile ferîd ve muhakkıkîn içre tahkîk ile sâhib-tecrîd ve 'ilm ü 'amel-i bî-bedel ile güzîde-i sülehâ-yı 'âlî-

¹³⁷ Ey gönül, medresede daha ne zamana kadar kemal talep edeceksin? Usûl, hikmet ve hendeseyi tamamlamaya daha ne kadar gayret edeceksin? Allah'ın zikri dışındaki her fikir vesvesedir. Allah'tan utan bu vesvese daha ne kadar sürecek?

ensâb ve âsmân-ı kerâmete kutbü'l-aktâb ve ahlâk-ı hamîde ile munisü'l-ahbâb ve etvâr-ı makbûl ile enisü'l-ashâb ve nazar-ı kimyâ-bahşı feyz-resân-ı şeyh ü şâb ve kelimât-ı hikmet-âyâtı bî-şübhe vü reyb ü irâdât-ı 'âlem-i gaybdür. El-hak ol kâşif-i 'ilm-i evvelîn ve ol 'ârif-i fûnûn-ı âhîrînün hakâyık-ı pür-dekâyıkın ehl-i zâhirün 'ukûli idrâk itmesinde 'âciz ü kâsırdur. Zîrâ ki ibârât-ı beligî ser-â-ser hakâyık ve işârât-ı fasîhi ser-â-pâ muvahhidâne ve pür-dekâyık vâkı' olmuştur. Bu bir kaç Fârisî ve Türkî beyt anlarındur. Tebeyyünen ve teberrüken cem' olup bu perişân evrâka sebt olundu. Rumûz-ı 'ulûm-ı âfâk ü enfüse vâkıf olan 'uşşâka mefhûm ü ma'lûmdur. Şi'r :

Gerçi der-gencem velî tenhâ neyem
Âşinâ-yı cânib-i cânâneyem

Diğer: Varlık kamu çün bir durur şâdî nedür mâtem nedür
Gel şeyhüm ol göster bana 'âlem nedür âdem nedür

Diğer : Ders-i 'ışkı biz fenâ sahnında tahsîl itmişüz
Sanmanuz seyr-i Semânî ile tekmîl itmişüz

Suhte olup yatduk tetimmât-ı talebde nice yıl
Me'kel-i derd içre gam tasını takbîl itmişüz

Ey müderrisler nedür bu sa'y-i bî-hâsıl müdâm
Bir gün ola diyesiz kim 'ömri ta'tîl itmişüz

Kâdî 'askerlik müderris mansıbı ednâ durur
Âsitân-ı hakkı kevnin üzre ta'cîl itmişüz

Diğer : Cihân mülkini 'ârifler görüp hoşca mekân dirler
İdinmezler mekân amma hemân hoş ca mekân dirler

HAYÂLÎ Efendi: Sultânü'l-'ârifîn ve burhânü'l-muvahhidîn hâdî-i râh-ı mustakîm a'nî Şeyh İbrâhim Nevverallahu merkadehu ¹³⁸ nun nûr-ı dîdesi ve sürûr-ı sînesi ya'nî ferzend-i dilbendidir. Ma'lûm-re'y-i sâhibân-ı kerem ola ki asl-ı pâkizeleri diyâr-ı 'Acem'dendür. Vilâyet-i Mısır'da tavattun idüp irşâd-ı fukarâ itmekle âsitâneleri melâz-ı şâh ü gedâ olmuştur. Sâbıkü'z-zikr müddet-i medîddür ki cânîşin-i vâlid-i erşedi olup erbâb-ı ma'ârif içre kutbü'l-aktâb-ı zamân ve mihr-i cihân-tâb-ı devrân. Muferr-i İslâmı ve'l-müslimîn nâsihü'l-halâyık-ı ecma'în ve zübde-i muhakkıkîn-i fûnûn ü dânişveri ve güzîde-i müdekkıkîn-i 'ukûl-i beşerî Hudâvend-i muhterem ve makbûl-i mükerrrem emirü'l-kelâm ve efsâh-ı fusahâ-yü'l-enâm mübdi'-i bedâyi'-i ma'ânî ve mazhar-ı sanâyi'ü'l-beyânı olmuştur. Dâimâ meclisi-i şerîfinde ve mahfel-i münîfinde müfessir-i **Mesnevî** ve mu'teber-i **Ma'nevî** olup gâh gâh garîk-ı bahr-ı vicdân olup bir gevher-rahşân-ı li-misli hâzâ peydâ iderler ki 'akl-ı hurdedân fehminde mest ü hayrân olur. ve ta'alluk-ı dünyevîden bî-haber olması mukarrerdür sebt olundu. Ebyât :

Sûzân-ı firâk ile oldı bu ciger biryân
Cân teşne yürek yandı onulmadı bu hicrân

Diğer : Musaffâ eyle dil levhin bugün nûr-ı tecellâdan
Cemâlin gösterür dil-ber çü mîr'at-ı mücellâdan

¹³⁸ Allah onun kabrini nurlandırsın.

SÜRÛRÎ Efendi : Gelibolu'dandır. Sâbikan şâh-zâde Sultân Mustafâ hazretlerinin hâcisi olmuş ve hadd-ı zâtında pesendîde-i ehâlî ve güzîde-i mevâlî kemâl ü fazl ile ser-âmed-i akrân ve hulk-ı 'azîm ile yegâne-i devrân ve ferzâne-i cihân idi. Kütüb-i mütedâvile nîce nîce şürûh ü havâşi ve tefâsir ü ehâdis yazmışdır ve kelimât-ı dür-pâşî yokdur. Her bir 'ilmde dürlü dürlü su'âl ü cevâb kılınmış ve zebân-ı Fârisî'de olan tedâvin-i selefe ve **Şebistân-ı Hayâl**'e ve halli âsân olmıyan resâ'il-i mu'ammâya ve **Mesnevî**-i pür-Ma'nevî'nün altı cildine tafsîl üzre şerh yazup her birisin erbâb-ı hâle ve tâlib-i kemâle gün gibi zâhir ü 'ıyân itmişdür ve zât-ı 'azîzi beyne'l-ihvânü'z-zamân zühd ü takvâ ile mevsûf ve fuzelâ-yı 'âlî-güher içre fûnûn-ı ma'ârifle ma'rûfdur. ve sanâyi'-i şî'rde ma'lûmât-ı pâk birle kava'id-güster ve fûnûn-ı 'arûz ü kâfiye bilmede hünerver ve üç zebân ile nazma kâdir ve her birinde hûb ü mâhirdür. Ammâ ittifâk-ı erbâb-ı hünere ve re'y-i ashâb-ı nîk-muhazzar şöyledür ki te'lifât u ma'lûmâtı ol pîr-i suhen-güsterün şî'rine ber ter ola ve bu denlü fazl u kemâl ile evâhir-i 'ömründe kimseye ser-fürû' itmeyüp kûşe-i 'uzletde **El fakru fahrî**¹³⁹ muktezâsınca kana'at kılup dâ'imâ meserret-i vahdet ile mesrûr ve 'ayş u huzûr üzre olup evkât-ı 'azîzin kitâb-ı nahv u sarf idüp vech-i ma'âş tahsîl kılurdu. Defe'ât ile hâk-i pâ-yi kimyâ-eserlerine râkım-ı hurûf-ı tezkire yüz sürmüşdür. Eş'âr-ı tasavvuf-âmîzi bî-hadd ve güftâr-ı tahayyül-engîzi lâ-yu'addur bu bir kaç beyt ile iktifâ olunup sebt olundu. Nazm :

Fâş olupdur gün gibi sırrum benüm ey âftâb
Dûd-ı ahumdur olan ortada bir pâre hicâb

Diğer : 'Âşıkum gün yüzünün nakşına şâhum ezeli
Seni nakkâş-ı ezel kudret eliyle yazalı

Âl ile aldayup aldı dil-i sûzânımız ah
Şol kara gözlerini nâz ile bir kez süzeli

Diğer : Nûş kıl gel berü başdan bu gözüüm yaşından
Ki dimişler sanemâ suyı bunar başından

VUSÛLÎ Efendi (Mollâ Çelebi) : İstanbulludur. Sarây-ı âlemde zât-ı şerîfî asl u neseble sâhib-i 'izz ü vekâr ve gülistân-ı fazîletde nahl-i vücûdı ezhâr-ı ma'ârif ile ber-hûrdâr ve zihn-i selîmi hem-vâr ve tab'-ı mustakîmi üstüvâr olmanın rûz ü şeb tahsîl-i 'ulûm idüp fezâyil ile makbûl-i her merzbûm olmuşdur. El-hak mevleviyyet ü ehliyyet ile ehâlî vü mevâlî içre meşhûr ve eyülikle efvâhda mezkûrdur. Müddet-i medîd ve 'ahd-i ba'iddür ki ferzend-i ercmend-i Sultân-ı zamân ya'nî şeh-zâde-i kâmrânun taht-ı felek-medârında kâdî-i nîk-baht olup havass ü 'avâm eyyâm-ı 'adâlet-şî'ârında asûdedür ve rûzgâr-ı emn ü emânetle ber-hûrdâr olmuşlardır ve subh ü şâm tab'-ı deryâ-mü'essirleri cem'-i 'ulûma şâmil ve tarz-ı nazm ü nesrde fusahâ-yı 'asr gibi kâmil ve her birinde ser-âmed-i emâsil ve pesendîde-i merdüm-i efâzıldur. Kelimât-ı rengîn ile sâhib-edâ ve ebyât-ı şîrîni çâşni-bahş-ı 'uşşâk-ı şeydâdur. Kasâyid-i selîs-i dil-keşi nefîs ve ferah-resân-ı dil-i gamzedâdur. Şâh-zâde-i merâm-bahş

¹³⁹ Fakirlik benim övüncümdür (Hadis) El-Aclunî, **Keşfü'l-Hafâ**, Dâru İhyâi't-Turas, Beyrut, 1352, C. II, s.87

hazretlerinin hâk-i pâ-yi sa'âdet-encâmılarına irişmek ile Vusûlî mahlas itmişlerdür. Eş'âr-ı güher-bârları bî-hadd ü lâ-yu'addur. Cümlesinden bir iki gazel-i bî-bedel ile bir kaç beyt sebt olundu. Şi'r :

Mihr-i 'âlem geşt ider etrâf-ı çarhı sû-be-sû
Olmaga sen âftâb-ı hüsne bir dem rû-be-rû

Mû-miyânunla dehânun bahsin itdük yok yire
Kaldı fark olunmadı biri birinden mû-be-mû

Dem-be-dem deşt-i belâda firkatünde dilberâ
Akıdı çeşmümden benüm seylâb-ı eşküm cû-be-cû

Görmege sen meh-cebîni her gice mâh-ı felek
Şehrün için tolanur menzil-be-menzil kû-be-kû

Ey Vusûlî let urur hışm eyleyüp ana küsûf
Sakın olmasun güneş ol mâh-rûye rû-be-rû

ve lehu : Kılca boynumda benüm yok didiler
Yâr tîgîn bilebilsem ne biler

Nâr-ı hicrûnle yanup gitdi yürek
Hânçerün sînede cânâ ne diler

Derd ile nây-sıfât nâlelerün
Niyedür zârı ne içün iniler

Görmesün hâk-i reh-i yârı müjen
Ugrıdur sürmeyi gözden o siler

Reh-i firkatde Vusûlî her dem
Ra'd-ı âhumla felekler gümüler

Diğer: Düşer mihründen ey meh necm-i eşküm bir nice gündür
Bana yâr olmadı tâlî' sitârem katı düşkündür

Diğer : Bana ey verd-i handânım olur cennet sakar sensüz
İder ruh-ı revân âhir bedenden can sefer sensüz

FEVRÎ Efendi: İbn-i 'Abdullah'dur. Zümre-i müderrisîndendür. Zât-ı latîfî mevâlî-i 'izâm içre eyülikle ma'rûf ve hâtır-ı 'âtır safâ ile ehâlî yanında mevsûf ve cevdet-i tab'ı müstakîm ve zekâ-yı zihni selîmdür. Kütüb-i mütedâvilenün her birinde mütâla'a-i ferhunde-âsârı 'allâme-i rûzgârî-i lillah dürr-i kâyıl dimege zebânın kâyıl itmiş ve mazmûn-ı nezâket-meşhûnı 'ale'l-fevr elfâz-ı gûn-â-gûn ile rişte-i nazma çeküp sarrafân-ı bâzâr-ı ma'rifet ve kûşe-nişînân-ı çârsû-yı mahabbete 'arz eyler. Anlar dahi mânend-i sübha elden düşürmeyüp her an vird-i zebân idinür. Hakkâ budur ki kasâyid-i pür-fevâyidi bî-hadd ve terci'-bend ile mu'aşşer ve tahmis ve tesdisleri lâ-yu'addur. Ser-â-ser meşhûr-ı âfâk ve hasb-i hâl-i 'uşşâk-ı pür-iştiyâk olmışdur. Cümlesinden bir gazel ile bir nice matla'-ı bî-bedel sebt olundu. Gazel

Geçmezem hergîz belâ-yı derd-i ‘ışk-ı yârdan
Dönmezem kalu belâda itdigüm ikrârdan

Meyl idersem cennete ruhsâr-ı yâri terk idüp
Rûz-ı mahşer zâhidâ mahrûm olam dîdârdan

Şöyledür za’fûm ki bir dîvâre söykensem eger
Peykerüm teşhîs olunmaz sûret-i divârdan

Çeşm ü müjgânun ruhun ‘aksiyle bir gülzârdur
Kim anun etrâfına havlı çekilmiş hârdan

İrmek istersen dehân-ı la’l-i yâre Fevri’yâ
Geç iki ‘âlemden el çek cümle yokdan vardan

Diğer : Bûlbûl aglar başı üzre gözi yaşın dökerek
Şâh-ı gül haste olup var ise çıkardı çiçek

Diğer : Gamzesi ol kâtilün bu sîne-i sad-çâkde
Sanki bir cellâd tîgıdur gömülmüş hâkde

Diğer : İsterin Hak haste-dil ‘uşşâka cânânın vire
Umarın derdin viren Allah dermânın vire

Diğer : Benzerin kadd-i nigâre diyü ey gülbin-ter
Olma magrûr sakın tîz biten tîz yiter

Diğer : Emvâc-ı kulzüm-i ‘ışk bu nüh kıbâbe sıgmaz
Ehl-i dile ne mahfî deryâ habâb a sıgmaz

Diğer : Pençe-i şîr-i belâdan cismümi ayırmasun
Tîg-ı hasret etle dırnag arasına girmesün

Gazel : Yâr yanında rakîb-i bed-likâ eksük degül
Cânuma derdâ ki hergiz bir belâ eksük degül

‘İşk ile tolmuş sınık dilden çıkar mı kâkülün
Genc olan vîrânede çün ejdehâ eksük degül

Birbirinden saklayup ‘aks-i cemâlin dem-be-dem
İki çeşmüm ortasında mâcerâ eksük degül

‘Âşîka yokdur vefâsı gerçi dil-dârun velî
Lutfi çoğ olsun cefâsı vaktehâ eksük degül

Sûretâ gerçi Muhammed denlü yok dilber velî
Sûretâ Yûsuf dir isen Fevri’yâ eksük degül

Nazîre li-mü’ellifîhi:

Her taraftan ‘âşık seng-i cefâ eksük degül
Başuma her kanda ise bir belâ eksük degül

Gönlüme geh gam gelür gâhi belâ vü mihnetün
Menzilümden devletünde âşinâ eksük degül

Vay bana kim bir senün gibi efendüm yok durur
Yohsa sana ey şeh-i hûbân gedâ eksük degül

Nîce tenhâ bulayın ey gün seni yanunda çün
Sâye gibi bir rakîb-i bed-likâ eksük degül

Dem-be-dem derd ü gamun dilde füzûn olmakdadur
Gerçi la’l-i ruh-bahşundan devâ eksük degül

‘Âlem-i ma’nâ yüzinden ‘âşık-ı sâdık gerek
Yohsa ‘âşık ey peri-rû sûretâ eksük degül

Dîde vü dil ol güneş yüzliye nâzır olalı
‘Ahdi’yâ mâbeynimüzde mâcerâ eksük degül

RİZÂYÎ Efendi (Kassab-zâde): Zümre-i müderrisîndendir. Kassab-zâde ‘Abdülkerim Çelebi demekle ma’rûf ve eyülükle mevsûf ve mevlidleri Dimetoka ve asılları Bursalı’dur. Mürebbisi Edirnevî olmagla Edirneli ta’dâd olunur ve kendüleri dahi Edirnelü mezkûr olmadın hazz iderler. Fi’l-hakika mezkûr şehrin âb u hevâsı safâ-bahş u neşât-engîz ve hâk-i hoş -nihâdı mihr-âmîz çâr faslı çâr ‘unsûr gibi mu’tedil ü latîf ve cümle âdemleri ehl-i dil ü kâ mildürler. ve mezbûr şehrin bâg u bağçesi reşk-i riyâz-ı berrîn ve gonce-fem olan perî-rû dilberlerle gayret-i hûr ü ‘ayndurlar. Bu bende-i müsâfir ol diyârda mücâvir oldukda bir had-dede fuzalâsından bî-nihâye mahabbet ve bir derecede şu’arâsından bî-gâye mürüvvet ve insâniyyet görmışdür ki takrîr ü tahrîr olmadan geçmişdür. Ol cây-ı ferah-efzânun gülis-tânların ve gül gibi şükûfte-cevânların ve serv-i sehî gibi hırâmân hûbların ve çarsu vü esvakda olan mahbûbların seyr itdükde bir gazel-i bî-bedel vâsf-ı tarîk ile zuhûra gelüp mestûr olup bu evrâka tahrîr olundu. Gazel li-mü’ellifihi

Tâ âmedem çu bâd be-bustân-ı Edrine
Gul gul şükûft dil zi gülistân-ı Edrine ¹⁴⁰

Şimşâd u serv ü huld-ı melâfîd-i ba’d ez in
K’âmed be-cilve serv-i hırâmân-ı Edrine ¹⁴¹

Yâd ez kenâr-ı Şat u zi Bagdâdiyân dehed
Seyr-i kenâr-ı Tunca vü hûbân-ı Edrine ¹⁴²

¹⁴⁰ Edirne bahçesine rüzgar gibi geldiğimde gönlüm, Edirne gül bahçelerinden dolayı gül gül açıldı.

¹⁴¹ Şimşir ağacı, servi ve cennet bahçesi, övünemez oldu. Çünkü Edirne'nin salınan servisi güzektü.

¹⁴² Tunca kenarını ve Edirne güzellerini seyretmek Şatt'ın kenarını ve Bağdatlıları hatırlatır.

Her dem zi bes ki yârî-i yârâne mi konend
Şermende em zi yârî-i yârân-ı Edrine ¹⁴³

Tâ dâmen-i visâl-i tu âred be-kef şode
‘Ahdî zi hayl-i hâk-nişinân-ı Edrine ¹⁴⁴

Mezkûr Rızâyî Efendi’nün zihn-i selîmi fezâyil ile ârâste ve tab’-ı mustakîmi ahlâk-ı kerîme ile pirâstedür. Kemâl-i fazl ile yegâne-i akrân ve evsâf-ı hamîde ile pesendîde-i yârân ve fusaha mâbeyninde fasâhatle bî-nazîr-i zamân ve bülegâ içre belâgatle erkân ve envâ’-ı ma’rifetle mergûb-ı ehl-i ‘irfân ve fûnûn-ı şi’r ü ‘arûz ü mu’ammâda hûb ve ser-âmed-i akrân ve üslûb-ı inşâda Vassâf-ı devrân ve belki ferîd-i cihân eş’âr-ı şîrîni lezîz ü nefîs ve güftâr-ı rengîni muhayyel ü selîsdür. El-hak hoş -tab’ u ‘âlî-sohbet ve âdemî-sîret muhibb-i fukarâ ve melce-i şu’arâdur. ve bu bende-i sergeşte ekser-i evkât Dimetoka ve Edirne ve İstanbul ve Bursâ’da hâk-i pâ-yi şerîfleri ile müşerref olup dürlü dürlü istifâde idüp nazm-ı dürer-bârların gûş-ı hûşe gûş-vâr kılmışdur. Ol bülbül-i gülşen-i fasâhat ve tûtî-i şekeristân-ı belâgat üç zebân ile şi’re kâdir ve her birinde mânend-i Hassan ve Selmân-ı sâhirdür. Bu Fârisî matla’lar anundur. Mâsadak-ı hâl ve şâhid-mâkâldür erbâb-ı fehm ü zekâyâ ‘arz olunur. Şi’r:

Peyk-i belâ vü kâsıd-ı derd ü Resûl-i gam
İmşeb-i ber menend biyâ ey ecel tu hem ¹⁴⁵

Tohm sân eşk berâh-ı tu nisârî kerdem
Şâdmânem ki der in mezra’a kârî kerdem ¹⁴⁶

Mübârek bâd ‘ıyd-ı ân derd-mend-i bî-kes ü k’urâ
Ki û kes râ nemîgûyed mübârek bâd ü kes û râ ¹⁴⁷

Bu matla’ı kendülere Ferhad Aga iltimâsıyla medrese virüldükde buyurmuşlardur tamâmı hasb-i hâlleridür. Beyt :

Sipehr râ çi ‘aceb ger koned ri’âyet-i dîn
Ki cuz mütâba’at kâr key koned gerdûn ¹⁴⁸

Türkî dilinde eş’âr-ı tarab-nümâsı ve güftâr-ı dil-küşâsı bî-hadd ü lâ-yu’addur. Bu ebyât-ı rengîn mânend-i sünbül-i müşkîn-i feyz-resân meşamm-ı dil-i hazîn-i ‘âşıkân-ı miskîndür sebt olundu. Şi’r:

Sünbülleri girihlerini çözdü çün nigâr
Bir hüsn dahi bağladı hatt-ı ‘izâr-ı yâr

Diğer : Kosam bin dâğı dâğ üstine sînemde ‘aceb sırdur

¹⁴³ Her an o kadar çok samimi dostluk gösteriyorlar ki Edirne'nin güzellerinin dostluğundan utanıyorum (beni şımartıyorlar).

¹⁴⁴ Ahdî, senin kavuşma eteğini ele geçirmek(sana kavuşmak) için Edirnelilerle birlikte yaşamaya başladı.

¹⁴⁵ Bela, dert ve gam elçisi bu gece benim yanımda, ey ecel sen de gel.

¹⁴⁶ Senin yoluna tohum gibi göz yaşı saçtım. Bu tarlada bir iş yaptığım için mutluyum.

¹⁴⁷ O kimsesiz dertlinin bayramı mübarek olsun. Öyle ki o kimseye mübarek olsun demiyor, kimse de ona demiyor.

¹⁴⁸ Felek alçağı gözetirse buna şaşılmaz; çünkü felek gözetmeden başka ne yapar ki...

Tefâvüt itmez ol gün yüzlinün yanında hep birdür

Diğer : Öyküdi gün yüzüne çün gördi bâd-ı sarsar
Bir sille çaldı nâre çıkdı gözünden odlar

Diğer : Göz yumup açınca dök dise o şeh bana güher
Merdüm-i çeşm-i güher-pâş ideyin dir göz kapar

Diğer : Kasr-ı ‘ayşa pür safâ bir suffedür câm-ı şarâb
Görinür hep ‘âlem anda tob âyine habâb

Diğer : Giceler subha dek gamdan uyanuk oldugum bilmez
Dirigâ sûz-ı mihr ile uyanuk oldugum bilmez

Dürug-ı bî-fürûgun dökülüp her gice agyârun
O mihr subh-veş mihrinde sâdık oldugum bilmez

Diğer : Görse kerîm derd ile agyâr hazz eyler güler
Nice agramayayın kim hâlûme itler güler

Bu gazel-i pür-mesel-i rengîn dahi ol şâ’ir-i bî-bedelündür.

Gazel : Ne yâri görmege kudret ne ‘arz-ı hâle fırsat var
Mecâlüm yok marîz-i ‘ışk olaldan hayli hayret var

Ne özge derd olur yâ Rab belâ-yı ‘ışk kim andan
Ne sıhhat ârzûsı ne ümîd-i istirâhat var

Kül itdi cümle eczâmı egerçi âteş-i firkat
Harâret niye bâkî bilmezin bende ne hâlet var

Koyup kûy-i nigârı ehl-i cennet olmak istersin
Mukarrer anladum kim sende sûfî ey belâhet var

Cefâsı yok güzel olsa virürdüm yolına varı
Rızâyî mâhasal hercâyî sevmekden ferâgat var

‘**ABDÜLGANÎ Efendi:** Bolı’ dandır. Zümre-i müderrisîndendir. Rûz ü şeb ‘ilm-i ma’kûl ve mütâla’a-i tefâsir ve ehâdis-i Resûl ‘aleyhisselâm kılmagla dâhil-i erbâb-ı ma’ârif olup şöhret-i tâm bulmuşdur. Hâlâ Bursa’da kırk akçe medreseye mutasarrıfdur. Fünûn-ı ‘ilm-i evvelîn ü âhirîni tettebbu’ idüp muhakkıkîn içre benâm ve câmi’-i cevâhir-i ma’ânî olmagın bi’t-tab’ her nesneden ganî ve kayd-ı hestî-i dünyâ ve mihnet-i nistî-i haşmet-i bî-bekâdan mustagnîdür. Zîrâ ki hergîz meyl-i mâl ü menâl ve asla arzû-yı câh ü celâl itmeyüp dâ’imâ tâlib-i erbâb-ı kemâl ve mâ’il-i ashâb-ı vecd ü hâldür. Ol ‘ulûm ile akrân içre bî-bedel olan deryâ-dilün zebân-ı Fârisî’de gazelleri muhayyel Türkî dilinde nazm-ı dürer-bârı pür-mesel vâkı’ olmuşdur. Cümlesinden bir iki matla’-ı Fârisî ve Türkî sebt olundu. Matla’

Habâb-âsâ ne refî ez ser hevâ-yı câm-ı Cem bîrûn

Ez ân hergiz zi bezm-i mey ne hâhem zed kadem bîrûn ¹⁴⁹

Diğer : Ol hilâl-ebrû eliyle şöyle atdı gam beni
Barmagın ısırdı kaldı seyr idüp ‘âlem beni

Diğer : Tâli’imdür bana gün göstermiyen devr içre âh
Âsmânî bir belâdur ‘âşıkâ baht-ı siyâh

Diğer : Dünyâya virmez isem n’ola şarâb-ı nâbı
Kim reşk-i âsmândur her nilgûn habâb ı

Nazîre li-mü’ellifihi:

La’l-i firâkı kana gark itdi la’l-i nâbı
Rindânı reşki bogdı suya dūr-i hoş-âbı

Pîr MEHEMMED Efendi: ‘Azmî mahlas ider. Mevlidi İstanbul ve zâtı zümre-i müderrisîn içre makbûl ve ‘ayân yanında Defterdâr-zâde dimekle meşhûr ve asl ü neseble cevân-baht u sa’âdetmend diyü efvâhda mezkûr ve akrân içre şânla ser-bülend ve kütüb-i ma’kûl ü menkûli tertîb üzre görmede ma’ânî ile hûşmend ve üç zebân ile tab’ı nazma şâmil ve her birinün edâyı ferah-nâkinde şu’arâ-yı kâmil gibi kâbil ve ol şâ’ir-i nâzûk-mizâcun eş’âr-ı güher-bârı çok asla ta’rîfe ihtiyâç yokdur. Bu bir kaç matla’-ı rindâne ki hasb-i hâl-i dil-i dîvânedür anundur. Metâli’ :

Râhatum peykân u tîrûn olalı hâtır-nişân
Kim dimişler râhatü’l-insânü fi hıfzı’l-lisân ¹⁵⁰

Diğer Gördiler kand-i leb-i dilbere dildâde geçer
Didiler tûtî-i Hinde dahi ol kande uçar

Diğer : Rûzgâr itdi kapundan ten-i hâkümüzü dūr
Sa’yimüz oldu işigünde hebâ-yı mensûr

Diğer : Tolanurmuş işitdüm gice ile kûy-ı cânânı
Sakınsun tutılır bir gün götürsün mâh-ı tâbânı

Diğer : Hadd ü pâyânı mı var yoluna cânlar virenün
Rişte-i cândan idünsen yaraşur pîrehenün

Nazîre li-mü’ellifihi:

Sâde pehlûya seni çekmege kâd eylemese
Böyle ditrer miydi üstüne düşüp pîrehenün

‘İLMÎ Efendi: İstanbullu zümre-i müderrisîndendür. Sâbikan Galata kâdîsi olan Burûsalu Remzi Efendi’nün mahdûm-ı erc mendidür. Kütüb-i ‘ulûmı tertîb üzre tahsîl ve kemâl ü hüner

¹⁴⁹ Köpük gibi başımdan cam-ı Cem sevdası çıkmadı. Bu yüzden şarap meclisinden asla dışarı adım atmayacağım.

¹⁵⁰ İnsanın rahatı dilini sakınmakla olur

ile zât-ı ferhunde-sıfâtın tekmîl itmeden bir dem ve bir an gâfil degüldür. Ana binâen tab'-ı şerîfî 'ilm ile pirâste ve hulk-ı latîfî hilm ile ârâste ve zebân-ı Fârisî vü Türkî'de nazm-ı belâgat-nizâm ile makbûl-i 'ulemâ-yı kirâm ve pesendîde-i hâs u 'âm olmuştur. Bu bir kaç matla' u beyt anundur bu evrâkda sebt olundu Şi'r:

Nice bir hicr-i hamı zülf ile kaddüm bükeyin
Nice bir ol kuru sevdâyile yaşum dökeyin

Diğer : Terk-i 'ışk-ı yâri dün mezheb idinmişdüm bu gün
Gördüğüm gibi yüzün yârün yitirdüm mezhebî

Diğer : Seni bir koçmag için bin yaşamakdur dir imiş
Dil-i dîvâne cihanda göreyin bin yaşa sen

BÂKÎ Efendi: İstanbulî zümre-i müderrisîndendür. Evân-ı cevânîde ve bu sarây-ı fânîde okımak semtine sâlik düşüp az zamânda çok ma'rifete mâlik olmuş. Zîrâ ki yârân-ı safâdan çekilüp kûşe-i 'uzlet ihtiyâr idüp rûz ü şeb tahsîlde cidd ü cehd kılup evkât-ı 'azizin 'ilme sarf idüp bir mikdâr isti'dâd u istihrâc peydâ itdükden sonra meydân-ı faziletde gûy-i sebkati çevgân-ı ma'ârifetle emâsil ü akrânından kapup merâtib-i 'ulyâ kesb kılup yegâne-i devrân ve ferzâne-i cihân olup kendü sa'y-i cemîli ile muktedâ-yı ehl-i imân u dîn ve fuzalâ-yı cihân ya'nî müftî-i devrân hazretlerinün dânişmend-i hûşmendi olmuş ve ol bülbül-i gülzâr-ı suhen ve tûtî-i şeker-şikenün eş'âr-ı pür-sûzı ve ebkâr-ı dil-efrûzı meşhûr-ı âlem ve manzûr-ı dîde-i benî âdemdür. 'Ale'l-husûs tarz-ı gazelde mânend-i Hilâlî elfâzı lâmi' ve darb-ı meselde Seyfî gibi nass-ı kâtî ve üslûb-ı kasîdede tarz-ı Ümîdî selîs ü hem-vâr ve ma'ânî-i hası bî-şümâr kemâl-i şöhreti bir hadde ki pâdişâh-ı bülend-himmet ve Sultân-ı sa'âdet-mend-i pür-şevket hazretlerinün gûş-ı hûşına ebyât-ı dil-firîbi ve kelimât-ı garîbi irişince ahvâlin tecessüs itmişler. Ba'de'l-vukû' bu asl kimesne dânişmend olup medresede yatmak lâzım degül diyü buna bir medrese tedârik eylen diyü kâdî' askerlere emr-i 'âlî vârid olmuş. Ber mucib-i hükm-i şâhî ve ber-muktezâ-yı takdîr-i İlâhî kasabâ-i Silivri'de otuz akçe bir medrese sadaka buyruldu. Hakkâ budur ki silsile teselsül bulalı bir dânişmende böyle ri'âyet ü 'izzet olup sa'âdet bulmamışdur. Hâlâ İstanbul içinde Murâd Paşa Medresesi'ne bedeli ile getürdiler. Ümmiddür ki nice nice merâtib-i 'âliye sudûr ide. Mezkûrun eş'ârı gâyetde hûb ü mergûb olduğuçün ser-â-pa meşhûr ve efvâhda mezkûrdür. Ana binâen ihtisâr üzre bir iki gazel-i bî-bedel ile bir kaç metâli' u beyt-i pür-mesel sebt olundu. Gazel :

Mûje haylin düzer ol gamze-i fettan saf saf
Gûyiyâ cenge turur nîze güzâran saf saf

Seni seyr itmek için reh-güzer-i gülşende
İki cânibde turur serv-i hırâman saf saf

Leşker-i eşk-i firevân ile ceng itmek için
Gönderür mevcilerün lücce-i 'umman saf saf

Câmi' içre göre tâ kimlere hem-zânûsın
Şekl-i sakkada gezer dîde-i gıryan saf saf

Gökde efgân iderek sanma geçer hayl-i küleng
Çekilür kûyuna mürgân-ı dil ü can saf saf

Ehl-i dil derd ü gamun ni'metine müstagrak
Dizilürler keremün hânına mihman saf saf

Vasf-ı kaddünle hırâm itse 'alem gibi kalem
Leşker-i satrı çeker defter ü divan saf saf

Kûyun etrâfına 'uşşâk dizilmiş gûyâ
Harem-i Ka'be'de her cânibe erkan saf saf

Kadrüni seng-i musallâda bilüp ey Bâkî
Turup el bağlayalar karşuna yâran saf saf

Gazel : Başlar kesilür zülf-i perîşânun ucından
Kanlar dökülür gamze-i bürrânun ucından

Peykân-ı belâ sîneme işler geçer oldı
Ey kaşları yâ nâvek-i müjgânun ucından

Dil darbın urur kalbe firâkunda dem-â-dem
Kan aglasa zahmum n'ola peykânun ucından

Yüz sürmek umar pâyüne üftâdeler ammâ
Nevbet mi deger kimseye dâmânun ucından

Murg-ı dil-i Bâkî'yi görün fâhte-âsâ
Efgân ider ol serv-i hırâmânun ucından

ve lehu eyzân :

Bana çok cevır itdigünçün ey sipihr-i bî-vefâ
Âhumun dûd-ı kebûdı oydu ulaşdı sana

Diğer : Halk-ı 'âlem gül seveydi kâşki bülbül gibi
Ol lebi gonçe bana تنها kalurdu gül gibi

Diğer : Turmaz yanımda hançerini vasf ider nigâr
Ya'nî bana tokundurur ol şûh-ı şîvekâr

Diğer: Gönül dâğı gamunla sînede bir şem' uyandırmış
Çerâğ-ı 'ışka garrâ kızıl altını uyandırmış

Gönüller nakdin almış yâr girmiş halka-i zikre
Bir iki derdmend âvâzeyi varmış tolandırmış

ve lehu Rubâ'î :

Hatt-ı la'l ile kaşı cânânun
Bir rübâ'îsidür gülistânun
Bir belâdur salındı 'uşşâka
Dostum kâmet-i hırâmânun

Diğer: Gonceler içre nihân eyleme gülberg-i terün
Ya'nî seyr eyleyelüm sîneni çöz dügmelerün

Diğer : Bilini koçmadadur ol sanemün derd ü belâ
Yohsa 'âşıklara şîrîn lebi hâzır helvâ

Nazîre li-mü'ellifihî

Teşne dil mîve-i vaslun derem ister cânâ
Sundı sîb-i zekânın didi ki işte elmâ

Diğer : Zahm-ı sînemden okun yârelerin hep alma
Tursun Allah'ı seversen hele bir pâre meded

NEVÂLÎ Çelebi: Zümre-i müderrisînden Saruhânî'dür. İsm-i şerîfî Nâsûh ve tab'-ı latîfî ma'ânî miftâhıyla meftûh kemâl ile 'allâme-i rûzgâr ve şî'r ü inşâda mânend-i dîgerân-ı nâmdâr kendü zu'mı ile iki zebân ile nazma kâdir ve her birinde sözleri nâdir zîrâ ki ma'nâ-yı garîb ve elfâz-ı 'acîb bulmada mâhir geçinür. Kuvvet-i şî'riyyesi pür-zûr ve ebyât-ı muhayyeli gayr-i meşhûr lâkin vâsıta-i şî'r-i dil-keş ile pâdişâh-ı sa'âdet-bahşdan iltifât-ı bî-hadd ve ihsân-ı bî-'add bulup otuz akçe medreseyi ahz ü cer itmiş. Madde-i nazmı şöyle musanna' u muhayyel ve dil-fırîb ü karîbü'l-fehm vâkı' olmuşdur ki 'akl-ı dûr-endîş murâd olan me'ali anlamada asla teşvîş çekmez. Li-misli hâzâ şî'r :

Tasavvur kerde em ez hande-i şîrîn-dehâneş râ
Nemîdânem hayâlî çü konem mûy miyâneş râ ¹⁵¹

Hayâlî şod tenem ez hicr-i ebrûyeş hemî tersem
Ki baht bed zi çeşm-i ân perî dâred nihâneş râ ¹⁵²

Mahfî olmaya ki erbâb-ı hased dirler ol şâ'ir-i pür-ma'ânînün sâbıkan diyâr-ı 'Acem'de meşhûr olan Mevlânâ Lisânî-i Şîrâzî-i sihr-sâzun beş beyit bir gazelin bir iki beytin az çok tasarrufla tevârüd itmişler ve zikr olan gazel-i meşhûrun ebyâtı budur ki mestûr olundu. Gazel

Ne bâ tu dest-i heves der-kenâr tuvân-kerden
Ne ârzû-yı tu ez dil beder tevân-kerden ¹⁵³

Ne ez pey-i tu tevân-ı âmeden zi bîm-i rakîb
Ne bî tu rû bediyâr-ı diger tevân-kerden ¹⁵⁴

¹⁵¹ Tatlı gülüşünden ağzını tasavvur ettim, ince belini hayal edemedim.

¹⁵² Kaşlarının ayrılığından vücudum hayale döndü, korkarım ki kötü baht o perinin gözünden vücudumu gizler.

¹⁵³ Ne sana kavuşmak mümkün ne de senin arzunu gönülden çıkarmak mümkün.

Beyâ ki girye-i men an kadr zemîn ne guzâşt
Ki der firâk-ı tu hâkî be ser tevân-kerden¹⁵⁵

Çünân ki ‘âşık-ı rûy-i tu em zi bîm-i hasûd
Key ez cemâl-i tu kat’-ı tevân-kerden¹⁵⁶

Lisânî ez pey-i vasl-ı tu ger ziyâde reved
Metâ’-ı zindegî eş muhtasar tevân-kerden¹⁵⁷

Ma’lûm-ı erbâb-ı ma’rifet ola ki tevân kerdeni tevânem kerd itmişdür. Matla’

Ne bâ tu dest-i heves der kemer tevânem-kerd
Ne ârzû-yı tu ez dil beder tevânem-kerd¹⁵⁸

El-kıssa tamâm-ı gazel böyle vâkı’ olmuşdur. Ümmîd budur ki ol fâzıl-ı cihân ‘ankaribü’z-zamân sâir şu’arâ-yı suhen-perver gibi kişver-i nazmda hüner-güster ve dilâver-i bahr ü berr olup erbâb-ı hussâd-ı bed-nihâddan âzâd ola ma’ânî hisârın feth-i fütûh ide veyâhud böyle şi’r dimeden tevbe-i nasûh eyleye. Bu gazel-i pür-mesel dahi anundur sebt oldu. Nazîre-i H’âce Hâfız dimişdür hâlî degüldür.

Âmed berât-ı ‘ışk muvakka’ benâm-ı mâ
Şükr-i Hudâ ki hükm-i kazâ şod benâm-ı mâ¹⁵⁹

Sâkî licâm-ı câm be-gülgûn bâde zen
În dem ki hest tevsen-i gerdûn râm-ı mâ¹⁶⁰

Câmî ki mâ beyâd-ı lebeş der keşîde îm
Reşk âvered Hızr u Sikender be câm-ı mâ¹⁶¹

Der dil hevâ-yı sîm-’ızârân u nev-hotân
Mârâ be suht âteş-i sevdâ-yı hâm-ı mâ¹⁶²

Geh tîr ü geh kemend keşîd âh-ı mâ velîk
An âhû-yı remîde ne şod sayd-ı dâm-ı mâ¹⁶³

Yâbîm tâze cân ü ser ez hâk ber konîm
Bûyend çün sekân-ı tu rûzî ‘ızâm-ı mâ¹⁶⁴

¹⁵⁴ Rakip korkusundan ne senin peşin sıra gelebiliyorum ne de sensiz başka bir diyara yönelebiliyorum.

¹⁵⁵ Gel artık, benim göz yaşım ıslanmadık toprak parçası bırakmadı ki senin ayrılığından başa toprak saçabileyim.

¹⁵⁶ Senin yüzüne öyle aşğım ki hasetçi korkusuyla senin yüzünden bakışlarımı nasıl alabilirim?

¹⁵⁷ Lisanî sana kavuşmak için eğer aşırı giderse onun rızkını azaltmak lazım.

¹⁵⁸ Ne sana kavuşmak mümkün ne de senin arzunu gönülden çıkarmak mümkün.

¹⁵⁹ Aşk berâtı bizim adımıza uygun (yerinde) geldi; Allah’a şükrolsun ki kaza hükmü bizim adımıza çıktı.

¹⁶⁰ Ey saki, gül renkli şaraba kadeh dizginini vur. Çünkü feleğin atı şimdi bize boyun eğmiştir.

¹⁶¹ Bizim onun dudağını anarak içtiğimiz kadehi Hızır ve âskender kıskanır.

¹⁶² Gönlümüzde gümüş yanaklılar ve taze yüzlülerin sevdası var. Boş sevdamızın ateşi bizi yaktı.

¹⁶³ Bizim ahımız kah ok çekti kah kemend attı; fakat o ürkek ceylânı avlayamadık.

Der keş Nevâlî sâgar-ı ‘işret ki der elest
Teslîm kerde end be-mestî zimâm-ı mâ ¹⁶⁵

AHMED Paşa (Na’tî) : ‘Ulemâ-yı ‘izâm ve fuzalâ-yı kirâm silkinde benâm olmaga rûz ü şeb ikdâm ve dem-be-dem ihtimâm gösterüp cidd ü cehd ile mülk-i ma’ârifde emirü’l-keâm olmuştur. Mevlid-i vücûd-ı pür-cûdî pâ-yi taht-ı Sultân-ı zamân ve ârâm-gâh-ı a’yân ü erkân-ı dîvân ve mesned-i vüzerâ-yı zî-şân ve me’men-i ‘ulemâ-yı sâhib-’ukûl a’nî İstanbul’dur. Sâbikan zamân-ı Sultân Selîm Hân ibni Sultân Süleymân’da ‘izz ü şân ile mahrûse-i Bagdâd-ı behîşt-âbâda kâdî-i ‘adl ü dâd olan ‘ulemâ-yı mütebahhirînün hem-karîni merhûm [u] magfûr Kâtib Mahmûd Efendi’nün ferzend-i dil-bendidür. Vâlid-i erc Mendleri gibi lahza lahza fûnûn-ı ‘ilme ragbet gösterüp evkât-ı ferhunde sâ’âtin gâh nahv u sarf ve gâh mantık u kelâma ve gâh riyâziyâte ma’tûf tutup ‘ömr-i ‘azîzin mezkûrlara masrûf kılmadadır. Anunçün ihvân-ı ma’ârif içre nîkû-halef olup eyyâmın telef itmemişler. Esâlib-i ma’ânî tahsîl ve füsûl-i beyânî noksânın tekâmül idüp re’y-i cemîli kendüye delil kılmışlar. Hâlâ kırk akçe medreseye mutasarrıfdur. Ümmiddür ki min ba’d berekât-ı ‘ilm ile ‘âlî-menâsıba kadem basup mu’azzez ü mükerrem ola. Akrânına nüktedânîlıkla fâyık u gâlib ve emâsiline dakika-şinâsılgıla ser-bülend olmaga lâayık ve ma’lûmat-ı pâki idrâkine muvâfık ola. Musâhabet-i yârâna râğıbdur ki fevâid-i ‘ulûmdan ve kavâid-i manzûmdan behrever ve esâlib-i inşâdan bâ-haber tab’-ı latîfi savb-ı şî’re âşînâ ve zihn-i derrâki durretü’n-nazma ve lisân-ı selâse nazma mâyl eş’âra kâmil ve semt-i gazelde dili kâyıl ve peyrev-i merdüm-i efâzıl ve sene hamse ve tis’în ve tis’â mi’ede diyâr-ı Bagdâd’a bu bende-i nâ-şâde bir mektûb-ı dürrer-bâr ile bu gazel-i âbdârları gelüp tezkîre-i erbâb-ı nazma nakş u nigâr oldı.

Bana ‘ışkunda ziyân itme gibi sûd olmaz
‘Âşîka ölmeden özge dahi maksûd olmaz

Koma hat vech-i münîründe gider pâk eyle
Nûrdur pâdişehüm nûrda çün dûd olmaz

Mâh-veş sîneni burc-ı bedene çekmeyenün
Kevkeb-i bahtı gülüp tali’i mes’ûd olmaz

İtmege bezmüni ‘işret gicesinde hoş -bû
Micmer-i tende yanan cân gibi bir ‘ûd olmaz

Kûy-i firdevsüni Na’tî çü makam eylemeye
‘Âkıbet nâmı anun dünyede Mahmûd olmaz

DÂ’Î Efendi : ‘Acem’dür. Zümre-i müderrisîne hem-dem Mollâ Şemsü’d-din dimekle meşhûr ve ahlâk-ı hamîde ile efvâhda mezkûrdur. Nahl-i vücûdî ve gülbin-i bûdî ravza-i Bagdâd ve gülşen-i Rûm’da neşv ü nemâ bulmuş ekser-i kütüb-i mütedâvileyi mütâla’a-i şerîf

¹⁶⁴ Senin köpeklerin bir gün bizim kemiklerimizi koklayınca, yeniden can bulup topraktan başımızı kaldırırız.

¹⁶⁵ Ey Nevalî işret şarabını çek, çünkü eleste bizim dizginimizi sarhoşluğa teslim ettiler.

ile bir bir tettebbu' idüp beyne'l-akrân çevgân-ı hüner ile gûy-i sebkati meydân-ı ma'ârifden kapup kâmrân olmuş. Şi'r ü inşâda mahâret ile erbâb-ı zekâ içre ma'rûf ve zât-ı pâki takvâ ve tahâ retle mevsûfdur. Eş'âr-ı dil-efrûzı gün gibi rûşen ü pür-sûz ve güftâr-ı pür-sûzı müstahsen ü dil-efrûzdur. Üç zebân ile nazmı bî-hadd ü lâ-yu'addur. Cümlesinden bir Fârisî matla' ile bir kaç Türkî metâli' ve beyt kalem-i dü-zebâne gelüp bu nüshâ-yı perîşâne sebt olundu. Şi'r:

Teşbîh-i in cemâl be-Yûsuf nemî konem
Ey şâh-ı Mısr-ı hüsn tekellûf nemi konem ¹⁶⁶

Diğer : İklim-i vücûda şeh-i 'ışkun seferi var

Ol gamze dil oldu sorun ana haber i var

Diğer : Geçdi vasl eyyâmı ammâ hiç gitmez yâddan
Cân çıkar bu ârzû çıkmaz dil-i nâ-şâddan

Diğer : Kâyıl oldım dehenünden bir agız tatlu dile
Ol dahi gaybdedür gâh olur gâh olmaz

Diğer : Yapmış idüm devlet ikliminde bir ümmîd evin
Yıkdi seyl-i vâdi-i mihnet anı bünyâddan

Diğer: Ey lebi la'l ü sözi dürr ü dehânı yâkût
Kim dimiş hokka-i yâkûtuna ur mühr-i sükût

Benzerün la'lüne dimek diler idi yakût
Lebini dişledi hatem didi kim eyle sükût

Sâbıkan Lahsa beglerbegiliginden münfasıl olan Sâlih Paşa oğlu Mehemed Paşa bu matla'ları mütâla'a kıldukda nazîre tarîkıyla bu matla'-ı mesel-endûz-ı pür-sûzı zuhûra getirüp mestûr kılmışlardır.

Alıcak cevri ile cânım o dehânı yakût
Bûse-i la'l-i lebin virdi dile hakk-ı sükût

DERVİŞ Çelebi: İstanbulî'dür. Tâife-i müderrisîndendür. Mevâlî-i fihâm ve 'ulemâ-yı 'izâm vâris-i 'ulûmü'l-enbiyâ-yı ve'l-mürselin salavâtullahı 'aleyhim ecma'in a'nî Bagdâd kâdîsi iken fevt olan Mevlânâ Kemâl Efendi'nün ferzend-i ercmendidür. Fünûn-ı 'ulûmı şeyhü'l-islâmu ve'l-müslimîn re'isü'l-'ulemâi'l-mütebahhirîn el-hâdî ilâ tarîkı'l-hakka'l-yakîn müftî-i sakaleyn-i bi'l-istihkâk ve muktedâ-yı merdüm-i hafikeyn-i 'ale'l-'ıtlakun hıdmet-i şerîflerinden tahsîl ü tekmîl itmişdür. Zât-ı pâki 'ulûm-ı 'Arabiyye mütâla'asında gâlib-i akrân ve zebân-ı Fârisî'de ma'lûmâtı pesendide-i yârân-ı Fârisîdân ve esâlib-i şi'r ü inşâdan bi'l-küllîye haberdâr ve her birinün anlamasında müsellemler-i zurafâ-yı rûzgârdur. Egerçi hâtır-ı deryâ-mü'essiri nazm cânibine ziyâde mâyl degül lâkin ahyânen tab'-ı güher-bârından bir dürr-i âbdâr peydâ kılur ki gûş-vâre-i merdüm-i dâna olmaga lâayık u sezâdur. li-misli hazâ beyt

¹⁶⁶ Bu güzelliği Yusuf'a teşbih etmiyorum., ey güzellik ülkesinin şahi, abartmıyorum.

Bir nihâl-i gam durur gûyâ bu cism-i nâtûvân
Besler anı dem-be-dem gör kim bu çeşm-i hûn-feşân

Diğer : Firkate yüz tutdı vuslat-ı hâl bir yüzden dahi
Hicre âgâz itdi yâr ahvâl bir yüzden dahi

Bosna vilâyetinde Saray nâm kasabada pâdişâh-ı ‘âlem-penâh neslinden olan ‘Osman Şâh’a
bir kasîde-i Fârisî tahrîr itmiş hemân tasvîr olundu. Matla’ :

Ey der-i devlet-sarâyet Ka’be-i âzâdegân
V’ey harîm-i bâ-safâyet kible-i üftâdegân ¹⁶⁷

¹⁶⁷ Ey devlet sarayının kapısı, hür insanların Kâbesi olan padişah, mutluluk haremın düşünlerin kiblesi olan padişah.

RAVZA-İ SÂLİS Sancak begleri ve defter-dârları zikrindedür.

AHMED Beg : Pâdişâh-ı murâd-bahş ve Süleymân-ı bâ-dıraş hazretlerinün eyyâm-ı sa'âdet-fercâmlarında beglerbegiler sınıfında leşker-şiken-i rûz-ı micâ a'nî Karaamid paşası olan İskender Paşa'nun oğludur. Elveledu sırru ebihi¹⁶⁸ muktezâsınca fâris-i meydân-ı şecâ'at ve mükemmel-i fazîlet ve derk-i firâsetle sâhib-derâset ve tâli'-i hümâyûn ve ikbâl-i rûz efzun ile Sultân-ı cihân-gîr ve hâkân-ı bî-nazîr paşaları silkinde şümâr ve altun başlu sancak ile kâmkâr ve sâir akrân içinde 'adâletle nâmdâr ve eyâlet ü emâret birle sâhib-vekâr ve hergîz dâ'ire-i kevn ü mekânda azharü mine's-şems ve ebyenü mine'l-ems¹⁶⁹ oldukları tâli' ü lâmi' ve sa'âdetmendlerinde lâmi'dür ve hadd-ı zâtında vücûd-ı şerîfi ve tab'-ı latîfi tahsîl-i envâ'-ı fazîlet itmeden bir an ve bir sâ'at hâlî olmayup dâ'imâ dest-i cûdı ile sâni-i Hâtem ve hulk-ı 'azîmiyle makbûl-i ehl-i 'âlem leylen ve nehâren tûtî-i şîrîn makâl olup iki lisân ile eş'arı zebân-ı hâl dimege tâlib ü râgıb ve her birinde fâzıl ü kâmil. Bu bir nîce eş'ar-ı âbdâr ol emîr-i nâmdârundur.

Cihan çu bâdiye men teşne-i harâb der u
Nişân-ı âb boved ser-be-ser ser-âb der u¹⁷⁰

Dil giriftâr-ı kemend-i zülf-i 'anber-bûy-ı tust
Ger dil-i mâ râ güşâdî hest ez pehlû-yı tust¹⁷¹

Dem-be-dem dil gark-ı hûn ez hancer-i dil-cûy-i tust
Surhî-i rûy-i şehîd-i 'ışk ez pehlû-yı tust¹⁷²

Diğer : Benüm bir zülfî cîm ebrûsı nûn eglencem olmuşdur
'Aceb dîvâneyem bend-i cünûn eglencem olmuşdur

DERVİŞ Beg: Bunlar dahi İskender Paşa'nun nûr-ı dîdesi ve sürûr-ı sînesi a'nî ferzend-i ercmend ü halef-i hûşmendidir. Hâlâ pâdişâh-ı gerdûn-medâr ve Süleymân-ı 'âlî-tebâr hazretlerinün nazar-ı 'inâyet-i bâ-berekâtleri ile nîce nîce a'lâ vilâyetlerde sâhib-'adl ü dâd ve mîr-i pâk-nihâddur. hakkâ ki ahlâk-ı huçeste-sıfât ile big oldukları yirlerde âyin-i şer' ve kanûnı kendüye reh-nümâ kılup ra'ıyyeti asûde-hâl ve dest-i cûd ü dâd ile müreffehü'l-bâl itmişdür. Binâen 'alâ-zâlik necm-i tâli'-i dirahşân ile emsâl ü akrân içinde 'âlem gibi serbülend ve 'akl ü fehm ile hûşmend ü bî-mânenddür. Zîrâ ki evkât-ı şerîfin zâyî' itmeyüp mütâla'a-i kütüb-i 'Arabîyye kılmaga müdâvemet gösterüp lezzet-i tâm alup meleke-i râsihe peydâ kılup 'ilm dâdıyla bî-hemtâ olup lisân-ı selâsede sâhib-lügaz ve mu'ammâdan geregi gibi habîr ve her birinde bî-nazîr ve zebân-ı Fârisî'de eş'arı tarab-efzâ ve Türkî dilinde nazmı

¹⁶⁸ Çocuk babasının sırrıdır.

¹⁶⁹ - Güneşten daha parlak ve...

¹⁷⁰ Dünya çöl gibi, ben ise onda susuzluktan harabım. Orada su izi tamamen seraptır.

¹⁷¹ Gönül senin anber kokulu kemendine giriftardır. Eger bizim gönlümüz için bir açılma ferahlık varsa o sendendir.

¹⁷² Gönül senin devamlı gönle yönelik hançerinden kana bulanır. Aşk şehidinin yüzünün kırmızılığı sendendir.

selâset-nümâ ve hadd-ı zâtında ‘âlî-himmet ü dervîş-nihâd olmanın mahlas-ı şerîfin Dervîş itmişlerdür. Bu bir nîce beyt anundur.

Mând vakt-i sefer ez kûy-ı tu cân u dil-i men
Dil ü can mând revan şod ten-i bî-hâsıl -ı men ¹⁷³

Kerdem izhâr be-yâran gam-ı bîmârî-i dil
Nîst yârî ki koned rahm ü dehed yârî-i dil ¹⁷⁴

ve hazret-i İmâm Hüseyin radiyallahü ‘anh mersiyesinde bu matla’ anundur.

Lâle girift dâmen-i meydân-ı Kerbelâ
Âhir nehuft hûn-ı şehîdân-ı Kerbelâ ¹⁷⁵

Bu Türkî matla’lar dahi anlarundur.

Gördi şeb-ruhsâr-ı ‘âlem-tâbı şem’-i encümen
Subha dek dökdi ‘arak reşkinden ey nâzûk beden

Diğer Mîr-i meclis olalı Hüseyinle ol gonçe-dehen
Tâc-ı zerrîn ile nergis oldı şem’i encümen

Bu iki matla’-ı rengîn dahi anlarundur sebt olundı.

Şâh-ı tûbâ kâmet-i dildâre benzer benzemez
Cilveden tâvûs-ı hoş -reftâra benzer benzemez

Diğer : Serîr-i saltanat gavgâ-yı ‘âm âlâmına degmez
Neşât-ı devlet-i dünyâ hilâl encâmına degmez

‘**ADLÎ Efendi** : Pâdişâhımız Sultân Süleymân şâh-ı pür-intibâhun begler begilerinden olup elsîne-i nâsda şece’ât ü şehâmetle ma’rûf ve efvâh-ı enâsda tedbîr ü firâsetle mevsûf olan Mustafâ Paşa-yı Gâzî’nün ferzend-i dil-pesendi ve veled-i hûşmendidir. İsm-i şerîfleri İbrâhim ve tab’-ı münîfleri râst-rev oldukları cihetden mustakîm ve sâhib-’akl-ı selîm ve mâlik-i hulk-ı ‘azîmdürler. Mevlidleri İstanbul ve ‘adâlet ü istikâmetle beyne’n-nâs meşhûr ü makbûldürler. Hâliyâ ‘izzet ü rif’at ile sâhib-livâ ve fahrü’l-ekâbir-i ve’l-’ulemâ olup zîr-destleri fukarâyâ ‘adl ü ‘adâletleri taht-ı yed-i şerîfleri olan zü’efâyâ şefkat ü merhametleri bir gâyetdedür ki mutasarrıf oldukları livâların re’âyâ ve berâyası müşârünileyhi yâd itdüklerinde İbrâhim Halil-i sâni ve binâ-yı kulûb-ı fukarâyâ bânîdür diyü elkâb iderler. Tarıkında bî-misl ü mânend ve esbâb-ı ‘imârete sâhib-i kudret ve ercend-i ma’rifetde tab’-ı şerîfi bülend ve nezâket ü zarâfetde zihni dil-pesend ve hadd-ı zâtında hoş sohbet ve tâlib-i

¹⁷³ Senin diyarından ayrılmak vaktinde can ve gönlüm kaldı. Gönül ve canım orada kaldı, boş bedenim yürüdü.

¹⁷⁴ Dostlara gönül hastalığının gamını açıkladım. Bir dost yok ki acıyıp gönle yardım etsin

¹⁷⁵ Kerbela meydanının eteğini lale kapladı. Kerbela şehitlerinin kanı artık uyumaz oldu.

ehl-i ma'rifet ü nîkû-haslet ve râgıb-ı a'mâl-i sâlihe-i dünyâ ve âhir ve'l-hâsıl her vechile evsâf-ı hamîde ile ârâste ve hilye-i pesendîde ile pirâste olup fûnûnün ekserinde mâhir ve zebân-ı Fârisî'de mûmâresetleri zâhir taziy-i evkât itmeyüp 'ömr-i girân-mâye-i mütâla'a-i kütüb-i mu'teber-i Fârisî'ye sarf idüp sa'y ü kûşîş ile gûy-i sebkati meydân-ı ma'rifetden rûbûde kılmışlar. Nazm ü inşâda bî-nazîr ve hall-i 'akd-i mu'ammâda pîr ve Mîr 'Alî Şîr 'ulûmı külliyyât ü cüz'îyyâtı geregi gibi zabt etmişler. Hattâ 'ilm-i 'arûz ü kâfiye ve edvâr ü lügâz ve ta'miye ve tevârihi sihr mertebesine iletmışlerdür. Tarîk-ı gazelde sâhib-tarz-ı nâdir ve edâ-yı selîs ile fikr-i bikre kâdir ve bu bir nîce metali' u ebyât u gazel ol bî-bedelün zâde-i tab'-ı latîfi ve berâverde-i zihn-i şerîfidür ki şâhid-i hâl ve masduka-i makâl olmag için vâsıta-i kalem vâsıtî-nihâd ile nakş-ı sahîfe-i hoş -sevâd olundu. Şi'r :

Kemân ebrûlara mâyl olur gördi dil-i hâki
Nişân itdüm müj e tîrine ben de cism-i sad-çâki

Sehâb-ı nîlgûn sanma bu çarh-ı nüh-kıbâb içre
Benüm dûd-ı derûnumdur boyadı göge eflâki

Gönül bagına yol saldı hayâl-i yâr çeşmümden
Su yolından girür bâga gör ol agyâr-ı bî-bâkî

Diğer : Gel bahr-ı 'ışka girme gönül bî-kenârdur
Zülf-i nigârı anma ki anun karasıdur

Diğer : Gamdan âzâd olmadı bir dem dil-i gamnâkümüz
Sanki mihnetle ezel tahmîr idüpdür hâkümüz

Dâglardur verd-i ahmer şerhalar mevzun-nihâl
Gûyiya gülzâr-ı gamdur sîne-i sad-çâkümüz

Her nihâl-i tâzenün turmaz akar ayagina
Su gibi meyyâl olupdur şimdi kalb-i bâkümüz

'Âlem istersen bizi seyr it ki başka 'âlemüz
Eşkimüz encüm olupdur dûd-ı âh eflâkümüz

Her nazarda 'Adlî'yâ bir nîce sûret gösterir
Câm-ı Cem'dür sanasın âyîne-i idrâkümüz

Bir zamânda eyyâm-ı rûze müştedd ve hengâm-ı savm-ı oruc ay gibi mümted olup zurefâ-yı zamân ol yâr-ı suhen-dândan rûze bizi muhkem tutdı ve açlık cânımuza kâr itdi 'ıydıyye bir şi'r-i âbdârla elem-i 'atşımız ref' ve gam-ı cû'ümüz ref' eylesenüz olmaz mı diyü iltimâs itdüklerinde bu gazel-i dürer-bâr ve nazm-ı âbdâr ber-yed-i nûyed 'ıyd-ı pür-tâmid ve feth-i bâb-ı 'işret-i safâya kilîd olmag için nazm etmişler.

Ber-tarâf olsa gam-ı rûze vü bayram olsa
Merhabâ itmege el virse güzel râm olsa

Feth-i ebvâb-ı safâya bu kilîd olsa mahall
Tâ ki 'işret yüzini görmege bir câm olsa

Rûz-ı ‘ıyd itse cihan halkını şâd u hurrem
Elem ü gamla heman zâhid-i hod-gâm olsa

Ne gerek yâri girift itmege meclisde eger
Nuklümüz dâne olup neş’e-i mey dâm olsa

‘Adli’yâ rûze dükendi gel e bayram idelüm
Nîce bir söyleyelüm derd ile ahşâm olsa

‘ÖMER Beg (Hayâlî-zâde): Gülbîn-i şerîfî ve penpe-i latîfî mîr-i erbâb-ı ‘ukûl a’nî ravza-i dil-küşâ-yı İstanbul’da neşv ü nemâ bulmuş. Zamân-ı evâilde ve bu sarây-ı âb u gilde bekâdur. Eben ‘an ceddin samîm-i kalbden ecdâd-ı pâk-nihâdî ber-güzîde-i Âl-i ‘Osmân ve vâris-i taht-ı Süleymân-mekân ve şâhenşâh-ı gerdûn-nişân Sultân Murâd Hân hazretlerinün dergâh-ı âsmân-bârgâh ve çetr-i felek-sây-ı hilâfet-penâhlarında bende-i hâlisü’l-fu‘âd ve ‘ibâd-ı pâk-i’tikâdları silkinde münselik olan erbâb-ı devletdendir. Zât-ı ferhûnde-sıfâtı ve vücûd-ı huçeste-simâtı fehm ü firâsetle pesend-i tabâyî’-i vüzerâ-yı kâmil ve re’y-i ‘âlem-ârâsı ‘akl ü kiyâsetle makbûl-i ümerâ-yı ‘âdildür. Hâlâ hezârân dürlü i’zâz-ı hudâ-dâdla ravza-i dârü’s-selâm-ı Bagdâd’a gül-i gülzâr-ı kemâl olup hâzin-i hazîne-i beytü’l-mâl ya’nî defterdâr-ı mâl olmak emrine me’ûrdur. Rûz ü şeb hulk-ı ‘azîm ve nefis-i kerîmle mesâlih-i müslimîni görüp herkesi hoş -hâl kıldukdan gayrı o emr-i hıdemât-ı pâdişâhîde kevkeb-i hûrşîd-i ‘âlem-gîrin kendüye delîl ve cidd ü cehd ile mevâbit-ı emvâl-i mîrîde sa’y-i cemîl gösterüp erbâb-ı aklâm ve ashâb-ı huçeste-fercâm içre benâm olmuştur. El-hâsıl ‘akl-ı nüktedânî menba’-ı cevâhir-i ma’ânî ve zihn-i hurde-nişânı zîver-bahş-ı rûhânîdür ve neseb-i nîkû-hasebi dürr-i sade-i bahr-ı sıdk u irâdet ve gevher-kân-ı safâ ve sufût ü cevher-sütûde sâhib-dilân ve zübde-i halef-i mîr-i suhenverân ve kuyûd-ı ‘âlemden âzâd olmagla mevsûf Hayâlî-zâde dimekle ma’rûf elveledü sırru ebihi ¹⁷⁶ kavliyle eş’âr-ı güher-bârı herkese kesb ü kâr ise anlara mir’ât-ı cibîl ve ebyât-ı mahabbet-engîzi haylîdür. Netâyic-i fikr-i sihr-endûzın hurde-şinâsân-ı suhenver ve şîrîn-zebânân-ı şîrîn-güster ‘ukûd-ı cevâhir-i manzûmelerin güşvâr-ı sem’-i kabûle teslîm belki hamâyil-i gerden huzû’ u ta’lim itmişler. Hemîşe riyâz-ı suhen reşâhat-ı tab’-ı güher-rîzinden tâze vü terdür. Bu ebyât anlarundur.

Ne var ‘âr itmese ol şâh-ı hûbân ben gedâsından
Meseldür hûb-rûlar yüz çevürmez mübtelâsından

Siyâh ebrûların berçîn iderse yâr aldanma
Siper kıl tîrine sînen alınma yâr karasından

Diğer: Gözinün sürme çeküp ag u karasına nigâr
Göz karardur beni öldürmek için leyl ü nehâr

HAKİKÎ Beg: Pâdişâh-ı Dârâ-yı mülk-ârânun paşaları silkinde münselik olan ‘Osmân Paşa’nun oğludur. Nahl-i vücûdî ve gülbîn-i bûdî ravza-i dârü’s-selâm-ı Bagdâd’da neşv ü

¹⁷⁶ Çocuk babasının sırrıdır.

nemâ bulmuşdur. İsm-i şerîfi Mustafâ ve samîm-i kalbden dil ü cân ile muhibb-i âl-i ‘abâ ve bi’t-tab’ zebân-ı Fûrs’e tâlib ve ma’rifete râgıb olmanın rûz ü şeb zurefâ-yı a’câm ile musâhib geçinüp fûnûn-ı ma’ârifete mâlik ve taklîd-i şu’arâ-yı ‘Acem itmege sâlik idi. Hayfâ ki ol peyrev-i erbâb-ı ma’rifete safâhat galebe kılup terk-i hân-mân ve bu dergâhdan rû-gerdân ve yagmâ-yı mâl ü menâl ve hem-dem-i sâhibân-ı câh ü celâl olmadan kaçup âvâre-i kûh ü beyâbân olmag temennâsıyla Bagdâd’da kullar agası iken sene selâse ve sittîn ve tis’â mi’ede Bagdâd’a beglerbegisi olan Hızır Paşa ile ba’zı ûmûr-ı devletde güft ü şinîd idüp terk-i diyâr itmiş. Hemân kişver-i Hindûstân temâşâsına ‘âzim ü câzim olmuş. Fi’l-hakika tabî’at-ı şî’riyyesi gâyetde revân ve Fûrsün tekellûminde zebân-âver-i devrân ve Türkî ve Fârisî dilinde eş’ârı firevândur ve bu bir iki Fârisî ve Türkî beyt anlarındur sebt olundu. Nazm

Çehre ez hâl ü hat ey mâh-veş ârâste
Çeşm-i bed dûr zi rû’yet ki huveş ârâste ¹⁷⁷

Diğer : Olurdı ol dür-i yek-dâneye çokdan gözüm menzîl
Rakîb-i bed-güherdür yolda seng-i hâresi ‘ışkun

NIHÂNÎ: İstanbûlî’dür. Ravza-i dehrde Durag Çelebi dimekle meşhûr ve râg u bâg-ı ‘âlemde nihâl-i ser-bülendi âb-ı sehâ ile neşv ü nemâ bulup perverde olmuş diyü efvâhda mezkûr ve şeh-zâde Sultân Selîm Hân’un bâb-ı ‘azîmü’s-şânında defterdâr-ı mâl ve şâyeste-i ikbâl olmanın hemîşe sehâveti pîr ü cevân gûşına irişmiş ve h’ân-ı ihsânından havass ü ‘avâm toymuş ve dem-be-dem fuzelâ vü sulehâya hıdmet ve her gün şu’arâ vü nüdemâyâ ri’âyet itmeden hâlî degül imiş. Keyfiyyet-i hâl-i Nihânî erbâb-ı ‘irfâne ve bâde-i şevk ile mest olan rindân-ı zamâne gün gibi zâhir ü bâhirdür. Beher hâl bu gazel ol yâr-ı bî-bedelündür. İstanbûl’a geldüğünde pâdişâh hazretleri mezkûr katl itmezden beş gün evvelce mestûr kılmış. Zurafâ vü şu’arâ mâbeyninde meşhûr olmuşdur. Husûsa yazup şâh-zâde hazretlerinin bârgâh-ı felek-dergâhlarına göndermiş. Gazel:

Cân oldı şehâ şâhid-i maksûdına vâsıl
Sultân-ı gam ‘ışkuna dil ey olalı menzil

Katlûme delîl olsa n’ola gamzene zülfün
Meşhûrdur e’d-dâlû ‘ale’l-hayri kefâ’il ¹⁷⁸

Ey kaşı kemân tîr-i havâdisden alınma
Peykânun ile sînede cân olalı yek-dil

Olmasa kişi ‘âlem-i esrâr-ı gam-ı ‘ışk
Tahsîl-i ‘ulûm eylemeden ana ne hâsıl

Zulmetde kalurdum şeb-i hicranda Nihânî

¹⁷⁷ Ey yüzü benlerle ve ayva tüyleriyle süslenmiş ay yüzü güzel, yüzünden kem göz uzak olsun, çünkü yüzün güzel bezenmiş.

¹⁷⁸ İyiliğe teşvik iyilik gibidir. (Hadis, Tirmizî âlim bahsinde 14. hadis) **Concordance et Indices de la Tradition Musulmane** C. V. s. 183, Çağrı Yay. âst. 1986

Âhum şereri olmasa ger bana meşâ'il

li-mü'ellifihi nazîre :

Dil zerre gibi olmaz idi mihrüne vâsıl
Yollara hevân ile düşüp almasa menzil

Kûyuna olur sâlike rehber süm-i esbün
Zâhîr budur e'd-dâlû 'ale'l-hayri kefâ'il ¹⁷⁹

Bülbül sözünü gûş idüp açılmadı gonce
Ağız bir idüp gönlün ile olalı yek-dil

Ben hasteye tîmâr didüm olsayidi âh
Olmaz idi ol bâd-ı hevâ ile bu hâsıl

Mecnûn ki şeh-i 'ışk idi her şeb ana 'Ahdî
Yir yir yakılup lâleler olurdu meşâ'il

TAB'Î Efendi: Vüzerâ-yı zamân ve ümerâ-yı cihânun himmet-i 'âliyeleri ile hemîşe tâlib-i erbâb-ı kemâl ve sâlik-i menâzil-i ashâb-ı câh u celâl olup dânişmend-i 'asr ve hîredmend-i dehr geçinüp medâris-i 'âlemde 'ulemâ-yı mütebahhirîn ve fusahâ-yı müteahhirîn hıdmetlerine irişüp âyine-i zamîr-i münîrden jeng-i cehâleti saykal-ı ma'rifet ile dûr itmegin fezâyil içre sâhib-ma'ârif diyü mezkûrdur. Zîrâ ki zeyl hüneriyle heves gubârın çihre-i vucûdından silküp pâk ü bî-gışş kılup ve enâmîl-i kilik-i bedâyi'-nigâr ile sahâyif-i havâtır-ı tarab-nâkin nûkûş-ı 'ulûm ile münakkaş kılmış ve envâ'-ı hissiyât-ı cân-fezâ esâlibin tahsîl ve fûnûn-ı nikât-ı dil-küşâ noksanın tekmîl tarîk-ı mülâzemetde kat'-ı menâzil kılup mülâzımân-ı deryâ-dil menzîline irişüp menâsıbdâ kuzât-ı 'adl-güster ve 'ulemâ-yı şerî'at-perver zümresinden kazâyâ râzı olup bir müddet kasabâtâ kâdî olmanın hükûmet-i 'adâlet-nişân ile benâm ve re'y ü ted- bîr ile huçeste-peyâm ve pesend-i sâhibân u zevî'l-ihtrâm olup tab'-ı hümâ-pervâzın menâsıb-ı ednâdan a'lâyâ 'urûc idüp ûmûrunda stikâmetle sülûk itmegin erbâb-ı sa'âdet ve ashâb-ı rif'at anlara nazar-ı 'inâyet idüp nezâret hıdmetlerine külâh-ı kûşe-i kadr ve menziletin evc-i simâte ve pây-e-i şevket ü rif'atin eflâke ırgürüp hıdemât-ı hazâyin-i Sultân-ı zî-şâna kıyâm kılup meyâmin-i müheymîn-i müte'âl kendüye delîl idüp envâl-i pâdişâhîde sa'y-i cemîl gösterüp akrânından mümtâz u 'âlî-tab'ân mâbeyninde ser-firâz olup ol dürr-i deryâ-yı zamâyir Cezâyir kurbünde ve dârü's-selâm-ı Bagdâd'da defterdâr-ı mâl ve mesâlih-i havâs-ı mîrîde bî-misâldür. Tab'-ı vekkâdî ve zihn-i Hudâ-dâdî rûsûm-ı nazmda belâgat-nümâ ve fûnûn-ı nesrde fasâhat-küşâ şemşîr-i âbdâr-ı dürrer-engîzi lisân-ı Fârisîde gamzedâ hançer-i güftâr-ı gurer-âmîzi zebân-ı Türkî'de a'lâ ve nâdir hâlâ şâ'ir-i metin-i sihr-sâz ve nâzım-ı güzîn-i yârân-ı mümtâzdur. Ma'lûmât-ı bî-gâyetle erbâb-ı sa'âdât içre maksad-ı bülend ve matlab-ı ercîmend bilüp reşhât-ı aklâm ile ol güzîde-i debîrân-ı şîrîn-nizâm ve şî'r-i mahabbet-encâm ile şâ'irân-ı 'âlî-makam mâbeyninde makbûl-i enâmdur. Tabî'at-ı pâki

¹⁷⁹- İyiliğe teşvik iyilik gibidir. Hadis, Tirmizi, ilim bahsinde 14. hadis **Concordance**, C.5s.183 Çağrı Yay. İst. 1986

tarz-ı suhende hûb ü mergûb olmanın Tab'î mahlas buyurmuşlardır. Bu bir nîce beyt ü metâli'-i bî-bedel ve ebyât-ı pür-mesel anlarındur.

İrişdi terâş-ı ruhı hatt-ı lebi irdi
Gün batdı dirîgâ n'idelüm kaş karardı

Diğer : Gonceye ragbetimüz yok leb-i dilber var iken
Miske meyl itmezüz ol zülf-i mu'anber var iken

Diğer : Ser-nîkûn olmuş devâtı sîmdür çün ol zekân
Kara degmiş ol likâya hat degüldür görinen

Gelibolı'dan olan Za'îfî Beg bu matla'ına ki dimişdür

Kıble yiter kûy-i dildârum bana
Sana ey Ka'be ırakdan merhabâ

çok kimseler cevâb dimişlerdür feemmâ sâbıkü'z-zikr a'lâ intikâl itmişlerdür budur sâkî-i sîm-sâk vâsfında tâkdür ki

Bâde yiter la'l-i dildârum bana
Sana ey sâkî ırakdan merhabâ

Bu matla' dahi anlarındur.

Bana gösterse yokdan var iden Hak la'l-i cânânı
Cihanda agzuma almazdum ölsem âb-ı hayvânı

Lebi câmina nakş iden gubâr-ı hatt-ı cânânı
Ne sihr itdi 'aceb kim mest ü hayrân kıldı hayrânı

HATMÎ Beg: Nâm-ı şerîfî Mustafâ Beg dimekle ma'rûf ve zât-ı hümayûn-sıfâtı eyülikle mâ'rûf ve sâbıkan pâdişâh-ı gerdûn-penâh ve Sultân Süleymân-ı ferî dün bârgâh hazretlerinin emr-i zevî'l-ihirâmı ile şâh-zâde-i keyvân-gulâm ve Cemşîd-ihtîşâm a'nî Sultân Selîm Hân-ı nîk-nâm hazretlerinin lalası iken vefât iden merhûm Ca'fer Paşa'nun oğludur. Bi'l-fi'l pâdişâh-ı devrânun sâye-i sa'âdetinde ve şâh-zâde-i kâmrânun eyyâm-ı devletinde hezârân i'zâz ile pâye-i devletde 'izz ü rif'atle Aydın sancagı begidür. Ma'ârif-i cüz'î ve küllî ile tab'-ı deryâ-mü'essiri ve hâtır-ı 'âtırî hil'at-i fûnûn ile ârâste vü pirâste ve zebân-ı Fârisî bilmede hûb ve tabî'at-ı şi'riyyesi mergûbdur. Bu bir nîce matla' u beyt anlarındur. Nazm :

Ey cebhe-i münîri olan âftâb-ı mahz
'Uşşâka gam şebinde yüzi mâhtâb-ı mahz

Lutfundan eyledün bizi gam-hânemüzde şâd
Can gibi itme gitmege bârî şitâb-ı mahz

Diğer : Geşt idüp hâsılı bu dehr-i harâb-âbâdı
Bulmadum kendüm için cevce ta'am-ı şâdî

Nûr-ı lutfundan uyardı bu çerâğın Hatmî
Görme anunla berâber şeh-i 'âdil yâri

YÜMNÎ Beg: Sâbıkan pâdişâhımızun vezîr-i a'zâmı olan Ayas Paşa oğludur. Mevlid-i latîfleri İstanbûl ve nâm-ı şerîfleri Mehemed Beg demekle meşhûr ve hulk-ı 'azîm ile makbûl-i cumhûrdur. Hâliyâ 'izz ü devletle tedbîr ü dikkatle pâdişâh-ı âfâk hazretlerinin yümn-i sa'âdetlerinde sancak tasarruf itmekle akrân içre ser-efrâz u tâk ve evkât-ı 'azîzin sarf-ı ma'ârif-i cüz'î vü küllî idüp lisân-ı 'Arab'ı ve zebân-ı 'Acem'i gereği gibi tahsîl ve her bir dilde durûb-ı emsâlün noksanın kemâl ile tekmîl itmeden bir an ve bir lahza hâlî degüldür. Zîrâ ki erbâb-ı ma'rifetle sohbeti ganîmet bilüp hemîşe müzâkere ve mübâhase üzredür. Zihn-i pâki nazmun her kısmına şâmildür. 'Ale'l-husûs gazel dimede tab'ı kâmindür ve tevârih bilmede müverrih-i fâzıl bu bir iki beyt-i şîrîn el-hâsıl anlarundur sebt olundu.

Leb-i şîrîn ile sen Husrevisin gerdûnun
Zülf-i şebdîzüne koşdukca râh-ı gülgûnun
Dögünüp taş ile nâle işi ben mahzûnun
Hîç işitmez kulagı katı imiş gerdûnun

Gazel : Rahm idüp ol mâh çün meyl itdi benden cânibe
Gam yime ey dil ferah yüz tutdı senden cânibe

Can bulursam n'ola sen geldükde benden cânibe
Haşr olunca can gelür dirler bedenden cânibe

Sene seb'in ve tis'â mi'ede şeh-i İstanbûl'da vâkı' olan Agustos zamânında berk ü bârân u seyl-i firâvân gelüp nice nice ma'mûr evleri virân itdükde bu târih-i âbdârı tab'-ı âteş-bârdan zuhûra getirüp ketb itmiş.

Bir 'alâmet zâhir oldu şeh-i İstanbûl'da kim
Halkun efgânı zemînden âsumâne çıkdı yâ

Eyle ifrât ile yagmur yagdı kim nice evi
Seyl alup hâşâk-veş deryâya anı takdı yâ

Vehm-i ra'd ü berk ile Yümnî didüm târihini
Yıldırımla seyl Kostantin'i yıkdı yakdı yâ

'ÂLÎ Efendi: Gelibolı'dan dânişmendân-ı nüktedânân zümresinden olup zebân-ı suhen-senc-i eyyâmda Mustafâ nâm ve mütekellimân-ı zamân içre fenn-i nazmda emîrû'l-keâm zât-ı bî-misâli pirâye-i fazla karîn ve vücûd-ı pür-efdâli pâye-i mülâzemetle ber-murâd u kâm-bîn iken ol târihde nûyin-i nev-âyin-i cihân şâh-zâde Sultân Selîm Hân bin Sultân Süleymân Hân hazretlerinin iltifât u fermânıyla tarîk-ı 'ulemâyı terk idüp silk-i erbâb-ı kaleme mülhak olup zihn-i pâk-ekremi ri'âyete müstehak olmanın sâhibân-ı 'izz ü ihtîşâm yanında kemâhüve hakkîhâ ihtirâm bulup manzûr-ı dîde-i ashâb-ı nazar ve mihr-i dânişle nûr-ı çeşm-i erbâb-ı hüner ve pesend-i mevâlî-i 'izâm ve nazar-kerde-i meşâyih-i kirâm olup himmet-i tab'-ı

cihângir-i lâ-nazîri hayâlden hâlî olmayup bülend olmagla kendülerin mahlas ‘Âlî erzânî görmüşler. ve ‘ilm-i riyâzîde mühim olan ‘ibârâtun beyân ve ma’ânîsin severmişler. Ol bâbda makbûl-i ehâli-i müşkil-küşâ ve güzîde-i mevâlî-i fasîhü’l-edâ olmuşlar. Lahza lahza rümûz-ı ‘ulûm-ı ‘Arabîyyete iştigâl ve künûz-ı zebân-ı Fûrsde lemha lemha peyrev-i ehl-i kemâl olup sa’y-i tamâm ile bî-hadd ü bî-şûmâr belâgat-i cân-fezâya cidd ü cehd gösterüp fusahâ-yı fasâhat-nümâyâ serdâr ve nâdire-gûyân-ı rûzgâr içre kemâl ü fazl ile iştiâhârı bisyâr olup ve akl-ı pür-temîz ile ‘ukalâdan mümtâz ve ma’ânî-i a’lâ birle bûlegâdan ser-firâzdur. Her an mütâla’a-i kütüb-i mu’tebere itmede müdekkık-ı zamân ve mülâhaza-i sahâyif-i ehâdis ü te-fâsîrde muhakkık-ı cihândur. Her vâdîde semend-i idrâkleri cilve-ger ve ‘akl-ı derrâkleri pâkizelikde ser-âmed-i nev’-i beşer esâlib-i ‘ulûmda **Şerh-i Hüssâm-ı Kâtî**’ye hâşiye ve ba’zı mahallerde bir da’îye ve gayrî şurrâhî-vâr dürdler idüp kemâl-i fehm-i iz’ânı râst-gûylıkda tîr gibi evc-i felege asmış ve zûr-ı bâzû-yı ma’ârifle her nesnenün mâhiyyetine vukûf bulup pâ-yi taleb-i muvâfıkla ehl-i ‘irfânı basmış ve **Hidâye**’nün haccu ‘uteka müte’allık mesâyiline delâyil-i sâdıkla resâyil yazup müstemi’îne li’llâhi derrehu kâyil didirmişdür ve dürer-i nazmda cevâhir-i eş’âr ve fevâid-i kasâyid-i celîlü’l-âsârıla behredâr olup **Münâzara-i Mihr ü Mâh** nâm manzûm-ı huçeste-nizâm ve nokta-i pür-nikât ile nücûm-ı tâbende gibi rûkûm idüp aklâm-ı hoş -hırâm ile kitâb-ı fasâhat-rûsûm te’lifine dest-i ihtimâm vâkı’ olmuş. Bu ebyât-ı müşkîn-erkâm na’t-ı Resul ‘aleyhi’s-selâm diyü i’lâm itmiş

İki ebrûnı kim debîr-i ezel
Eyledi safha-i cebînüne hal

Biri nûn-ı nübüvvet oldu anun
Biri re’y-i risâlet oldu anun

Haremün hürmetine bes bu delîl
K’ola cârûb şehper-i Cebre’îl

Der-i dergâhuna senün Mûsâ
Hâcib olmuş durur elinde ‘asâ

İtmege vâsf-ı pâküni tesbîh
Yaydı seccâde-i sehâbı Mesîh

Fenn-i inşâdan **Enisü’l-Kulûb** nâm bir kitâb-ı mergûb te’lif-i hûb olunmuş ya’nî ahhâr-ı sahîh-i nakş u nigârı melîh ile **Hümâyûn-nâme** tarzına sülûka kudret bulunmuş. Ba’d ez an nazm vâdîlerinde zihn-i tîz-revi tek vürûd-ı ilhâm-ı Rabbânî ile güft ü şînev haysiyyetinden kıssa-i **Mihr ü Vefâ** ki sâni-i **Yûsuf ü Züleyhâ** ve sâlis-i **Leylâ vü Mecnûn** çün dürr-i meknûn ve **Vâmık u ‘Azrâ** ve **Şîrîn ü Husrev** vezninde manzûme bu makûle ebyât-ı pür-nikâtı mersûmdur. Mihr-i bî-mihre hitâben be-emr ü ber düzd-i felek-zede cânibinden sâdır u mütesâdır olmuş şöyle ki beyân ider.

Ne ‘âlem mihrisin ey nûr-ı mutlak
Ki zeylün olmamış zerrâte mülhak

Ne mehsin mâhdan hüsnün ziyâde
Cemâlün bî-kusûr olmuş bahâda

Perî dirdüm velî peran degülsin
Melek dirdüm velî pinhan degülsin

ve tab'-ı âbdâr-ı latîfden **Matla'ü'l-Envâr**'e mukâbil fıkri-bikri-i şerîf den **Mahzenü'l-Esrâr**'e mu'âdil **Tuhfetü'l-Uşşâk** nâm bir kitâb-ı nâdirü'l-mümâsil ve hasb-i hâl-i erbâb-ı dil dahi vücûd buldı. Bu ebyât-ı şîrîn-şemâyil münâcât-ı kâzıyü'l-hâcâtur bu evrâkda sebt olundu.

Meded ey çâre-ger-i rûz-ı hisâb
Oldı 'Âlî kulunun hâli harâb

Gümreh itdi beni 'isyân-ı füzûn
Vay eger sen olmayasın reh-nümûn

ve yine şîr-i latîfden ve nazm-ı münîfden süreyyâ gibi rûsûm ve benâtü'n-nâş nakşıyla merkûm **Nâdirü'l-Muhârib** nâm kitâb-ı belâgat-encâmun itmâmına ihtimâm olup te'lif-i şeh-zâdeler cengini câmi' mebnî-i binâsı e'azim-i vekâyi'dür. ve ol semerât-ı nihâl-i ma'rifet ve nev-bâve-i şâh-sâr 'ilm ü fazîletden kâmkâr u behremend ve ez-hüner-i nesr ü nazmdan fâ-idemend olup re'y-i bülennden mebânisi remz-i tasavvufi pâk ve ma'ânîsi tasarrufi ferah-nâk diyü ol merd-i güzîn **Riyâzü's-Sâlihîn** nâm bir kitâb-ı mahabbet-karîn imlâsına resm-i nazmla ragbet göstermişler. ve dahi **Heft Meclis** nâm bir kitâb-ı küşâde bâb-ı inşâda semt-i nesr ile küşîş revâ görülmüş diyü kıt'a-i belâgat-ı beyân ol sâhib-i mensûr-ı fasâhat-nişândandır. Merhûm-ı magfûrunleh Sultân Selîm Hân Mevlânâ 'Atâ nâm h'âcesi ve Celâl Beg nâm musâhibi ile memâlik temlikine mihr gibi şitâbân ve zahmet-i râh-ı pâyânla ılgardan ekser-i sipâh-ı nâmdârı nâ-pâydar olup kendüleri hûrşîd-i cihân-ârâ gibi tek ü tenhâ kıldıklarına edâ itmişler.

'Arz itdiler 'asâkire 'arz-ı cemâl ile
Yollarda geh 'Atâ ile gâh Celâl ile

Hem-sâyeler havâs idi ancak rikâbda
Az kalmış idi zerre pey-i âfitâbda

Sâbıkü'z-zikrûn fıkri-bikri çokdur ta'rîf ü tavsîfe ihtiyâcı yokdur. Zîrâ ki te'lifât-ı manzûmâtı her bâbda bî-hadd ü bî-şümâr ve tasnîfât-ı mensûr-ı her vâdide hisâbdan bisyârdur. Bu cevâhir-i âbdâr ol gavvâs-ı bihâr-efkârün divân-ı selâtîn-i edvârından sarrafân-ı bazâr-efkâre iş'âr olınup kalem-i dü zebânla rakam olundu ki pesend-i Rûm ü 'Acem'dür.

Yollamışsın ruhların yakmış güneş ey âftâb
Yollamak lâzım seni seyr itmek için bî-nikâb

Diğer: Sensin zamâne deyrine sûret viren nigâr
Bir sûret-i sehâb iledür büt ne i'tibâr

- Diğer: Gül didigün şarâb ile tolmış piyâledür
Bir bir be-hakk ki eksile pervâzı lâledür
- Diğer: Yıkıldı hâtırum gönlüm harâb oldu o gül bilmez
Yine cevri itmek ister tâzedür hâtır gönül bilmez
- Diğer: Tâze dilber sevse ‘âşık eski derdin tâzeler
Tâzeler keyfiyyetin erbâb-ı ‘ışkun tâzeler
- Diğer: Gâh gâhi tîgîn agzında dutar ol ser-terâş
Diş bilir her kande ise katlûme bir bagrı taş
- Diğer: Girye itmez ki bile giryesini ben zârun
Esnedükce yaşarur gözleri ol mekkârûn
- Diğer: Dem-be-dem düşse gözünden n’ola ben bîmârûn
Nakd-i eşkûn kızılı çıkıdı yanında yârûn

GERMÎ Beg : Bagdâd’ dandır. Egerçi asl u nesebi ve zât-ı ferhunde hasebi Karakoyunlıdır. Sâbıkan Bagdâd beglerbegisi olan ‘Alî Paşa’nun ‘amûcesi oğlıdır. Nâm-ı nîkû-fercâmı İbrâhim hadd-ı zâtında vârestelikle âzâd-ı ümmîd ü bî-meded pašamızun devletinde nîce yirlerde yüz agardup yoldaşlık idüp sancak begi olmuştur. Merd-i germ-güftâr ve nûkte-güzâr olmanın fakr u fenâ semtine tâlib ve sohbet-i dervîşâne râgıbdur. Vâdî-i nazmda zebân-âver ve üç zebân ile şi’r-i dürrer-bârı der-gûş-ı ehl-i hünerdür ve cüst ü cûy-ı nazm-ı şu’arâ itmede mâhir ve fûnûn-ı şi’re kâdir ‘ale’l-husûs hezl ü hicvde nûkte-senc ve nîze-i zebânundan sîne-i muhâlifân pür-renc ve kendü tarîkında sâhibân-ı idrâk dîvâne-i bî-bâk dirler. Bu bir nîce matla’ u beyt ol şâ’ir-i bî-bedelündür.

Der kâr-ı men ey nâle tu taksîr ne-dârî
Taksîr-i tu în est ki te’sîr ne-dârî ¹⁸⁰

Kâsıd suhen-i vasl şenidî meger ez yâr
K’ez şevk Diğer tâkat-i takrîr ne-dârî ¹⁸¹

Bâzâr-gerd ü kûçe-nişînîm muttasıl
Pür zi gam-ı ehl-i ‘araz çünnîm muttasıl ¹⁸²

- Diğer : Ol çeşm-i âhuvâne nigâh öldürür beni
Ol zülf-i tâb-dârı siyâh öldürür beni

Geçdükde ben gedâya pey-â-pey nigâh ider
Her nâ-mahal gedâya nigâh öldürür beni

¹⁸⁰ Ey nale, benim durumumda senin hiç bir kusurun yok; senin kusurun etkili olmayışındır.

¹⁸¹ Ey elçi yoksa yardan kavuşma sözünü mü duydun da konuşmaya gücün kalmadı?

¹⁸² -Biz namus ehlinin zannınca devamlı çarşı pazarda dolaşan âvâre kimseleriz.

Nazîre li-mü'ellifihî :

Sanman füsûn-ı çeşm-i siyâh öldürür beni
Eyler yanumda gayre nigâh öldürür beni

Bu matla'lar dahi anlarundur

Nîce bir mâyl ola müdde'i ol mâh sana
Çarhdur böyle döner gâh bana vü gâh sana

FİKRÎ Beg: Nihâl-i vücûdî ravza-i dârü's-selâm Bagdâd'da neşv ü nemâ bulmuş serv-i ser-efrâz beglerdendir lâkin vâlid-i büzürg-vârları pâdişâh-ı Kahraman-savlet ve Süleymân-ı keyvân-rütbet a'nî Sultân Süleymân hazretlerinin sarây-ı hâsında hıdmet iden kulları silkinde olan ser-bülendân-ı zamân meyânında Tavîl Sinân dimekle meşhûr-ı a'yân-ı devrân ve hem-dem-i bende-gân-ı Sultân-ı cihân iken müddet-i rûzgâr nazar-ı 'inâyet-i Hazret-i Mollâ Hüdâvendigâr birle müşerref-i nâmdâr olup âhirü'l-emr bir agalıkla taşra çıkup vilâyet-i Bagdâd'da şâhenşâh-ı 'âlî-şânun eyyâm-ı sa'âdet-fercâmında sâhib-tabl u 'alem ve fermân-dih-i hayl ü haşem ya'nî sancak begi olmuş iken fevt olmuş. Hâlâ Sâbıkü'z-zikr asl ü neseble pâkize-hisâl ve sîret-i ferhunde ile bî-misâl olmanın 'ale'd-devâm Sultân-ı bâ-rif'atün emr-i 'âliyesi ile altun başlu sancak tasarruf kılup yegâne-i âfâk ve ferzânelıkda tâk kimesnedür. Zîrâ ki eyyâm-ı şebâbda evkât-ı şerîfin tahsîl-i 'ulûma mutasarrıf kılmış ve bâb-ı şî'rde ma'ânî-i bîkrini sayd idüp mahlas-ı nâzûklerin Fikrî kayd itmiş. Binâen 'ala zâlik fikr-i dakîk ile zât-ı latîfin cüz'î ma'ârif ve zebân-ı Fârisî'de olan şî'r ü inşâ ki 'irfân zümresinde müte'ârifdür tekmîl kılmış ve tedâvin-i şu'arâ-yı efsahü'l-beyânı ve kütüb-i münşiyân-ı zamânı mütâla'a kılup tevsen-i tab'-ı cihânı nûrda re'y-i bülend ile kişver-i nazma ma'tûf idüp ma'ânî meydânında in'ân-ı fikrini uzadup akrân mâbeyninde ma'rûf olmuş ve tab'-ı selîmi ve zihn-i mustakîmi vâdî-i eş'âra üç zebân ile nazmı tarab-nâk ve her birisi âb-ı sâfi gibi pâk. Bu bir nîce ebyât anlarun zâde-i fikr-i bikridür sebt oldu.

Bî-çârei ki ez tû ümîd-i visâl kerd
Sevdâ-yı hâm puht ü hayâl-i muhâl kerd ¹⁸³

Diğer : Ol kamer çihre kulagında degül halka-i zer
Mâh-ı nev sîm-i benâgûşına der-halka be-gûş

Diğer: Didüm sen mû-miyânı der-kenâr itsem n'ola bir kez
Gülüp nâz ile ol gül-ruh didi Fikrî hayâlündür

Diğer: Her kaçan kılsan güzer ey şûh benden cânibe
Cân u dil karşı varur şevk ile senden cânibe

Kayd-ı tenden tûtî cânım diler isem dâ'imâ
Bâl açup uçmaga sen şekker-dehenden cânibe

¹⁸³ Senden kavuşma uman bîçâre, boş bir sevda besledi, olmayacak şeyi hayâl etti.

Servi yürütme nigârâ ile şimşâdı hacel
Nâz ile reftâr u gül sahn-ı çemenden cânibe

Nâfenün kanı kurır iletse ger bâd-ı sabâ
Çîn ü zülfün bûyını mülk-i Hoten'den cânibe

Fikrî'nün murg-ı dilin kıldun âşikâr agyârı ko
Şâhbâzum uçmasun zâg u zigândan cânibe

Diğer: Gönülden serv-i nâzum bir boyı şimşâda mâyildür
Bihamdillah bu hem kufl-ı gam-ı hicrâna bir dildür

Terahhum eylemez 'uşşâka tab'ı cevre mâyildür
Anunçün eşk-i çeşmüm ol şehün yolında sâyildür

Bu matla'-ı pâk ve makta'-ı sûznâk dahi anlarundur bu evrâkda tahrîr olundu.

Vaslunda dil ziyâde ider ıztırâbını
Yâd eyler ol meger şeb-i hicrûn 'azâbını

Diğer: Kimün helâkisin diyü nâgâh sorsa yâr
Gel söyle Fikrî nîce virürsün cevâbını

Nazîre li-mü'ellifihi :

Ol tıfl almadın ele 'ışkun kitâbını
Ezberlemiş dil almag için 'işve bâbını

Aldun elünle varumı n'itdün disem o mâh
İnkâr idüp virür bana barmak hesâbını

FEYZÎ: Pâdişâh-ı âsmân-bârgâh ve Sultân-ı memâlik-penâh hülâsa-i dûdmân-ı müstevcibü't-tatvî' ve't-teslîm Âl-i 'Osmân-ı kesîrû'l-feyezândan hazret-i Sultân Selîm'ün menba'-ı füyûz-ı cismânî sarây-ı âmirelerinün lâzâl-i ma'mûret ve sükkâne-i mesrûret-i gılmânî zümresinden olup zât-ı melekû's-sıfâtlarında mevdû' olan isti'dâd-ı kâmile muktezâsınca mukaddemâ dergâh-ı gerdûn-iştibâhun çâşni-gîrlerinden olup izdiyâd-ı iltifâtı sa'âdet-'uzmâ-yı sûriye sezâ-vâr olmagın el-yevm mezâcî'-ı e'imme-i kirâm ve müşâhid-i meşâyih-i 'izâm olan meşâhir-i emsâr u bilâd a'nî dârü's-selâm-ı Bagdâd'da 'izz ü ikbâl ile timâr defterdâridur. Zât-ı huçeste etvâr ve vücûd-ı pür-cûd-ı mekrûmet-şi'ârları fûnûn ü 'ulûm-ı mütedâvileden müstefâd u müvâneset lisân-ı Fûrs'e mu'tâd tevsen-i zihni vâdî-i mazmûnı neverdleri messâh-ı bedâyî-i ma'ânî-i melîhe ve seyyâh-ı kulzüm-i 'ibârât-ı fasîha olup imdâd-ı mülhem-i kuvvet-i mütehayyile ile gamâmı te'akkul-ı teferrüsten emtâr-ı bedî'u'n-nevâl mezâmîn-i kariha arz-ı mukaddes-nişânlarına lâ-yezâl rîzân olduğundan Feyzî mahlas itmişlerdür. El-hak nazm-ı selâset-şi'ârı dil-pezir ü revân ve nikât-ı nezâket-âmîzi esnâ-yı tekellümde reşk-i selsebîl ü miyâh-ı hayâtdur. Bu bir gazel ve kıt'a ve beyt anlarundur.

Bir tâze dâg yakdı gelüp yâr sîneye
Müht urdı kendi kendü eliyle hazîneye

Kûyuna vardı gice saçun mübtelâları
Haccâc-ı Şâm sanki irişdi Medîne'ye

Çıkmağ gönülden ol sanemün fikr-i gabgabı
San sîb girdi san'at ile âbgineye

Bahr-ı tavilde saçuna bir gazel didüm
Müşgin hatiyle yazdum anı 'anberîneye

Zülfî hayâlini bile al Feyzî kabrüne
Çün ef'î pâsbân olur imiş defîneye

Diğer: Oldı nâmıyla 'Alî ol yüzi mâh
Kerremallahü vechehu ¹⁸⁴

Diğer: Zülfikâr olsa n'ola gamzeleri
Kanberîdür anun ol hâl-i siyeh

Diğer: Hayber-i bâb-ı firâkını açup
Eylese bana 'Alîlik ol şeh

Diğer: Hâlet-i 'ışkı ne bilsün sormanuz Ferhâd'e kim
Kendüsinden bî-haber 'ömri geçürmiş dâgda

KEŞFÎ Beg: Ehl-i kalem zümresinde Edirnevî'dür. Yunus-zâde Musallisi dimekle meşhûr ve erbâb-ı kemâl ile efvâhda mezkûr idi. Evân-ı cevânîde 'ilme iştigâl gösterüp dânişmend ve her bir fenden behremend olup âhirü'l-emr ehl-i kalem zümresine münselik ve şu'arâ ve zurefâ tarîkına sâlik ve her an 'ulûm-ı zâhirenün rümûzın keşf itmege ol nîkû-halef tahsilde mukayyeddür. Ve mütâla'a-i kütüb-i Fûrs'e mûmâreset-i küllî kılup edâsına kâdir ve şâ'irân-ı 'Acem gibi nazmı selîs ü vâfir ve tarz-ı inşâda münşiyân-ı rûzgâr içre fasihü'l-kelâm ve muhâsibân-ı dîvân-ı Sultânî arasında sâhib-erkam ve kırma yazı yazmagla defâtir-i padişâhîde benâmdur ve üslûb-ı nesta'lık yazmada hûbdur ve tabî'at-ı şî'riyyesi su gibi pâk ü revândur ve eş'âr-ı sûznâki vird-i zebân-ı 'âşıkân-ı sûzân olup rûz ü şeb nazm-ı dürer-bârı terakki bulmadadır. Sene selâse ve seb'in ve tis'â mi'ede diyâr-ı Basra'da mukâta'acı olup kendü sa'y-i cemîliyle ağır ze'âmete mutasarrıf düşüp âhir diyâr-ı Bagdâd'a 'Ali Paşa-yı ibnü'l-vendün kâtib-i divânı olup âhirü'l-emr takdîr-i Rabbânî ile Remâhiyye'ye sancak begi olup ol nâhiyede iki sene beg olmuşlardır. Akrânından mümtâz ve kâr u bârında sihr-sâzdur. Bu bir nîce matla' u beyt anlarındur. Ebyât :

Mest olup meclisde yaksan sîneme bir tâze dâg
Hak bilür bir sikke kurdun dünyede cânâne dâg

¹⁸⁴ Allah kendisini aziz kılsın (Hz. Ali için)

Diğer : Gördükde oldu kaşını şol denlü bî-mecâl
Bir aya dek gelir mi yirine görün hilâl

Diğer: Ebrûların gamın ki dil-i nâ-tüvan çeker
Bir pehlevâna döndi ki iki keman çeker

Diğer : Salın tırâz-ı ‘işve her serv-i kâmet ol
Haşr ol bizümle kaddüni göster kıyâmet ol

[Diğer]: Çeşm-i mahmûr-ı nigâr ey gönül uyhuda degül
Gâfil olma bu tegâfülleri beyhûde degül

Nazîre li-mü’ellifihi :

Fitneden bir nefes âhû gözi uyhuda degül
Anun için dil-i şûrîdemiz âsûde degül

Bu matla’-ı meşhûr dahi müşârünileyhün zâde-i tab’ıdur ki ‘âlem-gîr olmışdur.

Hayât-efzâ-yı ‘âlem rûh-bahş-ı mürde-i gamsın
Hemân ben hastenün cânı degülsin cân-ı ‘âlemsin

RAVZA-İ RÂBİ' Fi zikri şu'arâi fi kava'idi'l-hurûfî teheccî evvelihî'l-elif

Zurafâ-yı Rûm'un sâhib-meşrebi ya'nî **EMRÎ Çelebi**: Edirnevî'dür. Lutf-ı tab' ve safâ-yı zihn ile mevsûf ve fûnûn-ı mu'ammâda mahâretle Mîr Hüseyinî gibi ma'rûf ve kemâl-i tahayyülât birle Şeyh Kemâl Hucendî ve mazmûn-ı belâgat-meşhûn ile Dervîş-i Dehkî ve hüsn-i edâ-yı dil-efrûz ile Hasan-ı Dehlevî ve ma'nâ-yı dakîk-i pür-sûz ile Rûm'un Hüsrevî-i Kendî. Hakkâ budur ki eger Rûm'a tarz-ı mu'ammâyı küşâyış virmese kimse tahsîl ü tekâmîl idüp ol fende ad çıkarmaz idi ve her bir mu'ammâsının 'akdinde ve hallinde 'akl-ı 'ukde-küşâ ağız açamaz ve remz ü imâsı şöyle musanna' u muhayyel vâkı' olmuşdur ki şihâb-ı zamân görse engüşt-i hayret-der-dehân kalup hayrân olur. Üslûb-ı târihde bî-misl ü bî-mânend tevârihe mâlikdür. Şöyle ki makdûr-ı beşer degüldür ve her biri faraza bir târihdür. Râkım-ı hurûf Edirne'de ve İstanbul'da hıdmetlerine mülâkat idüp sohbet-i haslarıyla ve meclîs-i şerîfleriyle merreten ba'de uhrâ müşerref olmak müyesser olmuşdur güftâr-ı ferah-efzâların ve eş'âr-ı dil-küşâların okıyup yazmışdur. El-hak mazmûn-ı hâssı bî-hadd ü bî-şümâr ve şu'arâ-yı rûzgâr içre Hallâk-ı Ma'ânî diyü nâmdâr kimesnedür ve nefsü'l-emr dervîş-sıfât ve âdemî-sîret evkât-ı 'azîzin Medîne-i münevverenün tevliyyeti hıdmetine sarf itmege sâlik ve sâir şu'arâ gibi şi'rden dünyâya mâlik olup ber-murâd olayın diyü murâd idüp ol şâ'ir-i nîkû-nijâd bir kimse medhinde bir mısra' dimemişdür. Ana binâen bu matla' u makta' sebt olunmuşdur.-
Beyt :

Gördüm ey dil minnet ister virmege dünyâ murâd
Ana minnet itmeden kurtuldum oldum nâ-murâd

Emri'yâ dünyâ murâdun nîce hâsıl eylesün
Çün degüldür tab'una dünyâ vü mâfihâ murâd

Ol şâ'ir-i zamânun nazm-ı dürer-bârı firâvân ve cümleten der-gûş-ı erbâb-ı hûş olmanın makbûl-i pîr ü cevân ve hasb-i hâl-i 'uşşâk ve meşhûr-ı âfâk olmuşdur. Bu gazel-i rengîn kendinün icâdıdur sebt olundu. Gazel :

Hilâl ü hâme vü tomâr u şem' ü gonce-i zanbak
Nice bir ola pençenle düz olmaz elde beş barmak

Ben anun pençesini pençe-i hurşîde benzetdüm
Niçün el diye bir aya mukârin beş hilâl ancak

Elinde bir gümüş levh ile beş sîmin kalem gördüm
Didüm bu levhe yaz gönlüm didi bilmen gönül yazmak

Birisinde iki dördünde üçer kıt'a derc itmiş
Benânın mâh-ı nev vâsfinda beş tomar idüp el-hak

Fürûg-ı nârsız rûşen iderler meclis-i şevkî
Ben anun pençesin beş şem'-i kudretdür disem elyâk

Ne tûbâ servidür kaddün ki sîmin şâhlar salmış
Bitürmüş her birinde bir gül ü beş gonce-i zanbak

Ne mihr olur yed-i beyzâsı olmuş her şu'â'ının
Uc1 bir mâh-ı bedr Emrî ana bir mâh-ı nev mülhak

ve lehu eyzân:

Yapma göz hânesin aksun ko yaşun seyli harâb
Yegdür andan ki kapusun kapayu zabt ide h'âb

Leb-i cânâneye öykündi diyü sâkî-i bezm
Meyi kabdan kaba koydugıçün şişdi habâb

Dir isem derd-i ser oldı lebün emmek bana dir
Derd-i ser hâsıl ider içse kişi tatlu şarâb

Sûhte diyü ko cânı mezelensün la'lün
Kanda olsa mezesidür meyün ey sâki kebâb

Bulmadılar deheni hâtemini 'âşıklar
Hâk idüp tenlerini dökdiler ey Emrî türâb

Müşârünileyh bu gazel-i mezkûrı didükde mü'ellif-i tezkîre Edirne'de bulunup nazm-ı dil-pezîre cümle şu'arâ-yı şehir-i mezbûr nazîre diyüp bu hakîr-i za'ife dahi teklîf itdüklerinde tab'-ı latîfden zuhûr buldı. Nazîre li-mü'ellifihi:

Sâkiyâ bahr-ı tarab zevrâkıdur câm-ı şarâb
Barmagun 'aksi sütun yelkeni üstinde habâb

Mest olup gülşene geldükde sabâ şevkün ile
Şişe sancup yüregün goncelerün itdi kebâb

Gâib oldugını mihrün gice remmâl-sıfât
Bilmege encüm ü meh nokta döküp açdı kitâb

Şem'-i ruhsâruna karşı bu gice dil uzadup
Hayli germ itdi velî turmadı tiz geçdi şihâb

Görmeyen zülfünü rûyunda ne bilsün ki nedür
Mihnet -i şâm-ı kıyâmet elem-i rûz-ı hisâb

'Işk bir şâhid-i hûn-rîz durur bulsa eger
Melekûtü'l-mevtün itdi kan ile dest-i hisâb

Cennet içre kişiye çünki 'azâb olmaz imiş
'Ahdi'ye cennet-i kûyunda nedür bunca 'azâb

Bu eş'âr-ı müteferrika dahi anların şi'r-i dil-küşâ ve nazm-ı belâgat-nümâlarındandır cem' olup sebt olundu.

Nakd-i eşküm gördi ol pîr olası sögdi bana
Bu meseldür kim erenler nakde eylerler du'â

- Diğer : N'ola ey sîm-beden gönlüne eşk itse eser
Ki gümüş akçe durur taşa urursan da geçer
- Diğer : Leb-i Şîrîn'ün itmedi diyü dâd
Kendü kendüyi öldürür Ferhad
- Diğer : Eger haşr olmaz isem ol kıyâmet-kad nigârumla
Gezem mahşerde gögsüm döğerek seng-i mezârumla
- Diğer : Garîb geldi çemen-zâre zi-kes şehîlâ
Yüzün görmedi el-garîbü ke'l-a'mâ
- Diğer : Öykünirse dehenünde derd-i nihânun eger
Jâle ey gül göresin goncenün agzına düşer
- Diğer: Sûfî mecâz sandı nigârun mahabbetin
Bî-çâre gitdi bilmedi 'ışkun hakîkatin
- Diğer : Gerdûn fezâ-yı 'ışkda bir gökçe lâledür
Berr-i muhît o lâlede bir katre j âledür
- Diğer: Kimün geçsen önünden sanma arduca bakakalmaz
Bakakalur gözi ammâ vücûdundan bekâ kalmaz
- Diğer: Nesîm-i can güher-bâr olduğınca şâh-ı mercandan
Olur bir gonce peydâ yaprağı la'l-i Bedehşan'dan
- Diğer: Eylemez can bülbülü gülşende ol gülsüz mekân
Her gül-i hamrâ olursa la'lden bir âşiyân
- Diğer: Mâh mı girdi 'aceb koynına ya sîne midür
Yohsa bir sâf-ı mücellâ gümüş âyine midür
- Diğer : Karşusına sen ruhı âyine-i zîbâ ile
Ey şeker-leb söyleşürler tûtî-i gûyâ ile
- Diğer : Müdde'îyi gösterirken yâre göz kıpdı rakîb
İkinüz üç gözli olun didi lutfundan habîb
- Diğer : Bir şeker-lebdür bu ben mahzûnı nâ-şâd öldüren
Kim ana nisbet dinür Şîrîn'e Ferhâd öldüren
- Diğer : Hüsrevi itdi diyü Şîrîn yâd
Acıyup cânına kıydı Ferhâd
- Diğer : Nükte-perdâz-ı suhendür la'l-i şeker-hâlarun
Sözleri 'aksinedür hep tûtî-i gûyâlarun
- 'Âşık oldur 'aklı başından gider nîce bâr

Başlarından ‘aklı gitdi ‘âşık-ı şeydâların

Nazire li-mü’ellifihî:

İtmese ta’lîm efsûn la’l-i şeker-hâların
Kimse sözün dinlemezdi tûti-i gûyâların

Zülfüne dil bağlamazdılar vefâ bûyun umup
Başlarında ‘akl olsaydı eger şeydâların

Diğer : Halka halka oldu ‘âşıklar saçun bahsinde dün
‘Âkıbet biri birine girdiler zencîr-veş

Diğer : Çağıran ra’d degül girye ile nâle ile
Yâr-ı bî-mihr idüğün ‘âleme gerdun söyler

Diğer : Ten-i hâkîde etrâfa yayılmış dinlerüm sanman
Zemîn-i dilde kök saldı nihâl-i verdi dildârun

Diğer : Ne aldı satdı bu bâzârda disen Emrî
Metâ’-ı vuslatun ile degişdi dünyâsın

Diğer : Benzetdi yüzüne açılup gül yanagını
Bostancı gördi çekdi kopardı kulagını

Diğer : Kadd-i dildâre kimisi serv dir kimi elif
Ehl-i ‘irfânun sözi birdür edâsı muhtelif

Diğer : Ne mû-miyânunı kocduk ne agzunı öpdük
O yok bu yok ne ‘aceb bizden ictinâb itdün

Yârân-ı safâya pûşîde degüldür ki sâbıku’z-zıkr yedi sekiz yüz mu’ammâya kâdirdür.
Cümlesinden iki dâne mu’ammâ ol şâ’ir-i sâhiründür sebt olundu. Mu’ammâ be-ism-i Nûh

Gelüp görür beni karşudan ol meh-i tâbân
Nikâb ile yüzünü itdi can gibi pinhân

Velehu eyzân Mu’ammâ be ism-i Bektâş

Mâh u pervîn ü güneş başın virir cânâ sana
Her biri mihrüne bir gevher nisâr itse n’ola

USÛLÎ: Vardar Yenicesi’ndendür. Evsâf-ı hamîdesin gûş itdüğümüz şu’arâdandur. Dervîş-sıfât ve âdemî-hilkat ve sûret-i zâhirde tahsîl-i ma’rifet-i cüz’î ve küllî itmiş ve zihn-i pâkinde kâbiliyyet eseri olduğu ecilden Mısır’da Şeyh İbrâhim hazretlerinin hıdmetine vâsıl olup hankâh-ı şerîflerinde defa’ât ile erbâ’in çıkarup tasfîye-i bâtın kılmışlar. Âhir Rûm’a ‘avdet idüp geldiğinde kendü şehrinde tavattun itmişler. Ol esnâda kuzât-ı ‘izâmdan biri ol perverde-i meşâyih-kirâma bir haber -i’itâb-âmîz ve peyâm-ı hitâb-engîz gönderür ki kırk gün mikdârı oldu bu diyâra geldiniz lutf idüp bizi hâkden ref’ itmediniz ve müşârünileyhün bu güftâr-ı

mihr-âsâr mesmû'ı oldukda cevâb eyitmişler ki kırk yıldır ben kendüme geledüm size nîce varayın. Mezkûrün ebyât-ı pâki bî-nazîr ü bî-hadd ve kelimât-ı tasavvuf-âmîzi dil-pezîr ü lâ-yu'âddur. Cümlesinden bu gazel ki tevhîd-i lem-yezeldür bu evrâka sebt olundu. Gazel :

Vücûd-ı mutlakun bahrı ne mevci kim ider peydâ
Ene'l-Hak sırrını söyler eger mahfî eger peydâ

Me'âdindür kamu eşyâ ider öz kendü zâtından
Kimisi sîm ü zer zâhir kimi seng ü meder peydâ

Bu bâgun ger hakîkatde suyu bir bâgbânı bir
Velî olmuş hakâyıktan nîce yüz bin şecer peydâ

Nazar kıl nev'-i insâna kimi zehr ü kimi şekker
'Aceb hikmet bir agacdan olur dürlü semer peydâ

Düzilür nîce bin işler bozılır nîce cünbişler
Ne kâr-ı bü'l-'acebdür bu ki olmaz kâr ger peydâ

Nice zahmet çeker kesb-i kemâl idince bir 'ârif
Belî çok kan yudar kân eyleyince bir güher peydâ

Bu tokuz kubbe-i şeş sü içine geldün ü gitdün
Ne geldigün kapu zâhir ne gitdügün memmer peydâ

Kamu nezzârede ebkâr-ı ma'nâ muntazırlardur
Usûlî gibi tâ kim ola bir sâhib-nazar peydâ

Ehl-i dünyânun bu cihân ile yalancı olduklarına bu matla'-ı garrâ dahi anlarundur.

Ey Usûlî çün bilürsün bu yalandur o yalan
Bu yalancı dünyede sen de bir iki gün oyalan

Mevlânâ AHMED HARÎRÎ: Ravza-i dârü's-selâm-ı Bagdâd'da gül gibi tâb u tarâvet ve sünbül gibi bûy-i letâfet bulup perverde olmuşdur. Gûş-ı zihn-i derrâki cevâhir-i kava'id-i nazm-ı mevzûn ile ârâste ve hûş u idrâki zevâhir-i gün-â-gün-ı fûnûn ile pirâstedür. Rûz ü şeb tettebbu'-ı ba'z-ı 'ulûm-ı hâsü'l-fevâid ve cüst ü cûy-i tasdikât-ı 'akâyid ki mutâbık-ı kelâm-ı İlâhî ve hadîs-i Nebevî ki müştamil-i nesâyih ve keşf ü kerâmete vâzıhdur. Turûk-ı tarîkati ma'rifete iletüp ve kemâhî Hakîkati şeri'âta ırgürüp güzîde-i 'ulemâ-yı 'izâm ve pesendîde-i hükemâ-yı zevî'l-ihtirâm-ı kâşif-i dekâyık-ı müşkilât-ı ma'ânî a'nî Mevlânâ Efdâl-i Isfahânî hıdmetlerinden esâlib-i 'ulûmı kemâhüve hakkıhâ görüp mütâla'a-i râsihe hâsıl idüp âsân-sâz-ı mesâil-i her müşkil ve mantık u kelâmı sâhib-edâ ve nikât-ı hey'et ü hendesede bî-hemtâ ve remz ü imâ'-ı mu'ammâda bî-karîne-i devrân ve 'arûz ü kâfiyede makbûl-i yârân-ı suhen-dân ve ma'ânî-i mübhemi kasâid-i mütekaddimîni fikr itmede dûr-bîn ve âvâz-ı hazîn ile tahrîr-i dil-pezîri âteş-endâz-ı dil-i gamgîn ve tab'-ı bülend-i dil-pesendi üç zebân ile

nazma mâyl ve hallâl-ı mesâil-i erbâb-ı dildür. Ebyât-ı muhakkikâne [ve] ‘âşıkâne dimeden bîgâne degüldür. Bu kıt’a anlarundur. Kıt’a :

Eger zünnâr-ı ‘ışket ez ser-i bütân
Bended şeyh lâ ikrâhe fi’ d-din ¹⁸⁵

Ve ger bî-kıble rûy-i tu zâhid
Nemâzî kerd v’eylünlil mu’sallîn ¹⁸⁶

ÂNÎ Efendi: Bursalı’dur. Kuzât-ı ‘izâm ve vâlî-i fihâm zümresinden re’y ü tedbîr ile sâhib-’adl ü dâd ve asl ü neseble ‘âlî-nijâd Zîrek-zâde demekle ma’rûf ve evsâf-ı hamîde ile mevsûf zât-ı latîfi kemâl-i ma’rifetle ârâste ve zihn-i mustakîmi fehm ü firâsetle pirâste ve kütüb-i mütedâvilede mütâla’a-i pâki dil-peziir ve zebân-ı Fûrs’ün durûb-ı emsâli zabtında bî-nazîr ve sanâyi’-i şî’rden habîr ve mu’ammâ ve ‘arûz ü kâfiye bilmede dilîr ve hâtır-ı deryâ-mü’essiri nazm ü nesr cânibine mâyl ve her birinde gereği gibi kâmil ve tevsen-i tab’ı vâdî-i şî’rde cüst ü çâlâk ve eş’âr-ı ‘âşıkânesi sûznâk ve güftâr-ı rindânesi ‘uyûbdan pâk ve ser-â-ser hasb-i hâl-i rindân-ı derd-nâk vâkı’ olmuştur. Cümlesinden bu gazel-i pür-mesel ol yâr-ı bî-bedelündür kalem-i ‘anber-bîzle nakş u nigâr oldu. Gazel :

Bâg-ı ruhunda gül yüzüne zâr olam gibi
Sünbüllerüne yine hevâ-dâr olam gibi

Mushaf’da geldi fâl açıcak sûre-i Duhân
Âşûfte-hâl-i hatt-ı siyeh-kâr olam gibi

Bir fâle bakıcı didi fâlünde geldi lâm
Bend-i kemend-i zülfe giriftâr olam gibi

İrmez kemend-i zülfine bir kimse sa’y ile
Ben bu hevâda son uci ber-dâr olam gibi

Sevdâ-yı zülf-i müşk-i nigâr ile Ânî’yâ
Bâzâr-ı ‘ışk-ı yârda ‘attâr olam gibi

Bu beyt dahi miyân vasfında anlarundur hayli nezâket ile nâzûk vâkı’ olmuştur. Beyt

Miyânından haber sorarsan iklîm-i melâhatde
Ötesi kûh-ı billûra aşar bir ince beldür bu

ÜMÎDÎ Efendi: Hamîdî’dür. ‘Abdü’r-rahîm Çelebi demekle meşhûr ve Şâm kâdîsi olan ‘Âli Çelebi’nün birâderidür. Kuzât zümresindendir. Fünûn-ı fezâyil ile ârâste ve kemâl-i hüsn-i hulk ile pirâste eş’ârı selîs ve güftârı nefîs ve zebân-ı Fârisî’de nazm-ı dil-pesendi dil-peziir ve şî’r-i Türkî’de tab’-ı bülendi bî-nazîrdür. ‘Âşıkâne ve rindâne ebyâtından bir kaç dâne Fârisî ve Türkî matla’-ı musanna’ tesvîd olunup sebt olundu. Nazm :

Zülf-i tu şod ez dest-i tu mahzûn u perîşân

¹⁸⁵ Eger şeyh intikam için senin aşkının zünnarını kuşanırsa dinde zorlama yoktur.

¹⁸⁶ Zahid senin yüzünü kible edinmeden namaz kılmışsa tvay o namaz kılanların hâline. (Kur’an 107/4)

K'û nîz çü men kerde fûrû ser-be-girîbân ¹⁸⁷

Diğer : Felegün hâline ey h'âce nazar kılmazsın
Çarh-ı atlas ne kumaş idigüni bilmezsin

Diğer : 'İbret aldı bunca gamlarla görüp 'âlem beni
Âh kim 'ibret-nümâ-yı 'âlem itdi gam beni

Saldı deryâ-yı gamun girdâbına devran beni
Rûzgâr-ı nâ-muvâfık itdi ser-gerdan beni

Nazîre li-mü'ellifihi Matla' :

Bahr-ı eşke gark kıldı dîde-i giryan beni
Saldı girdâb-ı belâya itdi ser-gerdan beni

EFLATÛN-I 'Acem: Şîrvânî'dür. Sâbıkan Elkas Mirza'nun kitâb-dârı ve ol diyârun şâ'ir-i nâmdârı idi. Âhir feterât-ı Elkâsîde ki mezkûr Elkâs birâderi olan Şâh Tahmas'dan kaçup Rûm'a geldiği ma'lum-ı edânî ve ekâsîdür. Sâbıku'z-zıkr be-tarîk-ı seyr şehr-i İstanbul'a gelüp erkân-ı devlet ve a'yân-ı hazret ile ihtilât idüp padişâhun fûtûhâtın nazm iden 'Ârif mahlası ile iştiâr bulan Fethullah Çelebi'nün ba'zı terzîkâtına vâkıf olup mezkûr ile hayli şâ'irâne vü 'âşıkâne mübâhese ve mücâdele idüp bir kaç beytin sebt kılup 'arz-ı hâl tarîkı ile Sultân Süleymân pâdişâha sundı. Ol vehlede pâdişâh-ı Kahramân-kudret âteş-i hışm ü kahr ile mezkûr Eflâtûn'un hirmen-i vücûdun yakup berbâd itmek istemiş. Âhir keyfiyyet-i hâle vâkıf oldıktan sonra ol şâh-ı hâtem-himmet âb-ı inâyet ile ol âteşi intifa kılup Eflâtûn'ı çok ihsâna ve lutf-ı bî-pâyâna mukârin ü makrûn kılmış. Ba'de zamân 'Ârif Çelebi dârü'l-fenâdan sûy-ı bekâya raht-ı 'azîmet çeküp yiri mahlûl kalmagın ber-muktezâ-yı zamân biri ölmeyince birine mekân degmez dirler. Niteki ehl-i Şîrâzî dimişdür. Beyt

Tâ nemîred yekî benâkâmî
Diğeri şâd kâm nenişined ¹⁸⁸

Beher-hâl Eflâtûn'a fermân-ı hümayûn oldı ki Sultân-ı Ferîdûn-ı zamânun hünerlerin nazm ide. Elân ol fermânı kabûl idüp kıssa-perdâz ve yârân mâbeyninde mümtâzdur. Hadd-ı zâtında mezkûr Eflâtûn bi't-tab' envâ'-ı ma'rifetle müzeyyen ü ârâste ve sanâyi'-i nazm-ı pâki bilmekle pirâste ve hatt-ı nesta'lık yazmada hoş -nüvis-i zamân ve tezhîb ü tasvîrde Mânî-i cihân ü Bihzâd-ı devrân idi. Hayfâ ki mezkûr yârân arasında bed-şi'r demek le meşhûrdur. Zebân-ı Fârisî'de mahlasları Esîrî ve Türkî'de Hazânî'dür lâkin şöhreti Eflâtûn dimekle şuyû' bulmuşdur ana binâen Eflâtûn lakâbıyla sebt olundı ve müşarünileyhün aksâm-ı nazmda tab'ı makbûl ve matbu'dur. Bu bir kaç Fârisî ve Türkî matla' anundur tahrîr ü tasvîr olundı. Ebyât

Çünân za'îf şod ez hicr cism-i lâgar mâ
Ki sâye râ ne-tevân dîd der berâber-i mâ ¹⁸⁹

¹⁸⁷ Zülfün senin elinde mahzun ve perişandır çünkü o da benim gibi başını öne eğmiş.

¹⁸⁸ - Biri mutsuz olarak ölmedikçe bir başkası mutlu olarak oturamaz.

¹⁸⁹ Ayrılıktan zayıf cismimiz o kadar güçsüz düştü ki karşımızda gölgemiz görünmez oldu.

Ân şûh eger cefâ ne nümâyed zi rahm nîst
Ber men nekerde hîç cefâyî nemânde est ¹⁹⁰

Ey şem'-i şeb-efrûz merev ez berem imşeb
Cân mî reved ez ten be-nîşîn ber-serem imşeb ¹⁹¹

Diğer: Leblerün 'ayn-ı 'inâyetdür neden hun-h'ârdur
Sâd-ı sıhhatdür gözün bilmen neden bîmârdur

Diğer : Bu fenâ deyrinde çün harf-i vefâ efsânedür
'Âleme aldanma kim dünyâ müsâfîr-hânedür

Diğer: Ol perî-peyker ki kaddi serv ü beli incedür
Leblerini sorma benden kim açılmış goncedür

AHMED Çelebi: İstanbul'dandır. Dergâh-ı mu'allâda sipâhî oğlanıdır. Lakin müddet-i medîd ve 'ahd-i ba'iddür ki pâdişâh-ı Süleymân-mekân ve şehensâh-ı Hâlîl-h'ân hazretlerinin kilâr-ı hâsında kâtib-i a'lâ nasb olunmuşdur. Nefsinde sezâ-vâr-ı merâtib-i 'ulyâ kimesnedür. 'İlm-i muhâsebede bî-nazîr ve esâlib-i inşâda sözleri dil-pesend ü dil-pezîr. Egerçi sâir şu'arâ gibi mahlas ihtiyâr itmemiş feemmâ ol bülbül-i nûkte-dânî'nün gülistân-ı ma'ânîde gül gibi nazmı vasf-ı semen-berân-ı hoş-bû ve gonçe-dehânân-ı dil-cû vâkı' olmuşdur. Bu eş'âr-ı Fârisî ol yâr-ı nîkû-güftârundur. Nazm :

Kâmetem geşte ham ez hicr-i kemân-ebrûyî
Mîresed tîr-i cefâ ber-dilem ez her sûyî ¹⁹²

Berev ez dehr-i cefâ-pîşe mecû resm-i vefâ
Gül-i îñ bâg ne dâred zi vefâ çün bûyî ¹⁹³

ÜLFETÎ: Âmidî'dür. Rûzgârın cevân-ı bî-baki ve çarh-ı gaddârın rind-i sîne-çâki her lahzada temennâ-yı visâl-i mâh-rûyânla alûfte ve her lemhada sevdâ-yı zülf-i perişânla âşûfte ve çarsû-yı mahabbetde 'âşık-pîşe ve zâviye-i mürüvvette sâhib-endîşe olmanın nîce zamân hıdmet-i cevâ- nân-ı cefâ-kîş ve her an mülâzemet-i dilberân-ı bî-teşvîş itmeden hâlî olmaz. El-kıssa ol merd-i lâubâli âvâz-ı cîger-sûz-ı dil-küşâ ile mecâlis-i efrûz-ı 'uşşâk-ı bî-nevâ ve nagme-âmûz-ı büzürg ü kûçek vâdî-i musâhabetde muhâveresi a'lâ ve gökçek ve terennüm-i sihr-sâz-ı gayret-efzâsı hâfîzân-ı 'Irak u Hicâz ve güftâr-ı revânı safâ-bahş-ı kulûb-ı nüdemâ ve eş'âr-ı belîg-ı pâki makbûl-i şu'arâdur. Mukaddemâ Bagdâd beglerbegisi olan Ferhad Paşa'nun oğlu Mehmed Paşa'nun kethüdâsı Behrâm kethüdâ ile küllî ülfeti olmanın anlardan keyfiyyet-i ahvâlîne muttali' olup yazıldı. Bu matla' u beyt ve gazel anlarıdır. Ebyât

Bu tılsım-ı bedenün kubbesidür baş degül

¹⁹⁰ O şuh eger cefa etmiyorsa bu acıdığı için değildir. Çünkü bana etmediği cefa kalmamıştır.

¹⁹¹ -Ey geceyi aydınlatan mum, bu gece yanımdan gitme; can bedenden çıkıyor, bu gece başımda otur.

¹⁹² Bir keman kaşlının yüzünden belim büküldü. Gönlüme her yandan cefa oku gelmekte.

¹⁹³ Git, cefayı meslek edinen felekte vefa resmi arama. Çünkü bu bahçenin gülü vefadan bir koku taşımaz.

İki şemşîründür anun görinen kaş degül

Diğer: Melâhat âftâbı dir görenler Şâh Mahmûd'ı
Meh-i bedr olmuş elde çün o fîncân zer endûdî

ve lehu : Şerha-i na'l ki var sîne-i sad-çâk üzre
Âh şekli yazılıpdur ten-i gamnâk üzre

Gördiler âhumı ot saldı bütün dünyâya
Kaçdı etfâl-i nücûm çıkdılar eflâk üzre

Müdde'î meclisine varduğına ey kaşı yâ
Na'lçen nakşı yiter dâl bana hâk üzre

Mâh-ı nev sanma felekde görinen hâme-i âh
Çekdi bir med yine âyîne-i eflâk üzre

Na'lçen nakşı ile kebkebün izini gören
Dir hilâl ile Süreyyâ görünür hâk üzre

Dahi yetişmedi keyfiyyetimüz Ülfetî'yâ
Gel berü nûş idelüm kahveyi tiryâk üzre

EDÂYÎ Çelebi: Amâsiye'dendür. Kapudan olan Piyâle Paşa'nun kâtib-i dîvânı ve güzîde-i â'yân u erkânıdır. Ol vechile ağır ze'âmete mutasarrıf ve envâ'-ı ma'ârif ve vâkıf ve şi'r ü inşâ fûnûnında bî-hemtâ ve edâ-yı pâk ile meclis-ârâ ve güftâr-ı safâ-bahşla râhat-efzâ ve savt ü nakş icâdında bülbül-i hoş -nevâdur ve ebyât-ı selîsi çok ve eyülüğünde söz yoktur. Cümlesinden bir kaç nazm-ı âbdâr mânend-i dürr-i şâh-vâr ki der-gûş-ı 'uşşâk ve meşhûr-ı âfâkdur ki sebt olundu. Nazm:

Kıl hâkûmi öldükde ey çeşm-i türâb-âmîz
Tâ olmaya ol servün dâmânı türâb-âmîz

Diğer: Hâl kim ol goncenün la'l-i mey-âşâmındadır
Dâg-ı hasretdür ki gönlüm lâlesi câmındadır

Diğer : Meclîs-i 'uşşâkî 'ışkun câmıdır pür-şûr iden
Çeşm-i mestün neş'esidür 'âlemi mahmûr iden

Diğer: Sehâb-ı 'ışkdan yagduk cihâna katre-i âbuz
Sadefdür cism-i 'âlem anda biz bir dürr-i nâ-yâbuz

EMÎR Çelebi: İstanbul yanında Eyyûb-ı Ensârî'dendür. Kuzât zümresinden hoş tab' u ehl-i meşreb ve seyyid-i âlî-neseb ve emîr-i pâk-haseb kimesnedür. Eş'âr-ı tahayyül-engîzi dil-efrûz ve güftâr-ı tefekkür-âmîzi pür-sûz ve 'âşıkâne gazelleri çok lâkin bu bir kaç meşhûr matla'-ı hûbundan gayrı evfâh-ı âlemde gûyâ sözi yoktur. Ebyât:

Ter düşdi meclis içre gice bâdeden 'arak
Hayli dem oldu bezmimûze basmadı ayak

Diğer: Bî-sütûn-ı gamda nâgeh gûş idüp feryâdımız
Ol lebi şîrîn dimiş kim sag imiş Ferhâd'umuz

Diğer: Dendânına takılaydı görüp eşk-i terümden
Dürdâne iken her biri düşdi nazarumdan

ÂGEHÎ: Vardar Yenicesi'ndendür. Kuzâtıdan şuh-tab' u hoş-sohbet ve şâ'ir-i metîn ve sâhir-i dil-h'âh aksâm-ı şî're kâdir ve sanâyi'-i nazmdan âgâh ve bî-kayd ü lâubâli olduğu ecilden tab'-ı güher-rîzi vü dil-i şeker-bîzi hünerle mâyl ve ol fenne mâhirdür. Niteki zamân-ı evâilde bir gemici dilberine dil virüp fülk-i tenin deryâ-yı 'ışka salup müstagra-ı bahr-ı mevc-i hırmân olup ol hevâyla gemiciler ıstılahâtın cem' idüp bir kasîde-i âbdâr mânend-i dürr-i şehvâr gavvâs-sıfât bahr-ı 'amîkden kenâra çeküp der-gûş-ı erbâb-ı hüner ve meşhûr-ı bahr ü berr olmuştur. Bu bir kaç beyt kasîde-i mezkûrdandır. Kasîde :

Çekdirüp firkateni bizden ırag oldun sen
Bahr-ı firkatde nîce fırtınalar çekdüm ben

Barbariçen siyeh atlasdan olaldan cânâ
Gemici neftilerin 'âşık-ı zâr itdün sen

Seyr iden yüzünü deryâda irişür Hızır'a
Kadre ugrar seni bir kerre kadırgada gören

Bahr-ı 'ışk içre yürürsem n'ola yelken torıda
Bir haramî bakıcı yâre esîr oldum ben

Alamargayla yûri yog ise yil yelkende
Çünkü 'âşık olımazsın hele bâri yelten

Geldi çatdı dil ü cân zevrakına derd ü belâ
Bizi çignetmege bu fülk-i felek dutdı dümen

İtmek ister isen eger bag-ı cihanda manca
'Amel ü zühd kumanyasını vâfir yüklen

Orsa varsan çıkamazsın poca gitsen girdâb
Nice kullansan atar karaya bu keştî-i ten

Bahr-ı 'ışk içre olan 'âşıkâ pend ey nâsih
Karadan alet onarmak gibidür gen yakadan

Kelimâtum dür-i deryâ-yı hakîkat anlar
Bahr-ı ma'nâda şînâverlik iden ehl-i suhen

Olsa deryâ kumı mikdârı kayırmaz derdün
Sâ'âti var geçer ey Âgehî sabr it katlan

Eş'âr-ı 'âşıkânesi hûb ü bî-hadd ve güftâr-ı rindânesi mergûb ü lâ-yu'addur. Cümlesinden bir iki matla' gül gibi şükûfte ve dürr gibi sufte olup tahrîr ü takrîr olunur. Nazm :

Ref' eylemez yüzinden ol gonce-leb nikâbı
Açılmaz ehl-i 'ışka def' eylemez hicâbı

Diğer: Haber-i vuslat-ı dildârı idermiş ifşâ
Bize bir gün göresiz söz getirür bâd-ı sabâ

Diğer: Müzeyyen eyleyli hancer ol miyan bendi
Kıyâmet oldu yine ortaluk güzellendi

İLHÂMÎ Efendi: İstanbûlî Hâce 'Ubeydullah-ı Nakşîbendî'nün hulefâsından olan Hakîm Çelebi Efendi'nün dervîşlerindendir. Bu devr sulehâsından sâbıkan 'ulûm-ı zâhire iştigâl gösterirken ilhâm-ı Rabbânî ve 'inâyet-i Yezdânî irişüp terk-i mâsivâ ve kayd ü bend-i dünyâdan geçüp e's-selâmetü fi'l-vahdet ¹⁹⁴ fehvâsıyla 'âmil olup e'l-fakru fahrî ¹⁹⁵ muktezâsınca kâyilü'l-kana'at kenzü lâ-yefnâ edâsına rızâ virüp kûşe-i kana'at ihtiyâr ve künc-i inzivâda karâr kılup kütüb-i mütedâvilede mütâla'âsı pâk ü bî-nazîr ve zebân-ı Fârisî'de ma'lûmâtı has u dil-peziâr vâkı' olmuşdur. Zîrâ ki kasâyid-i şu'arâ-yı nâmdârı ve **Mesnevî-i** Mollâ Hudâvendigâr'ı ve tedâvin-i meşâyih-i 'izâmı ve hamse-i Şeyh Nizâmî'yi defâ'ât ile tetebbu' idüp her bir fende bir risâle ve nice nice mev'iza ile makâle yazmışdur. Hâlâ rûz u şeb nesâyih-i müslimîn ve irşâd-ı muvahhidîn kılup savm ü salâte kıyâm ve takvâ ve tahâret ile tasfiye-i bâtın idüp 'ârifîn içre şöhet-i tâm bulmuşdur. Ebyât-ı latîfî vahdet-engîz ve kelimât-ı şerîfî hakîkat-âmîzdür. Li misl-i haza gazel :

Şâd olurdun ne kadar münkesirü'l-bâl olsan
Ehl-i 'ışk içre eger derd ile hoş -hâl olsan

Safhanı kîl ü makâl ile siyâh itmez idün
Nûr-ı tevhîd e irüp vâkıf-ı ahvâl olsan

Zer gibi hâlis olup hâle irürdün anı
Süzülüp pûte-i 'ışk içre eger kâl olsan

Baş iltürdün işi zülfi hevâsında anun
Sürünüp nice zamân derd ile pâmâl olsan

Gördüğün hûba gönül virmek olurdu kârun
Sen de İlhamî gibi 'âşık-ı meyyâl olsan

ÂFİTÂBÎ: İsm-i a'lâsı Hasan Çelebi ve mevlid-i zîbâsı İstanbul'dur. Divân-ı hümayûn kâtiblerindendir. Tab'-ı nâzüki nezâketle ârâste ve zihn-i sâfî hüsn-i hulkla pirâstedür. Ol âftâb-ı ma'rifet ve mâhtâb-ı fazîlet zurefâ mâbeyninde gün gibi şöhet-i tâm bulup envâ'-ı

¹⁹⁴ Selamet vahdetedir (birliktedir).

¹⁹⁵ Fakirlik övüncümdür (Hadis) El-Aclunî, **Keşfü'l-Hafâ**, Beyrut, 1352, C.II, s. 87

hutût yazmada benâm ve akrânı içre şî'r ü inşâ ile makbûl-i eyyâmdur. El-hak sohbeti râhat-bahş ve sözleri tahayyülât-ı şebistânla dil-keşdür. Sâbikan mezkûr Kurd nâm bir kemân-ebîrû cevâne ya'nî bir âşûb-ı dil ü cânê 'âşık-ı nâ-tüvân olup zarâfet-âmîz bir matla'-ı pür-sürûr elfâz-ı belîg ile mestûr ol dilber-i perestîze 'anber-rîz-i kalemle rakam kılmış sebt olundu.

Kemân-ı bahtını sa'd ile kurdı
Kara bagrına kim ki çekdi Kurdu

Bu matla' u beyt-i muhayyel dahi ol âftâb-ı bî-bedelündür hayâlden hâlî degül Nazm

Bu lem'a-ı hüsnile ki sen nûr-ı basarsın
Yüz virme igen zülfüne kim nûr-ı basarsın

Diğer: Gumûm içinde kaddüm mûye döndi
Hümûm altında benzüm mûma döndi

AHMED Çelebi: İstanbûlî dânişmend tâifesindendir. Binâ emîni Hüseyin Çelebi'nün üvegi oğludur. Mezkûr Hüseyin Çelebi 'Acem-zâde'dür. Sâbikan pâdişâh-ı 'âlî-makâm Süleymân Hânun İstanbul'da olan câmi'-i latîflerinün binâsına emîn nasb olunmuşdı. Ana binâen hâlâ Sultân-ı 'adâlet-penâhun devâm-ı devletinde ve eyyâm-ı sa'âdetinde müteferrika silkinde ağır ze'âmete mutasarrıfdur. Rûz u şeb dinâr u dirhemle ri'âyet-i erbâb-ı dil ve himmet-i 'âlîyesin bezl idüp mühim-sâz-ı merdüm-i efâzıl kimesnedür. Mezkûr Ahmed Çelebi anlarun nazar-ı 'inâyetiyle ve iltifât-ı bî-nihâyetiyle tahsîl-i kemâl kılup kendü akrânı içre bî-misâl ve lisân-ı 'Arabî'de sâhib-makâl ve zebân-ı Fârisî'de zabt-ı durûb-ı emsâl itmişdür ve Türkî eş'âr dimede edâ-yı nâzûk ile bî-hemtâ ve terennümât-ı hoş -edâ ile bülbül-i nagme-serâ ve nakş u savt baglamada bî-nazîr ve cümle-i güftârı dil-pezi'dür. Bu bir kaç Fârisî matla' u makta' anundur. Ebyât:

Tâ zi gubâr-ı rehet kuhl-i basar kerde-îm
Ez heme hûbân-ı şehir kat'-ı nazar kerde-îm ¹⁹⁶

Suhen ez la'l-i tu ey gonçe-dehen bisyâr est
Kem suhen-gû be-rakîban ki suhen bisyâr est ¹⁹⁷

Ânân ki be an kâmet-i bâlâ nigerânend
'Âlî nazarânend çi 'âlî nazarânend ¹⁹⁸

Zinhâr megû derd-i dil-i Ahmed be-gürûhî
K'ez çâşnî-i 'ışk-ı bütân bî-haberânend ¹⁹⁹

¹⁹⁶ Yolunun tozunu gözümüze sürme yapalı, şehrin bütün güzellerinden başımızı çevirdik.

¹⁹⁷ Ey gonçe ağızlı senin al dudağından çok söz edilir, rakiplere az söyle zira söyleyecek söz çoktur.

¹⁹⁸ O uzun boya bakanlar, ne yüce bakışlardır, ne yüce bakışlardır.

¹⁹⁹ Ahmed'in gönül derdini sakın güzellerinin aşkının tadından habersiz olanlara söyleme.

ÜMİDÎ: İstanbullı dânişmend tâifesindendir. Rûz u şeb tab'-ı pâki tahsîl semtine sâlik ve ma'rifet-i cüz'ide küllîye mâlik elfâz-ı latîf ile şîrîn edâya kâdir ve fikr-i tarab-fezâ ile rengîn ma'nâ bulmada mâhir ve keli- mât-ı âbdârı sûznâk ve gıll ü gışdan pâkdür. Zuraîfâ yanında eş'âr-ı 'âşıkânesi çok lâkin şu'arâ dilinde ma'ânî-i hâs ile çendân şöhreti yok. Ümmiddür ki rûzgâr ile a'dâ dilinden halâs bulup şöhret-i tâm ile şâ'ir-i nîkû-nâm ola. Ebyât-ı rindânesinden bu bir kaç beyt-i mestâne yazılıp tahrîr ü tastîr olundu. Nazm :

Bu gün meclîsde sâkî sâgar almak dest-i dilberden
Heman bir gül koparmak gibidür şâh-ı gül-i terden

Diğer : Açdukca yâre sîneme ol tîg-ı zer-nigâr
Bir pâre hazz idüp açılır kalb-i gam-güsâr

Nukl-i lebünle bâde-i la'lün durur garaz
Yinüp içilmedük ne var ey şûh-ı şîve-kâr

Diğer: Cennet anılsa ruhun hâtıra eyler 'âlem
Ka'be yâd olsa ser-i kûyuna varur âdem

Diğer: Mîve-i zevk ü safâ kande olurdu hâsıl
Bâg-ı sînemde şehâ nâvekün urmasa kalem

Diğer: Yûsuf-ı jâle çeh-i gonceye düşmüş benzer
Çıkarur rişte-i zerrîn ile mihr enver

Bîmâr olup mevt zamânında cism-i zerdine bakup bedîhe bu beyti dimişler Matla'

Sarardı cism-i zârum oldu altun
Bizi harçlanmak ister gibi gerdûn

Diğer: 'Âlemi fasl-ı bahâr eyledi ser-sebz-i çemen
Başladı nagmeye bülbül yine her vâdîden

Diğer: Geh güle 'âşık u geh gonceye şeydâ geçinür
Daldan dala konar murg-ı nihâl-i gülşen

Diğer: Getürmüş arkasın yire hilâl-i çarh-ı mînânun
Kaşun meydân-ı hüsnün bir ser-âmed pehlevânıdur

EMÂNÎ: Nigebolî'dandır. Dânişmend zümresinden tab'-ı nâzüki fûnûn-ı 'ulûm ile ârâste ve sanâyi'-i şî'r ile pirâste hâtır-ı 'âtırî cânib-i nazma mâyil ve pesendîde-i erbâb-ı dil kimesnedür. El-hak sûz ü güdâz ile tevâmân-ı Figânî ve edâ-yı revân ile hem-zebân-ı Revânî geçinür. Ümmiddür ki rûzgâr-ı bî-âmândan âmân bulup rûzgâr ile maksad-ı maksûdına vâsıl olup kâmrân ola. Bu matla' u beyt anındur. Nazm

Hattun idelden teveccüh rûha Sultân olmaga
Yüz tutdı mülk-i hüsn alan u tâlân olmaga

Mahfî olmaya ki râkım-ı hurûf kendülerinden eş'âr-ı dürer-bârların taleb-kâr olduklarında mezkûrun bu matla'a hayli i'tikâdî olup cem'-i eş'ârından ihtiyâr idüp virmişlerdi. Nezâket-i tab'ları bu matla'un rekâketinden rûşen ü mübeyyendür. Sâbıkan diyâr-ı Rûm'da ba'zı şu'arâ buna benzer edâyı câiz görmüşlerdür. Bu beyitler dahi anundur. Şi'r :

Tâk itdi tâkatüm bu cefâ vü sitem benüm
Kaddüm ham eyledi bu firâk u elem benüm

Gam tekyesinde nîce zaman tekyelenmedin
Esrâr-ı hatt-ı yâri ne bilsün dedem benüm

Deyr-i cihanda sûrete dahi getürmedi
Bir sûret ile gönlüm alup ol sanem benüm

Diğer: Kâkülün cânâ perîşân eyle diller saydına
Hûb olur sünbül hevâda ey şeh-i hûbân şikâr

Diğer: Dişlerün vasfını geh geh dil-i mahzûn söyler
Söylemez söylemez ammâ dür-i meknûn söyler

EHLÎ: İstanbulî'dür. Zamân ile Galata kâdîsi olan Remzî Çelebi'nün kızı oğludur. Dânişmend tâifesinden rûz u şeb ehl-i dil olan yârânla müşâ'ere ve mübâhase-i 'ilmiyye itmeden hâlî degüldür. Egerçi henüz akrân içre cevândur ammâ hıdmet-i ehâlî itmek ile ehliyyet kesb kılup pür-hurdedân olmak üzredür Hüdâ müyesser ü mukadder ide . Kelimât-ı hûb-edâsından ve ebyât-ı rûh-efzâsından bir kaç matla'-ı pür-sûz mânend-i mihr-i dil-efrûz zuhûra gelüp mestûr olundu. Nazm

Bagrumı yakdı dile nâr-ı mahabbet düşdi
N'ola âh eyler isem câna harâret düşdi

Seyr kıldum ten-i sîmînini hammâm içre
'Arz-ı hâl eyledüm ol dilbere halvet düşdi

Diğer: Açamaz râz-ı lebin keşf ü kerâmet ehli
Bilemez sırr-ı miyânını hayâlât ehli

Devr-i sâgârda olan hâleti Dârâ ne bilür
Zevke dâ'irdür anı bilmedi dârât ehli

Künc-i meyhânedeki 'âlemi zâhid bilmez
Anı bir kûşe idi tuydı harâbât ehli

Diğer: Değişmez sîm-i eşki dirhem ü dinâra 'âşıklar
Gamunla göz yaşın akıtmagı dünyâya virmezler

Mevlânâ AHMED ZARÎF: Gülzâr-ı Bagdâd-ı gülşen-âbâddandur lâkin asl-ı pâkize nihâdî ve neseb-i huçeste-nijâdî gülşen-i râz-ı erbâb-ı niyâz olan ravza-i dilbend olan Şîrâz'dan olup

vâlid-i erşedi Mevlânâ Muhammed-i Şîrâzî demekle iştiâr-ı tâm bulup hikmetle benâm olmuşdı ve kânûn-ı tabâbetde pesend-i bîmârân-ı rûzgâr şîfâ-bahş-ı Ebû ‘Ali nâmdâr idi. Sâbıkü’z-zikr dahi ol fenden haberdâr-ı bî-misâl ve keyfiyyet-i ahvâl-i ehl-i zamânı bilmede sâhib-hâl ve hoş -tab’ u hûb-sohbet kimesnedür. Hakkâ ki zarâfet bir hıl’at-ı latîfdür ki şân-ı şerîfine nâzildür ve letâfet bir kabâ-yı nazîfdür ki kâmet-i mevzûn râstına zîbende olduğına erbâb-ı fezâyıl kâyildürler. Buna binâen musâhabet-i dil-küşâsı rûh-efzâ ve kelimât-ı tarab-nümâsı der-gûş-ı fuzalâ ser-â-ser nazm-ı fesâhat-nizâm ve makbûl-i tabâyî’-i hâs u ‘âmdur ve kelimât-ı belâgat-encâmı silsile-i hûban-ı ‘âşikân-ı bî-ârâmdur ve bu diyâra gelen erbâb-ı devlet ve sâhibân-ı ‘imâret ve eyâlet ü a’yân-ı memleket ile semt-i lâ-ya’kıl hemîşe tettebbu’-ı eş’âr-ı mütekaddimîn ve müteahhirîn itmeden hâlî degüldür. Ahyânen tab’-ı suhen-güzârı şi’r-i dilkeş ve metâli’-i bî-gışş nakş ü nigâr itmek üzredür. El-hak ol yâr-ı nîkû-halef bakıyye-i şu’arâ-yı seleftür. Bu bir gazel-i âbdâr ve bir iki beyt anundur. Gazel

Rûz-ı nevrûz est gam-hâ-yı kuhen dârem henüz
Cümle ‘âlem şâd ü men ez dest-i gam-zârem henüz ²⁰⁰

Şâd ü âzâdend esîrân-ı gam ez bend-i belâ
Der kemend-i gam men-i miskin giriftârem henüz ²⁰¹

Bûlbûlân-ı fasl-ı bahâr ez vasl-ı gül hurrem şodend
Veh ki men der firkat-i ân lâle-ruhsârem henüz ²⁰²

Diğerân derd-i dil-i hod râ devâ kerdend ü men
Derd-mend ü haste vü mecrûh u bîmârem henüz ²⁰³

Ahmedî râ bâtû yârî yâr-ı men imrûz nist
Der ezel yâr-ı tû bûdem tâ ebed yârem henüz ²⁰⁴

Nâsihâ pendem medih k’ez zülf-i yâr âşüfte em
Dîn-i merâ men ü mâ ki men der bend-i zünnârem henüz ²⁰⁵

Zi şevk-i şem’-i ruhet sûthem çü pervâne
Turâ be sûziş-i pervâne hîç pervâ ne ²⁰⁶

Zi câm-ı vasl çü mestem nemî konî bârî
Be sûy-i men nazarî kon zi çeşm-i mestâne ²⁰⁷

²⁰⁰ Nevruz günüdür, benimse hâlâ eski gamlarım var. Bütün âlem mutlu, ben ise hâlâ gamdan inliyorum.

²⁰¹ Gama esir olanlar, mutlu ve beladan azattırlar. Ben miskin ise hâlâ gam kemendine tutsağım.

²⁰² Bahar mevsiminin bûlbülleri güle kavuşmaktan mutludur, ne yazık ki ben hâlâ o lale yanaklıdan ayırıyım.

²⁰³ Başkaları kendi gönül dertlerine deva buldular; bense hâlâ dertli, bitkin (yorgun), yaralı ve hastayım.

²⁰⁴ Ahmedî sana yarıdır, benim yarım bu gün yok. Ezelde senin yarin idim. Şimdi sonsuza kadar yarınım (Sonsuza kadar senin yarin olarak kalacağım).

²⁰⁵ Ey nâsih bana öğüt verme, çünkü yarin zülfü ile perişanım. Bana dinimi gösterme, çünkü hâlâ zünnar bağlıyorum.

²⁰⁶ Yüzünün nurunun şevkiyle pervane gibi yandım. Senin, pervanenin yanışına karşı hiç pervan (aldırman) yok.

²⁰⁷ Kavuşma kadehi ile bir kez olsun beni sarhoş etmiyorsan bari mestane gözünle bana bir bak.

EDÂYÎ: İstanbulludur. Kazzâz Bekir Çelebi demekle ma'rûf ve hüsn-i hulk ile mevsûfdur. Zebân-ı Fârisî'de behremend ve fenn-i mu'ammâda Emrî Çelebi şâgirdlerindendir. Kavâ'id-i şürût üzre tahsîl ü tekmi'l kılup ol fende huşmend olmuştur. Zîrâ ki bir çok kûşîş idüp hayli nesne feth itmiş. Gâhi ki hâtırı 'alâka-i dünyâdan küşâd bulup âzâd ola. Bir mu'ammâ-yı garîb peydâ ider ki 'akl-ı 'ukde-küşâ fethinde hayrân kalur. Bu bir iki matla'-ı dil-pezîr ol yâr-ı bî-nazîründür. Beyt:

Bildüm ey meh-rû seni gül yüzlü bir cânânesin
Bilmedüm amma melek misin yâ hod cânâ nesin

Diğer: Gördi kim yoldan çıkar gitdükce nahçîrûn senün
Geldi hakkından anun ey kaşı yâ tîrûn senün

Mâsadak-ı hâl ve şâhid-makâl diyü bir mu'ammâ cümle mu'ammâlarından iktifâ olundu. Mu'ammâ be-ism-i Ganî :

Geşt eyleyen âfâkı seyr eyledi 'uşşâkı
Görmedi benüm cânım dünyâda benüm gibi
'Âşıklarun ey dilber bî-hadd durur ammâ yok
Bir bî-ser ü bir bî-pâ arada benüm gibi

ENVERÎ: İstanbulludur. Evsâfın işitdügümüz şu'arâdandır. Bârgâh-ı mu'allânun kunbaracı bölüğünden imiş. Hadd-ı zâtında ag u kara okumamış 'âmîdür amma âteş-bâzlık san'atinde hemân bir çakım kav ve bir pâre yanar od imiş. Her bir zamânda bir dürlü reng ile fitil otları peydâ itmede mâhir ve imdâd-ı himmet ile cârî mürekkeb düzmege kâdir ve şûh-tab'-ı nedîm ü zarîf ve yâr-ı latîf olduğu ecilden kendü hasb-i hâlîn bir matla'da derc itmiş budur yazıldı. Matla'

Zülfünle hatun 'ilm-i vefâ bahsin ider hep
Biri kara câhil birisi cehl-i mürekkeb

Eş'âr-ı pür-envârınun nûrından âyine-i tîre diller münevver ve güftâr-ı âbdârınun bir katresi teşne dillere hayât-güster mânend-i kevserdür. Bu bir nîce matla' u makta' u beyt anundur. Ebyât :

Bana tokınmaz geçer gamzen diyen tîrûn senün
Boynuma salınmagın kat' itdi şemşîrûn senün

Diğer: Segirdüm vardum agyârın başın bir taş ile urdum
Yaramaz varmadum ey yâr-ı şeker-leb eyü vardum

Diğer: Eger dirsene begüm ben bendene kandan gelür yaşum
İki seyyahdur Rûm'a kara kandan gelür yaşum

Diğer: Duhter-i rez çekeliden dir isem düşdi dile

Zâhidâ var yûri kıskanma helâlün dinile

Diğer : Begüm bezmünde kan yudanların yoldaşıdır sâkî
Şarâba emr idün tutsun harâmî başıdır sâkî

İttifâken bir gün iki desti şarâb ile ol rind hâne-i harâba giderken subaşıya rast gelür. Envâ'-ı 'itâb u 'ikâba müstehak oldukda hemân bedihe bu beyti okıyır. Bu eş'âr-ı âbdârun yüzi suyına halâs bulur mezkûr beytin bir mısra'ı Ahmed Paşa'nun Kerem kasîdesindendir tazmîn-i has vâkı' olmuşdur. Beyt:

İki destüm tolı mey destümi sındurma benüm
Tutalum iki elüm kanda imiş kanı kerem

ÂLÎ: İstanbulludur. Ehl-i cihetdendir. Konevî Mustafa Çelebi'nün oğludur. Rûz ü şeb tâlib-i ma'rifet olup semt-i şî're mümâreset göstermiş. Bu bir nîce 'âşıkâne vü rindâne nâzûkâne matla' anun eş'âr-ı muhayyel ve güftâr-ı pür-meselindendir. Nazm :

Leb ile hem-dem olup câm-ı bâde-i hamrâ
Nigârün agzın arar râzın açmaga gûyâ

Diğer: Meyli bâlâya olursa n'ola serv-i çemenün
Uzanur kaddine irişmege sen sîm-tenün

Diğer: Kurulsa bezm-i safâ-bahş dönse câm-ı felek
Mey-i sabûh ile gün togsa ol günü görsek

Diğer: Gerçi 'ömrüm bu cihan kimseye bâkî kalmaz
Seni ey rûh-ı revânum koçan amma ölmez

ÂRÂMÎ: Tirevî'dür. Sâbıkan erbâb-ı sanâyi'den iken nezâket-i tab'ı gâlib olup ol şehirde ârâm kılmayup terk-i fikr-i serencâm idüp evkâtın zâyî' itmeden halâs itmek için ber-güzîde-i Kird-gâr ve sitâbende-i Ahmed-i Muhtâr a'nî Hazret-i Mollâ Hudâvendigâr'un dergâhına ihtisâs hâsıl kılmış. Ol âsitân-ı kuds-âşiyânda murg-ı rûhı ârâm ü karâr tutup mezbûr bârgâhun mücâvirlerinden ta'dâd olup ber-murâd olmadan hâlî degüldür. Zîrâ ki ziyâde dervîş-nihâd u pâkize-i 'tikâd kimesnedür. El-hak ol peyrev-i erbâb-ı necât hadd-ı zâtında nesne okumamış 'âmîdür lâkin Hazret-i Mevlânâ'nun lutf ü in'âmı irişüp eş'ârı sûz ü güdâz ile pesend-i ehl-i niyâz olmuşdur. Bu bir nîce matla' u beyt anundur sebt olundu. Beyt :

Girüp bâzâr-ı 'ışka dil satar dünyâyâ istignâ
Meta'-ı kâr ü bâr-ı 'ışkdur sermâye istignâ

Şühûd-ı şâhid-i kevneyne ir 'âlemde Ârâmî
Bekâ 'âşıkları eyler fenâ dünyâyâ istingâ

Diğer: Dâgdur hâl-i ruhun 'aksi dil-i şeydâda
Gam-ı zülfünle kara günlü 'aceb sevdâda

Dest-gîr ol meded ey hıızr-likâ göz yaşı
Kodı fûlk-i dili bir sâhili yok deryâda

Eyü yavuz gider eglenmez imiş Ârâmî
Âferîn ana ki mâlik ola yahşi ada

Diğer : Hâl-i ‘anber-bâr kim ruhsâre yasdanmış yatur
Bâgbân-ı hindidür gülzâre yasdanmış yatur

Diğer : Esb-i himmet ne kadar yügrük olursa ey dil
‘İşk çâbüklere sanma ki meydan dükene

Diğer : Dün gice hoş yanışırdun yârdan
Şem’ ü pervâne yidi yâr-ı gârdan

Diğer : Derd-i ‘ışk-ı yâri tahsîl eylemek
Hoş gelür Ârâmî’ye her kârdan

Diğer: Şol kadar fânî göründi künbed-i mînâ-yı çarh
Bakdum idi benzer âb üzre habâbun ‘aynına

ÎLÂHÎ: Vardar Yenicesi’ndendür. Şeyh-zâde’dür. Dânişmend tâifesinden eben ‘an ceddin peyrev-i ehl-i mezheb ve asl ü neseble seyyid-i pâkize-meşreb olmagın rûz u şeb evkâtın ‘ulûm-ı ‘Arabî’ye sarf idüp ehl-i ma’ârif içre kemâlle ser-efrâz ve zebân-ı Fûrs’de kendü akranı içre mümtâz olmuş. Hadd-ı zâtında tab’ı pür-hiddet ve zihni hoş -sohbet rind ü lâubâli olduğu sebebden ebyât-ı ‘âşıkâne dimeden hâlî degüldür. Bu bir nîce matla’-ı ‘ârifâne anundur. Nazm :

Var iken hâk-i reh-i dilber-i nâzûk-reftâr
Kim alur ‘aynına kühli nedür ol bî-mikdâr

Dagıdup ‘aklumu cem’iyyet-i hâtır komadı
Elem-i ‘ışk-ı cevânân-ı perîşân-destâr

Diğer: Çekilür gelmege tîrûn kati ey kaşı kemân
Bu kez olmaz gibi gam-hâne-i dilde mihmân

Ey İlâhî bedenün kılca degülken ne ‘aceb
Âh-ı pür-sûzun olur ejder-i âteş-efşân

Diğer: Degül maksûdumuz ‘ışkunla cânâ derdden gayrı
Sirişk ü inkısâr-ı kalb ü rûy-i zerdden gayrı

ÂTEŞÎ : Bagdâdî’dür. Erbâb-ı sanâyi’ dendür. El kâsibi habiballah ²⁰⁸ hadîsiyle kâni’ olup sükkerlige mu’tâd iken evkât zâyî’ itmeden ihtirâz idüp gâh gâh şî’r-i efkârın dahi kendüye kâr u bâr kılur ve üstâdân-ı rûzgâr içre sâhib-hüner ve suhen-verân-ı devrân mâbeyninde zebân-âver ve ber-muktezâ-yı mahlas âteşîn mizâc olmagın istignâ yüzünden kimseye ‘arz-ı

²⁰⁸ Allah kazananı (ticaretle uğraşanı) sever.

ihtiyâc itmez ammâ tarz-ı gazelde germ-güftâr u ma'ânî-âsâr ve hasb-i hâl-i 'âşık-ı zâr. Bu bir kaç Fârisî eş'âr anundur. Beyt :

Gül be pîş-i ruh-ı zîbâ-yı tu ra'nâ ne buved
Gonce nezd-i dehen-i teng-i tu gûyâ ne buved ²⁰⁹

Begû be-âteş-i dil-i Âteşî ki der kûyeş
Zebâne kem keşed ü hîş râ 'alem ne koned ²¹⁰

Çû râ germ-i sevdâ Âteşî bâ müdde'î dîdem
Zi hayret dîde-i gayret be-bestem tâ çi pîş âyed ²¹¹

Dûşîne meger bâde keşidest ki imrûz
Mahmûr birûn âmede destâr perîşân ²¹²

Fî hurûfî'l-bâ

BEHİŞTÎ Efendi: Edirne ile İstanbul mâbeyninde olan kasaba-i Çorlu'dandır. Ehl-i 'ilm zümresindendir. Müddet-i medîd ve 'ahd-i ba'iddür ki kasaba-i mezkûrede vâ'izdür. Mütâla'a-i mütedâvile ve tefâsir ü ehâdise evkât-ı bâ-berekâtın sarf idüp her fenne resâ'il yazmışdur ki makbûl-i merdüm-i efâzıl olmuş. Zât-ı şerîfi kemâlât ile ârâste ve 'unsur-ı latîfi hilm ü hayâ ile pirâstedür. El-hak ol ser-âmed-i erbâb-ı hünerün ma'lûmât-ı mu'ciz-âyâtı ve kemâlât-ı bi-nihâyâtı bir haddedür ki tarîkdan ferâgat itmeyüp ol semte sülûk idüp sâir müderrisîn gibi tadrîs kabûl itse az zamânda mevâlî-i 'izâm ve ehâlî-i kirâmdan 'add olunması mukarrer idi. Bâ-vücûd bu kadar 'ilm ü fazl ile yine rind ü lâubâli 'âşık-pîşe ve nîk-endîşedür. Rûz u şeb şevk u zevkden 'ayş ü 'işretten hâlî olmayup sehî-kadd sîm-berlerle ve lâle-hadd dilberlerle seyr-i sahrâ ve geşt-i zâr-ı vefâ etrafına revân olup gûyâ reşk-i huld-ı berîn içre hûr ü gılmân ve manzûr-ı dîde-i pîr ü cevân olan cevânlar ile zevk ü safâda magrûr ve terennümât-ı tarab-efzâ ile nevâda mesrûr iken bu matla'ı mestûr kılmış ashâb-ı 'ayş ü huzûr arasında meşhûrdur. Matla' :

Tene dîrnâ diyü meclisde sürûr itsen sen
Başlar ey rûh-ı revân ditremege dir dir ten

hakkâ budur ki gâyetle zarîf ü latîf hoş -sohbet ve pür-dânâ-dil pür-himmet ve sanâyi'-i şî'rde ve sâir 'ulûmda kâmindür. Aksâm-ı nazma kâdir ve tarz-ı mesnevîde sâhir ve kasâid-i pür-fevâyidi vâfir eş'âr-ı tarab-engîzi sûz-nâk ve güftâr-ı şeker-rîzi lezîz ü pâk ve beyne'n-nas bî-hadd ü bî-kıyâs vâkı' olmuşdur. Bu bende-i râh-ı nûr ü sahrâ-yı derd ü gam envâ'-ı ikdâm ve

²⁰⁹ Gül senin güzel yüzünün önünde güzel değildir. Gonca senin dar ağzının yanında yok sayılır.

²¹⁰ Âteşî'nin gönül ateşine söyle de onun mekanında fazla alevlenmesin ve kendini pek ortaya çıkarmasın.

²¹¹ Ey Âteşî onu (sevgili) rakip ile sevda içerisinde görünce hayretimden ne olacak diye gayret gözümü kapadım (bakamadım).

²¹² Dün gece içki mi içti de bu gün sarığı dağınık vaziyette, mahmur bir şekilde dışarı çıkıyor.

‘âli-himem ile meclîs-i behişt-âyinlerine İstanbul’da irişüp sohbet-i hasları ile mugtenim olmuştur. Cümle-i gazeliyyâtın görmüş bin gazel mikdârı vardır. A’lâsı gâyetde a’lâ ve âbdâr olmanın pesend-i herkes ve vird-i zebân-ı ‘âşıkân-ı hûb-nefesdür. Bu eş’âr anundur. Nazm :

Sarardup şîre döndürdi gamun men zerd-sîmâyı
Rakîb-i kâvî göster gel berü seyr it temâşâyı

Dili bir seng-i mıknaş idüpdür şevk-ı peykânun
Ne lâzım çekmesün zahmet benümçün kaşların yayı

Diğer: Seg-i kûyunladur benüm cengüm
Bilmezem taşların niye fırlar

Diğer: Gözümde merdüm-i dîde ruhunda tıfl-ı Habeş
İkisinün biri birine yaşı benzemesin

Bu gazel dahi ol şâ’ir-i ferzâne kelimât-ı rindânesindendür. Gazel :

Kande görse bu lezzet ile şeker
La’l-i şîrînüne senün baş eger

Çarsû-yı derûnuma gönder
Anda tîr-i müjen ziyâde geçer
Hum yanında sürâhi ey sâki
Benzer ol tıfla kim anasın emer

Nîce kılsun namâzı sûfi kim
Âbdestün yirinde yiller eser

Kon ‘ilâc eylemen Behiştî’ye
Derd-i ‘ışkı anun mizâcî sever

Gazel-i nazîre li-mü’ellifîhi :

Görelî bâgda benefşe-i ter
Sünbül-i hattına anun baş eger
Cânı tîz vir o şehsüvâre diyü
Nîzesi turmayup beni dürter

Aldı bir reng ile dili gitdi
Görmedüm böyle bir dahi dilber

Agzuma virdi la’lüm em didi tez
Didüm ivme suya mı düşdi şeker

Katlüme va’de eyleyüp gitdi
‘Ahdî-i haste va’desin gözler

Bu bir kaç matla' u beyt-i pür-sûz ol şâ'ir-i ma'ânî-endûzundur. Ebyât :

Bezme gel bu gice ey 'âlem-i hüsnün mâhı
Yohsa yirden göge dek incinürüz vallâhi

Diğer: Uzaldugınca yanumdan ol kâmet-i bâlâ
Benüm ne sidre görünür gözüme ne tûbâ

Nasîhat eyleyi gördüm şu denlü tıfl-ı dile
Levend-i 'ışk odasından kesilmedi kat'a

Behiştî bendeni öldür efendi tîgun ile
Eger hasedden ölürse 'adû cehennem-râ
Diğer: Zayf-ı hayâlün irdüğü dem çeşm-i eşk-bâr
Silker önine mâhazârı bire iki enar

Diğer: Çarh-ı havfî mâh-ı nevden bir kemân almış ele
Ey Behiştî kasdı anun ya şunadur ya buna

Diğer: Dâr-ı gurbetde gamun görüp gezerken yâd olup
Âşinâsın bulmuşa döndüm sevindüm şâd olup

Diğer: Göz terâzusıyla olmaz hüsn-i bî-haddür hisâb
Olmaz ey Yûsuf-cemâlüm bahre peymâne habâb

Sâye sal ey ebr yandım bu harâretlerle kim
Yüz sürer yürür izi tozına yârün âftâb

Diğer: Her kim ki tâc-ı 'ışkı geye ihtiyâr ile
Kendü eliyle satun alur başına belâ

Diğer: Bir latîfe geçdi agyâre hep insâf eyledün
Pây-dâr olsun yiri geldükde devşürür sabâ

Diğer: Kâdî yine müselles-i şer'îden oldı mest
Kim meygede kapusını andurdı darb-ı dest

Diğer: Mecnûn'a 'ışk-ı Leylâ bir şem'-i reh-nümâdur
Ferhâd'a 'ışk-ı Şîrîn bir tatlucak belâdur

Diğer: Namâza yüz yumadugum benüm ma'zûr tutmazlar
Cemâ'at varsa bu dîde-i hûn-bârumı bilmezler

Diğer: Hınnalarını bir kişiye gösterür yürür
Kendi kızıl eliyle beni bir gün öldürür

Diğer: Bezm-i gülşende eser kalmadı câm-ı Cem'den
Götürüldi dükeli zevk ü safâ 'âlemde

- Diğer: N'ola hurşîd-i hâver kim cihan meşhûrîdur
Rûy-i çarha mün'aks olmuş 'ızârun nûrîdur
- Diğer: Müyesser olmamak olmaz mukadder ise visâl
Ki olmaz ey yüzi gün zerrece visâle zevâl
- Diğer: Derd-i 'ışkun bulmadum ben bundan özge çâresin
Sînene bir sâde-rû mahbûbı muhkem sarasın
- Diğer: Gören dir raks iderken gird-bâd-ı deşt [ü] hâmûnı
Sema'a koydı Leylâ'nun hevâsı hâk-i Mecnûn'ı
- Diğer: Şem'e meclisde harâret viricek mihr-i ruhun
Mirvaha atdı ana bâl ü perin pervâne

Mezkûrun tab'ı ziyâde küşâde olmanın latîfeleri gâyetde çokdur. Cümlesinden biri budur ki kasaba-i mezbûrede zümre-i sipâhdan Baba Kuşeyrî nâm nedîm-i hâs u 'âm olan yah-fürûşun ittifâken bir gün teferrüc-künân cânib-i yahdânına revâne olduklarında mütâyeye yüzinden karısına müte'allık bu beyti bedihe hûb buyurmuşdur nüdemâyâ matlubdur sebt olundu. Beyt :

Harâretten meded öldük Kuşeyrî
Bize in'âm ü 'âm eyle karından

BEYÂNÎ: Bagdâdî'dür. A'yân-ı zamân ve müdebbirân-ı cihân içre elkâb-ı huçeste-ensâbı Seydî Çelebi diyü meşhûr ve zebân-âverân-ı pür-dân meyânında suhen-ârâ ve 'ukde-i ma'ânî-i dil-küşâde diyü mezkûrdurlar. Ecdâd-ı pâkize-nihâdlarına Beyânî-zâde didikleri ma'lûm-ı cumhûrdur. Beyânî mahlas kılduklarına sebep budur. Ol nüktedân-ı hûb-nesebün vâlîd-i pür-hasebi menâsıb-ı Hüdâvendigâr'ı bi't-tab' ele getirüp husûsâ sâhib-tabl u 'âlem ve nigeş-dâr-ı hayl ü haşem olup ümerâ-yı 'âdil ve sâhib-devletân-ı deryâ-dil silkine dürr-i nâb gibi münselik olup ber-murâd olmuşlardır. Müşârünileyh 'âlem-i şebâbda bir an ve bir sa'at gâfil olmayup tâlib-i ma'ârif ve esrâr-ı İlâhîye vâkıf olmag için tahsîl-i 'ulûma cidd ü cehd gösterüp ol 'ahdün nâdire-i zamânı olan Mevlânâ Fazl-ı İsfahânî'nün mecâlis-i behîşt-âyînine irişüp fûnûn-ı ma'kulât-ı pür-nikâtı kemâ hakkıha görüp cehlden zât-ı hoş-sıfâtı halâs kılup makbûl-i havass olmuşlar. Hususa ma'ânî ve beyânı vird-i zebânı olup âhir **Küllî şeyun yerciu' ilâ aslihi** ²¹³ muktezâsınca sipâhilığa tevsen-i himmetin ma'tûf tutup ol revîşde cündlug arzu kılup meydân-ı vefâda pür-zîver ve a'dâsına mansûr ve rahş-ı tab'ı bir yirde karâr itmeyüp bu diyâra gelen sâhib-i sa'âdetlerden 'arûz alup bâb-ı murâd-bahşa varup dergâh-ı mu'allâyâ ve bârgâh-ı 'alâyâ revâne olup zümre-i çavuşâne mülhak olmuşlar. Sâhib-i tezkire bu dil-küşâyı anların dergâh çavuşlarından olduklarına hakkında keyfî'l-ittifak edâ idüp bu mecmu'a-i zurefâyâ sebt itmişdür. Târih li-mü'ellifihi:

Çün Beyânî-zâde vardı kapuya
Bulmaga kâm-ı dilin ol hoş -nihâd

²¹³ Her şey aslına döner

Dergeh-i ‘âlîde buldı kâm-ı dil
Oldı ikbâl ile akrândan ziyâd

‘Ahdi târihin didi olmuş durur
Seyyid Çavuş der-i Sultan Murâd

El-hak ol yâr-ı nükte-senc kelimât-ı hayât-nümâyıla sâhib-gencdür. Makbûl-i tabâyi’-i yârân-ı suhendân ve pesend-i zurefâ-yı gevher-zâ’-i devrândur. Musâhabet-i cân-fezâyıla mânend-i tûtî-i hoş -edâ ve serv-i sehî gibi engüşt-nümâdur ve inşâ ve eş’ârı rûh-bahş ve ma’ânî-yi dil-küşâsı ziyâde sâfi gibi bî-gışş. Elsîne-i selâsede ebyât-ı tarab-fezâsı gamzedâ olduğu gibi hüveydâ vü musaffâdur. Bu bir gazel bu bir nîce nazm-ı dil-âviz ol yâr-ı ‘azîzündür kalem-i gül-bîz ile sebt olundı. Gazel :

Kûyine seyl-âb-ı eşk ile iletse su beni
Ey ecel lutf eyle kim görmeye ol bed-hû beni

Olsa nevk-i kilik-i müşk-efşânına ten muttasıl
Kâyilem derd ü elem za’f ile kılsa mû beni

Ol perîşân kıldı çün hâl-i perîşânum su’âll
Sünbülün tutdum kim âşüfte kıldandur bu beni

Şâh-bâz-ı mülk-i istignâ idüm oldum şikâr
Ey gönül yâhû seni sayd itdi ol âhû beni

Gam âyînemdür gelürse şâd olur cân-ı hazîn
Gitse gamnâküm yine şâd ider ol kaygu beni

Gâh meyl-i bâde gâhi ragbet-i zühd ü salâh
Ey Beyânî sûdsuz sevdâ çeker her sû beni

Diğer : Alupdur ‘âriyetle bâd gûyâ jâle dendânın
Keremler gonçe gönlünden açar âheste âheste

Diğer: Başum üzre dâg tâc-ı Hüsrevânî’dür bana
Şâh-ı şehr-i ‘ışkum ol devlet nişânıdır bana

Câm-ı Cem’dür itlerünle çekdigüm zâfın sıfâl
Gice kûyun beklemek ‘ayş-ı nihânîdür bana

Diğer: Zahm-ı sînem içre çün âlûd-ı peykânı görün
Gonçe agzın pîr iden gülberg-i handânı görün

Diğer: Mâyil olma ey gönül gîsû-yı ‘anber-fâmına
İrmek olmaz bu uzun sevdâların encâmına

BEDRÎ Çelebî: Sirozî. Kuzât zümresindendir. Âsmân-ı ma'rifete bedr-i münîr ve gerdûn-ı fazîlete hurşîd-i bî-nazîr fûnûn-ı ma'ârifle makbûl-i tabâyî'-i ehl-i 'îrfân ve edâ-yı selîs ile musâhabeti nefîs ü ruh-bahş-ı yârândur. Bahr-ı nazma tab'ı şâmil ve şebistân-ı hayâlle mu'ammâda kâmindür. Ol şâ'ir-i deryâ-dilün nazm-ı dürer-bârı âbdâr ve eş'âr-ı âteş-bârı hasb-i hâl-i dil-i zârdur. Bu beyitler anundur. Nazm :

Dök nakd-i eşki derdünü ol nâzenîne aç
Teshîr itmege o perîyi defîne aç

Her gonçe açdı bülbül-i şevkine yakasın
Gel sen de 'andelibüne gül gibi sîne aç

Diğer: Reh-i dildârda hâk ol tarîk-ı bî-bedeldür bu
Kayırmaz sille-i ta'n-ı 'adûyı yirsün eldür bu

Visâl-i yâre magrûr olma hicrinden hazer eyle
Ki Bedrî zehrle âlûde olmuş bir 'aseldür bu

BASÎRÎ: 'Acem'dür ammâ diyâr-ı Rûm'da neşv ü nemâ bulmuşdur. Hadd-ı nefsinde ser-defter-i zurefâ-yı 'âlem ve hüsn-i edâ ile pesendîde-i ümem mütâyebe-i latîfle makbûl-i 'Arab ü 'Acem hoş -tab' u hûb-sohbet ve musâhabet-i pâki meclis-ârâ ve üslûb-ı mühâverede bî-hemtâ envâ'-ı letâyife kâdir ve sanâyî'-i şî'rde mâhir iki zebân ile ebyât-ı nâzüke mâlik ve hemîşe ma'ârifte sâlik imiş. Şu'arâ-yı Rûm ile ve fusahâ-yı 'Acem ile müzâkere ve müşâ'ereden hâlî olmayup dürlü dürlü zarâfeti meşhûr ve lâg u latîfesi efvâhda mezkûr takrîr ü tahrîr lâzım degüldür. Kelimât-ı dil-efrûzı dil-pezi ve ebyât-ı pür-sûzı bî-nazîr erbâb-ı basîret bu tahrîrden habîrdür. Cümlesinden bir iki Fârisî ve Türkî matla' anlarındur. Nazm :

Rûz-ı bârân bes ki der kûy-i bütân gerdîdeem
Der tarîk-ı 'ışk-bâzî gurg-ı bârân dideem ²¹⁴

Diğer : Kirpigün sihr okları ebrûlarındur yay ana
Bir benüm gibi belâ-keş ugrar ise vay ana

Diğer: 'Âşıklarını âh o Mesîhâ dem öldürür
Bu âdem öldürür ki Mesîh âdem oldurur

Diğer: Gerçi kim dirler cihanda 'ârifte bir gül yiter
'Ârifte bir gül yiterse bana yarım gül yiter

Diğer: Hem-nefes olalı can nâle vü efganlar ile
Mumdur yanmaga dil şem'-i şebistanlar ile

PENÂHÎ: 'Acem'dür. Üstâz-ı şâh Kulı nakkâş-ı elvân-ı renk-pâş dinilmekle meşhûrdur ve dürlü dürlü eşkâl-i garîbe ve 'acîbe yazmakda pesendîde-i üstâdân-ı nezdîk ü dûrdur ve

²¹⁴ Yağmurlu günlerde güzellerin köyünde o kadar dolaştığım için âşıklık yolunda yağmur görmüş kurdum (ustayım)

sâbikan ‘ilm-i zâhire ve fûnûn-ı şî’re iştigâl gösterüp bir mikdâr ma’rifetden haberdâr olup âhir nakkâşlık san’atını kendüye kâr idinüp bu mâbeynde gâh evkâr u gâh dil-fikâr geçeni ve evmâka geleni temâşâlanurken bir niçe rûzgâr-ı zûr-kâr ile ol kâr-rengîn-i pür-hayâlden nakkâşân-ı Çîn gibi bî-misâl ol kilik-i bedâyi’ sanâyi’-i sûr ile tarrâh-ı dil-pezîr ve bî-mânend ü nakş-ı dil-keşe zemîn ü zamânda bî-nazîr ü dil-pezîr tasvîrde mübdi’ u muhteri’ misâl-i Mânî ve tahrîr-i reng-â-reng ile çihre-küşâ-yı ma’ânî ve sîb-i zekân olan bütân-ı sengîn-dil ve gonce-dehen olan kilid-hân-ı şîrîn-şemâyil tasvîr ü tahrîrâtta Bihzâd-ı zamân ve tezhîbde yegâne-i cihân olup nîce müddet pâdişâhımız hazretlerinin kâr-hânesinde her vechile envâ’ işler işleyüp nakkâş-başlığa lââyık u sezâ-vâr ve üstâdân-ı rûzgâr içre nâmdâr olmuş iken ol üstâd-ı nîk-âyîne rûzgâr-ı gaddâr u tezhîb-kâr çarh-ı sitem-kâr bir renk geçdi ki bî-direng ü bî-ihtiyâd hemîn-dem terk-i kâr u bâr idüp hâtır-figâr ve rûy-i evkâr gelüp önünde ser teslîm-i ber-zemîn kılmış. Ammâ tabî’at-ı şî’riyyesi hûb ve ma’ânî-i rengîn ile sözleri mergûbdür ve bu bir iki Fârisî matla’ anundur sebt olundu. Şî’r :

Gerçi bî-çâre be kûy-i tu besî mî âyed
Hîç bî-çâre-ter ez bende kesî mî âyed ²¹⁵

Gam hored Mecnûn eger sad mülk-i âbâdeş dehî
Şâdmân gerded çü ez virâne abâdeş dehî ²¹⁶

PENÂHÎ: Konevî’dür. Hazret-i Mevlânâ Hudâvendigâr’e peyveste asl u nesebi ve nâm-ı huçestesi Mustafâ Çelebi’dür. Hadd-ı zâtında sünnî mezheb ve nîkû-sîret ve ehl-i meşreb ve hoş sohbet kimesne idi. Lisân-ı ‘Arabî’de ve tasavvufda ma’lûmât-ı pâki makbûl-i fuzalâ-yı ‘âlem ve zebân-ı Fârisî’de kavâ’id-i pür-fevâyidi pesend-i zurefâ-yı ‘Acem’dür. Zîrâ ki müddet-i medîd ve ‘ahd-i ba’îd Mevlânâ’nun âsitânın penâh idinüp şeyh-i hânkâh ve mesnevî-hân-ı dergâh-ı ârif-i billâh olmuş. Gûyâ ki bir gün mahâfil-i erbâb-ı hidâyetde şevk-ı şems-i pür-harâretle vecd ü hâlet irişüp raks u semâ’a bî-ihtiyâr mânend-i zerre-i bî-mikdâr girüp bu beyt-i hasb-i hâl-i dil-i bî-karâr dimiş. Beyt

Şevk-ı Mevlânâ ile tan mı semâ’ itsem bu gün
Zerre lâbüd raks ider tokınsa şemsün pertevi

Âhir ber-muktezâ-yı gerdiş-i gerdûn-ı dûn ve cünbîş-i rûzgâr-ı bî-sükûn ol bâb-ı hümayûndan dûr düşüp bir nîce zamân zâr ü zebûn ve vâdî-i tahayyürde hayrân ve sahrâ-yı tefekkürde menzil-i maksada pûyân olup şehr-i Kostantiniyye’ye gelüp ehl-i cihet olmuş. Ol rû-şinâs bin dürlü i’zâz ile beyne’n-nâs zindegânî idüp merhûm şeh-zâde Sultân Mehemmed Câmi’i’nde hâfız-ı kütüb nâmıyla ser-efrâz iken ravza-i câvidânî isteyüp **Küllü nefsin zâikatü’l-mevt** ²¹⁷ şarâbın nûş idüp kayd-ı dünyayı ferâmûş eyledi. Kâne sene ihdâ ve seb’in ve tis’â mi’e. Bu bir kaç matla’-ı muhakkıkâne ve muvahhidâne anundur. Nazm :

²¹⁵ Senin mahallene çok biçare gelirse de benden daha biçare olan gelir mi (gelmez)

²¹⁶ Eğer Mecnun’a yüzlerce ma'mur mülk versen gamlanır, bir virane versen şenlenir.

²¹⁷ Her can ölümü tadacaktır (Kur'an 29/ 57)

Derdden cism-i za'îfüm şöyle nâ-peydâ yatur
İremez dest-i ecel peyki ki bî-pervâ yatur

Katreden kemdür nemi yanında bahr-ı kâ'inat
'İşk dirler bu muhît-i dilde bir deryâ yatur

Diğer: Gör nice 'ayyâr u tarrâr-ı cihandur zülf-i yâr
Her girih başında anun nice yüz bin başı var

Diğer: Zülfi sevdâsıyla ben bûyî hevâsıyla sabâ
İki bî-hâsıllaruz ser-geşte itmiş rûzgâr

BİDÂRÎ: 'Acem Sehâbî'nün karındaşıdır. Dergüzîn'den Rûm'a gelüp zurefâyı ihtilât idüp güftâr-ı Türkî'ye meyl kılup bir mikdâr edâsına irtibât virüp fenn-i şî'ri tamâm tahsîl ü tekmîl itmiş. Egerçi aslında nesne okınamış 'âmî idi. Ammâ hâtırında şu'arâ-yı selefdan ve müteahhirînden eş'âr-ı bî-nihâye var idi. Musâhabetinden bi'l-küllîye hazz-ı tâm olunurdu. Zîrâ ki dâ'im h'âb-ı gafletden dîdesi bîdâr ve vâdî-i zarâfetde gönlü hûşyâr u rind-i mey-h'âr idi. Zebân-ı Fârisî'de eş'âr-ı sûznâke sâlik ve güftâr-ı Türkî'de edâ-yı pâke mâlik sene semân ve sittîn ve tis'â mi'ede ecel peyki ana dest-res buldı. Bu bir kaç matla' u beyt ki hasb-i hâl-i 'âşıkân-ı bî-mecâl ü şâhid-makâl ol şâ'ir-i şîrîn-kelâm-ı mübârek fâlundur. Nazm :

Göz göz oldı cism-i zârum nâvek-i dildârdan
Cümleten çeşm oldum amma doymadum dîdârdan

Diğer : Sûret-i yâr ile dil hânesini deyr eyle
Yâri her kûşede bir sûret ile seyr eyle

Diğer: Kaddüm hilâle döndi tenüm bir hayâldür
Ya'nî ecel gelüp beni bulmak muhâldür

Diğer : Ta'cîl idüp helâküme kasd itme ey ecel
Şâyed visâl-i yâre irem ihtimâldür

BELİĞÎ: İstanbulî'dür. Dergâh-ı mu'allâ yeniçerilerindendir. Esnâf-ı şî're kâdir ve edâ-yı belîğ ile şâ'ir ve eş'âr-ı belâgat-nümâsı dilkeş ve güftâr-ı nezâket-fezâsı hoş rind ü lâubâli olduğün nazmı rindâne olmadan hâlî degüldür. 'Âşıkâne gazelleri çok ve nefis ü selîs idüğüne söz yok. İli misli hazâ gazel :

Dilimüz anlayamaz sûfî bizüm kâl ehli
Bî-zebân söyleşelüm var ise bir hâl ehli

Saltanat fakr ile fahr itmek imiş 'âlemde
Ne bilür kadrin anun memleket ü mâl ehli

İledür halvetine hîle ile sûfî şarâb
Görmedüm dünyede anun gibi bir âl ehli

Cânı cânan yolına virmede ihmâl itme
İremez menzil-i maksûdına ihmâl ehli

Her dem âl ile Belîgî öper ol serv ayagın
Görmedüm hûn-ı şirişküm gibi bir âl ehli

BÂKÎ: İstanbul'dandır. Dellâk-zâde demekle ma'rûf ve hüsn-i hulk ile mevsûfdur. Zamân-ı evâilde ve bu fânî menâzilde babası merhûm ü magfûr Sultân Mehmed Hân-ı Gazi Câmi'i'nün hâtib-i hoş -âvâzı imiş. Mezkûr Bâkî dahi sadâ-yı dilkeş ile nagme-sâz ve eş'ârda sihr-perdâz kimsedür. Egerçi henüz 'âlem-i bî-bekâda bâkîdür lâkin nazm-ı dür-pâşından nâm ü nişân yok gûyâ ki Bâkî'nün hümâ-bâl olan şeh-bâz-ı tab'ı pervâz ideli mezkûrun tûtî-i zihni havfle pervâzdan vaz gelmişdür. El-kıssa nazmı ziyâde çok dirler feemmâ şöhreti yokdur. Bu matla' u beyt anundur dirler yazıldı Beyt :

Kim çeker yasını ey dil ol kemân-ebrûnun
Kim görür ya tozunı ol hat-ı 'anber-bûnun

Gözümün kanlu yaşı devlet-i 'ışkunda şehâ
'Aynına almaz olupdur akışın Ceyhûn'un

BÂKÎ-İ Selânikî: Zamân-ı evâilde evân-ı cevânîde sabâhat-i ruhsârı reşk-i gül-berg-i ter ve tarâvet-i 'izârı gayret-i mâh u hûr idi. El-hak bî-nevâlıkda ser- defter-i nüdemâ-yı 'âlem ve bî-hayâlıkda edâ-yı muzhık ile pesendîde-i 'Arab ü 'Acem ve kelimât-ı latîf ile hoş -sohbet ü meclis-ârâ ve tekellüm-i Fârisî ve 'Arabî'de bî-nazîr ü bî-hemtâ ol gonçe-i nevreste gülistân-ı vefâ için bülbülân-ı destân-serâ ya'nî zümre-i şu'arâ ebyât-ı tarab-engîz ve kelimât-ı 'anber-âmîz dirlerdi. Kendinün dahi tabî'at-ı şî'riyyesi var idi lâkin şöyle zarîf ü nâzûk tab' idi ki asla kendüye güc göstermez idi. Ahyânen netâyic-i tab'ından buna benzer nazm zuhûra gelüp makbûl-i cumhûr olundu. Beyt :

Beyânun cânı yürek yağı cigerler kanı
Ana beş beş togura sencileyin oğlanı

BEKÂYÎ-İ İznîkî: Dânişmend tâifesindendir. 'Âlem-i bî-bekâyı bâkî sanup Bekâyî mahlas itmiş. Hâlâ rûz ü şeb fûnûn-ı 'ilme cehd idüp akrânı içre benâm ve pesendîde-i havass u 'avâm olmak üzredür. Hâlbuki şehir-i mezbûrda Cimri Çingan oğlu demekle şöhret-i tâm bulmuşdur. Tabî'at-ı şî'riyyesi kem degüldür kim bu beyt-i dil-firîb anundur. Beyt :

Ehl-i dil kûy-i yâre cem' olsun
Hacı hacıyı Mekke'de bulsun

BÂLÎ : Rûm İli'nde Göllikesriye nâm şehrdendir. Ehl-i timârdandır. Rûz u şeb mülâzemet-i erbâb-ı dîvân ve hıdmet-i a'yân idüp ma'rîfet-i cüz'î yi tekâmîl ve zebân-ı Fûrsî tahsîl itmeden hâlî degüldür. Egerçi sâir ehl-i nazm gibi meşhûr olmamışdur ammâ kelimât-ı şeker-bârı halâvetden berî degüldür. Beyne'n-nas egerçi sûretâ evzâ' u etvâr ile şu'arâya musâhabeti

yokdur. Hemân Rûm İli delûlerine benzer idi. Ekser-i eş'ârı mahlası gibi şîrîn ü rengîn vâkı' olmuşdur. Beyt:

Dilâ sanma meh-i bedri ihâtâ eylemiş hâle
Kemend-i mihrini takmış o mâh çâr deh sâle

Dil esrâr-ı leb-i la'lünle sergerdân u hayrândur
Sanasun bir megesdür kim ırakdan tolışur bâle

Şekerdür vasf-ı la'l-i yâr-ı Bâlî'ni şeker-hânun
Gıda vir kand-i güftâr-ı lebünden tûtî-i bâle

Bİ'ÂTÎ : Kalender olup Karaamid'dendür. Seyyid Cemâlü'd-dîn Mücerred'ün ferzend-i güzîni ya'nî cânîşîni olan Baba 'Alî Kazvinî'nün Edirne'de hâk-i pâyine irişüp dest-i irâdet sunup anlara bi'at itmiş. Kuvvet-i şî'riyyesine bu bir iki beyt dâl ki vasf-ı dilberân-ı nîkû-cemâldür zikr olunur. Beyt :

Nedür ol kâmet-i mevzûn nedür o sîm-beden
Nedür ol tal'at-ı zîbâ nedür ol vech-i hasen

Nedür ol çâh-ı mu'allak nedür ol katre-i mâ
Nedür ol kûy-ı melâhat nedür ol sîb-i zekân

Fî hurûfî't-tâ

TÂBÎ-İ Kûçek: İstanbûlî dânişmend tâifesindendür. Zâhiren Sûfî-zâde demekle meşhûrdur ve hadd-ı zâtında rind ü lâubâli 'âşıklıqla efvâhda mezkûr gâh 'ayş ü nûş ile kâm-yâb ve gâh âteş-i firkat ile bî-tâb ü mehcûrdur. Cân u dilden ma'rifet semtine sâlik ve bir mikdâr hat yazmaga mâlik ve üslûb-ı şî'r-i makbûl-i Bâkî Çelebî'den istifâde itmiş ve tarz-ı hezli ve lâgı Sânî mahlas iden Cân Memî'den ahz ü cer kılmış anuñcün dâimâ ol tarîkde peyrev-i Sânî olup çerâgı andan uyarmış ve hemîşe itâle-i lisân idüp şu'arâyı garîb güftârla ve zurefâyı 'acîb eş'âr ile hicv itmeden hâlî degüldür. Anlar dahi anı ana göre elfâz-ı mühmele ile medh itmeden berî degüller. Bu gazel-i 'âşıkâne anundur. Gazel :

Vuslata gülşende el sundum nigâr el virmedi
Servi çekdüm sîneye âhir çenâr el virmedi

Destin öpmek istedüm pîr-i mugun mey-hânede
Düşdüm ayagına hayfâ ihtiyâr el virmedi

Yelken açdı çıkmaga girdâb-ı gamdan fûlk-i dil
Keşti-i ten garka vardı rûzgâr el virmedi

Gördüm ol yâri kenâr-ı cûyda refât ider
Arzû itdüm visâlini kenâr el virmedi

Gül koparmak istedüm Tâbî o şâh-ı şîvede
Hayli ikdâm eyledüm ammâ ki hâr el virmedi

Bu matla'lar dahi anundur takrîr ü tahrîr olunur. Ebyât :

Gönül âyînesin gerd-i riyâdan sâf ü pâk itdüm
Mahabbet pertevin saldum güneşden tâb-nâk itdüm

Diğer: Vaslun hazînesin sakınur var ise eger
Yok yirlere tolaşmaz efendi bilün kemer

TÂBÎ-İ Büzürg: Tarabefzûn'dandur. Dervîş-meşreb ve seyyâh-ı diyâr-ı Rûm ü 'Arab'dur. Terennümât-ı hoş -edâyla bülbül-i mevzûn ve nagamât-ı dilkeş ile gamzedâ-yı dil-i mahzûndur. Türkî bağlamada üstâd-ı dil-pezîr ve nakş u savt okımada akrânı içre bî-nazîr ve musâhabet-i dervîşâne ile hem-dem-i yârân ve letâyif-i latîfî bî-hadd ü lâ-yu'addur. Cümlesinden biri bu ki kendü Büyük Tâbî dinilmekle bilinür ve İstanbullu olan Tâbî-i Kûçek ki zu'mı kendüden büyük vâkı' olmuş dâimâ mahlasları iştirâk üzre olmanın birbirleriyle hırhır-ı da'vâdan hâlî degüllerdür. Bu hâletde bir gün zurefânun ber-güzîdesi ve şu'arânun pe-sendîdesi Büyük Tâbî'ye Amânî râst gelür. Mütâyebe tarîkıyla kanı Küçük Tâbî görünmez diyü ana su'âll ider. Mezkûr dahi hâzır cevâb olup latîfe yüzinden bu beyti 'ale'l-fevr nazm itmiş rakam oldu. Beyt :

Tâbî-i Kûcegi görmek dileyen
Görsün işte etegüm altında

TÂBÎ: Rûm İli'nde Vardar Yenicesi'ndendür. Sultânü'l-'ulemâ ve burhânü'l-fuzalâ ve râh-nümâ-yı muvahhidîn ve piş-vâ-yı fukarâ-yı rûy-i zemîn mefhâr-i meşâyih-i küberâ a'nî Mollâ Hudâvendigâr'un dergâh-ı felek-medârına irişüp nîce müddet anda karar kılup fukarâ içre dervîşlik ile nâmdâr ve ma'ârif-i İlâhî ve esrâr-ı nâ-mütenâhîye mahrem ve ma'lûmât-ı kesîre ile makbûl-i 'Arab ü 'Acem'dür. Hadd-ı zâtında pâk meşreb ve lâubâli-mezheb olmanın hemîşe geşt ü güzâr-ı memâlik-i 'Arab itmeden hâlî degül ol yâr-ı sâdıkun iki zebân ile kendü hâline muvâfık muvahhidânesi hûb ve güftâr-ı muhakkıkânesi mergûbdur. Pes bu gazelle bir iki matla' anundur rakam olundu. Gazel

Sâye-veş bir serve her kim bende-i üftâdedür
Kâr u bârından cihânun farîg u âzâdedür

Gerçi Husrev sevdi Şîrîn'i irişdi vaslına
Yolına rûhın revân itdi nazar-Ferhâd'edür

'Âşıkun fikri dem-â-dem rûyet-i dîdârdur
Zâhidün endîşesi evrâd ile esmâdadur

Yaşunı bahr it o mâhı kılmak istersen kenâr
Tâlib-i dürr-i semîn isen dilâ deryâdadur

Tâbiyâ vâsf-ı leb ü dendân-ı cânân eyledün
Kim ola nazmun nezâketden diye kim sâdedür

Diğer: Kul oldum nâgehân ey dil yine bir serv-i azâde
Ki ana sâyesi gibi olupdur ‘âlem üftâde

TÜRÂBÎ: Cevân-ı hâk-nihâd ve yâr-ı pâk-nijâd kimsedir. Vatan-ı safâ-bahşî Eregli’den Akşehir’de me’men itmişdür. Erbâb-ı kalemden ve nükte-şinâsân-ı merdüm-i ‘âlemden rakam olunur. Rûz ü şeb dimeyüp erbâb-ı ma’ârifle sohbet ve erkân-ı devletle ülfet idüp her birinden dürlü dürlü ma’ânî istifâde idüp tabî’at-ı revânına nefesine kuvvet ve nazm-ı süste safvet virmesine ‘uluvv-i himmetin dürer-i nazma mebzûl idüp erbâb-ı kemâl içre makbûl olmadan hâlî degüldür. Eş’âr-ı güzîdesinden ve güftâr-ı pesendîdesinden bir nîce beyt-i dil-âvîz kilki ‘anberîner ile sebt olundu. Gazel :

Biz fenn-i mahabbetde Ferhâd’ı unutturduk
Gerçi dahi şâgirdüz üstâdı unutturduk

Bir gonce firâkıyla kılduk çü hezâr efgân
Bülbüllere gülşende feryâdı unutturduk

Rindân-ı harâbâtuz bir hâle yetişdük kim
Her şeyh-i kerâmâta irşâdı unutturduk

Dil hânesine yârün tasvîrini nakş itdük
Mânî ile ‘âlemde Bihzâd’ı unutturduk

Bagdâd temâşâsın isterdi Tûrâbî dil
Kûyine varup yârün Bagdâd’ı unutturduk

TERÂŞÎ: Gelibolı’dan dergâh-ı mu’allâ yeniçerilerindendir. Terâşî mahlas itdüklerine vech-i tesmiye bu ki vâlidî cerrahlıkda üstâd-ı devrân ve ser tırâş itmede sâni-i Selmân olduğu ecilden kendü dahi ol san’ata cehd idüp üstâd-ı berber ve cerrâh-ı hûner-güster ve şikâf-sâz-ı kalb-i agyâr-ı kîne-dâr ve merhem-bahş-ı ‘uşşâk-ı dil-efkâr olmuş. Ber-muktezâ-yı tab’ mevzûn-ı eş’âr-ı gûn-â-gûn dimege heves ve makbûl-i herkes olmak ârzûsıyla gâh anı ve gâh bunu terâş itmekle şâ’ir-i pâkize ve dür-pâş olmakdan hâlî degüldür. Bu ebyât-ı ‘âşıkâne ve nazm-ı rindâne anundur ki iş’âr olundu. Şi’r :

Çâk çâk eylerse cismüm yiridür şemşîr-i ‘ışk
Cânuma geçmişdür ey kaşı kemânım tîr-i ‘ışk

Diğer: Kimseler vâkıf degül sonunda yok bîm-i firâk
Hayli zevküm var hayâl-i yâr ile tenhâ benüm

Fi hurufi’s-sâ

SÂNÎ Beg: İstanbul’dan sipâhi oğlanı zümresindendir. Cân Memî demekle meşhûr ve hüsn-i edâ ile makbûl-i tabâyi’-i cumhûrdur. Rûz u şeb mülâzemet-i erbâb-ı ma’rifet ve her an zebân-ı Fârisî’ye mûmâreset gösterüp tettebbu’-ı eş’âr-ı mütekaddimîn ve güftâr-ı fusahâ-yı müteahhirîn idüp isti’dâd-ı küllî hâsıl itmiş. Ol vechile pesend-i ehl-i dil olmuş. Ana binâen ekser-i ebyâtında zikr-i şâ’irân-ı ‘Acem ve esâmi-i vilâyâtını rakam itmekle mukayyed ve makbûl-i nîk ü bed kimesnedür. Zîrâ şu’arâ içre sâhib-tarz ve beyne’n-nâs ebyâtı bî-kıyâsdur

ve mezkûrun bir mikdâr eş'ârı selîs-edâ ile sâf ü pâk ve güftârı nefîs-ma'nâ ile ferah-fezâ ve dâfi'-i gamnâk olduğün ana şu'arâ nazîre dirler ve kendü dahi zurefânun ekser-ebyâtına nazîre-i dil-pezîr dimede bî-nazîr geçer ve tarîk-ı hezde gâyetle bî-misl ü bî-mânend idi. Şimdiki hâlde rahş-ı tab'ı ol semtde cevelân itmeden 'inân-ı piçân olup tâib oldım dir. Hâlâ zihn-i pâki ebyât-ı 'âşîkâne ve nazm-ı rindâne dimekle râgıbdur. Bu gazel kendü zu'm-ı fâsidiyle ziyâde pür-mesel ü muhayyel vâkı' olmuştur. Bu gazel anundur. Gazel :

Dehânun nokta-i mevhûm dirler mîm mübhem hem
Beni bu sırra vâkıf eyle tâ hall ola şübhem hem

Reh-i 'ışkunda öldüm ta'ne-i agyârı çekmekden
Mahallen halkı eyler bir yanadan turma ver hem hem

Beni bu bâgbân-ı sun' bir hoş bâga salmış kim
Dırahtistânı piç-â-piç ü nahlistânıdır hem hem

Bu ebyât-ı safâ-bahşı iderdi her seher evrâd
Göreydi bir nazar Şeyh İlâhi ibni Edhem hem

İrişmez kîmyâ-yı vasl-ı yâre behremend olmaz
Şu kim harc itmedi bu yolda dînâr ile dirhem hem

Reh-i derbend-i 'ışkı yalınız geçmiş gice Sânî
Hazer idüp harâmîsinden anun çekmemiş hem hem

Bu bir kaç matla' u beyt-i rengîn dahi anundur kem degüldür nîkdür. Ebyât :

Bâg-ı melâhatün gülidür rû degüldür ol
Mîhr-i giyâdur anda biten mû degüldür ol

Diğer: Kilâb-ı kûyunun biz her gice mihmânıyuz cânâ
O kavmün mâhasal şermende-i ihsânıyuz cânâ

Diğer: Merhabâ itmez isen bir nîce eyyâma degin
Çekeyin rûze-i hicrânı ki bayrama degin

Diğer: Hayli dem oldı bezme ayak basmadı şarâb
Meyhârenün gözünde uçar sâkiyâ habâb

Diğer: Gönül mir'âtını sûfî mücellâ itsen olmaz mı
Cemâl-i yârı bu yüzden temâşâ itsen olmaz mı

Nigârı da'vet içün bezme ey tab'-ı suhen sencüm
Yine bir şâ'irâne nâme inşâ itsen olmaz mı

Nazîre li-mü'ellifihî:

Bana bir şeb visâlün va'de cânâ itsen olmaz mı
Dil-i nâ-şâdı bir sözle tesellâ itsen olmaz mı

SÜBÛTÎ: Mevlidi Karaman'dur. Zümre-i Âl-i Resûl 'aleyhisselâmdur. Müddet-i medîd ve 'ahd-i ba'iddür ki İstanbul'da Karaman Bâzârı'nda bir dükkân köşesinde sâbit-kadem olup evkât-ı 'azizin ol ferzâne 'attarlıkla tabâbet-i müslimîne ve 'ilm-i hikmetde ebdâne sarf itmek üzredür. Kânûn-ı Bû-'Alî'de bî-nazîr ve aksâm-ı şî'rden habîr zamân-ı evâilde buhûr-ı şî're fi'l-cümle mûmâreset gösterüp âşinâ imiş. Hâlâ kelimât-ı dürer-bârı sadef-i tab'ından dūr düşüp bigâne-sıfât olup bâzâr-ı hünerde cilveger olmadan kalmış beher-hâl ol yâr-ı nîkû-halef bakıyye-i şu'arâ-yı selef olmanın bu beyti ki hayli 'âşıkânedür vâkı' olmuştur. Bir matla'-ı rindâne ve beyt ile vaz' olundu. Nazm:

Hançerüni sîneye çeksem gerek cânâ didüm
Didi var her ne gerekse eyle kendü cânuna

Diğer: Meclisde yegdür ölmek ben zâr u nâ-murâda
Göz göre la'l-i yâri öpmekden ise bâde

SENÂYÎ: Balıkesirevî dânişmend tâifesindendir. Gülşen-i nazm içre nihâl nevresin vâdî-i şî're tâze heves ve rûz u şeb bülegâ-yı senâ-güster ve fusahâ-yı suhen-perverler ile mübâhese ve müzâkereden hâlî degüldür. Tabî'at-ı şî'riyyesin yârân-ı nûkte-şinâs bu beyitden kıyâs kılalar. Beyt :

Gönlüme gam gelicek merdüm-i dîdem ter olur
Nem kapar şöyle bulutdan kati nâzûk ter olur

Fî harfî'l-cîm

CEVHERÎ Çelebi: Zümre-i müderrisîndendir. 'Ömr-i latîfin ve evkât-ı şerîfin mütâla'a-i 'ilme sarf itmek üzredür. Zihn-i pâki ve tab'-ı sâfi gâyetle zebân-ı Fârisî'den ve fenn-i mu'ammâdan behremend ve 'arz-ı cismi zâtında bir cevher-i bî-misl ü bî-mânend ve beyne'z-zürefa şâ'ir-i latîf ve 'inde'l-'ukalâ sâhir-i zarîf kimesnedür. Ser-â-ser nazm-ı cevherdârı çün dürr-i şâh-vâr ve tîg-ı elmâs-ı suheni cevherdâr egerçi sâir şu'arâ gibi meşhûr ü mezkûr degüldür. Ammâ ki gevher-i âbdârının vezni cevheriyân-ı bâzâr-ı hüner yanında tam 'iyârdur. Bu bir iki matla' anundur tahrîr olundu. Nazm :

Derdümi yâr sîne-i sad-pâreden bilür
Ne hâlde idüğüm benüm ol yareden bilür

Diğer: Yime mey gussasını dîde-i ter sag olsun
Çekme peymâne gamın kâse-i ser sag olsun

CELÎLÎ: Bursevî'dür. Haseb ile celilü'l-kadr ve neseb ile yegâne-i 'asrdur. Semt-i şî're cüz'î zamânda mûmâreset-i küllî gösterüp aksâm-ı nazma kâdir olmuş 'ale'l-husûs tarz-ı mesnevîde mâhir ve teshîr-i ma'ânîde sâhir kimse imiş. Sâbıkan zebân-ı Türkî'de hamse dimişdür. Her bir kitâbı makbûl-i şu'arâ-yı zamân ve pesendîde-i zurefâ-yı cihân olmuş ve her bir kitâbı hikâyât-ı garîbe ile ârâste ve elfâz-ı dil-firîb ile pirâstedür. Ammâ ol pîr-i rûşen-dil murâd üzre dileğine murâd belki hâtır-ı 'âtır-ı rûşen-zamîri mülâhhaz eylediği gibi fi'l-cümle ri'âyet olmayup bu mâbeynde gerdûn-ı dûn belki gerdiş-i çarh-ı ser-nîgûn cûnbiş-i nâ-

hemvârından dest-i nâ-sezâdan ensesine sille yiyüp ol a'râzla dimâgına hâlel irişüp bir nîce zamân terk-i şi'r ü gazel kılup musâhabet-i yârân-ı safâdan ve mülâzemet-i ihvân-ı vefâ ve'l-hâsıl mülâzemet-i müşâhedât-ı hallân-ı safâdan çekilüp pâ-yi 'uzleti dâmân-ı ferâgate sarup kûşe-i 'uzlet ve kûşe-i vahdet ihtiyâr idüp 'akl u dâniş-i dūr-endîşine bâde-i mahabbetle bî-hûşî ve zebân-ı şîrîn-güftârına mihr-i hâmûşî urup kırk yıl mikdârı ebnâ-yı rûzgâr ile güft ü gû idüp derd-i ser çekmeden emîn olmışdur. Nite ki 'ârifân-ı cihân dimişlerdür. Mısra' :

Âşinâ-yı halk derd-i ser est ²¹⁸

Âhirü'l-emr sene ihdâ ve seb'in ve tis'â mi'ede 'âlem-i fânîden kişver-i câvidâniye revâne oldu. Merhûm ü magfûrun kitâbı **Leylâ vü Mecnûn**'dan Leylâ vâsfinda üç beyt ol cümleden bu evrâk-ı dil-küşâda ve ravza-i ihvân-ı safâda sebt olundu. Mesnevî :

Ebrûları berk-i sebz-i bâdâm
Ruhsâresi yâsemin-i gül-fâm

Ebrûlar içinde nakşî ol nîl
Mihrâb-ı safâda sebz-i kandil

La'l-i lebi içre dürr-i dendân
Gûyâ ki şafakda subh-ı handân

Tâbistân vâsfindan bu beyt dahi hem ol kitâbdandır. Beyt :

Görüp bu hevâ-yı germi zanbak
Bir ak 'arâkiyye giydi ancak

Bu bir kaç beyt dahi Kitâb-ı **Husrev ü Şîrîn**' den ve Temuz vâsfinda hûb vâkı' olmışdur. Nazm:

Meger irişdi eyyâm-ı temûzî
Hümûm-ı germ ü tâb-ı nimrûzî

Sanasın kırk fırka pâyesidür
Siyeh ü laciverdi sâyesidür

Nahl-i seng-i sipihr-i derdmende
Felek devr idemez pirâhinde

Nihâl-i şevkde kameri nâlân
Sanasın sih üzere murg-ı biryân
Yakup yandurdu benzer tâb-ı hurşîd
Ki kendin suya salmış sâye-i bîd

Degül mâhi zülâl-i dil-keş içre
Semenderdür yürür san âteş içre

²¹⁸ Halkın tanıdığı olmak baş belâsıdır.

Leb-i deryâ harâretde olup huşk
Kurumuş hâki san kim nâfe-i müşk

Hevâdan düşdi çün hurşîd tâbe
Göyünürdi dil-i seng-i âftâbe

ve zâde-i tab'-ı gülbüzlerinden gül gibi yüz dâne gazeli tertîb idüp **Gül-i Sad-berk** nâmıyla ihtirâm virmiş. Cümlesinden bir kaç Türkî ve Fârisî matla' u beyt anundur. Ebyât :

Kan ile ruh-ı zerdüme yazdum hat-ı âşûb
Ta derd-i dilüm şerh ide ol şûha bu mektûb

Diğer: Egnüme sînem palasın biçdi şemşîrûn senün
Ol melâmet hılkatin dikdi bana tîrûn senün

Diğer: Mihnet -i hicrâne sabr itmek olurdu dostlar
Neyleyüm bir yirde sıgmaz 'ışk ile sabr ü şekîb

Nîst bahtem tâ demî ân âsitân mesken konem
În kadr bes k'ez gubâreş dîde râ rûşen konem ²¹⁹

Ân sa'âdet gû ki der râheş felek hâkem koned
Pây bûşeş râ nasîb-i cân-ı gam-nâkem koned ²²⁰

ve bu bir iki beyt dahi anun gazeliyâtındandır.

Bir mehûn hicrinden öldüm aglasun devrân beni
Mihnet -âbâd-ı 'ademde arasın yârân beni

Diğer: Tagıtdı harf-i cünûndur nâme-i a'mâlimüz
Ey kirâmen kâtibîn ma'zûr tut ahvâlimüz

CEVRÎ Çelebi: Edirnevî'dür. Kuzât zümresindendir. 'İlm-i zâhire cidd ü cehd idüp bir mikdâr tahsîl ü tekmîl itmişdür. Hadd-ı zâtında yârân arasında yâr-ı latîf ve nedîm-i sitem-i zârif kimsedür. Zarâfeti bir haddedür ki bir gün Fevrî Efendi'yle mübâhase-i şi'r idüp birbirinün mahlasın begenmeyüp ceng ü cidâl kılurken hemân Cevrî, Mevlânâ Fevrî'ye dir ki çok söyleme yohsa şimdi seni iki nokta ile kuzı iderin ve müşârünileyh dahi fî'l-fevr dir ki epsem ol yohsa ben de seni bir nokta ile Cüzî kılarun diyü latîfe iderler. Bu nükte ma'lûm-ı zurefâ oldukda lâ-farkûn beynehüma dirler. Mezkûr Cevrî hâlâ rûz u şeb fikr-i kazâ ile dünyâ kaydına sâlik ve 'ömründe aksâm-ı şi'rden bir iki matla'a mâlikdür. El-hak ziyâde şâ'irâne ve selâsetde bir kılca bahânesi yokdur erbâb-ı 'irfâne 'arz olunur. Beyt :

Dili alup gider oldun gel al bile cânı
Biribirinden ayırma Efendi yârânı

²¹⁹ Bahtsızım ancak bir o eşiği mesken edinebilirsem ve oranın tozuyla gözümü aydınlatabilirsem bu bana yeter.

²²⁰ Feleğin onun yolunda beni toprak ettiği ve ayağını öpmeyi gamlı canıma nasip ettiği mutluluktan söz et.

Diğer: Kesdi ümîd-i visâlle dil âh u nâlesin
Bu cümle ile bilmişken istihâlesin

CÂMÎ Çelebi: İstanbullı'dur. Nûr-ı çeşm-i 'âlemiyân ve zübde-i Sultân-ı zamân el-mevlâ mülûku'l-'Arabî ve'l-'Acemî mâliku rikâbi'l-ümemi el-müeyyedü mine's-semâi el muzafferu 'ale'l-a'dâi mu'izzü'd-dünyâ ve'd-dîni kehfü'l-islâmu ve'l-müslimîn²²¹ a'nî şâh-zâde-i güzînün âsitân-ı felek-âşiyânında iltifât-ı bilâ-nihâyât ve 'inâyât-ı bî-gâyât ile akrân içre ser-efrâz olup hezârân hezâr i'zâz ile balabancı başıdur. Hadd-ı zâtında netâyic-i tab'-ı vekkâd-ı dūr-pâşî ve letâyif-i hâtır-ı nekkâd-ı revânı mübdi'-i bedâyi'-i ma'ânî ve mazhar-ı sanâyi'-i mebânî olup şehbâz-ı fikr-i hüma-pervâzı hemîşe murg-ı ma'ânî ve evc-i a'lâda şâhin gibi şikâr itmede cüst ü çâlâk ve tûtî-i zihni şekeristân-ı suhunde edâ-yı pâk ile bî-bâk-i rûzgâr ve zât-ı ferhûnde sıfâtı ma'ârif-i cüz'î vü küllî ile pirâste ve ârâstedür. Ebyât-ı rengîni bâde-i nâb gibi sâf u pür-zîver ve kelimât-ı şîrîni pâk ü makbûl-i cumhûr olmagın şeh-zâde-i müslimînün gayret-i firdevs-i berîn olan bâbında mezbûr agalık ile sâhib-'izz ü temkîndür. El-hak keyfiyyet-i eş'âr ile ve çâşnî-i güftâr ile Rûm'da Câmî-i sâni olmaga erzânidür. Bu gazel-i garra vasf-ı mâh-rûyân-ı zîbâ ol şâ'ir-i hûb-edânundur ki sebt olundu. Gazel:

Görmedük gurre-i ebrûnı meh-i garrâda
Bulmaduk şevk-ı ruhun mihr-i cihân-ârâda

Biz ne keyfiyyet ile mey diyelüm la'lüne kim
Neş'e-i câm-ı lebün hâleti yok sahbâda

Nâfe-i zülfün hevesi gonçe-femün fikriyle
Geçirür yok yire 'ömrini kuru sevdâda

Görinür âyîne-i rûyine bakdıkca dilâ
Ol perî-çihre bize sûret-i istingâda

Câmi'yâ istemezin kılmasun âzâd beni
Bes durur bana kulum dimege ol beg-zâde

Diğer: Sâki-i bezm-i meye didüm ayagun öpelüm
Merhabâ ise garaz didi tolun iç öp elüm

Diğer: Salmadın 'arızında mû sâye
Lenterâni dir idi Mûsâ'ye

CEMÂLÎ: Defterdâr-zâde demekle erbâb-ı devlet ve a'yân-ı 'âlî-rütbet mâbeyninde mevsûf ve ma'lûmât-ı dil-keş-i safâ-âyîn ile akrân u emsâl içre ma'rûf ve zât-ı huçeste-sıfâtı ma'ârifle 'ulemâ katında makbûldür. Vücûd-ı pür-cûdına vatan İstanbul'dur. Ana binâen libâs-ı ma'ârifetle müzeyyen ve âsâr-ı hissiyât gün gibi tabâyi'-i pâkinden mübeyyen zihn-i

²²¹ Arap ve ÖAcem krallarının efendisi, ümmetlerin dizginini elinde tutan, semadan teyit edilen(desteklenen) düşmanlara galip gelen dünya ve dine izzet veren, âslamın ve müslümanların sığınağı

müdrîki fûnûn-ı ‘ulûmdan habîr ve kemâlât-ı lâ-nihâyâtla dânişmendler içre lâ-nazîr hemîşe âsmân-ı tab’ından dâniş-i mihrî dirahşân-ı rahşân gibi tâli’ u tulû’ idüp dūr-feşân olmanın mesmû’dur. Memâlik-i dil-i ‘uşşâkı işrâk-ı dânişle rûşen kılur ve evsâf-ı hûbân-ı cihânı her vechile yâd itmede şâ’ir-i hasendür. Zîrâ ki tab’-ı nazm-ı hüner-güsteri tahayyülât ile mânend-i Emrî ve selâset-i eş’âr ile tevâmân-ı Bâkî olup bu devrün şu’arâsının mecâlis-i ferah-fezâlarına râh-ı suhenle sâkî olmaga erzânîdür. Bu bir nice matla’-ı mu’ciz-nümâ ol sâhir-i nükte-ârânundur. Ekser-i durûb-ı emsâl bilmede bî-misâldür. Ebyât :

Cöngüne yanlışlıg idüp yazdum ise ger du’â
Lutf idüp ma’zûr dut yazmaz yanılmaz bir Hudâ

Diğer: İtme zamâne halkı ile gel mu’âşeret
İşkencedür ‘avâm ile ‘örfî musâhabet

Diğer: Serv dirdüm kaddüne illâ ki istignâsı var
Yüzünü misbâh okurdum n’eyleyüm ammâsı var

Diğer: İtdük şu denlü imtizâc olmaya makdûr-ı beşer
Sâkî ile ben bendenün [bir] içdüğü ayru gider

Diğer: Ey dirîgâ cihân-ı fânîde
Delûlik dahi oldu masharalık

Diğer: Çeşm-i giryânım görüp bin yaş hakundur didi yâr
Hâk-i pâyün bana toprak kâdîsi hükm eyledi

CEVHERÎ : Bagdâdî’dür. Asl u neseble sâdât-ı ‘izâmdan ve zübde-i evlâd-ı seyyidü’l-enâm ‘aleyhisselatü ve’s-selâmdandır. Hüsn-i rûz-efzûn ile reşk-i hurşîd ü kamer ve kadd-i mevzûn ile hayret-efzâ-yı serv-i sanavber idi. Nâgâh bahâristân-ı vücûdına bâd-ı harîf esüp berk-i hazân gibi zerd ü za’îf idüp sarsar-ı ecel ana dest-res bulup nahl-i hayâtın şikest itdi. Cevher-i nazmı dürr-i sîrâb gibi olmanın bu matla’-ı pür-sûz mânend-i şem’-i dil-efrûz ki vasf-ı hûbân-ı meh-veş ve hasb-i hâl-i rindân-ı belâ-keşdür. Matla’

Ez mey-i la’l-i bûtân çihre ber-efrûhte îm
Çihre efrûhte vü şem’-sıfat suhte îm ²²²

CELÎLÎ: Bolı’dan müderrisin içre zikr olan ‘Abdûlgani Çelebi’nün birâderidür. Zümre-i mülâzimîndendir. Asl ü neseble celilü’l-kadr ve sarây-ı ma’rifet ü fazîletde eben ‘an ceddin ma’ârifle sâhib-sadr vâdî-i nazmda tab’-ı bülendi ‘âlî-himmet ve eş’âr-ı dil-pesendi makbûl-i erbâb-ı hikmetdür. Bu bir kaç matla’ anundur. Ebyât:

Mesken idindi çeşümü nakş-ı hayâl-i yâr
Gûyâ ki oldu dîdelerüm hâne-i nigâr

²²² Güzellerin la’linin şarabından yüzümü parlattık; yüzümüz parladı ve mum gibi yandı.

Diğer: Gülzâr-ı hüsn-i yâr okınalı sebak sebak
Gül defterini gonce dürüpdür varak varak

Diğer: Letâfet bahridür rûyun kaşun mevc-i melâhatdür
Degül çâh-ı zenehdânun şehâ girdâb-ı mihnetdür

CA'FER Çelebi İstanbullı'dur. Dânişmend tâifesindendir. Zâtî-zâde demekle ma'rûf ve 'ilm-i zâhirde fûnûn ile mevsûfdur. Bi't-tab' dervîş-nihâd ve kayd-ı hestîden âzâd olmanın be-tarîk-ı seyâhat hıdmet-i erbâb-ı tarîkatı ve mülâzemet-i ehl-i hakîkatî özleyüp diyâr-ı 'Acem'e ve ekrâf-ı 'âleme revâne olup ol ferzâne-i tekellüm zebân-ı Fûrs'i tekâmîl ve nesih yazmagı muhakkak tahsîl itmiş. Elân İstanbul kâdîsi olan Kâdî-zâde Efendi'nün dânişmendidir. Mezkûra 'arz-ı hıdmetin tevfiiz itmişler imiş Bir nice günden sonra ol hıdmetden 'azl olmuş. Hasb-i hâli bir kıt'a-i bî-misâle nazm kılmış zikr olunur. Kıt'a :

Kesme cevır ü cefânı bendenden
Zahmetün bana 'ayn-ı rahmetdür

Bende-i bendenüm hemîn maksûd
Hıdmet-i 'arz u 'arz-ı hıdmetdür

Ol esnâda bir mikdâr zamân mezkûr Efendisinin hıdmetlerine varmadığına binâen El 'özü makbûlün 'inde'l-kirâmî ²²³ fehvâsıyla bir kıt'a-ı garrâyı terkîm ü imlâ itmiş. Kıt'a :

Varmasam hâk-i pâye ger dâim
Sanmanuz anı kadr ü pâyemden

Hayfdur k'ola tîre her lahza
Âsitân-ı şerîf sâyemden

ve lehu : Kûyun etrâfın ırakdan görürüm
Olmasun diyü kilâbun bî-huzûr

Yakına var gam ki nâgeh birisi
Yapışup damaga dime ki dūr

CÜDÂYÎ-İ 'Acem : Buhara'dandır. Mukeddemâ ol diyârda şu'arâ ve zürefâyla müşa'ere ve mübâhase idüp şûh-tab' u hoş -sohbet olup tâlib-i ehl-i hikmet geçinüp letâyif-i nâzüki bî-nazîr ve zerâfet-i hâssı dil-peziir olmuş. Âhir terk-i diyâr kılup üftân u hizân ve teferrüc-künân Rûm'a gelüp hıdmet-i erbâb-ı 'ulûma irişmiş. Her birinün musâhabetinden müstefîd olur iken dûnyâ-yı dündan nevmîd olup maraz-ı ta'ûn ile fevt oldu. Bu bende ile hukûk-ı sâbıkası küllî olmanın vefâtına bu târih-i pâk kelimât sebt olundu. Târih li-mü'ellifihi :

Şâ'ir-i hoş-gû Cüdâyî ân ki boved
Sohbet-i pâkîzeeş kuvvet-i revân ²²⁴

²²³ Özür büyüklerin indinde kabul edilir.

²²⁴ Ey Cüdâyî güzel söz söyleyen şair, onun (şairin) temiz sohbeti ruha kuvvet verir.

Ez cihân-ı bî-vefâ dil-gîr geşt
Terk-i yârân goft ü çün reft ez miyân ²²⁵

Behr-i u târih-i ‘Ahdî gofte şod
Veh Cüdâyî kerd rihlet ez cihân ²²⁶

Egerçi ol merhûmun tabî’at-ı şî’riyyesi hûb ü pür-zîver ve pesend-i cumhûr ve mergûb vâkı’ olmuştur lâkin musâhabet-i pâki şî’r-i sûznâk üzre fevka’l-hadd ber-terdür. Bu matla’-ı nâzûk anundur. Matla ‘

Merân rakîb be hârî zi kûy-i yâr merâ
Berev berâ-yı Hudâ yek zamân güzâr merâ ²²⁷

CİNÂNÎ: Sofyevî’dür. Evân-ı cevânîde terk-i ravza-i ‘âlem-i fânî idüp gülşen-i câvidânî cânibine revâne ve şem’-i şebistân-ı İlâhîye pervâne oldu. Ümmîddür ki ber-muktezâ-yı mahlas cinâna lâıyk u sezâ-vâr ola. Ol yâr-ı nîkû-girdârun âyine-i tab’ından bu beyt nümâyân olup sahife-i rûzgârda yâdigâr kaldı. Beyt:

Anlar idi âyine mâhiyyetin
Rû-be-rû olsa anunla nâgehân

Fî harfî’l-ha

HÂLETÎ Efendi: Zümre-i kuzâtdandır. Rûm İli’nde Ilıca nâm kasabadan zihn ü zekâ-yı selîm ile mevsûf ve a’yân-ı zamân içre ‘Abdullah Çelebî demekle ma’rûfdur. Hoş-sohbet ü nâzûk-tab’ kimesnedür. Kemâl ü fazl ile makbûl-i merdüm-i zamân ve fenn-i şî’r anlamada müsellemler-i ehl-i cihân ve Hayâlî Beg’ün edâsına mâıyl ve muhibb-i ehl-i dil ve mazmûn-ı Emrî’ye kâıyl olmanın her yirde emîr-i kelâm ve pesend-i hâs u ‘âm olmuştur. Ebyât-ı hâssı hâlet-resân-ı ‘uşşâk-ı bî-nevâ ve himmet-i bülendi erbâb-ı mihr ü vefâdur. Egerçi nazm-ı dürrer-bârı az ve öz ammâ pâk ü sûznâkdür bu evrâka sebt oldu. Li misli hazâ ebyât:

Her kaçan devr okısa mahfelde cânânım benüm
İster ol devrün teselsül buldıgun cânım benüm

Diğer: Âşiyân itmiş idi dilde mahabbet göçdi
Yüri ey kebk-i hırâm ol yuvadan kuş uçdı

Diğer : Dâğlar dûdı tenümde tâze sünbüldür bana
Dâğum üzre dâğlar katmer karanfüldür bana

Diğer: Sifâl-i serde yir yir tâze dâğumdur karanfüller
Yanında dûd-ı âhum her taraf şûrîde sünbüller

Diğer : Belendün ey kefen üstime bana yâr-ı gâr oldun
Götürdün hâkden beni görem kim yüzün ag olsun

²²⁵ Dostları terk edip ortadan kaybolunca vefasız dünyadan usandı.

²²⁶ Onun tarihini Ahdî söyledi. Cüdâyî ne yazık ki dünyadan göç etti.

²²⁷ Ey rakip yarin mekanından beni aşağılayarak kovma. Allah için bir zaman olsun beni bırak da git.

HUBBÎ Beg: Ehl-i ticâretlendür. Dürr-i sadef-i sâhib-dilân ve zübde-i halef-i mîr-i suhenverân Hayâlî-zâde dimekle meşhûr ve pesendîde-i nezdîk ü dûrdur. Elveledu sırru ebihi²²⁸ kavliyle şî'r herkese kesb ise anlara mirâs-ı celîdûr. Rûz u şeb esîr-i sohbet-i erbâb-ı hüner ve dem-be-dem benefşe-i hûbân-ı peri-peyker ve hemîşe gülşen-i cânında hûbb-i gonc-femler gülbin-i cinân gibi tâze vü ter olmakdan ma'rifet-i küllî ile cüz'îden behremenddür. Eş'ârı sûznâk ve güftârı hûb ü pâk ve gâyetde mergûb ü ferah-nâkdür. İllâ bu gazel ve bir iki beyt dahi anlarundur. Gazel :

Meskenet-i hâkini tâc it başa sultanlık budur
Saltanat mülkini berbâd it Süleymanlık budur

Hûş-yâr ol bâde-i 'ışk ile ser- hoşluk budur
Bî-hod ol esrâr-ı Sübhân ile hayranlık budur

Her ne gelse huşk ü ter h'ân-ı kazâdan mâ-hazâr
Dime bu zehr ol şeker âdâb-ı mihmanlık budur

Hak-şinâs ol herkese kadrince eyle bezl-i cûd
'Âlemi kul eyle ihsân ile sultanlık budur

Cür'a-h'âh-ı çeşme-i 'irfân ol ey Hubbî varup
Katreye alma yedi deryâyı 'ummanlık budur

Diğer : Esrâr-ı gam-ı 'ışkı sen ey zâhid-i nâdân
Fâş eyleme dîrsin beni âbdâl mı sandun

HÂYİRÎ: Bu devr şu'arâsından ve bu 'ahd fuzalâsındandır. Erbâb-ı fazl u kemâl arasında Hâfız-ı şâh-nazar dimekle iştihâr bulmuş. Asl u nesebi pesendîde-i ehl-i rûzgâr ve zât-ı pâk-hasebi nâmdârdur. Egerçi peder-i büzürgvârı ve ecdâd-ı 'âlî-tebârı tâife-i etrâkdendür. Kendüleri dünü'l-bülûg iken vâlidleri ile seyr-i bilâd-ı e'azim iderek bir tarikle dergâh-ı felek-bâr-gâh Ebâ 'Abdullahü'l-Hüseyn'e(r d) yüz sürüp amedd-i medîd ve 'ahd-i ba'iddür ki hâk-i Kerbelâ'yı 'arş-ı a'lâya virmez ve Hâyırî mahlas itdüklerine sebep bu ki hâyır-ı Hazret-i İmam'da mütevattın olmuşdur. Vücûd-ı latîfi mütâla'a-i 'ulûm-ı 'Arabiyye'den habîr ve kavâ'id-i eş'âr bilmede bî-nazîr ve tevârih-i selâtin-i rûzgâr ve üslûb-ı inşâyı tettebbu' itmeden hâlî degüldür. Zebân-ı selâsede şâ'irân-ı nâmdâr gibi fûnûn-ı nazmdan haber dârdur. Bu bir nîce matla'-ı âbdâr-ı Fârisî ve Türkî anundur. Ebyât

Ey hatet ez müşk-i ter ber gül nikâb endâhte
Ebr-i zülfet sâye-i ber-âfîtâb endâhte²²⁹

Diğer: Safâ-yı câm-ı leb-i yârdan rivâyet ider

²²⁸ Çocuk babasının sırrıdır (yolundadır).

²²⁹ Hattın taze miskten gülün üzerine örtü . Zülfünün bulutu güneşe gölge saldı.

Elün dudagina ur gör neler hikâyet ider

Diğer : Ne cefâdur ki bana ol büt-i tannâz eyler
Ben ana ‘arz-ı niyâz eylerüm ol nâz eyler

Diğer : Başuma nâz ile ol serv bırakdı sâye
Ey hümâ sâyenî şimden girü sal sahrâya

Bu rubâ’î-i zîbâ dahi ol şâ’ir-i gûyânundur. Rubâ’î :

Derd-i dilem ez çâk-i girîban peydâst
V’ez sîne-i zâr râz-ı pinhan peydâst
Ez za’f tenem çünân şode zâr u nahîf
K’ez her tarafî ki benzerî can peydâst ²³⁰

HARÎMÎ Beg: Kûtâhiyye’ dendür. Nâm-ı şerîfî İbrâhim ve hulk-ı ‘azîm ile yâr-ı kerîm kimesnedür. Fî zamânına şehir-i mezbûrda alay begi olan Rahîmî Beg’ün ferzend-i dil-pesendidür. Hâlâ hıdmet-i Sultân-ı mesned-nişîn-i Siyâvuş olan pâdişâhun ‘asâkir-i muzaffer safları içre çavuşdur. Peder-i büzürg-vârı gibi ‘âlî-tebâr olup ze’âmete mutasarrıfdur ve yârân-ı suhen-güzâr mâbeyninde ebu’l-ma’ârif ve envâ’-ı nikât-ı bâ-berekât künhüyle vâkıf kendü tarzında ser-âmed-i akrân u emâsil ve makbûl-i sâhib-devletân-ı câh u celâl ve meydân-ı belâgatde pîşrev-i şâh-ı suhenverân-ı zamân ve ‘arsa-i fasâhatde dür-pâşî fasîh-i zebânân-ı cihândur ve edâ-yı pâk ile musâhabeti dil-peziir ve cüst ü cûy-ı memâlik itmede bî-nazîr olmanın emr-i pâdişâh-ı cihângîr ile sene selâse ve semânîn ve tis’â mi’enün şehir-i Recebinde diyâr-ı Bagdâd’a gelüp mezârât-ı evliyâullah ve merâkîd-ı asfiyâ-yı feyz-i enbiyâyı ziyâretle behremend olmak müyesser ve mukadder oldukda her birisinün âsitân-ı felek-âşiyân-ı huceste ‘ünvânına ‘arz-ı ‘ubûdiyyet izhâr-ı hulûs-ı taviyyet için birer gazel-i âbdâr-ı mânend-i dürr-i şehvâr rişte-i nazma çekmişlerdür. Hususâ hazret-i şâh-ı şehidân ya’nî şehid-i Kerbelâ Nevverallahü merkadehu ²³¹ hakkında buyurduklarının matla’ı budur ki zikr olunur. Matla’:

Cennet-âsâ ravza-i kûyun ser-â-ser nûrdur
Dûd-ı kandîlün anunçün kühl-i çeşm-i hûrdur

Eş’âr-ı dil-küşâları bisyâr ve hasb-i hâl-i dil-i zâr olmanın bir nîce matla’-ı âbdâr nakş u nigâr oldu. Ebyât:

Gül-ruhların senün olalı gülsitân-ı ‘ışk
Bülbül-veş atdı murg-ı dili dâsitân-ı ‘ışk

Diğer: Terah def’ olup irişdi ferah bu kalb-i nâ-şâde
Bihamdillah yüz urdum evliyâ-yı şehir-i Bagdâd’a

²³⁰ - Gönümün derdi bağrımın açıklığından bellidir. İnleyen sinemden gizli sır açığa çıkmıştır. Zayıflıktan tenim (vücudum) öyle zayıflamış ve incelmektedir ki ne taraftan baksan can görünür.

²³¹ Allah onun kabrini nurlandırsın

Diğer: Çenk itdün kaddini gamla dil-i mahzûnun
Bu mıdur ‘âşık-ı sâdık olana kânûnun

Diğer: Bî- rahm müjen oklarını sîneme gönder
Lutf eyle ko teklifi gönülden geçeni gör

Diğer: Tenk itdün başıma şîve ile dünyâyı
Göresin nîce olur sevdigüm istignâyı

Nazîre li-mü’ellifihi:

Dün gice görmedüm ol mihr-i cihân-ârâyı
Dûd-ı âhumla kara basa n’ola dünyâyı

Bu matla’ dahi anlarundur. Matla’ :

Gezer kûyunda dil şâm ü seher aglayı aglayı
Gamunla nâr-ı hicrâna ciger taglayı taglayı

Nazîre li-mü’ellifihi :

Gam-ı hâliyle çıkdum dîdeden aglayı aglayı
Dilerdüm zülfî zencîrine dil bağlayı bağlayı

HAYRETÎ: Vardar Yenicesi’ndendür. Ehl-i timâr tâifesinden evsâfin işitdügümüz şu’arâdandır. Rind-i lâubâli ve pâk-meşreb ve peyrev-i ehl-i mezheb ve dervîş-sıfât ve nîkû-hilkat tab’-ı nâzûki fûnûn-ı ma’rifetle müretteb her vechile esnâf-ı şî’re kâdir ve ‘ilm-i tasavvufun ıstılâhâtında mâhir elfâz-ı revân-bahşla mânend-i hâfız-ı hoş -nevâ ve tarz-ı gazelde misâl-i Hayretî sâhib-edâ hayfâ ki evâhir-i ‘ömründe dîde-i cihân-bîni ‘alîl ve beyne’l-akrân zâr u zelîl olup bu cihân-ı pür-âşûbdan göz yumup görmezden evvel çeşm-i i’tibâr ile nazar itmeden göz yumup nîk ü bedden geçüp kûşe-i ‘uzletde nişîmen tutup kendü hasb-i hâlin bu matla’da derc itmişdür. Matla’ :

Bu fenâ evde vefâdan görmedi asla eser
Bunca yaşlar yaşadı hatta agardı çeşm-i ter

hakka budur ki eş’âr-ı tarab-engîzi ve güftâr-ı tasavvuf-âmîzi hûb ü mergûbdur. Cümlesinden bir gazel-i zîbâ ki mahabbet-efzâdur sebt olundu. Gazel:

‘Âşıkun bagrındataglar denlü başı var imiş
Kendü bir kem katre deryâlarca yaşı var imiş

Yok sanurdum bâliş-i râhat bu mihnet-hânede
Şimdi bildüm dilberün işügi taşı var imiş

Benlik imiş ayıran ben bendeyi cânâneden

Ey dirîgâ bilmedüm arada nâsı var imiş

Baş virüp râh-ı fenâda başa iletmiş
Âferin Ferhâd'a hoş devletlü başı var imiş

Cân ile cânân arasında hicâb oldun diyü
Hayretî'nün kendü kendüyle savaşı var imiş

Bu matla'-ı garrâ dahi ol şâ'ir-i bülend-edânundur. Matla' :

Benzetmiş uzun kâmet-i dil-cûsına yârün
Başında kavak yili eser dahi çenârun

HÂLÎ Beg: Kuloglı'dur. ve sipâhi silkine münselik olmuştur. Bagdâd'a tâbi Mendîlcebin nâm kasabada mütevellid olmuş egerçi babası Bosna'dandır ve nahl-i vücûd-ı pür-esmârı ravza-i dârü's-selâm-ı Bagdâd'da neşv ü nemâ bulmuştur. Dil-i pür-envârı hakikat nûrıyla tolmuştur. 'İlm-i tasavvufun kemâhiye hâlin bilmiştir. Defe'ât ile vilâyet-i Rûm u 'Acem ve hıdmet-i pâdişâh-ı encüm-haşeme varup gelmiştir. Müsâfereten nîce nîce ma'ârif fâide kılmıştır. Hâliyâ rûz u şeb vasf-ı gül-ruhân-ı zamân itmede mânend-i bülbül ve nazar-ı pür-sûzî hâlet-bahş-ı yârân-ı dil-efrûz olmadan hâlî degüldür. Türkî ve Fârisî gazel-i âbdârları ve sâir güher-bârı çokdur ve her birisinin eyüliginde kimsenin sözi yokdur. Bu bir nîce ebyât-ı pür-nikat anlarındur. Ebyât :

Der reh-i 'ışk-ı cevânan can-feşânîhâ konîm
Z'ân ki der pîrî besî yâd-ı cevânîhâ konîm ²³²

Ez hûn-ı dîde est merâ rûy-i zerd surh
Verne ki dîde est ruh-ı ehl-i derd surh ²³³

Mâ terk-i bâde-i tarab-efzâ nemî konîm
Herkes ki mî koned be koned mâ nemî konîm ²³⁴

Sûret-i 'âlem Diğer-gûn şod zi eşk-i âl-i men
K'ey be in sûret be-'arz-ı û resed ahvâl-i men ²³⁵

'Âşıkam her dem be-derd-i 'ışk vâkıf nîst yâr
Hâlî'yem âgeh nemî gerded kesî ez hâlî men ²³⁶

Diğer: Ey münevver senün envârun ile mihrle mâh
Dün ü gün hıdmetüne mihr ile mâh iki güvâh

²³² Gençlerin aşkı yolunda can saçalım, çünkü yaşlılıkta gençliği çok yâd ederiz.

²³³ Benim sararmış yüzümün kırmızı görüntüsü kanlı göz yaşımıdır. Yoksa dert ehlinin yüzünün kırmızı olduğunu kim görmüştür.

²³⁴ Biz neşe veren şarabı terk etmeyiz, terk eden etsin, biz terk etmeyiz

²³⁵ Benim kızıl göz yaşımın alevinin sureti değişti. Benim durumum bu suretle ne zaman ona arz olunacak?

²³⁶ Her an âşığım, yar aşk derdine vakıf değil; Hâlî'yim, kimse benim derdimden haberdâr olmaz.

Sâye hem şâm-ı firâkun bana hem-râh olmaz
Sen meger eyleyesin sâye-i lutfun hem-râh

Nîm bismil ne koyupsun men-i mihnet-zedeyi
Ger murâdun beni öldürmek ise Bismillâh

Diğer: Harâbât ehliyim sâki cevânun bâde pîrimdür
Ayakdan düşsem anda câm-ı gülğün dest-gîründür

HAYDAR Çelebi: Tarabefzûn'dandır. Zümre-i kuzâtdan dervîş-nihâd ve nîkû-nijâd kimesnedür. Ma'rifet-i küllî ve cüz'î ile tahsîl ü tekmîl itmişdür. Tab'-ı latîfî ve zihn-i şerîfî fenn-i şî're egerçi çok mümâreset itmemişdür. Lâkin şî'rinde zerre kadar bahâne yoktur. Bu bir iki beyt-i 'âşîkâne anundur ki sebt olundu. Nazm :

İnlerin ta subha dek sen peyker-i meh-pâreden
Aglarum ahşama dek eşküm gibi seyyâreden

Tatlu cânumdan usandum acı acı aglarum
Ayrı düşelden berü ol la'l-i şeker-pâreden

Diğer : Bağlamış niçe gönül her mûyının bir târına
Kimisin asmış kimin yakmış dahi envârına

HÂFİZ: Konevî'dür. Dânişmend-i hûşmend zümresinden kuvvet-i muhâfazası hûb ve mezûniyyet-i tab'ı gâyetde mergûb imiş. Âvâze-i hoş-nevâsın ve eş'âr-ı dil-küşâsın görüp işitdigümüz şu'arâdandır. Lisân-ı 'Arabî'de tahsîl-i ma'ârif kılmış ve zebân-ı Fârisî'nün kavâ'id-i fevâidine vâkıf imiş. Bu bir iki beyt anundur zikr olunur. Beyt :

Gam-ı zülfünle hâk olsam biter üstümde sünbüller
Ruhun şevkıyle can virsem tolar kabrüm kızıl güller

Ola kim bir bahâneyle irem bâgına dildârun
Kesik başum sifâlinde dikün bitsün karanfüller

Diğer : El virse bana devran bir hoş zamâne olsa
'İyd olsa dest-i yâri öpsem bahâne olsa

HAMDÎ-İ Burûsevî: Hadd-ı zâtında 'Acem-zâde olup kayd-ı 'âlemden âzâde olmanın 'âlem-i cevânîde devrân-ı bî-bekâyı fâni bilüp su gibi cüst ü cûy-ı didâr-ı hûb-rûyân-ı ferhunde-âsâr olup geşt ü güzâr iderek hankâh-ı 'âlem ve mesned-gâh-ı dervîşân-ı bî-gam ve tarîk-ı tarîkatde peyrev-i râh-ı mustakîm a'nî Mısır'da mukîm olan Şeyh İbrâhim'ün âsitân-ı kuds-âşiyânına revâne olup Hazret-i Gülşenî'nün câ-nişîni olan güzîde-i Şeyh Develi ya'nî Seyyid 'Alî hıdmetlerine irişüp bi'at itmiş. Âhirü'l-emr seyr ü sefer iderek diyâr-ı Bagdâd'a gelüp yârân-ı safâ ile ve mü'ellif-i tezkire ile musâhabet idüp keyfîyyet-i hâlinden âgâh olundu. Hayli dervîş-nihâd ve Fenâfillah mertebesine dest-res bulmuş şâ'ir-i dûr-endişdür. Kelimât-ı muhakkıkâ neyle makbûl-i herkes ve nikât-ı 'âşîkânesi vird-i zebân-ı yârân-ı hûb-nefes

olmuşdur. Bu bir kaç beyt-i âbdâr Hazret-i İmam Hüseyin'e radyallahü anh vardukda mersiye diyüp sebt itmiş. Ebyât:

Şerhalar çek sînene mâtem günü âbdâl isen
Kane gark olmak ile sa'y it muhibb-i âl isen

Diğer : Lâle-veş çâk idelüm cismimüzi mâtemdür
Âşikâr eyleyicek dâg-ı dili bir demdür

Diğer : Ehl-i diller n'ola ger gezse fenâ şeklinde
Pâdişâhlar bulunur bunda gedâ şeklinde

Diğer: Ser-fürû eylemezüz şâhenşeh-i devrânun
Ayagı topragıyuz dilber-i 'âlî-şânun

Diğer: Za'fdan mıdır 'aceb ol derlemiş ruhlarda tâb
Yohsa ya Rabbi bu yüzden mi çıkar gülden gülâb

Diğer : Sabâ lutf it götür yüzden sehâb-ı zülf-i cânânı
Ne günden oldıgun göster bize nevrûz-ı Sultânı

Mezkûr tekrâr burc-ı evliyâyâ gelmede bu gazel-i 'âşıkânı edâ itmişlerdür. Gazel

Mürde-i 'ışk olanun gonce-i dil sad-çâkidür
Görinen nergis çemende dîde-i gamnâkidür

Suçı yokdur dilberün bakdukça ammâ âdemi
Öldüren çeşm-i siyâh u gamze-i bî-bâkidür

Lâlenün hep yanduran şimdi fitil-i dâgını
Bir mehûn Bagdâd'da ruhsâr-ı âteş-nâkidür

Lutf idüp çöz düğmeni it tûtî-i gûyâ beni
Böyle sîne şâ'irün âyîne-i idrâkidür

Şüphe yokdur ey gül-i pâkîze-tıynet Hamdi'yi
Eyliyen ser-halka-i 'uşşâk 'ışk-ı pâkidür

HÜSEYNÎ-i Bagdâdî: Âbâ ve ecdâd-ı pâk-nihâdî ol diyârun a'yân-ı huçeste-şânından ta'dâd olunup mü'ellif-i tezkirenün 'amucesidür. Ekser-i evkâtın müsâfîretde geçirüp sevdâ-yı 'ışk başına üşüp bâd-ı mahabbet gönlüne eser idüp 'alâka-i dünyevîden rişte-i ümmîdin kat' kılup rûzgârda tarîk-ı dervîşlik ihtiyâr idüp niçe zamân geşt ü güzâr iderek vâdî-i cünûna düşüp gâh müsâfir-i bahr ü berr ve gâh mücâvir-i zâviye-i erbâb-ı hüner olup iki zebân ile nazm-ı revân-ı vasf-ı hûbân-ı cihân söyleyüp şifte-i cevânân-ı dil-firîb ve lezzet ü çaşni-hân-ı 'ışkdan nasîb alup âhirü'l-emr nidâ-ı İrci'î ilâ rabbike ²³⁷ gûşına irişüp Kerbelâ'da defn olunmuşlardur.

²³⁷ Ey huzura kavuşmuş insan! Sen Ondan hoşnut, O da senden hoşnut olarak Rabbine dön. (Kur'an 89/28)

Sene tokuz yüz seksen beşde yârâna vedâ' kılmışlar ve bu bir nice Fârisî ve Türkî eş'âr anlardan istima' olmuştur. Ol yâr-ı pâk-meşrebden bî-ta'b sebt olundu. Ebyât :

Kâkül-i müşkin be-ser an sîm-ten mî pervered
In belâ râ ez berâ-yı cân-ı men mî pervered ²³⁸

Ân sanem tâlib-i din bûde vü gâfil ez u
Kible-i ehl-i yakîn bûde vü men gâfil ez u ²³⁹

Bâşed heves-i tîr-i tu der dil heme kes râ
Tâ hod ki feşâned be-dil in tohm-ı heves râ ²⁴⁰

Diğer: Sanman beni çemendeki gül sîne-çâkiyem
Bir serv boylu lâle-ruhun derd-nâkiyem

Bu rubâ'î-i mestâne dahi ol şâ'ir-i zîbânundur sebt olundu. Ruba'î

Der fasl-ı bahâr horden-i bâde hoş est
Horden-i mey-i nâb bâ-ruh-ı sâde hoş est
Sahn-ı çemenî bâşed ü men bâşem ü yâr
Esbâb-ı tarab müdâm âmâde hoş est ²⁴¹

HASİRÎ: Şîrvâniyyü'l-asl ve sâhib-nesldür. Hayli nezâket-i tab' ve zerâfet-i vasfla ârâste ve esbâb-ı lehv ü lu'bla ol felâket-me'âb pirâste ve bir bî-riyâ 'âşık-ı şeydâ ve'l-perişân-menzil ü bî-me'vâ olmanın bûriyâdan bî-ser-i bî-devletine bir tâc-ı pür-revâc peydâ idüp bî-kaydlığında şâhân-ı 'âleme ser-fürû' idüp 'arz-ı ihtiyâc itmez ve hûb-rûyân-ı cihânı sûfî gibi bâg-ı cinâna satmaz. Bir nice müddet dârü's-selâm-ı Bagdâd'da sâkin olup erbâb-ı nazmla ihtilât-ı küllî eylemenin kelimâtına cüz'î irtibât virüp vâdî-i şî're sâlik ve emti'a-ı gazelden hayli mâl ü menâle mâlik olmuşlardır. Cümle elfâz-ı güher-nisârlarından bir iki beyt-i pür-nikât bu cem'iyet-i zurefâyâ sebt olunması münâsib görüldü. Ebyâtına eşhâs-ı 'âşık-pîşe tâlibdür. Nazm :

Bize bir yâr-ı vefâ-dâr gerekmez mi gerek
Olıcak yâr-ı cefâ-kâr gerekmez mi gerek

Diğer : Türkî-vârinca söylerem şî'ri
Kâtî arınca söylerem şî'ri

HIFZÎ: İbni 'Abdullah'dur. Dânişmend tâifesindendir lâkin İstanbulda neşv ü nemâ bulmuştur. Zihn-i selîmi ve tab'-ı mustakîmi hûb ü mergûbdur. Kemâl-i kâbiliyyetden 'ilm-i

²³⁸ O gümüş tenli başında mis kokulu kâkül büyütür. Bu belayı benim canım için (canıma kasdederek) büyütür.

²³⁹ O put (sevgili) din talep ediyordu, ben ise ondan gafildim. O yakîn ehlinin kiblesiydi, ben ise ondan gafildim.

²⁴⁰ Bu heves tohumunu gönle saçınca senin okun herkesin gönlüne saplanmaya heveslendi.

²⁴¹ Bahar mevsiminde şarap içmek güzeldir. Saf şarabı güzel yüzlü biriyle içmek güzeldir. Yeşil bir bahçe olsun, ben olayım bir de yar olsun. Eğlence gereçlerinin sürekli hazır olması güzeldir.

zâhire meşgûl iken terk-i ‘alâyık-ı dünya idüp tarîk-ı tasavvufa sâlik olup ol vâdîden çok nesneye mâlik olmuştur ve bir mikdar zamân siyâhat tarîkı ile Rûm İli’ne seyr ü sülûk idüp ma’rifet-i cüz’î ve küllî kesb itmiş sanâyi’-i şî’rden habîr ve zebân-ı Fârisî ve Nevâyî bilmede bî-nazîr ve hadd-ı zâtında ol tûtî-i şeker-hâ-yı hoş-edâ hıfz ile hâfız-ı kelâm-ı Hudâ’dur. ‘İlm-i mûsıkîde terennüm ile bûlbûl-i nagme-serâ ve savt ü nakş bağlamada hem-zebân-ı ‘uşşâk-ı bâ-nevâdur. Hayfâ ki zarîf-i latîf ü şâ’ir-i nasîf-i nahîf şî’r ü şu’ûr mâbeyninde şöyle meşhûr ve bir mertebede ter-mizâc kimsedür ki dâimâ kendü hûyından bî-huzûr olur ve ol bâbda bî-’ilâc idüğü zebân-ı yârânda mezkûrdur. Bu gazel-i mestâne hasb-i hâl-i rindân-ı zamân oldugıçün şâhid-makâl ve mübeyyen-i hâl ve vasf-ı mecâlis-i erbâb-ı dünyâ olsun diyü peydâ itmişler. Gazel :

‘Âlimün mertebesin gör ne kadar ber-terdür
Başdan bezm-i safâ bir ayag altı yirdür
Ne kadar vahşi gazâl olsa da râmundur yâr
‘İşk-ı dîvâneligin gör ki ne vâdîlerdür

‘İşk-ı Mansûra felek bay-sıfât baş egdi
Ol ne Hallâc durur gör bu nîce çenberdür

Dehen-i nâzüki ter düşdüğine cânânun
Yok yire ol lebi nev hattı yine mugberdür

Söz güherdür dir isen Hıfzî-i sâfî-dile gel
K’andan gayrıda bulunmaz o bir cevherdür

Diğer : ‘Âlemi kırdı geçürdi meded ey kaşı hilâl
Nedür ol çeşm-i harâmî nedür ol rûy-i celâl

HÂLÎ: ‘Acem-zâde’dür. Babası Şirvan’dan Rûm’a gelüp kuzât zümresi içre sâhib-kazâ olmuş ve kendü İstanbul’da neşv ü nemâ bulmuşdur. Hâlâ dânişmend tâifesinden olup ekser-i ‘ulûmî mütâla’a kılup ve zebân-ı Fârisî’yi geregi gibi bilüp üç zebânla nazma kâdir ve her birinde mânend-i akrân-ı şâ’ir-i sâhir ser-â-ser şî’ri hâlet-bahş-ı ehl-i hâl ve hasb-i hâl-i ‘uşşâk-ı şikeste-bâl vâkı’ olmuştur. ve hatt-ı nesta’lık yazmada kâtib-i seri’ ve tarz-ı inşâda mübdi’ u muhteri’dür. Bu bir iki matla’ u beyt anlarundur. Ebyât :

Bîmâr-ı hicrem ü dehedem la’l-i yâr haz
Ârî dehed şarâb be ehl-i humâr haz ²⁴²

Diğer: Çıkmadı cânun ü gönlümden ol anun yâdı
Ah anun derd-i dili ve ey bunun feryâdı

Kasd-ı cân itmege yüz sihr ile ta’lim ider
Gözinün veh ne belâ sâhir imiş üstâdı

²⁴² Ayrılıktan hastayım, yarin al dudağı bana haz verir. Evet şarap humar ehline haz verir.

Diğer : Dilde bir gam-hâne bünyâd eyledi üstâd-ı ‘ışk
Virdiler adını ol kasrun harâb-âbâd-ı ‘ışk

ve bu kıt’a dahi ol şâ’ir-i sihr-sâzundur yazıldı. Kıt’a :

Ez reh-i tâ’atet mekon yâ Râb
Be-sûy-i ma’siyet zi ser ne revem

Lutf-fermây der cihan ma’sûm
Hem çünan k’âmedem diger ne revem ²⁴³

HÜKMÎ: Gelibolı’dan dânişmend-i hûşmend zümresindendir. Rûz u şeb kesb-i ‘ulûm için hıdmet-i erbâb-ı kemâl idüp akrân içre ma’ârif-i cüz’î ve küllîde bî-misâl ve envâ’-ı hutûta mâlik ve kalem-i müşgîn sevâdından tahrîr olan erkâm-ı rengîni dil-pezîr ve tecnîs ü tahayyülde peyrev-i Emrî ve edâ-yı pâk ile hem-zebân-ı ‘Amrî olmaga sâlikdür. Bu bir iki beyt ve matla’-ı selîs-i zîbâ anundur tahrîr oldu. Beyt :

Tıfl-ı dil kaddin görüp ‘ışka elifden başladı
Rabbıyesir lâ tu’asr rabbıtemmim bi’l-hayr ²⁴⁴

Diğer: Gam u gussa elem hicran figân u mâtem ü hasret
Bişirdi bagrumı cânâ kebâb itdi yidi zahmet

Diğer : Na’l kesdüm bedende hem-çû kamer
Tâbakan na’lu bi’n-na’li didiler ²⁴⁵

HAYDERÎ: İstanbulludur. Dervîş-sıfât ve nîkû-hılkat e’l-kâsibu habîballah ²⁴⁶ fehvâsınca vech-i ma’îşet takyacılıktan hâsıl idüp evkâtın ana sarf itmek üzredür. Selîka-i şî’ri hûb bir haddedür ki rişte-i nazm-ı bârîki ‘uyûbdan nühûftedür ve ma’nâ-yı dakîki igne yürüdisi gibi sûftedür. Bu bir kaç beyt-i mestâne ve sûznâk-ı rindâne ve pâk anundur sebt olundu. Nazm :

Başında od yanar her şeb iderse girye lâyıkdur
Diyemez hâlini rûşen dili şem’un tolaşıkdur

Diğer : Hümâ-yı ‘ışk-pervâz ol gel ey can murgı tenden geç
‘Alâyıkdan mücerred ol yüri kayd-ı bedenden geç

Dimekden zülf-i dilber gibi ‘âlem müşk-bâr olmaz
Gerekse ey sabâ her gice sahrâ-yı Hoten’dan geç

²⁴³ Ya Rabbi ma’siyete (itaasızlık) doğru senin itaat yolundan çıkarma.

Lütuf buyur dünyaya masum geldim, başka türlü gitmeyeceğim.

²⁴⁴ Rabbim, işlerimi kolaylaştır ve onları hayırla sonuçlandır.

²⁴⁵ Birbiri ile uyuştu

²⁴⁶ Allah ticaretle uğraşanı (kazananı) sever.

HAMÎDÎ: İstanbullı'dur. Dergâh-ı mu'allâda silâhdâr bölüğündendir. Hadd-ı zâtında merd-i dilâver ve peyrev-i erbâb-ı hüner olmak ümmîdiyle rûz ü şeb taklîd-i şâ'irân-ı nâm-âver ider kimsedir. Bu matla' eş'ârının güzîdesi ve tab'ının pesendîdesidir. Matla':

Hakdan ne câh u câme ne hod efser isterin
Gönlümi egleyici güzel dilber isterin

HAMDÎ: Tirevî'dür. Erbâb-ı sanâyi'den iken letâfet-i tab'-ı latîfi ve zekâ-yı zihn-i zarîfi olmanın zurefaya karışıp okuyup yazmak semtine sâlik düşüp aslında tab'-ı mevzûna mâlik olduğu ecilden şâ'ir-i nükte-güzâr ve sâhir-i ma'ânî-[nigâr] olmuş. Bu bir nîce beyt anlarındır. Ebyât :

Bir dil-rübâ ki kâyıl ola mübtelâsına
Harc eyle nakd-i cânı ana mübtelâsına

Diğer: Kâmetüm nahlin dirîgâ eyledi âlâm-ı lâm
Ey elif kad bulmadı senden dil-i hod-kâm-ı kâm

Diğer : Okundı kadd ü hattuna ve'n-necmü ve's-şecer
Yazıldı mushâf-ı ruhuna ahsenü'l-beşer

Diğer : Kaşların hancer çeker katl itmege efgendesin
'Âşık öldürmüş gözün ey bî-vefâ sen kandesin

HÜSÂM Beg: İstanbul'dandır. Pâdişâh-ı 'âlî-şânun ehl-i dîvânından olup mukâbelecilik mansıbında iken vefât itmiş. Evsâfın gûş kıldugumuz şâ'ir-i pür-hûş kısmındandır. Feemmâ ibdâ'-ı şî'rde icâd-ı târîhe nisbeti ziyâde olduğu ba'isden ol fâik-i emsâl müverrih-i bî-misâl vâkı' olmuşdur. Binâen 'alâ zâlik İstanbul kurbünde Hazret-i Eyyûb-i Ensârî 'aleyhi'r-rahmeti'l-bârî mukâbelesinde Südlüce nâm makâm-ı sürûr-encâmı Ka'be-i 'ârifîn-i güzîn ve teferrüc-gâh-ı erbâb-ı yakîn olan zâviye-i Ca'fer Abâd'un itmâmı bünyâdında buyurdıkları târîh-i hûb-makâl şâhid-hâlidür. Târih :

Hamdülillah ki in huçeste-makâm
Şod besî dil-küşâ ve hem dil-keş

Geşt mülhem zi hâtıf-i gaybem
Ka'betü'l-'ârifîn târîheş²⁴⁷

HÜKMÎ Beg: Erbâb-ı aklâm zümresindendir. Eltâf-ı zü'l-minen ile zât-ı pür-haseni vâdî-i inşâda nâm-ı pâki gibi hüsn-i vücûd-ı pür-cûdunun mevlidi Rûm İli'nde Hersek vilâyetindendir. Evân-ı cevânîde ve bu sarây-ı fânîde istifâde bâbına teveccüh idüp eyyâm-ı sürûr-encâmı ve ifâde tahsîlinde sâ'ât-i leyâlî-i kirâmı cidd ü cehd ile sarf idüp 'ilm-i 'Arabîyye ile müşerref olup mütâla'a-i rasîheden behremend ve fûnûn-ı Fârisî bilmede bî-

²⁴⁷ Elhamdülillah bu mübarek mekan çok hoş ve güzel oldu. / Bana gayb elçisinden ilham olundu. Tarihi Ka'betü'l-'ârifîn oldu.

mânend ve semt-i kitâbete mukayyed düşüp ‘ahd-i devrân zuhûra getirüp bir nice dürlü hutût meşk idüp hoş-nüvisân-ı ıyyâm içre hattât-ı devrân diyü benâm ve muhâsebân-ı müşğîn-erkâm gibi rahş-ı sa’âdetle sâhib-sitâm olup lahza lahza erbâb-ı fazîlet ile ihtilât idüp ma’lûmât-ı safâ-güsteri pür-neşât olmagın ehl-i fazl içre ma’ârifle meşhûr ve elsîne-i merdân-ı ‘ayş ü huzûr arasında mezkûr. Binâen ‘alâ zâlik erbâb-ı devlet bâbına sâlik geçüp hıdmet-i ehl-i şevkete mâyl ve mülâzemet-i ashâb-ı ‘âlî-himmete kâyl ve kendü umûrunda cem’iyyet-i mâl ü menâl ve ri’âyet-sâz-ı sâhibân-ı kemâldür. Diyâr-ı Basra ve Bagdâd’da ‘izz ü ikbâlle beglerbegi olan Çıkala-zâde Sinân Paşa’nun kâtib-i dîvânı ve ol bâbun ser-âmed-i akrânıdır. Tab’-ı derrâki fûnûn-ı kemâlât-ı şî’r-i bilmede mükemmel ve zihn-i pâki bârik-i şî’r ile fehm-i çâlâki mânend-i H’âce-i Cihân u ‘akl-ı evvel ve rik’a-i nazm-ı mahabbet-nişânı dil-pezîr ve hükm-i menşûr-ı mürüvvet-küşâsı ‘âlem-gîr buhûr-ı ma’ânîde gevher-i şî’r-i dür-bârı gün-â-gün mânend-i dürr-i meknûn makbûl-i yârân-ı zü-fûnûn ve der-gûş-ı dervîşân-ı ciger-hûn ve mülk-i suhunde hükmi revân ve zabt-ı iklim-i ma’rifet itmede yegâne-i zamân. Bu gazel-i dervîşâne ol yâr-ı ferzânenündür. Gazel :

Sûret-i zâhir ile gerçi ki ‘âlî-şânuz
Hâk-i râh-ı fukarâ bende-i dervîşânuz

Tâcımız şîşe-i mey hâtemimiz câm-ı şarâb
Tahtımız meyledür şimdi Cem-i devrânuz

‘Arsa-i hâkde n’eyler bize esbâb-ı gurûr
Bir iki gün bu fenâ tekyede çün mihmânuz

Düşeli kûh-ı gam-ı ‘ışkına ol Şîrîn’ün
Şimdi Ferhâd gibi bî-ser ü bî-sâmânuz

Hükmi’yâ çün bize erbâb-ı kemâl oldu zahir
Lutf-ı tab’ ile bu gün Enverî vü Selmân’uz

Fî harfî’l-ha

HAYÂLÎ Beg: Vardar Yenicesi’ndendir. Sâbıkan Baba ‘Alî Mest’ün mürîd-i hûşyârı ve dervîş-i nâmdârı iken sâhib-sa’âdetlerün ve erbâb-ı himmetün nazar-ı kimyâ-bahşları ol mihr-i münîre mukârin ü mu’âvin olup zerre-vâr hâkden kaldırıp Sultân-ı kişver-küşâ-yı cihân ve hâkân-ı zamân Sultân Süleymân Hân hazretlerinin ‘inâyât-ı berekâtleri irüp hüsrev-i şu’arâ-yı zamân ve ser-âmed-i zurafâ-yı cihân olup bin i’zâz ile pâye-i devlete kadem basup âsitân-ı felek-âşiyân makbûllerinden defter-i hâssa kayd olup ağır ze’âmete mutasarrıf olmaga şâyeste ve tâli’-i huçeste ile devlet ü sa’âdete irişmişdür. Ol tûtî-i şekeristân-ı elhânî ve ol bülbül-i gülzâr-ı ma’ânînin hayâl-i tab’-ı pâki nihâyetde ve letâfet-i zihn-i sâfı gâyetde fûnûn-ı şî’re kâdir ve her bir fende üstâdân-ı mütekaddimîn ü müteahhirîn gibi mâhir kuvvet-i muhâfazası fevka’l-hadd ve sohbet-i hâssı pesendide-i nîk ü bed ve zarâfeti gamzedâ-yı dil-i mahzûn ve esnâ-yı musâhabetde her bir sözi dürr-i meknûndur. El-hak elfâz-ı nefis-i pâk ile Rûm’un Hâfız-ı Şîrâz’ı ve edâ-yı selîs-i bülend ile şu’arânun ser-fîrâzı ve dikkat-i hayâlde tahayyülât-ı kemâl ile mevsûf ve sanâyi’-i şî’rde şu’arâ-yı ‘Acem gibi rengîn-makâl ile ma’rûfdur. Ol yegâne-i cihân ve ferzâne-i zurafâ-yı zamânun kemâl-i şöhreti bir mertebede vâkı’ olmuşdur ki kâbil-i tahrîr ve imkân-ı takrîr degüldür. Zîrâ ki eş’âr-ı âbdârı ve nazm-ı dürrer-bârı bî-hadd

ü lâ-yu'addur. Cümle-i eş'âr-ı sûznâkinden ve güftâr-ı pâkinden bir gazel-i pür-mesel ve ba'zı ebyât sebt oldu.

Ruh-ı gerdunda her subh ey şafak kim cilve-gersin sen
Bana kan agladur hayl-i melek-hûn-ı cigersin sen

'Aceb mahbûbsın ey şem' kim fehm olmadı şânun
Virirken cânı pervânen hem aglar hem gülersin sen

İrüp ol serv kadde görmedünse kâbe kavseyni
Var ey Cibrîl-i 'aklun dahi yabanda uçarsın sen

Tecellî eyledi sende cemâl-i nûr-ı Yezdânî
Velî âyîne gibi ol sıfâtdan bî-haber sin sen

Cefâ taşın ne gam atsa Hayâlî sana alçaklar
Belâgat mîvesin peydâ iden nahl-i hünersin sen

Diğer: Kâkül-i miskîn-i cânânun perîşân hâliyüz
Gussanun ser-geştesi derd ü gamun pâmâliyüz

Diğer : Cihân-ârâ cihân içindedür ârâyı bilmezler
Şu mâhîler ki deryâ içredür deryâyı bilmezler

Harâbât ehline dûzah 'azâbın anma ey zâhid
Ki bunlar ibn-i vakt oldu gam-ı ferdâyı bilmezler

Diğer : Tenlere rûh-ı mukaddes 'ışk-ı pâkündür senün
Devlet-i bîdâr çeşm-i h'âbnâkündür senün

Götürür koynunda bir seng-i siyâhın kûyunun
Vâdî-i 'ışk içre Ka'be sîne-çâkündür senün

Diğer : 'Agyâr âh idermiş ol gül-'ızâra karşı
Olur sovk hevâlar evvel bahâra karşı

Bu beyt-i rûh-bahşı vird-i zebân idinmiş
Mansûr gitdüginde şevk ile dâra karşı

İdüp muhît a'zam emvâcın âşikârâ
Tenler sefînesini urur kenâra karşı

Diğer : Âyine hüsnüne kul olsun safâsı var ise
Şâne çeksün zülfünün bin bin belâsı var ise

Diğer : Dûr itdi ben gubârı ser-i kûy-i yârdan
Kime şikâyet eyleyeyin rûzgârdan

Diğer : Râh-ı gülzâr-ı vefâda cismini iden gubâr
Rûzgâr ile girür bir verd-i ra'nâ koynına

HÂVERÎ Efendî: Manastır'dandır. Kuzât zümresinden tab'-ı şerîfî nazmla gün gibi meşhûr ve zihn-i latîfî nezâketle efvâhda mezkûr kevkeb-i nazm-ı bî-nazîrî ufk-ı semâ-yı tab'dan mâh-ı münîr gibi nümâyân u tâbân ve necm-i ebyât-ı dil-pezîrî kûşe-i hâtırdan mihr-i cihân-ârâ gibi leme'ân u rahşân olmuş. Hakkâ budur ki rindâne ve 'âşıkâne bî-misl ü bî-mânend eş'âr-ı dil-pesend ile beyne'l-akrân yegâne-i devrân ve ser-âmed-i kuzât-ı zamândur. Bu gazel-i meşhûr anların gazeliyyât-ı bî-bedelinden mestûr olundu. Gazel :

Seni gözler dü çeşm-i hûn-feşânum nîce demlerle
Gel ey nûr-ı basar merdümlik it demler kademlerle

'Aceb nîce yazıldı başuma bu kara yazular
Benüm hod mihnet ü derdüm yazılmaya kalemle

Hevâ-yı kadd ü zülfünle ölürsem ah idüp cânâ
Mezârumdan turam mahşerde 'abbâsî 'alemlerle

Kad ü zülf ü dehânun hasreti lâm eyledi kaddüm
Hudâ bilür benüm sag olacagum bu elemle

Nice zünnâr-ı 'ışka Hâverî bel bağlamayam kim
Der ü dîvâr-ı deyr-i dil pür olmuşdur sanemle

Diğer : Anladum çeşmi ne fettân idüğün kaşından
Bilinür rehzen olan niteki yoldaşından

Koparur fitneyi hattun çekelü zülfün adı
Tutulur yeniçeri suçı bölükbaşından

HURREMÎ-i Bagdâdî: 'Attâr-ı bâzâr-ı eş'ârda sâhib-dükkân-ı efkâr ve nâkil-i nakl-i nazm-ı şeker-bâr olup latîfe-i güzâr ile ehl-i rûzgâr diyü iştihâr bulmaga sezâ-vâr ve makbûl-i sığâr ü kibârdur. Vücûd-ı şetâret-nümâsı ve gülbîn-i zât-ı zarâfet-efzâsı ravza-i Bagdâd'da neşv ü nemâ bulmuşdur. Mü'ellif-i tezkirenün akrabasından olup 'âlem-i şebâbda ilâ hâzihi'l-eyyâm ol yâr-ı ferhunde-encâm hem-zebân-ı tûtîyân-ı şeker-güftâr ve hem-nefes-i şâ'irân-ı fesâhat-şî'âr olup lahza lahza mütâla'a-i devâvin-i belâgat-nizâm-ı bülegâ-yı A'câm ve lemha lemha cüst ü cû-yı vâdî-i kelâm-ı nezâket-encâm fusahâ-yı ervâm idüp 'ale'l-husus manzûmât ve münşe'ât-ı Mevlânâ Fuzûlî'yi rahmetullahı 'aleyh vird-i zebân u mûnis-i cân kılup meclis meclis okıyup yazmag ile iştihâr-ı tâm bulup erbâb-ı 'irfân içre benâm olmuşdur. Hadd-ı zâtında bir güler yüzlü gül gibi hurrem ü handân ve bir şîrîn-zebân-ı devrândur. Bu bir nice matla'-ı Fârisî vü Türkî anlarındur. Ebyât :

Ârâm cüdâ z'ân meh-i hod-kâm nedârem
Nâ-kâm cüdâ geşte em ârâm nedârem ²⁴⁸

Diğer : Ne sır var bâtınında bilmezem kim meclis-i meyde

²⁴⁸ O başına buyruk ay yüzlüden ayrı, huzurum yok. Arzuma ulaşamadan ayrıldım, huzurum yok.

Düſer erbâb-ı meclis mest olup ammâ sebû düſmez

Diğer : Dime kim dil-berde ancak kâmet-i bâlâ gerek
Kâmet-i bâlâsı gibi her yiri a'lâ gerek

Diğer: Minnet Hudâ'ya hâsıl idüp devr-i kâmımız
Kan yutdurur 'adûlara ſûrb-i müdâmımız

Diğer : Kaçan kim 'arz-ı hâle başlasam ol ſûh-ı bed-hûya
Komaz kendüyi anda ya tegâful ya 'itâb eyler

Sana ey Hurremî la'l-i leb-i yâr itdügi rengi
Ne câm eyler mahabbet meclisinde ne ſarâb eyler

Diğer : Siyeh-pûſ ol gel ey âbdâl dil-i mâh-ı Muharrem'dür
Figân it ſerhalar çek sînene hengâm-ı mâtemdür

Diğer : Gel ey da'vâ-yı mihr-i âl iden kan agla gam-nâk ol
Bu demlerde mahabbet hândânun gönli pür-gamdur

Diğer : Bihamdillâhı ve'l-minne ki tevfikât-ı Rabbânî
Tavâf itdürdi bana meſhed-i ſâh-ı ſehîdânı

HÂTEMÎ Beg: Edirnevî'dür. Mukeddemâ ehl-i timârdan iken rahş-ı tab'ı ol vâdîden 'inân çeküp tâc ü kâbâ terkin urup siyâhat-i tarîkle diyâr-ı 'Arab ü 'Acem'e seyr ü sülûk idüp erbâb-ı fazl ü hünerden behremend ve ashâb-ı sıdk u safâdan hûſmend olmak ricâsıyla dervîſ-sıfât ve 'âlî-himmet olup minnet-i ehl-i rûzgârı çekmeyüp bir 'abâ ihtiyâr itmiş. Mezkûr ol zamânda Mâtemî mahlasıyla meſhûr ü mesrûr imiş. Âhir giderek ol tarîkden dahi vaz gelüp külli şeyun yerci'u ilâ aslihi ²⁴⁹ muktezâsınca ſâh-zâde-i 'âlemiyân ve nûr-ı dîde-i merdüm-i zamân ya'nî Sultân Selîm Hân hazretlerinin dergâh-ı cihân-penâhında müteferrika olup âsûde-hâl ve müreffehü'l-bâl olmuş. Hemîſe cem'iyet-i hâtır-ı cân u dilden nazm ü nesr ile Sultân-ı zamân ya'nî ſâh-zâde-i kâmrânun medh ü senâsına iſtigâl üzredür. Ana binâen mahlas-ı pâkin Hâtemî'ye hatm itmiş. El-hak sohbeti hûb ve ſûh-tab' kimesnedür. Aksâm-ı ſi're kâdir ve 'arûz ü kâfiye ve mu'ammâ bilmede mâhir geçinür. Tarz-ı kasîdede müsellem ve eş'âr-ı dürer-bârı vâfir ve zebân-ı Fârisî'de mûmâreseti mütekâsir tekellüm-i pesend-i yârân-ı 'Acem ve makbûl-i sâhibân-ı keremdür. Gazeliyyât-ı 'âſıkânesi bî-hadd ü bî-kıyâs ü pür-zîverdür. Egerçi beyne'n-nas mezkûr ü meſhûr degüldür. Râkım-ı hurûf mezkûrula Edirne ve İstanbul'da defâ'at ile mülâkat idüp musâhabet itmişdür. Ziyâde dervîſ-meſreb ve lâubâli ve pâk-nesebdür. Hayfâ ki yârân-ı hoſ -fehm içre zu'm ile müttehimdür. Mezkûrun ebyât-ı hayâl-engîzi ve kelimât-ı misâl-âmîzi hûb ü mergûbdür. Cümlesinden bir kaç sûz-nâk ve gamzedâ-yı dil-i gam-nâk matla'-ı pâk gül gibi neſv ü nemâ bulup gülbîn-i kalemden mânend-i dürr-i nâ-süfte kilik-i müſgîn-rakamla riſte-i nazma geçdi ma'lûm-ı erbâb-ı 'ulûm ola diyü merkûm olundu. Ebyât :

²⁴⁹ Her şey aslına dönecektir

Şîvesinden turamaz bir dem ayag üstine yâr
Tâze şâhun yine kendüye olur mîvesi bâr

Diğer : Yirüm âh ile geh âteş gehî giryeyle âb itdüm
Yakup yıkdum vücûdum ben harâb-ender-harâb itdüm

Diğer : N'ola bir nice dem gelse ferâgat giryeden 'ayne
O nûr-ı çeşm ile ey dil su sızmaz şimdi mâbeyne

Diğer : Görinen sanma hilâl-i çarh ey hurşîd-hadd
Hâme-i âhum çeküpdür âsmân üstine med

Diğer : Sen tururken mihr ü mâha yakmış ey hurşîd-hadd
İsterin Hak'dan çukurında bula sâhib-rasad

Diğer : Kıl nazar ol mâha mir'ât-ı safâdur sînesi
Ol durur dîdâr hakkıçün gönül âyînesi

Bu gazel dahi anların icâd-ı hâssıdır. Hayli müşkil ve kendü re'y-i fikriyle makbûl-i ehl-i dildür. Gazel :

Yaşıma kaddüne çü şimşâd benzer benzemez
Cismüme çeşmüne mû cellâd benzer benzemez

Bu dil-i meyyâle vü ol hınk-ı berk-i âhengû ki
Şehsüvârüm her akarsu bâd benzer benzemez

Eşm-i bî-âhû-yı şîr anunla bâg-ı kûyuna
Her peleng-i cenk-cû Bagdâd benzer benzemez

Yazmada nakş-ı hayâlün dilde çeşm ü 'ışkuna
Mâni vü ey mâh-rû Bihzâd benzer benzemez

Dîde-i pür-hûn u la'l-i şekkerine Hâtemî
Bâde ile bir gedû kannâd benzer benzemez

HISÂLÎ: İnebahtı'dandur. Şehr-i mezbûrda reşk-i kal'a-i çihârüm olan hisârün kethüdâsı Allah Beg'dür. Dîn-i mütehaflızların hâfız-ı hoş-edâsıdır. Ma'ârif-i müktesebe ile zihn-i pâki mücellî ve fezâyıl-i ma'rifet ile tab'-ı çâlâki akrânından müstagnî ve zât-ı melekî-sıfât ve huçeste kelimâtdur ki Hısâlî mahlasıyla simâ-ı şerîfleri 'Arabî'den haber dâr ve Fârisî'de makbûl-i zebân-ı dânnân-ı rûzgâr ve ebnâ-yı zamân içre tabî'at-ı şî'riyyeleri hem-vâr tabâyî'-i pesend ve efkâr-ı 'amîk ile buhûr-ı nazmdan behremend hüsn-i hulkları gâyetde lutf-ı ihtilât-ı yârân-ı nüktedân ile nihâyetde nisf-ı evsâfın gûş itdüğümüz şu'arâdan ve manzûmâtın gördüğümüz fusahâdandur. Cümle-i eş'ârından bu müseddes ki istihkâm-ı küllîye ile müessesdür gonce-i kalem-i dürer-bâr ve zâyice-i tabî'at-ı güher-âsârlarındandur. Bu tezkîre-i pür-hayâle ol nâzım-ı firişte-hısâlün sebt oldı. Müseddes :

Tâ ki sen serv-i hevâ-bahşa hevâdâr oldum
 Mûnis olup gam ile gussa ile yâr oldum
 Ta'n-ı a'dâ vü rakîb ile dil-efkâr oldum
 Hâsılı cân ü dilümden dahi bî-zâr oldum
 Düşeli 'ışkuna günden güne bîmâr oldum
 Allah Allah ne 'aceb derde giriftâr oldum

Kalmadı zerre kadar cism-i za'îfümde mecâl
 Artdı günden güne canda gam u endûh ü melâl
 Derd-i hicrûn büküben kâmetümi itdi hilâl
 Oldı sıhhat dil-i bîmâruma hod emr-i muhâl
 Düşeli 'ışkuna günden güne bîmâr oldum
 Allah Allah ne 'aceb derde giriftâr oldum

Düşeli mihnet-i derdün dile ey serv-i revân
 Bir dem eksilmedi candan n'ideyin âh u figân
 Bana dermân idemez gelse etibbâ-yı cihân
 Derdimün ancak ölumdür yine dermânı hemân
 Düşeli 'ışkuna günden güne bîmâr oldum
 Allah Allah ne 'aceb derde giriftâr oldum

Artdı eksilmedi canda elem ü derd ü belâ
 Bulmadum mihnet ü gamdan n'ideyin gitdi rehâ
 Âh kim haste dilün derdine olmadı devâ
 Çekmeden derdünü kurtulmadum ey mâh-likâ
 Düşeli 'ışkuna günden güne bîmâr oldum
 Allah Allah ne 'aceb derde giriftâr oldum

Nîce bir derd-i firâkunla çekem renc ü elem
 Bu Hısâlî kuluna rahm kıl ey şâh-ı kerem
 Çâre yok nic'edeyin n'eyleyeyin ah n'idem
 Başuma rûz-ı ezel 'ışkunı yazdı çü kalem
 Düşeli 'ışkuna günden güne bîmâr oldum
 Allah Allah ne 'aceb derde giriftâr oldum

HÜSREVÎ Çelebi: İstanbûlî'dür. Zümre-i müderrisîn içre münselik Mevlânâ Hüsrev oğlu dimekle meşhûr ve cevdet-i fehm ile makbûl-i cumhûrdur. Zihn-i pâki safâ-yı dil-peziir ile ârâste ve tab'-ı sâfi edâ-yı bî-nazîr ile pîrâstedür ve güftâr-ı şîrîn dimede tûtî-i şeker-şiken ve eş'âr-ı rengîn bulmada hüsrev-i mülk-i suhendür. Bu matla' anundur. Beyt :

Yanuna alup rakîbi eyledün seyr-i çemen
 Yanuna kalur mı ey serv-i sehî seyr eyle sen

HALÎFE: Gerçi asl-ı pâkizeleri ve vâlid-i 'azîzleri Tebriz'dendür lâkin Karamamid'den ta'dât olunur. 'Âlem-i tufûliyyetde ve debistân-ı dehrde üstâdân-ı rûzgâr ve nûkte-güzârân-ı şîrîn güftâr hıdmetlerine diz çöküp müddet-i karîbde sevâddan behremend ve etfâl içre sebak almada yüz agardup sâhib-hüner olmuş ve anunla dahi kana'at itmeyüp 'ulemâ hıdmetine tâlib

olup evkât-ı şerîfin kesb-i ‘ulûma sarf itmiş zât-ı latîfî kâbiliyyetden mâl-â-mâl olmanın tahsîl-i kemâl-i pür-me’âl kılıp dânişmendân-ı zamân arasında sâhib-makâl olup ba’dehu ârzû-yı seyr-i diyâr-ı Haleb ü Şam ve hıdmet-i meşâyih-i kirâm ve mülâkat-ı ‘ulemâ-yı zevî’l-ihtirâm ve mülâzemet-i selâtin-i sâhib-ihtîşâm idüp cihân-dîde ve sohbet-âzmûde ve müverrih-i rûzgâr ve her fende nâmdâr ve aksâm-ı nazma üç zebân ile mânend-i ehl-i kemâl rûz ü şeb iştigâl gösterüp nâzım-ı cevâhir-i beyân ve gavvâs-ı dürer-i ma’ânîdür. Husûsâ turûk-ı mesnevîde tarîk-ı pîr-i Gence’ye sâlik geçinüp misâl-i hamse-i **Penç Genc**’e mâlik olmuş ve üslûb-ı gazel ü tahmîs ü terci’-i bend ile pesendîde-i merdmân-ı hıredmenddür ve diyâr-ı mezbûrda hâsıl olan şu’arânun edîbi ve zurafânun mürebbisidür. El-hak nikât-ı dakîk ile ser-âmed-i eyyâm ve kelimât-ı hayât-bahş ile emirü’l-kelâm idüğine elsîne-i nüdemâda envâ’-ı latîfesi mezkûr ve şu’arâ-yı ‘asr katında bu ‘ahdün halîfesi diyü meşhûrdur. Bu bir kaç matla’ u beyt anlarındur sebt olundu. Nazm :

Serv hâhed ki şeved çûn kadd-i tu hoş revnak
Râst şod der hakk-ı u küllü tavilun ahmak ²⁵⁰

Diğer: Leb açup söylese ol gül çemende gonce-femlerle
‘Aceb mi goncenün hasretten agzı tolsa demlerle

Hatın engüşt ile ol meh yüzünde peh peh eyler
Yazar mihr âyetin hüsnî kitâbına kalemlerle

Gamun her tâze oldukca dil-i dîvâne şâd olur
Beni şâd eyle her dem ey perî-ruh tâze gamlarla

Şehâ dilden gubârı feth iden reyhân-ı hattundur
Muhakkak bendenüz kırma bizi müşgîn rakamlarla

Halîfe ol sehî-kâmet yine zülfün ‘alem itmiş
Gelür dil kişverin almaga ‘abbâsî ‘alemlerle

Mezkûr mehâbîb-i şehîr-i Âmid için şehrengîz-i mihr-âmîz dimiş. Nevbet bir nekkâreci dilberine degdükde üç beyt edâ-yı bülend ile derc idüp âvâzesi tâk-ı ‘âleme velvele ve nüh revâk-ı âsmâne gulgule salmışdır. Nazm :

Biri nekkârecidür adı Hayder
Olupdur cümle hüsn ehline mihter

Çıkup bir cebîne dir ol mâh tal’at
Güneş sen git benümdür şimdi nevbet

Öz adına çalar devlet nefirin
Ne kara gündedür görmez fakîrin

²⁵⁰ Servi senin boyun gibi güzel (uzun) olmak ister, onun hakkında bütün uzunlar ahmaktırt sözünü gerçek oldu.

HÜDÂYÎ Beg: İstanbullı'dur. Sâbikan dergâh-ı mu'allânun yayabaşlarından idi. Âhir diyâr-ı Budîn'e yeniçeri yazıcıları başka kapu itdüklerinde mezkûr yeniçeri yazıcısı nasb olmuş. Tevsen-i tab'ı ol uç yirlerde ârâm ü karâr itmeyüp yine 'azm-i diyâr-ı aslî kılup gelmiş. Hâlâ ze'âmete mutasarrıfdir. Bi't-tab' dervîş-nihâd ve tabî'at-ı şî'riyyesi hudâ-dâddur. Eş'âr-ı dil-keşi hûb ve güftâr-ı bî-gıışşı mergûb bir mertebede ki Yûsuf-sûret olan hûblarun vird-i zebânı ve Ya'kub-sıfât olan 'uşşâkun mûnis-i cânı olmuş. Cümlesinden bir nice matla' u beyt-i rengîn anlarundur tahrîr olundu. Ebyât :

Agyâr-ı kîne-h'âh ile seyrâne gitme hiç
Gel gör ki n'oldı Yûsuf'a yabane gitme hiç

Diğer : Hâk-i tenümi yile virüp râh-ı yârda
Bir toz koparmayınca koman rûzgârda

Diğer : Mey-i telh içdim idi çâre sanup derd ü gama
Yârsız olduğuçün acısı çıkdı depeme

Diğer : Degdün ol zülf-i 'anber-efşâne
Erre-i 'ömr imişsin ey şâne

Diğer : Hat-ı ser-sebz ile ey hûblarun mümtâzı
Ruhun ol lâleye benzer ki ola pervâzı

Diğer : Kemâl-i kudret-i hakk ile bir yürür ölüyün
Meded ölüyorım ben kuluna bir çâre gerek

HÜSREVÎ: Bursa kurbünde bir kasabadandır. Zümre-i mülâzimînden dervîş-sıfât ve âdemî-hılkat beyne'l-akrân hûb ve nezd-i ehl-i 'irfân mütâla'ası mergûbdur. Hadd-ı zâtında 'âşık-pîşe ve râst-endîşe kimsedür. Kuvvet-i tab'-ı güher-fezâsı bu eş'âr-ı dil-küşâsından mübeyyen ü rûşendür Nazm :

Hüsnüne rûh-ı musavver lebüne can dirler
La'l-i cân-bahşun içün çeşme-i hayvan dirler

Ehl-i hikmet anıcak leblerün ey rûh-ı revân
Biri 'İsî-i zamân birine Lokmân dirler

Nazm idelden berü evsâfunı ey hüsn-i hasen
Cümle vassâf-ı cihan Hüsrev'e Hassân dirler

Diğer: Bir dem ölürüz varmaz isek kûy-ı nigâre
Bilmem nic'olur hâlimüz ey dil vara vara

HIZRÎ: İstanbul kurbünde olan Yenihisâr'dandır. Mezkûr Hızrî 'ilme meşgûl iken rûzgâr-ı dîn-perverden hoş nûd olmayup kahr ile dânişmendlik tarîkından geçüp diyâr-ı Şam'da yeniçeri bölüğüne cûyân-ı âb-ı hayât gibi cân atup bir mikdâr zamân lisân-ı 'Arab'a râgıb u tâlib olup tekellümüne müdâvemet-i küllî göstermiş ve bi't-tab' kâbil-i vücûd olduğuçün bir

derecede taklîd sûretiyle mukayyed imiş ki asla ebnâ-yı ‘Arab’dan teşhîs ü temyîz olunmazdı. ‘Âkıbet ol diyârda ol nîkû-fercâm çok ârâm itmeyüp Rûm’a ‘avdet idüp gelmiş. Ol vechile pesendîde-i hâs u ‘âm olmuş. Ol zamânda İstanbul’da iki meze-i rûzgâr ve her birisi bir lakabla nâmdâr ahâveyn var imiş. ‘Ârifîn-i cihân ve hoş -tab’ân-ı zamân birine boza-hâne kocı ve birine kepek dânesi dirlerdi. Sâbıkû’z-zikr anların hakkında hezl tarîkıyle bir kıt’a derc itmişdür ki mezeden hâlî degüldür. Kıt’a :

Oldı şehr içre çün ser-i zurefâ
Boza-hâne kocı kepek dânesi

Ya İlâhî buları eşhâsa
Meze içün togurdı mı ânesi

Bu makta’ı dahi hayli âbdâr vâkı’ olmuşdur.

Hızrî âb-ı hayâtı ey ‘aynum
Lebleründen kinâyet eyler imiş

HALÎLÎ-İ ‘Acem: Kazvinî’dür lâkin müddet-i medîddür ki ticâret tarîkıyla terk-i diyâr idüp geşt ü güzâr-ı memâlik-i Rûm ve hıdmet-i ashâb-ı ‘ulûm kılup âhir şehr-i Haleb’de tavattun itmişdür. Hâtır-ı ‘âtır tarz-ı mu’ammâya mâylı olmanın tahsîl ü tekmîl kılmışdur şöyle ki her mu’ammâ-yı dil-küşâsı makbûl-i merdüm-i efâzıl olmuşdur. Hâlâ peyrev-i Mîr Hüseyin olup anların risâlesine göre bir risâle-i garrâ tertîb itmededür. Zîrâ ki dört beş yüz mu’ammâya kâdirdür ki her birinün ‘akl-ı ‘ukde-küşâ terkîb ü tahlîlinde kâsır olması mukarrer ve pesend-i erbâb-ı hünerdür. Bu bir iki mu’ammâ-yı şâhâne kalem-i dü-zebâne gelüp ‘arz olunur. El-hak diyâr-ı ‘Arab’da yârân-ı ‘Acem içre misl-i nâdir ve mu’ammâ fenninde sâhirdür ve bu mu’ammâlar anundur ki sebt olundu. Be ism-i Âdem

Çün zülf-i tu dîd reft dil ez ber-i mâ
Dâdîm be-zülf-i tu dil ey dilber-i mâ ²⁵¹

Dil ez ser-i mâ guzeşt ü mâ ser-i dil
Mârâ ser-i dil ne-mând u dil râ ser-i mâ ²⁵²

ve lehu mu’ammâ Be ism-i ‘Alî

Gird-i kûy-ı sâkî-yi kevser be-ser gerdîdeem
Tûtyâ ez hâk-i pâyeş kerde bîhad dîdeem ²⁵³

ve lehu mu’ammâ Be ism-i Emrî

Hâhî ki pest sâzî la’l-i girân-bahâ râ
Leb râ guşâ vü be-nümâ dür ez dehân-ı tu yârâ ²⁵⁴

²⁵¹ -Gönlümüz senin zülfünü görünce bizden çıkıp gitti. Ey dilberimiz, senin zülfüne gönül verdik.

²⁵² -Gönül bizden geçti, biz gönülden geçtik. Bizim gönülle ilgimiz kalmadı, gönlün de bizimle.

²⁵³ -Kevser sahibinin mahallesinin etrafını başımızla dolaştık; ayağının tozundan gözüne sürme yapmış sayısız kimse gördük.

HÂVERÎ-İ ‘Acem: Sultâniyye’ dendür. Yâr-ı latîf ve merd-i zarîf hoş -tab’ u nîk-sohbet ve ‘arsa-i şatranç u neddde esb-i fikri haylî cevalâna kâdir ve vâdî-i nazmda bedihe dimege hâzırdur. Egerçi nesne okımamış ‘âmî kimesnedür ammâ letâyif-i hâsı mezkûr ve ol pür-hurdedân otuz yıldur diyâr-ı Rûm’da hem-nîşîn-i ehl-i ‘irfân olup şu’arâ-yı Rûm ile hem-dem ve Rûm’a gelen zurafâ-yı ‘Acem ile mahrem geçinüp eş’ârlarından ve güftâr-ı dürer-bârlarından bahş alup ve her birinün keyfiyyet-i hâline vâkıf u âgâh ve her birine bir dürlü latîfe ile bir lakab-ı dil-hâh komışdur. El-kıssa herkesi mezelemekten hâlî degüldür. Nefsinde kendü dahi etvâr-ı ‘acîbe ve evzâ’-ı garîbe ile herkesün mezesi olmışdur. El-hak şu’arâ-yı mütekaddimîn ve müteahhirînün ser-güzeştleriyle eş’ârların ezberlemişdür. Esnâ-yı musâhabetde muhîl-hân oldugı ecilden ben anı tezkîre-i erbâb-ı ‘irfân dimişin. Kâr u bâr-ı garîbinden ve güftâr-ı dil-firîbinden bir mertebede hazz olunur ki tahrîr ü takrîr olmak mümkün degüldür. Bu bir iki matla’-ı Fârisî anundur. Nazm

Dârem zi intizâr-ı tu ey serv-i sîmber
Pâyî derûn-ı hâne vü pâyi birûn-ı der ²⁵⁵

Hasret-i la’l-i tu hûn der ciger âvurd merâ
Ber ruh ez her muje yâkût-ı ter âvurd merâ ²⁵⁶

HULÛSÎ: Talebe tâifesinden ve Üsküb cânibinden Yenibâzâr nam kasabadandır. Zât-ı pür-hünerinde kâbiliyyetden eser olmagla ‘ulûm-ı ‘Arabî’ye meyl idüp tahsîlde vücûd-ı nâkısın tekâmül itmege şehir-i İslâmbol’a gelüp okumaga meşgûl olup fahrü’l-’ulemâ-yı mufahhirîn Bostan-zâde Efendi ki pâdişâh-ı sa’âdet-encâmın Anatolî kâdî ‘askeridür hıdmetlerine ihtisâs-ı hâlis hâsıl iden dânişmendlerden olup diyâr-ı Bagdâd’a kısmet-i hıdmeti ki beyne’l-hâsü’l-’âm kassâm diyü benâmdur. Fikr-i bikrilerinden zuhûr bulan eş’ârı ihâm-ı tâm ile tamâm ‘ayâr ve elmâs-ı tefekkürle süfte olan gevherleri ser-rişte-i hayâl-i muntazam olup suheni zer-i hâlis gibi sâf ü pâkdür. Bu bir nice ebyât-ı sûz-nâk anlarındur. Şi’r :

Şiddetle bâd-ı âhum çok esdi gerçi ey dil
Olmadı bana bir dem ol nev-nihâl mâyıl

Can virmedin dilermiş sayd itmek ol hümâyı
Tüy Hakları mı sandı anı rakîb-i bâtıl

Takınup ey Hulûsî şimşîr-i gamzesini
Bizi yaraklanurmuş katl itmege o kâtil

Diğer : Çeşm-i a’âdan hazer kıl gülsitânda her zamân
Turma gel can bostanda bitmez ey serv-i revân
Görinen sanma şu’â ey dil felekde her seher

²⁵⁴ Kıymetli yakutu değersiz kılmak istersen ey yar, dudağını açıp ağzındaki inciye göster.

²⁵⁵ Ey gümüş göğüslü servi, seni beklemek yüzünden bir ayağım evin içinde, bir ayağım kapının dışındadır.

²⁵⁶ Senin al dudağının hasreti ciğerime kan doldurdu. Her kirpigimden yüzüme taze yakut getirdi.

Tîr-i âh-ı âteşînüm cem' ider imiş cihân

Diğer : Kapusunda dikilür çeşm-i rakîb
Mih-i neccâr ile mi kakdı habîb

İskender Paşa oğlu Basra beglerbegisi Ahmed Paşa vâsfında bir kasîde-i has dimişdür. Ta'rif-i şems-i cihân-efrûz bir iki beyt-i musanna'-endûz anlarundur. Nazm:

Bâmdan vakt-i seher uçdı 'asâfir-i nücûm
Çıkdı şâhîn-i ufuk çu nûk açup zerrîn-per

Âsmân üzre kevâkıb gice bahrîleridür
Bâz-ı mihri göricek taldılar âba yekser

Bu kıt'a dahi mumâ 'ileyh paşa medhindedür yazıldı. Nazm:

Menba'-ı ref'et ü Mahmûd-hisâl Ahmed nâm
Ma'den-i lutf-ı kerem Dâver-i pâkize-güher

Gördi 'âlim pederün sende 'uluvv-i şânın
Oldun ey pâk-güher âyîne-i İskender

HÂDİMÎ: Bagdâd'dandur. Abâ vü ecdâdı Bagdâd'da asûde olan Hazret-i Kanber 'Alî'nün âsitân-ı felek-âşiyânında hâdim ve hem-nîşîn-i erbâb-ı mekârimdürler. Binâen 'alâ-zâlik sâbıkü'z-zikr Pîr-zâde Hasan dimekle havass u 'avâm içre meşhûr ve ma'lûm-ı nezdik ü dûrdur ve 'ilm-i rıfkdan habîr ve musâhabeti dil-pezîr üslûb-ı gazelde yârân gibi sâhib-edâ ve makbûl-i yârân-ı nûkte-ârâ. Bu bir nice nazm-ı sûznâk ol yâr-ı bî-bâkündür. Şi'r :

Ez ân der serem râ peyveste sevdâ-yı sefer bâşed
Ki meyl-i hûb-rûyân bâ garîbân bişter bâşed ²⁵⁷

Ne şeved kâm-ı dilem hîç be-dil-h'âh ez tu
Çi konem bîş ki feryâd berem ez âh ez tu ²⁵⁸

Rakîbân va'de-i katlem dehend ü men serâsîme
Be-gird-i kûy-i ân bî-rahm hestem tâ pîş âyed ²⁵⁹

Diğer: Sevdâ-yı ser-i zülfün dîvânesidür gönlüm
Şem'-i meh-i ruhsârun pervânesidür gönlüm

HUMÂRÎ: Karaamid'dendür. Evân-ı cevânîde ârzûmend-i ma'ânî olup rûz ü şeb hıdmet-i şu'arâ-yı rûzgâr ve 'âşık-ı hûb-rûyân-ı şîve-kâr olup husûsâ ol yâr-ı nîkû-nijâd Mevlânâ Halîfe'nün tilmizlerinden ta'dâd olunur. Tab'-ı şûhî nazm cânibine gereği gibi mâyl ve mazmûn-ı gün-â-gün bulmaga peyrev-i erbâb-ı dil olup hayfâ ki hemîşe lâf ü güzâfı bî-hadd

²⁵⁷ Başımda hep o kapıdan gitme sevdası vardır; çünkü güzellerin gariplere meyli çoktur.

²⁵⁸ Gönlüm senden arzuladığına hiç kavuşamadı, senin elinden feryat edip ah çekmekten başka ne yapayım?

²⁵⁹ Rakipler katlimi vadederler, ben ise o acımasızın mekanının etrafında ne olacak diye dolaşırım.

el-kıssa suhen-cebîni beddûr zîrâ ki yârânı birbirine nifâk itmede bî-misl ü tâkdur. Bu bir nice ebyât-ı mestâne ki vasf-ı çeşm-i mahmûrân-ı zamânedür kalem-i dü zebâne gelüp nakş u nigâr olup anlardan yâdigâr kalmışdur. Ekser-i zamân dil-berân-ı cihânun nergis-misâl h'âb-âlûde-i çeşm-i humârın vasf itmede mest ve hem-dem-i yârân-ı mey-perest ve sohbet-i ferah-bahş ile letâyife kâdir ve esâlib-i nazmda şâ'ir-i sâhirdür. Bu beytler anlarundur. Nazm :

Şol kadar medh-i cemâlün eyledüm gülşende kim
Bülbülü şâh-ı gül üzre aldı bu hayretle h'âb

Diğer : Bulmadı bûy-ı vefâdan bir eser zülfünde
Nîce yıldur ki bu sevdâda yeler bâd-ı sabâ

Diğer : Sîneye bir kez gelür mi diyü gamzen okları
Ey kemân ebrû budur şeb tâ seher dilden geçen

Diğer : Nergis-i mestün görüp hacletden egdi başını
Sanma eyler sebzeye her lahza âhû ser-fürû'

Diğer : Meger firdevs-i kûyunda görüpdür kadd ü bâlânı
Ki ref' itmez kıyâmet kopsa başın şermden tûbâ

HANDÂN: Cevân-ı hande-rû ve dervîş-i küşâde-ebrû Buhârâyî 'âlem-i şebâbdan berü maksûdın arayu âheng-i Hicâz ile vilâyet-i 'Acem'de gâh Nişâbûr ve gâh Isfahân'a revâne olup geşt ü güzâr tarîkıyla ravza-i Resûlullâh'a ve tavâf-ı Ka'be-i şerîf ile müşerref oldukdan sonra diyâr-ı Rûm'u ve temâşâ-yı her merzbûm ârzû kılup cüst ü cûy ile bî-ser ü pâ girdbâd-âsâ her tarâfa cevelân idüp âbdâlân-ı zamân içre nîce eyyâm-ı zindegânî ve dervîşân ile kâmrân olmağa terk-i kuyûd-ı 'âlem-i fânî ve vâreste-i iklim-i cismânî olmağı özleyüp sergerdân-ı vâdî-i belâ ve ser-geşte-i sahrâ-yı Kerbelâ olup su gibi ol âsitân-ı pâke yüzler sürüp müddet-i medîddür ki ol dergâh-ı felek-bârgâha mücâvirdür ve hemîşe yârân-ı safâ ile şu'âra-yı nîk edâ ile musâhabet idüp ümerâ-yı 'âlî-mikdârdan i'tibâr bulmuşdur. İki zebân ile şi're kâdir ve erbâb-ı nazma cevâb dimede hâzırdur. Bu eş'âr-ı dürer-bâr anlarundur tahrîr olundı. Ebyât

Ber ser-i kûy-i bütân her dem temâşâyet hest
Enderân kû bâ rakîban ceng ü gavgâyet hest ²⁶⁰

Diğer : Şu'le-i nâr-ı Ene'l-Hak'dan toludur sînemüz
Gayr nakşından müberrâdur dil-i bî-kînemüz

Diğer : Pes ki çekdüm derd ü mihnet firkat-i dildârdan
Göklere çıkdı duhânum sîne-i efkârdan

Nâle döndi cism-i Handân câna yetdi dost lar
Mihnet -i eyyâm u ta'n-ı bî-hadd-i agyârdan

²⁶⁰ Putların (güzellerin) mahallinde her an seni temaşa ederler. O mahalde senin için savaşılar, kavga edilir.

Fî hurûfî'd-dâl

DÂNİŞÎ Efendi: Kayseriyye'dendür. Süleymânegî-zâde Pîrî Çelebi demekle meşhûr ve makbûl-i tabâyî'-i cumhûrdur. Şâ'ir-i zarîf ve yâr-ı latîf kemâl-i fazl ile ârâste ve 'ulûm-ı 'Arabiyye'de zâtı ma'lûmât ile pîrâstedür. Hadd-ı zâtında âdemî-hılkat ve nîkû-sîret şöyle ki ahlâk-ı hamîde ile yegâne-i âfâk ve zihn-i pâki dâniş-i şî'r ile beyne'l-akrân tâk ve zebân-ı Fûrs'e ve hatt-ı nesh-ta'lîka cân u dilden ârzûmend ü müştâk sehâvet-i bî-gâyeti bir mertebede ki bi'z-zarûr otuz akçe medreseden ferâgat idüp kazâyâ râzı olup vilâyet-i Mısır'da seksen akçe kâdî oldu. Ol esnâda 'Arab-zâde demekle ma'rûf ve zühd ü takvâ ile mevsûf olan Mısır kâdîsı ile bî-vakt keştîye girüp mevsim-i bahârdur diyü bahr-i bî-pâyâne düşüp Mısır'a revâne oldu. Ol demde bir gazel-i âbdâr dimiş üç beyti hasb-i hâl-i dil-i zâr olmagın nakş u nigâr oldu. Nazm :

Dil uzadursa yaşuma deryâ kenârda
Âhum çok oynadur anı bu rûzgârda

Bu âh-ı âteşîn ile deryâ-yı gamda dil
Bir keştîdür ki bahre salupdur yanârda

Tek devlet-i visâli ele girsün ol şehün
Mansıb olursa Dânişî olsun kenârda

Meşhûrdur ki 'Arab-zâde-i mezkûr Şeyh İbrâhim tarîkına münkir olup Mısır'a giderken Gelibolı'da olan şeyhün müridlerinden Za'îfî'nün tekyesini harâb idüp dânişmendlerine dir imiş ki Mısır'a vardukda Gülşenî'nün tekyesin ve dervîşlerin yir yüzinden ref' ü kal' itmek borcum olsun diyü kelimât itmiş. İttifâken ol gün Cum'a günü olup mezbûr şeyhün cânîşini olan oğlu Ahmed Efendi bu sözi remz ile bilüp esnâ-yı va'zda söyler ki ey müselmânlar üzerimize bir kara bulut gelmektedir. Himmet eylen ki bâd-ı âh-ı fakr ile ol ebr def' ola ve bu du'âyı iderler. Hemân lahza didikleri gibi olup âhirü'l-emr keştî-i vücûdları ol seferde deryâya müstagrak olup sâhil-i maksûda vâsıl olmadı **İnnâ lillahi ve innâ ileyhi râci'ûn** ²⁶¹ El-hak ol nâ-murâd-ı pâk-i'tikâd ziyâde 'âşık- pîşe ve nîkû-nihâd kimse idi. Eş'âr-ı sûznâki hûb ve güftâr-ı âbdâr-ı pâki mergûb ve pesendîde-i zurefâ-yı 'âlem ve gamzedâ-yı dil-i pür-gam idi. Ehl-i dâniş yanında rûşen ü mübeyyendür. Bu bir nîce matla'-ı şâhâne ki hasb-i hâl-i bende-i ferzânedür anundur Ebyât :

Lebiyle söyleşemez sen şeh-i suhendânun²⁶²
Hemân agızlıgidur gonce-i gülsitânun

Diğer: La'linün 'âşık-ı hûnîn dilidür câm-ı şarâb

²⁶¹ (O sabredenler, kendilerine bir bela geldiği zaman) Biz Allah'ın kullarıyız ve biz ona döneceğiz derler. (Kur'an 2/ 156)

²⁶² Nazîre-i Keşfî Beg:

Lebine öyküne mi sen şeh-i suhendânun
Ki ağzı var dili yok gonce-i gülistânun

Başlardur yüreginde görinen sanma habâb

Nukl-i la'lünsüz efendi bu gice meclisde
Ehl-i şevk içre 'aceb bî-meze düşdi mey-i nâb

Diğer : Çihreye yaş akıdup yollar idelden gözimüz
Hâlimüz aglamaga doymadı yâre yüzimüz

Kâmeti halka teni zerd olanı unutma
Kulagunda küpe olsun senün ey gül sözimüz

Diğer : Sarılmak va'de itmiş gerçi bir destâre agyâra
Alup nâzüklük ile anı mestâne tolandırmış

Diğer : Olıcak tîr-i belâ kavs-i kazâdan nâzil
Başını 'âşık-ı miskînün ider ser-menzil

DERVÎŞ Çelebi: İstanbullı'dur. Asl u neseble dervîş-nihâd ve pâkize-nijâd kimesnedür. Mukaddemâ dergâh-ı mu'allâ yeniçerilerinden idi. Zâtı kâbil olmanın ol yâr-ı dil-efrûz şeb ü rûz 'ulûma müdâvemet gösterüp meleke-i rasîhe peydâ kılup dânişmend olan yârân içre mülâzım olmuş. Giderek otuz akçe medreseye mutasarrıf iken hüsn-i ihtiyârıyla ferâgat idüp dîvân-ı hümayûn kitâbetine mâyil ü râgıb olmuş. Elân ol ûmûr-ı 'âlîye inkıyâd üzredür. Tabî'at-ı şî'riyyesi hûb ve tarz-ı inşâsı mergûb idüğine söz yok. Zîrâ ki eş'âr-ı dürer-bârı ziyâde çok vâkı' olmuşdur. Bu bir nice beyt kendinün zâde-i tab'ı olmanın sebt olundu. Nazar-bâz olan ehl-i dil-i yârâna garaz 'arz olunmakdur ki vâsf-ı hâl-i dil-i nâlân u dîde-i giryândur. Gazel :

Derd ile hûnâb hem bî-h'âbdur gönlüm gözüm
Hicr ile nâ-yâb u hem pür-âbdur gönlüm gözüm

Bahr-ı hırmâne düşelden vâdî-i hicrândan
Garka-i girdâb u pür-seyl-âbdur gönlüm gözüm

Akıdur sîm-i sirişküm çihre-i zer-gûndan
Gûyiyâ tîz âb ya sîm-âbdur gönlüm gözüm

Bâg-ı kûyun devr idüp nâlân olup yaşlar döker
Sanasın dolab ya mîzâbdur gönlüm gözüm

DU'ÂYÎ: Hamid İli sancagındandır. Vâlid-i büzürg-vârı erbâb-ı timârdandır. 'Âlem-i şebâbda her fenden behreyâb olup pâ-yi taht-ı şâh-ı cihânı özleyüp İslâmbol'a gelüp ehl-i dîvân içre makbûl olup ol diyârda makam tutup cem'iiyet-i hâtır ile ârâm kılup hıdemât-ı sâhibân-ı 'izz ü ihtişâma ikdâm gösterüp ağır ze'âmet ile kâm-bîn ve kânûn-dân-ı güzîn olup dergâh-ı 'âlî çavuşları silkine münselik olmuşlar. Hadd-ı zâtında merd-i suhen-güzâr ve a'yân u akrân içre nâmdâr-ı hûb-şî'âr olmagla mezkûr çavuşlar zümresine du'âcı nasb olup binâen 'alâ hazâ ol yâr-ı bî-hemtâ Du'âyî tahallüs ihtiyâr idüp meşhûr-ı ehl-i nigâr olmuşdur. Tabî'at-ı şî'riyyesi nezâket ve sözden hâli olmamagın ekser-i nazmı 'uşşâk-ı zârun hasb-i hâlidür. Bu bir nice matla' u beyt anundur. Nazm :

Zebânumdan çıkar ansız bir âteş câna kâr eyler
Ne bildüm cevri-i dil-berdür ne bildüm rûzgâr eyler

Diğer : Nâle-i ‘uşşâkı gûş eyler terahhum eylemez
Gönli ol miskîn dilün yâ Rabbi mermerden midür

Diğer : Yine etrâf-ı hüsnünde misâl-i bî-misâlün var
Gülistânun kenârında şebistân-ı hayâlün var

Diğer : Kaddün görelî mekteb-i gülşende turup serv
Salınmagı ta’lim ider etfâle nihâlî

DERÛNÎ: Magnisa’dandur. Erbâb-ı sâz ü tarâb zümresindendir. Şâh-zâde-i cevân-baht-ı kâmrânun bârgâh-ı âsmân-ı âsitânelerinde rûz u şeb ‘ayş u nûş ile şâd-mân kimsedir. Sazlarda kopuza mûmâreseti dil-pezi ve nakş u türki tasnifinde bî-nazîr ve pesendide-i büzürg ü kûçek ya’nî pîr ü cevân ve ser-âmed-i muganniyan-ı devrândur. Zihn-i pâki tarab-engîz ü mesel-âmîzdür. Bir mertebede ki Bahâriyye diyü gemiciler ıstılâhâtın cem’ idüp gülbîn-i gülistân-ı hüner ve nihâl-i bostân-ı heft-kışver olan şâh-zâde-i bahr u berrün a’nî Sultân Selîm Hân-ı dilâverün evsâf-ı pâkinde elfâz-ı sâf ile bir kasîde-i âbdâr mânend-i nihâl-i mîvedâr neşv ü nemâ buldurmış meşhûr-ı rûzgâr ve makbûl-i dil-i ebrâr olmuştur. Bu bir kaç beyt kasîde-i mezkûrdan nakş u nigâr oldı. Nazm :

Eşk-i çeşmüm gibi etrâf-ı gülistanda akan
Dûd-ı âhum durur ol kulle-i kuhsâre çıkan

Kıbleden döğdi esüp bâd-ı nesîm-i kudret
Başladı itdi temevvüc yine deryâ-yı çemen

Câ-be-câ yelken açup çıkdı açıldı ezhâr
Sanki deryâ-yı sefid oldı fezâ-yı gülşen

Katına dakdı ayagina çenârun cûlar
Sebze-zâr-ı çemeni forsa gibi sandı gören

Çıkdı tûğın çeküben gâzi donanmacı gibi
Dil getürdi nazar-ı şâh-ı bahâra süsen

Gül-i ter çünki re’is oldı kamu ezhâra
Dakdı yanına anun hançer-i dil-dûz-ı diken

Serv bir hûb direk dikdi turup anda revân
Yâsemenler anun etrâfına bağladı resen

Gönlüne çıkdı meger düşmene tuş oldı gözi
Âşiyânında ider bülbülü gördüm şiven

Bizi çignetdiye çignetdi hevâ-yı kaddün

Karaya atdı gam-ı zülfün ile keştî-i ten

DERÛNÎ: ‘Abdullah oğludur. Dergâh-ı mu’allâ yeniçerilerinden idi. Ber-mûcib-i emr-i ‘âlî diyâr-ı Bagdâd’da ehl-i timâr olan sipâha ilhak olup deftere kayd olmuş sene ihdâ hamsinde. Egerçi nefsinde dervîş-nijâd ve bî-kayd u nâ-murâd kimse idi. Ol zamânda Bagdâd şu’ârası Mevlânâ Fuzûlî ve Mevlânâ Şemsî’ye irişüp zamîr-i rûşen ve tab’-ı cebînini gün gibi cilâladup her nesneyi istifâde idüp dâimâ nezâyir dimeden hâlî olmaz idi. Feemmâ rûz u şeb zebân-ı Fârisî mûmâresetine sâlik ve bir mikdâr tekellümine mâlik olmuş idi. Sene tis’â ve sittîn ve tis’â mi’ede fevt oldu. Eş’âr-ı dürer-bârî ‘anber-âmîz ve kalem-i müşk-bîzle dil-âvîz idi. Cümlesinden bir matla’ sebt olundu. Matla’ :

Bir ‘arak-çin tolu miske dime gîsûdur bu
Dil-i sevdâ-zedenün başına kaygudur bu

DERÛNÎ: Vardar Yenicesi’nden ehl-i kalem zümresinden ve bu devrün zurafâ ve şu’arâsındandır. Bi’t-tab’ dervîş-meşreb ve pâk-mezheb kimesnedür ve Hayretî’nün birâderi olan Sîne-çâk’ün bî-bâk perverdelerindendir. Hâlâ rûz u şeb cânib-i nazma derûn-ı dilden mâyıl ve Fûrs bilmede yârân-ı Fârisîdan gibi kâmindür. Tabî’at-ı nazmiyyesi nîkdür bed degül. Bu bir nice beyt anundur. Nazm :

Ger bileydün kıymetin ol müşk-bû sünbüllerün
Âteş üstine salar mıydun siyeh kâküllerün

Diğer : ‘İşkun sipâhına olalı dil konak yiri
Dâg-ı gamun tenümde olupdur ocak yiri

Terkitse mâl ü mülki Derûnî ‘aceb degül
Külhanda dahi bulmıya mı bir yatak yiri

Mezkûr zamân ile bir cevân-ı nâ-mihribâna ‘âşık-ı nâ-tüvân iken bir meclisde şeytan lakabla şöhrat bulmuş bir rakîb-i dîv-sîret dil-berine bâde-i nâb sundukda ‘alâ-vechi’l-’itâb bu beyti bedîhe dimiş ol agyâr-ı zîşt-kirdânun gûrlığına Beyt

Sâkiyâ öpme rakîbün ayagın eyle şikest
Âdem oldur ki sıya kasd ile şeytân ayagın

Fî-harfi’z-zâl

ZÂTÎ: Balıkesrevî’dür. Şâ’ir-i metîn ü şîrîn-makâl ve sâhir-i sihr-âferîn ‘ilm-i nücûm ile remilden habîr ü zamîr-dân-ı bî-misâl ammâ kevkeb-i tâlî’i dâim nühûsetle zevâlden ve ihtirâk-ı kûsûf ü husûf-ı pür-melâlden kurtulup sa’de ırmemişdür lâkin eş’âr-ı âbdârı teskîn-sâz-ı dil-i ‘âşıkân-ı sûznâk ve güftâr-ı âteş-bârı harâret-bahş-ı füsûrde-i dilân-ı gamnâkdür. El-hak gurer-i mazmûn-ı meşhûn-ı rengîn ile ferîd ya’nî hallâk-ı ma’ânîdür ve dürr-i meknûn-ı gûn-â-gûn-ı semîn ile ‘Abdullah-ı Mervârîd a’nî tevâmân-ı Sayrafî ve Beyânî nice müddet melikü’ş-şu’arâ-yı rûzgâr ve üstâd-ı şîrîn-kâr diyü nâmdâr idi. Silk-i nazma münselik olan

cevâhirün her birisi dürr-i sır-âb iken hâl-i hayâtında cevher-yân-ı bâzâr-ı ‘itâb ve ma’ânî-dân-ı hâzır-cevâb yanında kıymeti olmadığı ecilden bu beyti hüve’l-vâkı’ diyü nass-ı katı’ gibi buyurmuşlardır. Beyt :

Şimdi eş’âruna Zâtî n’ola ragbet yog ise
Her biri sen ölicez dürr-i yetîm olsa gerek

hakkâ budur ki ol pîr-i suhenverân-ı zamân ve ol bî-nazîr-i nükte-dânân-ı cihân müsellemler-i ehl-i zamândur. Hadd-ı zâtında eş’âr-ı dil-firîbi ve güftâr-ı garîbi bir mertebede pâk ü latîf ve bir derecede zarîf ü ferah-nâkdür ki ‘âşıkân-ı zamân ve ‘ârifân-ı cihân hasb-i hâl bilüp vird-i zebân idinüp subha-misâl elden düşürmezler. Bu bir kaç metâlî’-i âbdâr ol şâ’ir-i mezkûrundur mestûr olundu. Ebyât

Murg-ı zerrîn-per zümür-rûd-âşiyân lü’lü’-gıdâ
Bâl açup uçmak diler her subh kûyundan yana

Diğer : Kâmetün ey bustân-ı lâ-mekân pîrâyesi
Nûrdan bir servdür düşmez zemîne sâyesi

Diğer: Seni ol at ki ey server-i hûbân götürür
Ey meded kıyma anı sürme yazuk cân götürür

Diğer : Dilber sunaydı destini devlet vireydi el
Çirkin yüzümü ana süreydüm güzel güzel

Diğer : Düşdüm nişân-ı pâ-yi seg-i dil-ber üstine
Ol gonce gördi didi yüzün güller üstine

Diğer : Beni kurbanun idin çalma bıçagun ganeme
Ne bilür yoluna can virmegi ol bir meleme

Diğer : Dâimâ ayaguna düşer yürür dil dost um
Ol garîbe düşdügünce merhamet kıl dost um

Diğer : Şebdîz-i hatt-ı dil-ber tozup tozup gelelden
Gülgûn-ı eşk-i ‘âşık tutup dütüp yenilmez

Diğer : Didüm ey dost rakîbi bana göster kerem it
Nâz ile ol gözümün nûrı eyitdi gözi yok

Diğer : Ey boyı serv-i sehi zülfeynün iki dâldür
Yata yata ‘ârızun âbında olmuş âbnûs

Diğer : ‘İlm-i ihfâda belün agzun ile eyledi bahs
Hiç agzun belüne virmedi bir zerre vücûd

Diğer : Bakdukca yüzlerine tutarlar ellerini
Yüz tutdılar cefâyâ feryâd ellerinden

Diğer : ‘Adû-yı zâg elinden bir tezerv-i şîve-kâr oldum

Dahi ben şâh-bâz-ı ‘ışk olaldan bir şikâr oldum

Diğer: Şîşe-i hicr olsa yirüm n’ola mânend-i gülâb
Ey felek bir tâze ter gülden çıkardun sen beni

Diğer: Ey ‘andelib âh u figândan ne fâ’ide
Verdün kulagın eyledi âb-ı gurur berk

Mezkûrun eş’âr-ı âbdârı ziyâde bî-şümârdur bu gazel-i bî-bedel ile ihtisâr olundu. Gazel :

N’oldun inlersin felek her-câyî cânânun mı var
Her makâmı seyr ider bir mâh-ı tâbânun mı var

Benzüni ey bûstan bâd-ı hazan mı itdi zerd
Yohsa başı taşra bir serv-i hırâmânun mı var

Aglayup feryâd idersin her seher ey ‘andelib
Hâr ile hem-sâye olmuş verd-i hândânun mı var

Yoluna cânun revân itsem gerek cânâ didüm
Yüzüme bin hışm ile bakdı didi cânun mı var

Zülf-i dil-ber gibi ey Zâtî perîşansın yine
Cevri bî-hadd yohsa bir yâr-ı perîşânun mı var

ZİHNÎ: Bagdâdî’dür. İsm-i şerîfî ‘Abdü’ d-delîl ve hüsn-i hulkı cemîldür. Evân-ı cevânîde rûz u şeb kesb-i kemâl ve mülâzemet-i erbâb-ı câh ü celâl idüp cân u dilden hıdmet-i ashâb-ı ma’rifete yüz sürüp muhibb-i erbâb-ı fazilet geçinüp ve tâlib-i tûtîyân-ı şekeristân-ı belâgat ve bende-i bülbülân-ı gülistân-ı fasâhat olup ‘ilm-i mûsikîye müdâvemet-i küllî gösterüp edâyı nakş u savtda dil-pesend ü bî-nazîr ve ol ‘ilmde üstâdân-ı zamân gibi nakş-ı türkî-bend ü yâr-ı dil-pezi ve bu devrde sazlardan kemançeye mûmâreset kılup pesend-i büzürg ü kûçek ve makbûl-i tabâyî’-i sûznâk-ı ‘uşşâk ve pişrev-i merdüm-i Hicâz u ‘Irak olmanın her kıldan çalar sâzende kısmından nagâmât-ı dil-keş ile gamzedâyı dil-i gamgîn ve ferah-bahş-ı kalb-i hazîn ve üslûb-ı eş’ârda tab’ı ma’nâ-yı latîfe kâdir ve tarz-ı inşâda zihni kelimât-ı selîs ile münşî-i sâhirdür ve hemîşe gülşen-i ‘âlemde bülbül-i hezâr-destân gibi zebân-âver ü ‘âşık-pîşe ve hûb-endîşe olduğına eş’âr-ı sûznâki delîl ve şâhid-i ma’nâ-yı bikri zîver-i hâs ile ziyâde suheni cemîldür. Hakkâ ki musâhabet-i tarab-engîzle meclis-ârâ ve nikât-ı letâyif-âmîzle sâhib-edâ kimesnedür. Bir kaç beyt anlarundur yazıldı. Nazm :

Mürîd-i dergeh-i meyhâneem mey dest-gîrim midür
Sürâhî pîr-i pür-keyfiyyet-i rûşen-zamîr midür

Diğer: Gelseler dâde bulanlar gam-ı hicrûnle memât
Tenk ol küşte-i bî-dâduna sahn-ı ‘arasât

Diğer: ‘Uşşâka sâz-kâr degüldür hevâ-yı bâg
Kûy-i belâdur anlara ser-menzil-i ferâg

Diğer: Yâdunla çekdigüm degül âh-ı şerer-feşân
Kurdum şeh-i hayâlüne zer-dûz bir otag

ZİHNÎ Beg: Mevlid-i latîfî Galata ve nâm-ı şerîfî Bâlî Çelebi demekle ma'rûf ve ahlâk-ı pesendîde ile mevsûfdur. Sultân-ı Kîtî-penâh ve Hakan-ı Cem-sipâh ya'nî şâh-zâde-i Îrân u Turân hazret-i Sultân Selîm Hân'un âsitân-ı felek-bârgâhında müteferrikadandur. Amedd-i medîd ve 'ahd-i ba'îddür ki müşârünileyh şeh-zâde-i Süleymân Han'un in'am u 'âmına mazhar düşüp matbah-ı emânetiyle sâhib-'izz ü fer kimesnedür. ve hadd-ı zâtında cevdet-i tab' ile meşhûr ve safvet-i zihn ile efvâhda mezkûr ve zât-ı pâki envâ'-ı ma'ârifle müzeyyen ve gün gibi mübeyyen olmagın zebân-ı Fûrs'den behremend ve mu'ammâ ve 'aruz bilmeden fâ'ide-mend ve hâtır-ı 'âtır-ı cânib-i şi're mâyl ve gazel ü kasîdede edâ-yı nâzûk ile pesendîde-i emâsildür. Bu bir nice matla' u beyt anundur sebt olundu. Nazm :

Mihr-i münîri benzedüp ey meh cebînüne
Çarh-ı berîn disem yiridür şeh-nîşînüne

Diğer : Yok gibi mezâkun yine ey sûfî-i bî-hûş
Acı didün içdükce bize geldi bu mey hoş

Diğer: Şâh-ı gamun ki lâle-sıfat dilde dâğı var
Hûn-ı cigerle besleme nîce çerâğı var

Kûyunda gerçi 'âşıkun ey gül hezâr var
Efgân ider benüm gibi yokdur hezâr-vâr

Diğer : Gamzen hadengi gerçi ki bagrum deler geçer
Mecrûh-ı kalbi hancerün ammâ deler geçer

Agyâr-ı kîne-h'âh geçer ise beni sabâ
İnanma sevdigüm seni zîrâ sever geçer

Diğer : Pîr-i mugâna gel bana bir kaç içür diyü
Sûfî 'asâsını tuttu virdi rızâ ile

ZÜNNÛN: Şam'dandur. Rûz ü şeb şehir-i mezbûra gelen erbâb-ı 'ulûm ve dem-be-dem şu'âra-yı 'Arab ü 'Acem ü Rûm ile ihtilât idüp ve her bir dilün edâsına irtibât virüp üç zebân ile tab'ı nazma şâmil ve âvâz-ı hazîni mergûb ve tarzı hûb olmagın nagâmât-ı dil-küşâ ve terennümât-ı rûh-efzâ ile bu devr içre 'ilm-i edvâre habîr ve nakş u savt u türki bağlamada bî-nazîr ve hadd-ı zâtında dervîş-sîret ü âdemî-hıkat olduğu ecilden Sultânü'l-'ârifîn-i rûzgâr ve muktedâ-yı din-ârâ-yı Ahmed-i Muhtâr a'nî Hazret-i Mevlânâ Hudâvendigâr'un tarîkına sâlik fukara içre **El-fakru fahrî**²⁶³ esrârına mâlik olmuş. Müddet-i medîddür ki ol dergâh-ı behîşt-bârgâhun câmi'-i latîfînde ve türbe-i şerîfînde h'ânendedür. Bu eş'âr anundur beyân olunur. Ebyât

²⁶³ Fakirlik övüncümdür (Hadis) El-Aclunî, **Keşfü'l-Hafâ**, Beyrut, 1352, C.II, s.87

Hattî ki ber ân ‘ârız-ı mehveş şod mestûr
Sübhâne kadîr cem’u’z-zulmeti ve’n-nûr ²⁶⁴

Edirlî er-râhe ve eskinî elâ yâ eyyuhe’s-sâkî
Erihnî ‘an hevânî ve eskinî min hamreti’l-bâkî ²⁶⁵

Kıt’a : Vâdî-i ‘ışk içinde bî-ser ü pâ
Bende-i hâk-i pâ-yi Mevlânâ

Zülf-i hûbânla olan meftûn
Mest ü mecnûn Mevlevî Zünnûn

ZİHNÎ: Burûsevî’dür. Mumcî-zâde Bâlî Çelebi demekle meşhûr ve beyne’l-kuzât ‘adl ile efvâhda mezkûr ve zihn-i pâkî letâyif-i latîf ile müzeyyen ve tab’-ı safâ-bahşî gün gibi rûşen ü mübeyyen ve zarâyif-i dil-pesend ile meclis-ârâ ve musâhabeti edâ-yı bülend ile şî’rinden a’lâdur. Beher hâl bu matla’-ı rindâne ol ferzâne-i zamâne eş’ârındandır. Matla’ :

Câm-ı ‘ayşum yire çaldun hâke yeksân eyledün
N’itdün ey sâkî-i devrân göz göre kan eyledün

Fî harfî’r-râ

RAHMÎ Çelebi: Bursalı’dur. Mülâzımîn zümresinden zamânla İskender Çelebi’nün meclisine irişen zurafâ-yı cihândan düşvâ-yı şîrîn-zebândandır. Tab’-ı mustakîmi ve zihn-i selîmi nazma mâyil ve esnâf-ı şî’re üstâd-ı kâmil kimesnedür. El-hak şâ’ir-i zarîf ve nedîm-i latîf ve hemîşe şu’arâ-yı rûzgârdan ve ‘urafâ-yı ‘âlî-mikdârdan ra’nâlıkla mümtâz ve a’lâlıkla ser-efrâz ve her gün gün-â-gün ve reng-â-renk libâslar ile ârâste ve envâ’-ı zîb ü zînetle pîrâste ve teshîr-i ebkâr-ı ma’ânî itmede sâhir ve her vechile aksâm-ı şî’re kâdir ‘ale’l-husûs vâdî-i mesnevîde peyrev-i Hilâlî olup **Şâh u Gedâ** rakam itmiş ve tarz-ı gazelde tevâmân-ı Hayâlî ve üslûb-ı kasîdede mânend-i İsmâ’îl-i İsfahânî belki Rûm’da Selmân-ı sâni olup taklîd-i şu’arâ-yı ‘Acem kılmış. El-hâsıl bu devrde rûzgâr-ı bed-girdâr-ı keç-reftârdan tarîkında berhûrdâr olmayan erbâb-ı ma’rifetdendür. Ol bülbül-i gülşen-i suhen ve tûtî-i şeker-şikenün eş’ârı bî-hadd ve güftârı lâ-yu’addur. Cümlesi meşhûr-ı âfâk ve hasb-i hâl-i dil-i ‘uşşâk-ı pür-iştîyâk vâkî’ olmuşdur. Bu gazel anundur. Gazel :

Ne kanlar dökdüğün ‘arz itse çeşmüm yâre âl anlar
Tenüm gamdan hilâle döndi dirsem bir hayâl anlar

Hadîs-i ‘ışkı benden sor ne bilsün zâhid-i nâdân
Rûmûzun bu mu’ammânun mücerred ehl-i hâl anlar

Fenâ bezminde cem keyfiyyetin câm-ı mahabbetden
Harâbâta düşüp şûrîde hâl olan ricâl anlar

²⁶⁴ O ay gibi yanağı örten ayva tüyleri... Sübhanallah! Karanlıkla ışık bir araya gelmiş

²⁶⁵ Ey saki beni şarapla sula, beni bu sevdadan rahata ulaştır, arta kalan şarapla sula

Vücûd-ı vâcibün mâhiyyetin idrâk iden ‘ârif
Hakikatde zuhûr-ı mümkünâtı hep zılâl anlar

Gözüm merdümünün ‘aksi düşmüşdür letâfetden
Ruhun mir’âtına nâzır olanlar anı hâl anlar

Belâ bezminde zâr olsa ‘aceb mi çeng ü ney-âsâ
Kanı bir merd-i kâbil bu cihânda kıl ü kâl anlar

Suhen bezminde Câmî’dür bilin keyfîyyet-i ‘âlem
Hayâlât-ı kelâmum Rahmî’yâ ancak Kemâl anlar

Bu bir kaç matla’ dahi anun zâde-i tab’-ı güher-sencidür bu evrâkda sebt olundu. Ebyât :

Tâc eylemiş meded o şehün hâk-i râhını
Mâhun başına oldurayın şeb-külâhını

Diğer: Tîg-ı mihnetden ki sînem zahm-nâk olmuş yatur
Hâkdür seylâb-ı gamdan çâk çâk olmuş yatur

Diğer: Cânâneyi cân görmege kasr-ı tene geldi
Göz merdümü seyrâna anı revzene geldi

Diğer : Temennâ-yı visâl itmek degüldür hûb sevmekden
Garaz bir hatt-ı rûhânî durur mahbûb sevmekden

Diğer : Bahâr oldu açıldı gonc-lebler sahn-ı gülzâre
Güle yir yok meger yapışdıram penbeyle divâre

Diğer : Vücûdum dâg-ı hûnînümle gûyâ gül nihâlidür
Ham olmuş bâr-ı gamdan kâmetüm bir serv dalıdur

Diğer : Verd-i rûyun bana bir âl itdi âlin bilmedüm
Kaşların kaddüm hilâl itdi hayâlin bilmedüm

RİZÂYÎ Efendi: Filibevî’dür. Asl u neseble memdûh-ı cumhûr ve zebân-ı pîr ü cevânda Baba Çelebi diyü mezkûr ü meşhûrdur. Sâbıkan levh-i hâtırı nükûş-ı mâsivâdan sâde olmagın ârzû-yı tarîk-ı Nakşibendî kılup maksûd-ı uhrevî için fakr ü fenâ semtine sâlik iken ber-muktezâ-yı zamâne murâdât-ı dünyevîye mâlik olmuş. Zîrâ ki pâdişâhımızun umûr-ı ‘âlîyyesine vezîr-i a’zam olan Rüstem Paşa’nun hâcesi olmuş idi hakka budur ki fûnûn-ı ma’ârifle zâtı kâmil ve ebnâ-yı zamân u ihvân-ı cihân içre ebu’l-fezâyil diyü şöhet-i tâm bulup hûb nâm olmuş. Bu bir iki beyt ol yâr-ı nîk-encâmundur. Beyt :

Kaşlarınla nâme-i hüsnün ‘aceb ‘ünvânı var
Saltanat menşûridur tigrâ-yı ‘âlî-şânı var

Diğer : Kaşun nişânı mühr-i Süleymân girih girih

Oldı berât-ı hüsnüne ‘unvân girih girih

RAHÎMÎ Beg: Kütâhiye’ dendür. Zât-ı melek-hısâli fûnûn-ı ma’ârife mâlik ve vâdî-i şî’re rahş-ı tab’ı sâlik ve aksâm-ı nazm ü nesre kâdir ve her birinde mâhirdür. Şâh-zâde-i ‘âlî-himmetün eyyâm-ı sa’âdetinde ve devâm-ı devletinde bin i’zâz ile alay beyi olup ağır ze’âmete mutasarrıfdur. Geregi gibi âdâb-ı sohbe vâkıf olmanın sa’âdetle hem-nîşîn olan şâh-zâde-i rûy-i zemînün a’nî Sultân Selîm Hân-ı güzînün meclis-i cennet-misâline irişüp ol bâb-ı murâd-bahşdan ber-murâd olup hoş -hâldür ve hadd-ı zâtında hoş sohbet ü meclis-ârâ ve vâdî-i nazmda semend-i himmeti a’lâ ve eş’âr-ı dil-pesendi pür-mesel ve edâ-yı bülendi makbûl ü bî-bedeldür. El-kıssa ma’ârif-i cüz’î ve küllîden behremend ve ebyât-ı zîbâsı makbûl-i yârân-ı hûşmenddür. Cümlesinden bir nice matla’-ı mihr-engîz kalem-i müşk-rîzle sebt olundu. Nazm :

Sâf kıl can gözgüsün sûfî ruh-ı zîbâya bak
Gör ne şekl izhâr ider ol sûret-i ra’nâyâ bak

Diğer : Sabâya çîn-i zülfün eylesen pür çîn-i sihr peydâ
İder ta Çîn ü Maçîne varınca müşk-i ter peydâ

Diğer : Dil miyânun ârzûlar can lebün eyler ümmîd
Âh kim maksûd nâ-peydâ vü maksad nâ-bedîd

Diğer : Çeşme-i dilden akar kanlu sirişküm su gibi
Dem-be-dem turmaz bulanur bir delü kanlu gibi

Diğer : Gubâr-ı hattun esrârını hayrân olmayan bilmez
Mezâk-ı nutk-ı la’lün hem-dem-i cân olmayan bilmez

Diğer : Çehrene olalı kuzgun müşteri ey yâr-ı şem’
Mihr-i ‘âlem-tâbe germiyyet satar her bâr şem’

Şâm ü magrib Hind anundur zulmete varınca tâ
‘Âleme hükm itdi şevkûnle Sikender-vâr şem’

Diğer : Bu gice gün yüzünden aldı mı eyâ ziyâ meş’al
Çerâğ-ı mâha şevk ‘arz itdi germ olup şehâ meş’al

Eş’âr-ı mütekaddiminde bunun gibi nesneyi câ’iz görmüşlerdür. Bu gazel-i pür-mesel ol şâ’ir-i bî-bedelündür. Gazel :

Zülfünle gamze bend ider oldı ugrılayın
Miskin dil mi kaldı bu sevdâ eyin beyin

Benzerse subh-ı hüsne ya haddün mehâsine
‘Asr içre dirse n’ola güneş eyle böyleyin

Cân mâcerâ-yı hicrûn ile hem-dem olalı

Gönlüm ile gözüm ortasına düşdi mâ-beyin

‘İşkun hevâsı ile geh aglar geh inlerin
Nem var benüm eser senün ortada ben neyin

Ben mübtelâyı hasret iden seyr-i hüsnüne
Eyülük yüzünü göremesin yavuzun eyin

‘Uşşâk-ı bî-nevâyâ o şeh nâza başladı
Toldurdu her makâmı yine âhun n’eyleyin

Sultân-ı mülk-i ma’rifetüm ben Rahîmi’yâ
Ammâ Selîm-i şâh-ı suhendâna bendeyin

Diğer : Vâkıf-ı esrâr-ı gaybîdür lebün candur diyen
Mûşikâf ancak dehânun genc-i pinhandur diyen

RIYÂZÎ-İ Üskübî : Zümre-i mülâziminden iken fevt olmuş. Evsâfın işitdigümüz şu’arâdandır. Bâ-vücûd ki maksad-ı maksûdına irüp ber-murâd olmadın dâimâ handân ü şâdân ve her an ‘ayş ü nûşa mu’tâd imiş. Bi’t-tab’ hoş-fehm ü hûb-sohbet ve kelimât-ı şebistân-ı hayâl semtinde muhayyel ve ebyâtı ihâm-ı tâm ile ser-â-ser pür-mesel ve şu’arâ mâbeyninde letâyifî meşhûr ve zurafâ yanında zarâyifî mezkûr bir mertebede ki cümle-i latîfeleri vird-i zebân-ı nüdemâ-yı cihân ve pesendîde-i pîr ü cevândur. Birisi budur ki latîfe dirler ki bir gün hamâma vardum gördüm hamamcı turmayup âdem soyar ve nâtur bulduğu başmagı siler ve dellak fûtâ sıkır ve müşteri tas çalar gördüm bir alay sarık alup yürüyivirdüm. Bu latîfesi ihâm-ı tâm olmanın pesend-i zurafâ-yı eyyâm olmuşdur. Müşârünileyh zebân-ı Fârisî’ye şöyle cidd ü cehd kılmış ki diyâr-ı Rûm’un her merzbûmunda makbûl-i hâs u ‘âmdur. Hayfâ ki zât-ı şerîfî ve nâm-ı latîfî rind-i lâubâli olduğu ecilden halk içinde perîşân-mezheb ve peyrev-i erbâb-ı meşreb diyü meşhûr ü mezkûrdur. Binâen ‘alâ-zâlik ol zamânda Rûm İli kâdî ‘askeri olan Çivi-zâde Efendi mevlânâ-yı mezkûre hîn-i mülâzemetde ‘alâ-vechi’l-’itâb senünçün Riyâzî kâfirdür dirler. Sana nice mansıb virelüm diyicek mukâbelesinde Sultânüm siz bir kâfir kâdîlığı ihsan eylen diyü cevâb virür. Bu latîfe sebebiyle kâdî olur. Beher hâl bu bir kaç beyt-i bî-misâl ol şâ’ir-i perîşân me’âlündür sebt oldu. Nazm :

Sâkin deşt-i belâ yirini mesken mi sanur
Rehrev-i ‘ışk o vâdîleri me’men mi sanur

Diyicek hancerüne düşerin ey dost senün
Atdı âgâz-ı ‘itâbe beni düşmen mi sanur

Eyledi mest bizi bâde-i hum-ı lâhût
Müdde’î ‘âlem-i lâhûtdaki den mi sanur(?)

Diğer : ‘Arûs-ı nev dirilme ey felek zâl-i kühensin sen
Nice dâmâda kendin râm kılmış pîre-zensin sen

Derûnun ey hum-ı mey sâf herkes zevk ider senden
‘Aceb bilsem nedendür tıynet-i pâkûn nedensin sen

Diğer: Diyeli hâl-i ‘ızârun fitne fenninde begüz
Komadı ben ‘âşık-ı dil-hastede cânâ benüz

Bahr-ı şî’ri âb-ı lutfâ gark iden kimdür disen
Dürr-i yemm-i ma’rifet şâhâ Riyâzî bendenüz

RÛHÎ: Bagdâdî’dür ammâ asl-ı pâk-nihâdî ve neseb-i ferruh-nijâdî Rûmî’dür. Zîrâ ki vâlid-i ekremi sâbıkan merhûm Sultân Süleymân zamânında vilâyet-i Bagdâd’a beglerbegi olan Ayas Paşa’nun bendelerinden olup Bagdâd’da gönüllü bölüğüne geçüp te’ehhül itmişler. Mezkûr Rûhî Bagdâd’da vücûda gelmegin Bagdâdî yâd olundu. Nâm-ı vâcibü’l-ihtirâmı ‘Osmân ve zât-ı huçeste-kirâmı pesend-i yârân ve zihn-i mustakîmi çâlâk ve kadd-i bülendi letâfet gülşeninün nâzûk-nihâli ve rûy-i ferah-bahşî ma’rifet gülzârının gül-i âli ve gülistân-ı nazmda tab’-ı nüktedânı gonce gibi zîver-i hüner ile ârâste ve bustân-ı ma’rifetde vücûd-ı latîf-i zarîfî ma’lûmât ile pîrâstedür. Rûz u şeb tetebbû’-ı eş’âr-ı şu’arâ-yı nâmdâr ve dem-be-dem peyrev-i fusahâ-yı suhen-güzâr olup yârân-ı suhen-güster ile hem-dem-i tûtî-i şîrîn-dem olup her vechile gazel dimek tab’-ı pâkine müselleme ve tabî’at-ı şî’riyyesi hûb ve ebyât-ı nâzügi mergûbdur. Ekser bu diyâra gelen dervîşân u şâ’irân-ı dil-rîşân ile eş’âr-ı dürrer-bâr ve nazm-ı belâgat-disâr dimege meşgûl ve erbâb-ı kemâl içre söyledüğü eş’âr makbûldür. Bu bir nice beyt ve gazel-i âbdâr anlarındur tahrîr oldı. Gazel :

Beni aşûfte kılan kâkûl-i ‘anber-bûdur
Getüren başuma sevdâ ol iki gîsûdur

N’ideyin baglasalar turmaz idüm ‘âlemde
Beni bend eyleyen ol turra-i ‘anber-bûdur

Sînede yârelerümle bir olup gönlüm arar
Nâvek-i gamzesi hakkâ ki ‘aceb dil-cûdur

Bakmazuz kuhl-i Sıfâhâne tolu cevher ise
Dostum hâk-i rehûnle gözümüz memlûdur

Şânelerken saçını üstüne bir mû düşmüş
Rûhi’yâ sanma miyandur görinen bir mûdur

Diğer : Gül dem-â-dem açılup olsa n’ola tâze vü ter
Bâgda bir dem anun gitmez elinden senger

Diğer : Cigerün yâreledi tîg-ı gam âh eylemedün
Âferîn ey dil-i nâlan var imiş sende yürek

Diğer: Rîşte-i dil şu kadar pür-girih olmuşdur kim
Girihin açmaga yok çâre meger pârelene

- Diğer : Mâyilüz duhter-i rez sohbetine girmez ele
Sâkiyâ hû çekelüm şâyed ayag ile gele
- Diğer : Mahabbet meclisinde sîne bir pür-sûz micmerdür
Anun üstündeki dâg-ı siyehler kurs-ı ‘anberdür
- Diğer : O sayd-efken bu gün meydân-ı ‘ışkun dil-sitânıdur
Elinde bâz sanman ben za’îfün kuşca cânıdur
- Diğer : ‘Aks-i sîb-i zekânun birle bu çeşm-i bînâ
Benzer ol şîşeye kim ola içinde elmâ

RUMÛZÎ Çelebi: Rûm İli’nde Tırhala yanından asl ile Seyyid-i ercmend ve dânişmend-i hûşmend zümresindendir. ‘Ulûm-ı zâhire ve bâtineden âgâh u fâ’idemend ‘Acem-zâde demekle meşhûr ve kemâl-i ma’rifetle efvâhda mezkûrdur. Fünûn-ı ma’ârifle ser-âmed-i akrân ve ma’lûmât-ı kesîre ile makbûl-i ‘ulemâ-yı devrân ve şî’r anlamada müsellem-i zamândur. El-hak hoş -sohbet ü tîz-fehm ve nîkû-güftâr ve kıssa-perdâz ve nûkte-güzâr ve mübâhase-i ‘ilmiyyede zebân-âver-i cihân u bî-bâk ve zebân-ı Fârisî’de hayl-i cüst ü çâlâk ve tarz-ı inşâda gereği gibi mükemmil ü kâmil ve her bir fende bî-nazîr-i emâsil ve her vadîde bir nesne hâsıl itmiş kimesnedür. Eş’ârı sûznâk ve gıll ü gışdan pâkdür egerçi tabî’at-ı şî’riyyesi batîdür feemmâ musâhabet-i dil-pezi pesendîde-i yârân ve makbûl-i tabâyi’-i ehl-i ‘irfândur. Bu bir kaç beyt ü matla’ anundur. Nazm:

Ne cevherdür ayagı tozunı ben bî-basardan sor
Ne hod nergis gibi ‘âlemde bir ehl-i nazardan sor

- Diğer : Kulunun bir başı var nesnesi yok sana yarar
Ol dahi câ’iz ise yoluna olsun yekser

Görinürse n’ola her kimseye bir sûret ile
Sâde dildür sanemâ âyîne-i hoş -manzar

Müşk-i ter deşt-i Hıtâ içre perîşânundur
Pâdişâhum ayagun tozu degül mi ‘anber

Yâr yanında yüzi suyu ile oldugı için
Ey Rümûzî yüregümde yir idüpdür hançer

- Diğer : Fasl-ı güldür yine bûlbûl gibi feryâd idelüm
Bir fasl-ı ‘ayş ü safâ bezmini bünyâd idelüm

Yolını gösterelüm ister isen meykedenün
Sûfiyâ gel seni bu ma’nâya irşâd idelüm

- Diğer : Ol hat-ı nevreste gird-’ârız-ı pür-tâbda
Sebze-i nev-hîzdür bitmiş kenâr-ı âbda

Diğer : Libâs-ı âl giymişsün bu gün meydâne girmişsin
Güzellik varına benzer ki zâlim kana girmişsin

RÛHÎ Çelebi: Kuzât-ı hûb-sıfât zümresindendir. İsm-i mehmedet-şî'ârı Mahmûd nefsi-i Gelibolı vücûd-ı pür-cûdlarına mevlûd olup Sultân-ı müdekkikîn ve hâkân-ı muhakkikîn **Muhammediye** sâhibi Yazıcıoğlu mahallesinden olup peder-i büzürgvâr-ı huçeste-etvârları pâdişâh-ı rûzgârın kadirge re'îslerinden Davud Re'îs demekle iştihâr bulmuşlar. Sâbıkû'z-zikr 'âlem-i tufûliyyetde merhûm babalarıyla menâzil-i erbâb-ı 'ukûl olan İstanbul'a gelüp bi'l-'izz ü ve'l-asl dimeyüp fûnûn-ı 'ilme iştiğâl gösterüp mevâlî-i 'izâm ve ehâlî-i kirâmdan nîcesinün hıdmetlerinde olup kaç yıl 'ulemâ-yı kibâr ve fuzalâ-yı 'âlî-tebâre irişüp 'ale'l-husûs Kâmî Efendi hazretlerinin dânişmend-i hûşmendi olmuşlar. Ba'dehu vâlî-i Mısır olan fâzıl-ı devr-i zamân kâmil-i hükemâ-yı cihân a'nî Nişâncı-zâde Ahmed Efendi'den mülâzım olup tadrîsden otuz akçe medreseye vâsıl olduktan sonra 'âlim-i hikmet-nümâ kazâ semtine sâlik olup kutbü'l-'ârifin ve âbdâlû'l-kâşifin ve reh-nümâ-yı gâib ü hâzır Hazret-i Şeyh 'Abdülkâdir'ün rahmetullahı 'aleyh mahabbet-i rûh-efzâsı cân u dilinde muhkem-i safâ-güster olmanın dâ'imâ zevk-i tarâb-nümâyıla mânend-i bülbül-i gûyâ olup Rûm İlleri'ne niyâbet itmege giderken yolları Ezüne'ye ugrayup sâbikan magfûr Nişâncı-zâde Efendi dânişmendliğinden ferâgat iden Şeyh Mahmûd Efendi hazretlerine mülâkat-ı ferruh-sâ'ât müyesser olup 'izz ü hûbûr huzûr bulup **Tuhfetü'l-'Uşşâk** nâm bir risâle inşa idüp itmâmına küllî ihtimâm itmişler. Bir vechile şeyh-i ferhunde-akdâmı bir müsebbâ'-ı kirâmı ile nazm-ı pür-nizâm erkâm kılmışlar. Merreten ba'de uhrâ ol yâr-ı bî-hemtâ cezebât-ı şeyh-i müşkil-küşâ ile vilâyet-i Bagdâd'a kazâ-yı cevâreze râzı olup 'adâlet-nümâ kâdîlığla âsitân-ı 'arş-âşîyân-ı müteberrike şeyh-i 'âlî-nijâdda yüz sürmek nasîb oldukda bu bende ile mülâkat idüp eş'âr-ı dürrer-bârların ve münşeât-ı gurur-nisârlarını güş-vâr-ı dil-i bîdâr itmişdür. El-hak musâhabeti bâde-i dil-küşâ gibi bî-gışş ve letâyif-i tarab-efzâsı dilkeş ve sohbeti dil-küşâ bu bir nîce ebyât-ı muhakkikâne ve nazm-ı 'âşıkânesindendir kalem-i dü zebâna gelüp bu evrâkda tahrîr ü tastîr olundu. Nazm :

'Ömr âhir oldu cevri-i firâvan dükenmedi
Öldüm gamıyla gussa-i hicran dükenmedi
Gözden hayâl-i rûy-i cevânan dükenmedi
Dilden recâ-yı vuslat-ı cânan dükenmedi

Diğer : Şeh-i 'ışkı serîr-i dilde şâh-ı kâmran gördüm
Ser-â-ser mülk-i dil hükmünde fermânın revan gördüm

Dahi mihr ü mahabbet neydügin hiç görmeden kimse
Derûn-ı dilde mihr-i rûyunı günden 'ıyân gördüm

RUMÛZÎ Çelebi: İstanbulludur. Ehl-i kalem zümresindendir. Sâbikan dergâh-ı mu'allâda vâridât kitâbetine nasb olunmuşdı. Ana binâen Vâridâtî Mustafâ Çelebi diyü iştihâr bulmuşdur. Zîrâ ki nâm-ı şerîfî Mustafâ ve muhibb-i fukarâ kimesnedür. Âhirü'l-emr bârgâh-ı a'lâda sipâhi oğlanı bölüğüne geçüp diyâr-ı Mısır'da muhâsebeci oldu. Hakkâ budur ki 'ilm-i

‘Arabî’den bir mikdâr habîr ve zebân-ı Fârisî mümâresetinde misâl-i ‘Acemân-ı bî-nazîr ve tekellümünde dilîr ve mütâla’âsı dil-pezîrdür. Nazm-ı dürer-bârı **Mahzenü’l-esrâr-ı İlâhî** gibi rümûz ile memlû ve güftârı keyfiyyet-bahş-ı esrâr-ı ‘âşıkân-ı nîkû-hûdur. Ol ‘ukde-küşâ-yı her müşkil olan çâre-sâz-ı ehl-i dilün zihn-i selîmi ve tab’-ı mustakîmi semt-i mu’ammâya bir tarîkla mümâreset göstermişdür ki ta’rîfden müberrâ ve tavsîfden mu’arrâdur ve her kande bir tahlîl-i müşkil-i mu’ammâ-yı garîb olsa ki hiç kimse istihrâcına kâdir olmasa anun hâtır-ı ‘âtırına dokunup ve dîde-i dûr-bînine görüldüğü gibi hall idüp edâ-yı dil-firîb ile anı takrîr itdükde mütesemmi’ olanlara bî-ihyâr âferîn dimeden hâlî olmaz. Ol fende şöyle mâhirdür ki ‘âlemde misli nâdir ve bir ismde kırk elli mu’ammâ peydâ itmege kâdirdür ki her birisi bir gayr-ı madde ile nazm-ı cân-perver ve makbûl-i erbâb-ı hüner ola ve tevârih-i güzîde ile beyne’l-müverrihîn tâk ve yegâne-i âfâk ve ekser-i târîhleri altı tarîk ile derc olmuşdur. Üç dâne mu’ammâ-yı bî-misâl şâhid-i hâl olsun diyü ketb olundu. Mu’ammâ-yı be-ism-i Sefer :

Câmı yokdur dimege zerrece ben de varayın
Bildirüpdür lebün ey meh dehene mikdârın

Bu mu’ammâ dahi hayli rindânedür. Mu’ammâ be-ism-i Kâsım

Ben rind-i harâbâtî-i rüsvâ-yı cihâne
Ey pîr-i mugân lutf idüp in’âmuni ‘âm it
Çün câm-ı sıfâl-i serimi sıya bu devrân
Her pâresini revzen-i meyhâneye câm it

ve bu mu’ammâ dahi gâyetle mestâne vü fenâyâ nişânedür. Mu’ammâ be-ism-i Bayram

Ger be porsî k’enderîn meyhâne cây-ı mâ kucâst
Bîsütûn sakfî ki bînî hâne-i vîrân-ı mâst ²⁶⁶

Eş’âr-ı ‘âşıkâne vü rindânesinden bir iki beytle ihtisâr olundu. Nazm :

‘Ar ‘arlığına kâmetün şâhid olmaga
Yetmez mi iki ‘aynun ile iki râ kaşun

ve lehu : Derd ü gam-ı mahabbet bir kûşedür ki anda
Diller ne râhat özler gözler ne h’âb özler

REF’Î Çelebi: İstanbul ile Edirne mâbeyninde olan Çorlı nam kasabadandır. Sadr-ı ‘ulemâ-yı ‘izâm ve fuzalâ-yı fihâm olan Mevlânâ Pervîz Sânellahu el-melikü’l-’azîz ²⁶⁷ hıdmetlerine irişen dânişmend kısmındandır. Hoş-tab’ u nîk-sohbet zât-ı ma’rifetle ârâste ve fûnûn-ı ma’ârifle pîrâstedür. Re’y-i Ref’î’nün himmeti bülend ve tûtî gibi şekeristân-ı ma’ânîde şeker-hand ve zihn-i pâki aksâm-ı nazmdan behremend emsâl ü akrân içre mazmûn-ı belâgat-meşhûn ile kelîmâ tı çün dürr-i meknûn-ı bî-misl ü bî-mânenddür. Hadd-ı zâtında dervîş-nihâd u pâk-i’tikâd kimesnedür. Bu fakîr ile mâbeynimüzde nice müddet çok münâsebet ü musâhabetimüz sebkât idüp mahabbet ü müveddetleri uhuvvet mertebesine irişmişdür. Binâen

²⁶⁶ Bu meyhanede bizim yerimizin neresi olduğunu sorarsan, gördüğün sütunsuz tavan bizim viran evimizdir.

²⁶⁷ Melikü’l-aziz olan Allah, onu kâim kılsın.

‘alâ-zâlik ebyât-ı dil-pezîrin ve kelimât-ı bî-nazîrin cümleten tetebbu’ idüp görmüşüz ki el-hak ser-â-pâ ‘uyûbdan berî ve her biri mânend-i gül-i tarî mergûb u hûb vâkı’ olmuştur. Cümlesinden bir kaç matla’ u beyt-i âbdâr ihtisâr olunup sebt olundu. Nazm :

Gelüp geçmek dilermiş sîneden peykânı cânânun
Sakın ey zahm-ı dil zinhâr aç gözün uyar cânun

Duymadan peykânı dokınmuş meger cânânumun
Sonra açıldı gözi bu zahm-ı hûn-efşânumun
Hem-sâyesi olmak diler ol zülf-i dü-tânun
Gönli kati yüksekde uçar şimdi hümânun

Diğer : Kabagın revzeninün rûz u şeb açar kapar çeşmüm
Hayâlün sâhını kondurmaga ölçer yapar çeşmüm

Leb-i bahr-ı sirişküm üzre kasr-ı dil-küşâdur ser
İki manzardur anda rûy-i deryâya bakar çeşmüm

Diğer : Çokdan olurdum yolunda şehsüvârum hâksâr
Korkarum kim çok görür anı götürmez rûzgâr

Diğer : Tutsak yanında hâke berâber vücûdumuz
Çigner yürir bizi yine turmaz hasûdumuz

Diğer : Cânâ rakîb gerçi görünmez belâ idi
Varınca yanuna çıka geldi belâyı gör

Diğer : Alınur mıydı şehâ satduguna ‘âşıklar
Eger agyârla olmasa senün bâzârın

Diğer : Sohbete gelmekîçün itmiş idi va’de nigâr
Bilmezem gelmez ise hiç neye varur sohbet

Diğer : Gûş-ı nigâre kendözini benzedür hilâl
Billâhi lâzım olmadı mı ana gûş-mâl

Diğer : Bulunmaz degme bostanda igen mevzûn bâlâdur
Benüm ey bâgbân ol kâmeti servüm dik a’lâdur

Diğer : Harem-i hüsnine yârün diyü oldun nâzır
Urdı çeb-râst müjem merdüm-i çeşm vâfir

Nazîre li-mü’ellifihi :

Genc-i hüsnine o gün yüzlünün oldı nâzır
Akçesi olsa n’ola merdüm-i çeşmün vâfir

REY’Î: İstanbullı dânişmend tâifesindendür. Derzî-zâde demekle ma’rûf ve hıl’at-i hüsn-i rey’i ile zâtı mevsûf ve beyne’l-akrân mütâla’ası pâk ve müzâkeresi selîs ü dil-keş ve sûret-i hatt-ı nesh ve ta’lîkı ferah-nâk u nefîs ü bî-gış fûnûn-ı şî’re kâdir ve tekellüm-i Fârisî’de

sâhirdür. Zurafâ vü şu'arâ yanında letâyîfî meşhûr ve zarâfeti mezkûr olmuş. Tabî'at-ı şî'riyyesi fusahâ mâbeyninde hûb ve letâfet-i musâhabeti bülegâ katında mergûbdur. Derzî-zâde 'Ulvî'nün birâderidür. Bir kaç beyt anundur.

Dil tıflı gâib oldu mahallende nâgehân
Dellâldür ki çağırıp arar anı figân

Gîsûna girmeden ne çıkar şâne 'aceb
İki de birde gönlümüze tokınur hemân

Diğer : Egerçi muktezâsı 'ışkunun şâhum gedâlıkdur
Benüm yanumda vallahi gedâlık pâdişâlıkdur

REY'Î-Karahisârî : Dânişmend tâifesinden ve bu devr şu'arâsındandır. Hemîşe cân u dilden ma'rifet semtine tâlib ve fazl u hüner cânibine zâtı mâyil ü râgıb ve gâyetde seri' kâtib ve musâhabeti nazmına gâlib ve zarâfeti makbûl-i erbâb-ı ma'ârif ve sanâyi'-i şî'rden âgâh ve fûnûna vâkıfdur ve şu'arâ vü zurafâ içre Sarı Rey'î demekle meşhûr ma'ânî-i reng-â-reng bulmagla efvâhda mezkûrdur. Bu bir nice matla' u makta' netâyic-i tab'ındandır. Ebyât :

Rişte gibi görünür cism-i nijâdum târe ten
Döndi za'f-ı sûzen-i müjgânun ile târe ten

Diğer : Kapundur kible-i erbâb-ı bâb-ı Ka'be-i 'ulyâ
Hamîde kaddüm oldu ol kapuda 'urvetü'l-vüskâ

[Diğer]: Cevr ü vefâyile dili cânan yıkar yapar
Mülküni zulm ü 'adl ile sultan yıkar yapar

Diğer : Bil derûnum na'l ile dâg-ı tenümde Rey'iyâ
Söyleşür erbâb-ı remz olan göz ile kaş ile

RÎF'ATÎ-Balikesrevî: Dânişmend tâifesindendir. Hûb-sîret ve âdemî-hılkat kimsedür ve beyne'l-akrân mütâla'âsı rengîn ve mübâhasesi şîrîn ve tab'ı vâdî-i şî're sâlik ve zebân-ı Fârisî'de nazma mâlik geçinür ve fikr-i zu'm ile refî'î a'lâ ve nazm-ı bülendi zîbâdur. Bu beytler anlarundur. Beyt

Gam-ı 'ışket nigârâ âteş efrûzed be-cân-ı men
Zebâne mîşevde peydâ hemîşe ez dehân-ı men ²⁶⁸

Diğer : Piyâle dutdı sâkî bezmümüzde pâyidâr oldu
Sebû-yı meykede geldi bizümle dest-yâr oldu

Diğer : Leb-i dildâre su gibi gönlüm
Akmasun mı dehânı dil-cûdur

²⁶⁸ Ey sevgili, aşkının gamı canıma ateş salar, her zaman ağzımdan alevler çıkar.

RÛHÎ-İ Konevî: Ehl-i ‘ilm zümresindendir. Ehliyyetle ma’rûf ve ma’rifetle mevsûfdur ve hadd-ı zâtında zarîf ü suhen-güster ve eş’ârı latîf ü rûh-perverdür. Egerçi ebyâtı çokdur lâkin şöhreti çendân yokdur. Bu makta’-ı musanna’ bir tarîkla ta’miye olmuş ki maksûd-ı beni âdem ve pesend-i ehl-i ‘âlemdür. Beyt :

Ol elif-kad mîm-fem bir dâl kesdi sînene
Bagruna bas sakla Rûhî sen dahi âdem gibi

RÛHÎ: Müftî-i zamânun ve server-i ‘ulemânun a’nî Ebu’s-su’ûd Efendi’nün kethüdâsı oğlıdur. İsmi Mustafâ ve mevlidi İstanbul’dur. Nakkâş-ı sun’-ı bedâyi’-i sûrla sahîfe-i rûzgârda bir çihre-i zîbâ nakş u nigâr idüp şöyle tâb u tarâvet ve hüsn-i hulkla letâfet virmiş ki iklîm-i hüsnde cemâl-i zîbâsı çarh-ı çârümde güneşe dak dutar ve şehristân-ı melâhatde gurre-i ebrû-yı garrâsı gökde mâh-ı neve barmak basardı. Hayfâ ki ol hüsn ü bahâ ile Yûsuf-ı Ken’ân ve gülîstân-ı hayâtun tâze fidânı ve gülzâr-ı cinânun serv-i hırâmânı nev-cevân iken şâh-ı ‘ömrinün bahârı kemâle irişüp ve nihâl-i kaddi nahl-i bâr-âver olup mîvesinden berhûrdâr olmadın sarsar-ı bâd-ı fenâ serv-i hırâmânına yol bulup ve gülşen-i hüsnünün gonce-i handânına dühûl kılup ‘ârızî güllerin füsûrde vü pejmürde itdi. Ol cevân-ı nâ-murâdun ve ol şebâb-ı nîkû-nihâd her gün bir tarîkla ebyât u eş’âr dimege bâis ve her dem dürlü dürlü havâdis zuhûruna râgıb u tâlib ve tabî’at-ı şî’riyyesi hûb ü mergûb idi. Bu bir kaç matla’-ı âbdâr anundur tahrîr olundu. Nazm :

Bendesin şâh-ı kerem itmese yâd
Elümüzden ne gelür güce ne dâd

N’ola bed-nâm-ı mahabbet olsam
Rûhi’yâ bâkî olur çün eyü ad

Diğer: Ruhun gülle berâber dutsalar incinme eldür bu
Ana böyle alınmanun ne vehmi var güzeldür bu

Diğer: Şöyle lezzet virdi söze la’l-i şekker-hâlarun
Dinlenilmez sözleri hîç tûtî-i gûyâlarun

RUSÛHÎ-İ Hamîdî: Dânişmend zümresinden rûz u şeb tâlib-i ma’rifet ve hemîşe esîr-i musâhabet kimesne idi. Egerçi ki şî’re çendân rusûhı yokdı ammâ zarâfet-i safâ-bahşı çok idi. İttifâken zurafânun birisi elinde ‘ilm-i fıkıhdan bir kitâb görür. Bu kitâb nedür diyü sual ider. Sâhib-kitâb mezkûra dir ki kitâbum ‘Arabî’dür ne sana söyler ne bana. Mezkûrları erbâb-ı ma’ârif mezelenmeden hâlî olmazlardı. Cehâletine ihtimâl virirlerdi. Beher-hâl evân-ı cevânide ‘âlem-i fânîyi terk kılup meyl-i serây-ı câvidânî itdi. Bu bir iki eş’âr-ı âbdâr anundur takrîr ü tahrîr itdi. Nazm :

Kuş uçmasun hevâda ol hümâ-pervâzun üstinden
Çık ey âh-ı ciger-sûzum döne döne kebâb eyle

Bilüp mikdârını germ olmasun şems-i cihân-efrûz

Cemâlün pertevin göster ana ref'-i hicâb eyle

RİZÂYÎ : Bu bende-i senâ-h'ân-ı mü'ellif-i tezkîrenün büyük birâderidür. Tab'-ı şûhî mâyl-i nazm olmagın cân u dilden tâlib-i musâhabet-i zurafâ ve şu'arâ olup ol hevâ ile terk-i diyâr idüp evkâtın gâh ticârete ve gâh san'ate nasb kıldı. Sene selâse ve sittîn ve tis'â mi'ede müteveccih-i ravza-i berîn ve meyl-i zîr-i zemîn kıldı. Hadd-ı zâtında hoş -sohbet ü hûb-sîret pâkize-tıynet ve pâk-güftâr ile meclis-ârâ ve tarz-ı mu'ammâda 'ukde-küşâ ve gazeliyyâtı bî-misl ü bî-hemtâ ve pesend-i şu'arâ-yı sâhib-edâdur. Bu bir kaç Fârisî ve Türkî matla' u beyt anundur. Ebyât

Eşk-i hûnîn-i çeşm sûret-i bâz râ hengâme îst
Enderân hengâme her yek-be-yek gülün câme îst ²⁶⁹

Her zamân rûy-ı tu ey şûh be-sû-yı digerest
Hemçû âyîne ki her lahza berûy-ı digerest ²⁷⁰

Diğer : Tolu gezsün sâkiyâ câm-ı şarâb eglenmesün
Bu ten-i bî-tâb içre ıztırâb eglenmesün

Diğer : Âftâb-ı hüsnüne yitmek diler mihr-i felek
Bu cihetden segridür her subh gökden yire dek

Dikmişüm meydân-ı 'ışkunda murâdum haymesin
Rişte-i cânım tınâb u dîd-ı âhumdur direk

RİNDÎ: Bagdâdî'dür. Râkım-ı tezkîrenün 'amucesi oğludur. Tabî'at-ı şî'riyyesi gâyetde hûb ve tarz-ı nazm-ı belâgat-nümâsı mergûbdur. Egerçi bülbül-i cânı gülşen-i nazma tâze hevesdür lâkin gül gibi eş'arı makbûl-i herkes olmuşdur. Hemîşe ol yâr-ı nîk-endîşe 'ışk-ı cevân ile teşvîşe düşmüş rind ü lâubâlî ve 'âşık-pîşe kimsedür. Hakkâ budur ki sîret-i pâki fevka'l-hadd ve meskenet-i hâtır-ı mest-mendi pesend-i sülehâ-yı zamân ve hem-dem-i fukarâ-yı cihân-ı râzdan ve hurde-şinâsân-ı hakâyık-ı pinhân yanında gün gibi 'ayân ve esâlîb-i nazmda sâhib-dîvân ve kasâid ü mu'ammâda ma'ânî-i hâssı firâvândur. Bu matla'-ı rindâne ki ta'rîf-i bâde vü peymâne vâkı' olmuş anlarundur bu evrâka sebt olundu Matla' :

'Aks-i lebün ki dîdede cilve ider müdâm
Benzer şarâb-ı âle ki me'vâdur ana câm

ve bu beyt ve gazel-i rengîn dahi zâde-i tab'larıdır. Beyt :

Zahm-ı şemşîründe sanma kan durur ey gül-'ızâr
Âb-ı hasret bir cerâhat çün dahi agzında var

Diğer : Henüz kılmadan erkâm nâm-ı kûhkeni
Defâtir-i gama yazdı debîr-i 'ışk beni

²⁶⁹ Gözün kanlı yaşı açık yüzle bir savaş halindedir, o savaşta her biri gül renkli bir elbise gibidir.

²⁷⁰ Ey şuh, her zaman senin yüzün başka bir yöne çevrilir; tıpkı her an başka bir yüze bakan ayna gibi.

Gazel : Dürce-i yâkût-ı güher-rîzünden idüp ictinâb
Gonce-san dem-beste kalmış dâne-i la'l-i mîzâb

Tarh-ı bezm itmişsin ey meh dün gice kim var bugün
Reşk-i cânında gümân hâtırda dilde ıztırâb

Zülf ü ruhsâr u hat u hâlünden ayru oldılar
'Akl vâlih sabr muztar can perîşan dil harâb

Nâfenün kanın kurutdı yakdı bagrın lâlenün
Kûşe-i la'l-i dür-efşânunda hâl-i müşk-nâb

Şevk-i la'l-i yâr ile câm-ı şarâbun Rindi'yâ
Terkin itmeme başuma tas giydürürse her habâb

Diğer : Bir nazar görmesem ol mihr-i cihân-ârâyı
Gözümün yaşı virür seyle bütün dünyâyı

Diğer : Peykân-ı yâr çıkmadı gönlümden ey tabîb
İki eliyle dutdı meger anı yâreler

Bu rubâ'î-i rindâne hayli mestâne ve muhakkıkâne olmagla kalem-i dü-zebâne geldi. Rubâ'î :

Takdîr ile sübha olsa dürd-i mey-i nâb
Zâhid ele aldıkca ola mest ü harâb

Ayaga düşerse kef-i zenân-ı duhter-i rez
Mevlâyî olup raks ide anda habâb

Mevlânâ-yı mezkûr sene selâse ve tis'in ve tis'â mi'ede fevt oldukda kendinün sulb oğlu
Zühdî bu târîhi dimişdür sebt olundu. Kıt'a-i târîh :

Âh kim nahl-i kadi Rindî'nün
Sarsar-ı bâd-ı ecelden sındı

Aglayup Zühdî didi târîhin
Bezmi yandurdu firâk-ı Rindî [993]

RAHÎMÎ: Burûsevî'dür. Ehl-i kalem zümresindendir. Kalem-i seri'ü'l-beyânla tahrîr olan hutûtı hayât-efzâ-yı dil ü cândur ve ma'rifet-i cüz'î vü küllîden haber dâr ve eş'âr-ı dürer-bârı pesend-i sarrafân-ı bâzâr-ı girûdâr olmuştur. Bu beyt cümle-i eş'ârındandır. Beyt :

Sıma mir'ât-ı kalbüm tâ ki kılmayum nazar gayre
Ki sûret bir görünmez tâ ki anda inkisâr olsa

RA'DÎ: İstanbullı'dur. Dergâh-ı a'lâda sipâhi tâifesinden idi lâkin müddet-i medîd ve 'ahd-i ba'iddür ki Mısır'da hıdmet-i pâdişâhî üzredür. Tabî'at-ı şî'riyyesi kem degül. Yârân mabeyninde gül gibi eş'âr ile bülbüldür. Âvâze-i nazmı ra'd-vâr kubbe-i eflâke velvele ve künbed-i mînâ-yı dünyâyâ gulgule bırakmışdur. Bu beyt anundur. Beyt :

Kalbünü sâf eyle sûfî al ele câm-ı safâ
Bâde nûş it cûşa gel 'âlem ayag üstindedür

Fi harfî'z-zâ

ZÎNETÎ-İ Sîrozî: Dânişmend iken fevt olmuş zihn-i latîfî şî'rde envâ'-ı zînetle ârâste ve tab'-ı şerîfî nazmıda fûnûn-ı ma'rifetle pîrâste eş'âr-ı dil-keşi sûznâk ve ebyât-ı bî-gıışşı pâk ve nakş u savt edâsında hûb-nakş olmagla meclis-ârâ ve sâhib-edâ kimesne idi. Bu bir nice matla' u beyt zâde-i tab'-ı zînet-nümâsıdır ki iktifâ olundu. Ebyât :

Meded öldürdi beni ey sanem-i şehir-âşûb
O levendâne revişler o hüdâyî üslûb

Diğer : Sanmanuz kavs-ı kuzah kılmaga diyü çarhı bend
Âh-ı âteş-nâk-i 'âşık bagladı şekl-i kemend

Diğer : Siyeh fûte kuşanup girse hamâme o meh-peyker
Halâyık tas çalarlar ay tutuldu zann idüp yir yir

Diğer : Dâmen âlûde vü destâr perîşân yaka çâk
Kûyuna geldi yine Zînetî-i rûsvâyî

ZÂRÎ: Ehl-i 'ilm zümresinden zü'emâ bölümünden ecdâdı Anadolu'ya bağlı Kestel kazasından Gerek nam karyedendür. Talebeden olmanın gah niyâbet-i kuzât-ı 'izâm idüp ve vâlidî hıdmet-i 'ulemâ-yı fihâm kılup mülâzım olup kazâyâ rızâ virüp Karaman'da Seydişehir'nde te'ehhül itmiş. Müşârünileyh anda vücûda gelmişler. Âhir tayısı olan Gül-zâde Mehmed Çelebi ki el'an Yenişehir sancagı begidür anlarla İslâmbol'a varup Koca Nişâncı katında re'îs-i küttâb olan 'Abdurrahmân Efendi'ye şâgird olmuşlar. Ba'dehu Sultân Selîm hazretlerinin lalası olan vezir Mustafâ Paşa hazretlerinin hıdmetine ihtisâs-ı küllî hâsıl idüp sâbıkan Sultân Mustafâ hazretlerinin re'îs-i küttâbı olan Dervîş Efendi'nün yanında mezkûr paşanun dîvân kâtibi ve Şâm-ı şerîfinde anların mühürdârı olup mümâileyh paşa Şâm'da 'imâret-i 'âlî binâ itdükde mezkûr kâtib nasb idüp bir mikdâr zamândan sonra mezkûr 'imârete mütevellî olup hâliyâ tevliyetden vaz gelüp ze'âmete mutasarrıfıdır. Sene hamse ve semânîn ve tis'â mi'ede Rıdvân Paşa hıdmetlerine irişüp mezkûr paşa Basra'ya müteveccih olup sâbıkı'z-zikri dîvân kâtibi itmişler. Hadd-ı zâtında merd-i dâna ve nûkte-ârâ-yı garrâ ve suhen-senc-i bî-hemtâ ve latîfe-h'ân-ı zamân ve zebân-âver-i cihân u bî-karîne-i devrândur. Şî'r ü inşâ cânibine tab'ı mâyıl ve nazm-ı nizâm-encâmı hâtır-şinâsân-ı ehl-i dildür ve hasb-i hâl-i mestmendân-ı dehr ve sergüzeşt-i derdmendân-ı 'asrdan âgâh u habîr ve musâhabet-i cân-fezâsı ferah-bahş-ı cân-ı nâtûvân ve hayât-resân-ı dil ü cândur ve 'Alî Fakîh demekle meşhûr-ı fukahâ-yı zamândur. Bu bir nice beyt anlarındur. Nazm :

Katlüme tîr-i müjenle çünki tedbîr eyledün
Yâ niçün ey kaşı yâ hayr işi te'hîr eyledün

Diğer: Gönlünü döndürdiler bezm-i gamunda sâgarun
Başına çökdü o kan ayaklunun yir yir habâb

Diğer: Girmez kulagina o mehün itdügün figân
Yaşun irerse Zârî göge âh u zâr ile

ZÜHDÎ: Rûm İli'nde Sofya'dan ve behişt-âsâ hurrem-i câdandur. Zümre-i sipâh-ı kîne-h'âhda ağır timâra mutasarrıf ze'âmete mâlik ve tab'-ı selîm ve zihn-i mustakîm ile hulk-ı 'azîm mîr-i mîrân-ı nâmdâr ve zübde-i ehl-i kadr ü i'tibâr Husrev Paşa'nun kâtib-i dîvânı ve makbûl-i erkân u a'yânı otuz yıla karîbdür ol sâhib-temkîn ü vakârın hıdmet-i kitâbetiyle seferde ve hazaarda hem-rikâb u hem-i'nânı hattâ Paşa-yı mezkûr emr-i şerîf-i Hüdâvendigâr ile sene seb'â ve seb'in ve tis'â mi'ede merhûm şâhzâde Sultân Bâyezid-i sergeşte-i rûzgârın katline ve şehzâdelerini götürmesine diyâr-ı 'Acemistân'a 'asker-i bî-girân ile revâne oldukda Zühdi-i mestûr bile olup nazm u inşâ ile enîs ve ehl-i fazl u belâgatle celîs olup nâm-ı latîfi Hasan olmagla cümle-i etvârı müstahsendür. Mütâla'â-i kütüb-i 'Arab ve devâvin-i Fûrs'de edâ-yı ebyât ve gazeliyyât-ı Nevâyî'de kemâl ile mûmâreseti ve zebân-ı Fûrsle mütekellim ü musâha bete tamâm kudreti ve ragbeti vardır. Tabî'at-ı şî'riyyesi âb-ı pâk mânend-i revân ve eş'âr-ı bî-bedeli bî-hadd ü bî-pâyândur. Bu bir gazel-i bî-bedel-i pür-mesel ile bir kaç matla' ve beyt-i pâk anların zâde-i tab'-ı ferah-nâkidür ol pesend-i ehl-i idrâkden sebt olundu. Gazel :

Meydân-ı hüsn içinde bulunmaz sana yiter
Kûyun gedâlarında bulunmaz bana yiter

'Uşşâk-ı mest-mendi saçun dârına as n'ola
Gamzen hadengi dillere yiter belâ yiter

Hüsn ile mihr olursa cihânun güzelleri
Meyl eylemez birine dil ol mehlikâ yiter

Tâc u kabâdan el yuduk ey hâce-nişân
Dervîşinüz şehâ bize dîbâ 'abâ yiter

Zühdi figânım ol mehün irüp kulagina
Rahm eyleyüp didi yiter ey mübtelâ yiter

ve lehu eyzan :

Nev-bahârın sürelüm bir nice gün zevk ü demin
Rûzgârın nice bir nûş idelüm zehr ü gamın

Nice taş dillidür ol şûh-ı sitem-kârı görün
'Âr ider bendesinün yüzine basmaz kademin

Seg-i kûyunla diler haşr ola agyâr-ı pelîd
Ol asılası gör kim niçe sürer resenin

Bâgbânâ ruh-ı dildârı göreydün sen eger
Satsalar almaz idün bir pula bâgun semenin

Zühdi yimezdi gam ‘âlemde eger ölse dahi
Bir gice sîneye çekeydi o gül-pîrehenin

Diğer : Servi gördüm bâgda kadd-i nigâre dik gelür
Yıkılup bir yire ‘uşşâk anı muhkem yondılar

Diğer : Kadd-i dil-cûyun harâmî kebke refâtâr öğredür
La’l-i nâbun tûtî-i gûyâya güftâr öğredür

Diğer : Kelle-i nahl üzre biten şâhlardur sanmanuz
Kays-ı bî-dildür başında kuşlar itmiş âşiyân

ZÎNETÎ-İ Sîrozî : Dânişmend tâifesindendir. Vâdî-i nazma tâze-heves ve gülşen-i ma’ânîye
gülbin-nevresdür. Dâimâ tab’ı zîb ü zînet ile fer bulmadan hâlî degüldür. Bu matla’ anundur.
Matla’ :

Öykünmeseydi ‘ârızuna gül didikleri
Nâlemle bahs ider miydi bülbül didikleri

Nazîre li-mü’ellifihi:

Gülzâre şem’-i bezm olalı gül didikleri
Yanup kül itdi cismini bülbül didikleri

ZÎREKÎ: Hemedânî’dür. Evân-ı cevânîde arzû-yı geşt ü güzâr ile terk-i diyâr idüp şehr-i
Adana’ya gelüp mezkûr şehrde olan muhibb-i evlâd-ı Nebî ya’nî kâtib Pîrî Çelebî’nün
vâsıtasıyla güzîde-i erkân ve zübde-i a’yân ve asl u neseble yegâne-i zamân a’nî Ramazân-
zâde Pîrî Paşa hazretlerinin bâb-ı sa’âdet-me’âbına intisâb itmiş. Hâlâ rûz u şeb sâhib-’irfân
olan yârânla Türkî diline müdâvemet gösterüp müşâ’ere ve müzâkere itmeden hâlî degüldür.
Tevsen-i tab’ı ‘arsa-i eş’ârda cüst ü çâlâk ve zebân-ı Fârisî’de güftârı ferah-nâk olmagın **Mîhr
ü Mâh** nâm bir kitâbı Türkî dilinden Fârisî’ye terceme kılmış ziyâde hûb u mergûbdur . Bu
bir iki matla’ anundur. Nazm :

Mîkonem sa’y-ı tavâf-ı Ka’be-i kûy-ı tu râ
Ey sanem çün leyse’l-insân ilâ mâ sa’â ²⁷¹

Z’ân muje sad tîr-i merdüm-kuş be-sû-yı men resîd
Yek yek inhâ ber dilem ez tond-hûy-ı men resîd ²⁷²

²⁷¹ Senin mekanının kubesini tavaf etmeye çalışıyorum. Ey sanem tıpkı çabalayandan başkası insan değildir
denildiği gibi.

²⁷² O kirpikten yüzlerce öldürücü de bana doğru geldi. Bunlar benim hırçınlığımdan bir bir gönlüme geldi.

Bu kıt'a-i zîbâ dahi anların zâde-i efkârıdur mestûr oldu. Kıt'a :

Kat'-ı menzil ne koned sâlik-i râh ey mürşid
Tâ be-zerdîy ü za'ifî neşevd hemçü hilâl ²⁷³

Mâh râ bîn çü hamîde şevd ü lâgar ü zerd
Yek şebe râh şevd der kademeş pânsad sâl ²⁷⁴

Fî-harfi's-sin

SA'YÎ Çelebi: Saruhânî'dür. Zümre-i kuzâtdandır. 'İlm-i şerîfe sa'y-i cemîl gösterüp 'ulûmdan behremend ve her fende hûşmend idi. Zebân-ı Fârisî'de ve hatt-ı nesta'lık yazmada bî-misl ü bî-mânend ve mazmûn-ı hâsı makbûl-i şu'arâ-yı bülend-himmet ve eş'âr-ı dürrer-bârı muhayyel ü pür-san'atdûr ve hadd-ı zâtında sâhib-meşreb olmanın cemî-i zurafâ mâbey ninde perîşân-mezheb diyü töhmetle âlûde ve gerdiş-i cevri devrden füsûrde idi. 'Âkıbetü'l-emr aksâ-yı maksûda irmeden ol magfûr-ı sa'îd şimşîr-i tîz ile kendü memlû ki bir bût-i hûn-rîzûn elinde şehîd oldu. Merhûmun eş'âr-ı pür-sûzı ve güftâr-ı dil-efrûzı bî-hadd ü lâ-yu'addur. Mâsadak-ı suhen ve şâhid-i fen bir nice matla' u beyt anlardan sebt olundu. Ebyât :

Gördi kim etfâl-ı eşküm hânesin eyler harâb
Âşiyân-ı dîdemi terk itdi uçdı murg-ı h'âb

Diğer : Fenâ gülzârıdur 'âlem bahârımdan hazân kalmış
Meh-i nev sanma uçmış 'andelibi âşiyân kalmış

Diğer : Gir gönül kûy-ı harâbâta ko neng ü 'ârı
Böyledür 'âşık olan kimsenün âhir kârı

Âteşin âhum okı bagrına geçdi felegün
Meh-i nev şekli degüldür görinen mismârı

Her gice sanma şihâb oldugiçün köhne serâ
Turmayup hâne-i dehrün dökülür mismârı

Diğer : Nâle ney göz yaşı mey oldu ciger-biryânım
Hane-i dilde hayâlün olalı mihmânım

Nazîre li-mü'ellifihî:

Düşeli gözlerüme 'aks-i leb-i cânânım
Ma'den-i la'l durur zübde-i hûn-efşânım

SEHÂBÎ-İ 'Acem: Şehr-i Dergüzîn'den hevâ-yı 'azm-i diyâr-ı Rûm ve seyr-i safâ-yı her merzbûm kılup İstanbul'a gelüp neşv ü nemâ bulup otuz yıl rûz u şeb mülâzemet-i erbâb-ı rif'at ve hîdmet-i ashâb-ı devlet idüp şu'arâ-yı Rûm ile ve zümre-i zevî'l-'ulûm ile mübâhese

²⁷³ Ey mürşid, yolun saliki, sarılık ve zayıflık bakımından hilal gibi olmadıkça menzili kat edemez.

²⁷⁴ Aya bir bak, eğilip zayıflayıp sararınca, onun adımımda bir gecelik yol beş yüz yıl olur.

ve müzâkere-i şî'r ü inşâ eyleyüp pâdişâh-ı hâtem-himmetün nazar-ı kimyâ-bahşlarına mazhar düşüp otuz akçe 'ulûfeye müstehak u elyâk olmuş. El-hak tarz-ı inşâ ve mu'ammâda bî-nazîr ve akrânı içre misli nâdir ve tevârih-i selâtin-i mütekaddimîn bilmede mâhir idi. Ana binâen **Kimyâ-yı Sa'âdet**'i terceme idüp pâdişâhun hâk-i pâ-yi kimyâ-eserine 'arz itmiş. Ol Sultân-ı sehâ-güsterün hezâr in'am-ı bî-şümârına sezâ-vâr olmuş. Mezkûrun eş'ârından bir iki matla'-ı Fârisî mânend-i şem'-i şeb-efrûz ve hasb-i hâl-i 'âşık-ı dil-sûz ve mezheb-i zâhid-i siyeh-rûz-hâ ile âmûz olduğu çün bu evrâkda sebt oldu. Nazm :

Menem ü hâk-i der-i meykede vü rûy-ı niyâz
Zâhidâ rev ki ne dârem ser-i sevdâ-yı namâz²⁷⁵

Be-ki sûzem şem'-sân reghâ-yı cân-ı h'îş râ
Pîş-i û rûşen konem sûz-ı nihân-ı h'îş râ ²⁷⁶

Nazîre li-mü'ellifihi :

Sâhtem peykân-ı tîreş şem'-i cân-ı h'îş râ
Demkeş ey şem' ü mezen âteş zebân-ı h'îş râ ²⁷⁷

Hayfâ ol şâ'ir-i metin sene ihdâ ve seb'in ve tis'â mi'ede âheng-i huld-ı berîn idüp vefât itdi. Bu bir iki Türkî matla' dahi anlarundur. Beyt :

Zehr-i hicran çâşnî-i vasl ile lezzetlûdür
Ta'm-ı mey ger telh ise keyfiyyet-i mey tatludur

Diğer : Tekellüm itmeyüp olsam 'aceb midür mebhût
Ki urdı hâtem-i la'li dehâna mühr-i sükût

SIYÂHÎ: Tirevî'dür. Dervîş-sîret ve hûb-hılkat kimesnedür. Dem-â-dem ol pîr-i nîkû-halef tettebbu'-ı güftâr-ı şu'arâ-yı selef idüp lâzım olan ma'ârifî zabt idüp dâimü'd-dehr bu 'asr içre müzâkere ve müşâ'ere itmeden hâlî degüldür. Eş'âr-ı safâ-bahşî zenk-zedâ-yı dil-i tîre bühtân ve güftâr-ı bî-gışşı râhat-efzâ-yı 'âşıkân-ı nâtüvândur. Bu bir nice beyt anundur. Nazm :

Ey dil koyalum mâziyi zîrâ ki 'ademdür
Müstakbel için gam yime dem şimdiki demdür

Diğer : Câna sabr itmedi dil zülfüne gitdi ürek
Eyü varur bu meseldür yol eri yolda gerek

Diğer : Degüldür görinen yârün Siyâhî zülfi vü hâlî
Birisi dâg-ı sînemdür biri baht-ı siyâhumdur

SELÂKÎ-i Hamîdî: Ehl-i 'ilm zümresinden imiş. Kuzâtdan selîka-i şî'ri pâk ve sözleri sûznâk ve tab'ı tahmîs ü terci'-i bend semtine mâyil ve murabba' u tesdîs edâsına zebânı kâyil ve her birinde kâmindür. Mâsadak-ı güftâr bir matla' u bir nice beyt-i pür-sûz çün mihr-i dil-efrûz didâr gösterüp zuhûra geldi. Nazm :

²⁷⁵ Bir ben varım, bir de meyhane kapısının toprağı ve niyaz yüzü var. Ey zahid, git (başımdan) benim namaz derdim yok.

²⁷⁶ Mum gibi can damarlarımı kime yakayım da onun yanında gizli yanışımı açık edeyim?

²⁷⁷ Canımın mumunu okuna uç yaptım, ey mum nefesini çek de kendi ağzını ateşe verme.

‘Arz-ı hâl itmege ey şeh nice açam dehenüm
‘Âleme od bıragur sûz-ı dilümden suhenüm

Diğer : Sûz-ı ‘ışkunla yanar döymez tenümden pîrehen
Dostum sensin beni ‘âlemde gömleksiz koyan

Diğer : Hicründe görenler tenümi pîrehen içre
Bir mürde-i sad-sâle sanurlar kefen içre

Diğer : Su olup demrenün sûzumla sızdı çıkdı cismümden
Degül tebden dökülenler ‘arak cism-i fikârumdan

SELMÂN: Vardar Yenicesi’ndendür ve mülâzimîn zümresinden idi. Rûz u şeb cidd ü cehd idüp ‘ulûmı tertîb üzre görmüş ve zebân-ı Fârisî ve Nevâyî’ye ve fenn-i târîh ile mu’ammâyâ çok mümâreset gösterüp her birin bir mikdâr tahsîl ü tekmîl itmiş ve tarz-ı inşâ ile mânend-i akrân-ı bî-misl-i zamân ve üslûb-ı kasîde ile kişver-i Rûm’da kendü Selmân idi. Sene isna ve seb’în ve tis’â mi’ede terk-i rûy-i zemîn kılup ‘azm-i seyr-i behîşt-i berîn eyledi. Bu bir nice matla’ u beyt anundur. Ebyât :

‘Ayş u ‘işret mevsimidür geldi eyyâm-ı bahâr
Zâhidâ bana namâzı anma anun vakti var

Diğer : ‘Âşık öldürmegi tahrîk ider ol yanundan
Togruluk anlamazın hançer-i bürrânundan

Diğer : Sendedür gönli mahabbet ehlinün ey cevri çok
Anun içün gayri dil-ber sevmeye hiç gönli yok

Diğer : Didüm ey sîm-ten dil-ber bilün koçmaga kâbil mi
Gülüp nâz ile ol gül-ruh eyitdi belki akbeldür

Diğer: ‘Ahd ü peymânun bizümle böyle miydi ey felek
K’ola peymâne şikeste kahve fîncânı dürüst

Diğer : ‘Âşık oldu gibi ol zülf-i ‘abîr-efşâne
Gör e bir kurı kemik kaldı nigârâ şâne

SIRRÎ: Vardar Yenicesi’nden dânişmend-i hûşmend tâ’ifesindendür. Esrâr-ı ‘ulûma vâkıf u âgâh ve zebân-ı Fârisî’de pesendide-i ebrâr ve ma’lûmâtı dil-h’âh vâkı’ olmuşdur ve ma’rifet-i cüz’î vü küllîde güzîde-i akrân ve makbûl-i ehl-i ‘irfândur. Egerçi şu’arâ ve zurafâ-yı cihânda sohbet-i hâssı nazmına gâlib diyü meşhûr olmuşdur lâkin eş’ârı nefîs ve güftârı dahi selîs ü zîbâ ve gamzedâ-yı ehl-i niyâzdur. Li misl-i hazâ bu evrâka ketb oldı. Beyt :

Ne hâlüm anmaga kudret ne sabra tâkat var
Efendi hâl mükedder ziyâde hayret var

Diğer : La’l-i can-bahşunla leb-ber-leb olaldan câmlar
Sâkiyâ elden düşürmez rind-i dürd-âşâmlar

Diğer : Dehenün şâh-ı gonce şîvesidür
Leb-i la'lün şarâbun incesidür

Bu gazel dahi anundur. Gazel :

Âdemler öldürür gözün ey şûh-ı şîve-kâr
Dilerse vechi var ana şehbâz-ı can şikâr

Vasf eylemege kaddüni ey serv-i hoş -hırâm
Gönline girdi bahr ü berün hayli cûy-bâr

Gülzâr-ı vasla salmadı hayfâ nesîm-i lutf
Hâküz yolunda bir sanemün nîce rûzgâr

Bir zerre yüzüne sînededür âftâbımız
Bir katre yüzün eylemişüz bahrı der-kenâr

Sırrî gibi bir âfet-i can mübtelâsıyuz
Had yok belâya cevır ü cefâyise bî-şümâr

Diğer : Ruh degül âyîne-i 'âlem-nümâdur gördüğün
Leb degül câm-ı şarâb-ı dil-küşâdur gördüğün

Diğer : Pür 'arak sanma yüzünden o mehün nûr yagar
Ya meger gün var iken 'âleme yagmur yagar

Mevlânâ SÜNNÎ: Rûm İli'ndendür. Dervîş-sıfât ve âdemî-sîret ü melek-hılkat kimsedür. Tasfiye-i bâtın itmege dest-i irâdet dâmen-i meşâyih-i kibâre uzadup tevhîd-i muvahhidînün istilâhâtın ketb itmiş. Ol ecilden gâh hem-nîşîn-i ashâb-ı dîn ü mezheb olup ve gâh peyrev-i erbâb-ı meşreb geçinüp her vâdîden behremend olmuş. Zîrâ ki siyâhat tarîkıyla müsâferet ihtiyâr kılup etrâf-ı 'âleme su gibi revâne ve hıdmet-i 'ârifân-ı cihâna cân u dilden tâlib ü râgıb ve hemîşe tettebbu'-ı eş'âr-ı mütekaddimîn ve fusahâ-yı müteahhirîn idüp zebân-ı 'Acem'e ve lisân-ı Nevâyî'ye bir mertebede iştigal göstermiş ki makdûr-ı beşer degül ve her birisinden zevk-ı tâm alup meşhûr-ı hâs u 'âm olmuş. Kuvvet-i muhafazası gâyetde müstahkem ve sohbet-i hâssı pesendide-i 'Arab u 'Acem'dür. Nazm-ı dürer-bârı dervîşâne vü muhakkıkâne vâkı' olmuşdur. Cümlesinden bir kaç rindâne kalem-i müşk-efşâne gelüp sebt oldu. Nazm:

İrgürem vasla rakîbâ dimiş ol mâh seni
Şa Allah o günlere ırgürmeye Allâh seni

Diğer : Sünbülün gül üzre kim bir pîç ü tâb olmakdadur
Rûy-i maksûda kara bahtum nikâb olmakdadur

Sînem içre nâr-ı hicrânunla gönlüm kim yanar

Bir cahîmîdür ki kabrinde ‘azâb olmakdadur

Sende istignâ-yı hüsn ü bende yagmâ-yı cünûn
Sen ferâgatde benüm hâlüm harâb olmakdadur

Diğer : Gam-ı cânânı ‘âşıklar dem-i ‘ukbâya virmezler
Bugün nakdi koyup ol nisye-i ferdâya virmezler

Bu deyr içre Mesîhâ dir bilenler Tanrı hakkıçün
Ölürler bir büte can virmegi dünyâya virmezler

Mey ü mahbûb zevkin anlayan şevk ehli ‘ârifler
Şarâb-ı kevsere dil-berleri hûrâya virmezler

Metâ’-ı vasl-ı yâre nakd-i can vir ölmeden Sünnî
Ki dâ’im ‘ömr gibi sana bir sermâye virmezler

SERHENGÎ: İstanbul’dandur. Pâdişâh-ı encüm-sipâh ve şehen-şâh-ı felek-dest-gâh a’nî Süleymân-ı gerdûn-mekân Nûşirevân-ı devr-i zamân hazretlerinün çavuş-ı ‘âlî-şânlarındandur. Binâen ‘alâ zâlik rahş-ı tab’ı meydân-ı ma’ânîde pişrev-i şâh-ı suhenverân-ı cihân ve şâh-bâz-ı zihn-i hüma-pervâzı vâdî-i efkârda tâyir-i lâ-mekân ve hadd-ı zâtında merd-i sebük-rûh u hande-rû ve hüsn-i hulkıla ‘âlemi feth ü fütûh ider. Gâyetde nîkû-hû kimesnedür. Rûz u şeb tek ü pûde mânend-i sabâ bî-karâr ve cüst ü cûda misâl-i âb-ı revân-ı tîz-refîâr ve dürr-i nazm-ı dürrer-i cihân-kerdi seyyâh-ı bahr ü berr ve Edhem-şî’âr bâd-pây-i iklîm-i neverdi ‘inân-ı güftâr-ı safâ-güster birle rehber-i erbâb-ı hünerdür. Bu bir nice beyt anlarundur yazıldı. Ebyât:

Sahn-ı ‘âlemde gönül hânesi ma’ mûr olmaz
Bunda ‘âkil sevinüp zerrece mesrûr olmaz

Diğer : Âşüfte kılupdur beni bir kâmeti serkeş
Zülf-i siyehi gibi gönül oldu müşevveş

Diğer : Bed-mest olanı sohbet-i ‘irfâne getürme
Küstâh olanı meclis-i rindâne getürme

Gûş it sözümi pendümi redd eyleme zinhâr
Bed-aslı meded-hâne-i yârâne getürme

Telh olmaya meclis dir isen pendümi gûş it
Serhengî meded sohbe bîgâne getürme

Diğer : Cehl ile mürekkeb olana olma musâhib
Bir yüzi karadur anı âdem ola sanma

Diğer : Bin ayak bâde şehâ ‘aynuma gelmezdi benüm
Beni sermest idesin sen gül[e] efsûn itdün

Diğer : Sâbir ol kısmet-i rûz-ı ezel[e] kâil isen
Tâma'-ı hâmi gider sag olan insan geçinür

Diğer : 'Ayş eyleyegör yâr ile gülşende safâ sür
Serhengî göre kim bu cihan kimlere kaldı

Kıt'a 'Aynî Beg hazretlerinin dimişlerdür.

İrtesün ziyâde 'izzet ile câh ü devletün
Mîr-i kelâmısın yine bu 'arsada bugün

Olsun ziyâde 'ömrün ile 'Aynî rif'atün

...²⁷⁸

SIHRÎ-İ Üskübî: Evsâfın işitdügümüz zurafâdandır. Ehl-i 'ilm zümresinden imiş. Kemâl-i ma'rifetle bî-mânend ve üslûb-ı kitâbetde hûşmend geçinüp dâimâ tettebbu'-ı tevârih-i şâhân-ı pîşîn kılup tarz-ı inşâda sihr-âferîn olmuş ve ol vechile evkât-ı 'azîzin şehr-i Edirne'de mahkeme kitâbetine nasb itmiş ol bâbda çok dünyâ kesb kılmış ve 'inde'l-'ulemâi'l-'izâm ve beyne'l-havâsı ve'l-'avâm sûret-i sicillât-ı berekât-âyâtı bir mikdâr sübût bulup nâmdâr olmuş. Egerçi sâir şu'arâ gibi zurafâ mâbeyninde bî-hüccet meşhûr ve mecmû'a-i şu'arâda fezâyille şî'ri mestûr olmamış. Bu beyt anundur. Beyt :

İşimi altun ider sâkî gümüş peymâneler
Kimyâdur var ise hâk-i der-i meyhâneler

Zümre-i bülegânun bilâ-istiklâl sâhib-nâmı Rüstem-i şu'arâ **Mevlânâ SÂMÎ:** Manastır'a karîb yirdendür. 'Unfuvân-ı şebâbda tâlib-i râh-ı savâb ve evân-ı hayât-ı hututü'l-kitâbda sâlik-i münselik-i sevâb olmag ile levâzım ve kavâ'id-i fûnûnı cem' idüp ictimâ'-ı kemâlât ile şehristân-ı vücûdun mi'mar-ı fazl u dânişle âbâd idüp ehl-i 'ilm zümresinden ta'dâd olup zamân-ı ferâgat işgâlinde şu'arâ-yı şîrîn-makâl ile eş'âr-ı bî-misâl belki mânend-i sihr-i helâl dimekle teshîr kılup ashâb-ı vecd ü hâl itmede dilîr ve pîşe-zâr-ı 'âlemde pençe-i zûd-ı ma'ârifle ve gûş-ı ma'ânî-i dil-firîbini kemend-i teshîre çeküp ele getürmede mânend-i şîr-i nahçîr âhir seyr-künân-ı meserret-bahş-ı seyyâhân-ı sâhib-'ukûl olan şehr-i İstanbul'a gelüp ol nüzhet-gâh-ı vâlâ ve nişîmen-gâh-ı selâtîn-i cihân-küşâda tab'-ı latîfleri nihâl-ı mütemâyil-misâl gülzâr-ı pür-esmâr 'ulûma mâyil ve zihn-i tîz-revleri mâ-yı cârî gibi vâdî-i fûnûna mâyil düşüp bir lahza ta'tile rızâ-yı himmetleri kâyil olmayup zurafâ-yı zamân ve fuzalâ-yı cihânun ol memdûhü'l-hisâyil ve müstecmi'ü'l-fezâyil tahsîl-i ma'ârif itmege hîn-i mülâkîlerinde her birinden geregi gibi behremend ve esnâ-yı musâhabet-i rûh-efzâlarıyla hursend olup ol suhen-senc-i mâhir ebkâr-ı ma'ânî tasarrufına kâdir olmagın makbûl-i etibba'-ı asâgir ü ekâbirdür. Sene tis'în ve tis'â mi'enün târîhinde bâ'is-i sezâ-vârı 'izz ü şân-ı cihândârî Kars'un muharrerlik ile defterdârı olan rû-sefîdi ehl-i hâcene a'nî Kara Hâce ile vilâyet-i Kars'a gelüp ol emîr-i şeca'ât-mısrun eyyâm-ı rif'at-fercâmında isimleri Hüssâm olmagın El-esmâu

²⁷⁸ Hiçbir nüshada olmadığı için yazılamadı.

tenzilüne mine's-semâ'i²⁷⁹ mûcibince tîg-ı bürehne gibi kemâl-i hüdmetlerinden ol serhadlerde sufûf-ı şeca'âne belki mahz-ı hücûm-ı celâdetlerinden terk-i ser idüp hamallât-ı merdâne-i kulûb ebnâ-yı cinsi yanında merâtib-i sâmiye hâsıl itmegin Sâmi tahallüs ihtiyâr kılmış ve ehl-i dünyâ içre sâhib-i 'tibâr olup müşârünileyh defterdâr Kızılbaş cenginde mevcûd bulunup ol merhûm-ı sa'îd mezkûr gazâda şehîd olmuşlar. Hukûk-ı sâbıkaya binâen şehâdetlerine bu târîh-i gazâ ol şâ'ir-i hûb-edânundur. Târîh :

Zübde-i gâzîyân Muhammed râ
Kerd düşmen şehîd bi 'illet²⁸⁰

Bûd kân-ı sehâ ve menba'-ı cûd
Berevâneş koned Hudâ rahmet ²⁸¹

Hûr ü gılmân berû bebahşed nîz
Kevser ü hem cinân-ı pür- ni'met ²⁸²

Goft hâtîf berâyı ân târîh
Ez ezel şod makâm-ı u cennet ²⁸³

Âhirü'l-emr hazret-i bahş-ı kulûb-ı pejmürde-i ehl-i 'irfân ve hayât-ı cedîd-resân-ı pîr ü cevân ve hükûmetinden re'âyâ-yı Erivân'e revân ve 'adâletinden berâ-yı Nahçevân'e yeniden cân irişdiren cenâb-ı ma'âlî-i âyân Hızır Paşa hazretlerine intisâb idüp ol dergâh-ı felek-iştibâhda hâtır-hâh-ı ehibbâ üzre kâm-yâb olup ba'dehu cânib-i şerîflerinden der gâh-ı felek-bârgâh ve âsitân-ı sa'âdet-penâhda kapu kethüdâları olup ol tâ rîhde pâdişâh-ı murâd-bahş ve şâh-ı âsmân-rahşun tahrîs-i terk-i mâsivâ-yı Rabb-ı gafûr ve tedâhül-i zümre-i 'ibâd-ı şekûre bu matla'ları zuhûr buldı. Matla' :

Târik-i gayr olgıl ey dil gel berü Mevlâ'ya bak
'Abd-i şâkirsın eger bezl olınan alâya bak

Bu tarîk ile 'ucûbeleri vâkı' olup mestûr olmuşdur. Matla' :

'Âlemi iden mu'attar zülf-i müşk-âsâya bak
Mürdeler ihyâ ider ol la'l-i rûh-efzâya bak

Yine bu matla'larına dahi ki matla'

Ragbet komadı tatlu dilün şekkere cânâ
Kıymet mi komadı la'l-i lebün kevsere cânâ

bu nazîreyi bî-nazîr dimişdür. Gazel :

²⁷⁹ İsimler semadan iner.

²⁸⁰ Gazilerin seçkini Muhammed'i düşman sebepsiz şehit etti.

²⁸¹ Cömertlik hazinesi ve eli açıklık kaynağıydı, Allah ruhuna rahmet etsin.

²⁸² Ona huri ve gılman bağışlasın ve ayrıca kevseri ve nimet dolu cennetleri de (bağışlasın).

²⁸³ Hâtîf onun için tarih söyledi, ezelden, onun makamı cennet oldu.

Her kim reh-i 'ışkunda senün ser vire cânâ
Lâyık mı degül kul ola sen ser vere cânâ

Mir'at-ı cemâlün ki zuhûr ide cihanda
Safvet mi kor âyîne-i Sikenderde cânâ

Hurşîd-i cihân-tâb gibi ola mı bir gün
Sâmî yüzünü süre o hâk-i dere cânâ

Âhir imdâd-ı tâlî'-i sükkân-ı Dârü's-Selâm'un içinde âsûde olan cezbe-rişte-i himem evliyâ-yı
'izâmla sâhib-celâlet ve menba'-ı sa'âdet müşârünileyh Hızr-kadem Musâ-şiyem-i beyzâ-
'alem eyâlet-i Bagdâd'a şeref-tîr buldukda me'an gelüp bi'l-fi'l hıdmet-i kethüdâlıga mensûb
olup revîş-i müstahsenelerinden tamâm-ı re'âyâ vü berâya şükrân u rızâ üzre olup hüsn-i
tedbîrinden her zamân velî-yi ni'metine nâm-nîk du'â-yı sülehâ-yı dîr ü nezdîk ahz itmege
kemâl-i iştigâlde olup mesâlih-i müslimînden zihn-i ferâgatlerinde deryâ-yı zehhâr dürer-i
belâgat-nisâr tab'ları müteharrik oldıkca efvâc-ı envâ'-ı emvâc-ı ma'ânî bedî'-i sâhil-i bürûze
isâr itmeden hâlî degüldür. Bu bir nice matla' u beyt anundur. Gazel :

Gözün aç sûfiyâ mestâne-i bezm-i elestüm ben
Habâb-âsâ degül 'aynumda 'âlem şöyle mestüm ben

Tekellüfsüz öper meclisde la'l-i dil-beri sâgar
Göreliden ol safâ-yı rûh-bahşı mey-perestüm ben

Alurdum nakd-i cân ile metâ'-ı mihrüni yârün
Meh-i nev gibi 'âlemde egerçi teng-destüm ben

Safâ-yı hâtır olurdu velî seng-i havâdisden
Nihâl-i mîve-dâr-âsâ şehâ gâyet şikestüm ben

Huzûrunda e'âlînün makâmum bellidür Sâmî
Bihamdillah edânînün hemân yanında pestüm ben

Diğer: Rengler virse n'ola âl ile enhâre gözüm
Beni gark itdi ser-â-pâ kara kanlara gözüm

Gam-ı ruhsârını yârün ne kadar yâd itse
Eşk-i hûnîn akıdur derd ile bî-çâre gözüm

Yüzünü görse kalur la'l-i lebünde nazarı
'Âşık olmuş toyamaz lezzet-i dîdâre gözüm

Meclis-i gamda kabagum n'ola olmazsa tehî
Döndi gûyâ iki peymâne-i hummâre gözüm

Seyr olunmaz ruh-ı rahşânı nigârun Sâmî
Yaşarur bakmag ile mihr-i pür-envâre gözüm

Diğer : Firkat şebini rûşen ider şem’-i cemâlün
Sîrâb kılur teşneleri la’l-i zülâlün

Hicründe ne gam olsa gönül bî-kes ü tenhâ
‘İşk ehline eglence yiter fikr ü hayâlün

Va’îz kocadun ta’nı komazsun dahi halkla
Bilmem ki degirmende mi agardı sakalun

Sâmî ne kadar kendüni alçakda görürsen
Günden güne artar meh-i nev gibi kemâlün

Bu matla’-ı rengîn ez Sâfî:

Kan olur gamzesine tîg-ı dem efşan dir isem
Baş gider kirpüğüne hançer-i bürran dir isem

nazîre ez an Sâmî:

Aslı yokdur femüne gonce-i handan dir isem
Rast gelmez kaddüne serv-i hırâman dir isem

nazîre ez ân Hayâlî :

Men’ idermiş ‘âşıkı seyr-i cemâl-i yârdan
Almadı zâhid temettü’ var ise dîdârdan

nazîre ez ân Sâmî:

Niçün inler bülbül-i şeydâ gül-i pür-hârdan
‘Âşık-ı sâdık olan kaçmaz cefâ-yı yârdan

nazîre li-mü’ellifihi :

Dem-be-dem turmaz akar kan zahm-ı tîg-ı yârdan
Aglamaz kan dökmede bu dîde-i hûn-bârdan

Bu bir iki beyt ü matla’ dahi anundur Nazm :

Sanmanuz fânî cihanda olmuşuz dünyâ-perest
Hak bilür rûz-ı ezel oldı gönül Mevlâ-perest

Diğer : Dönmüşüm pervâneye bir şem’-i enver şevkine
Ugradum tâb u tebe hurşîd-i hâver şevkine

Dürr-i Necef lakâbıyla mülakkâb ‘Alî nâm bir cevân-ı pâk-meşreb [için] dimişdür

Beyt :

Virdi cihanda silk-i cevâne çün şeref
Lâyık degül mi dinse ‘Alî’ye dürr-i Necef

SIHRÎ: İstanbulludur. Ümenâ tâifesinden iken sâbıkan diyâr-ı Haleb’de töhmet-i ‘azîme ve bir zâlimün zulmüne mukârin düşüp sâf ü bâk mâmelekin terâş itmiş. Ol sebeble huzûzât-ı

nefsânîden müberrâ ve tekazâ-yı nefsi-zâlimden mu'arrâ olmuş. Hikmet bu ki ol rind-i cihân u pür-hurde-dân yine rûz u şeb şevk-i cevânân-ı bî-misâl ve taklîd-i ehl-i hâl itmeden hâlî degüldür ve ol vak'a vâkı' oldukda gerdiş-i devr-i gaddârun ve âyin-i cevr-i çarh-ı sitem-kârün kahrından terk-i kayd-ı dünyevî idüp sermâye-i devlet-i uhrevî için tecrîd tarîkı ile âsitân-ı 'âlîşân ve ravza-i kuds-âşiyân-ı Hazret-i Gülşenî'ye kuddise sirruhu yüz sürüp tasfiye-i bâtın itmegi arzû kılmış. Âhir yine seyr ü sülûk ile diyâr-ı Rûm'a gelüp her an erbâb-ı 'ulûma elünden geldiği hıdmeti dirîg itmez ve hemîşe mülâzemet-i cevânân-ı hûb-sûreti eksük komaz. Anun için râkım-ı hurûf-ı tezkîre anları hâdim-i şu'arâ ve zurafâ lakâbıyla mülakkab itmişdür. Erbâb-ı safâ içre bu nâm ile ma'rûf ve hıdmet-i nüdemâda lutf ile mevsûfdur. Hadd-ı zâtında asl u neseble nîkû halef ve bakıyye-i şu'arâ-yı selef kimesnedür. Aksâm-ı nazmda şâ'ir-i sihr-âferin ve tarz-ı tevârihde akrânı içre güzîndür. Eş'âr-ı 'âşıkânesi meşhûr-ı cihân ve pesend-i zurafâ-yı zamân vâkı' olmuşdur. Bu bir nice matla' u beyt anundur. Nazm :

- Şûh u şengül rindler bezminde dil-berdür şarâb
Başı üstinde anun sâkî 'arak-çîni habâb
Diğer : Vücûdun zevrakın sal bahr-ı 'ışka rûzgârundur
Hudâ'nundur onarmak sanma ey dil rûzgârundur
Diğer : Elüm olur cihan bâğında ayakda komaz dirdüm
Yüceldükce o serv-i kâmetüm benden ırag oldı
Diğer : Cihânda sînesi üstinde her kim bir cevan besler
Demi zevk ü safâ ile geçer cân üzre can besler
Diğer : Şol dem ki kabrüm üstine cânan gelür gider
Bu mürde cismüme sanuram can gelür gider

Mukaddemâ kapudan olan Rüstem Paşa'nun birâderi olan Sinan Paşa fevtine bir târîh-i âbdâr dimiş ihtisâr olup sebt olundu. Kıt'a târîh :

Virür âhir hevâya fülk-i teni
Nûh dahi olur ise keştî-bân
Her kaçan dem çeke neheng-i ecel
Katrece gelmeye ana 'ummân
Yûsuf-ı sâni idi ahabâba
Görinürdi 'adû gözine sinân
Hâtıf-ı gayb didi târîhin
Taldı rahm et denizine kapudan
Sıhri'yâ gel du'â-yı hayr idelüm
Rûh-ı pâkini şâd ide Hannân

SÂ'Î-I Nakkâş: Serdâr-ı merdân-ı evbâş kimesnedür. Edirne'dendür. San'atinde üstâd-ı zamân ve musavver-i devrân ve şâ'ir-i bî-bâk ü zebân-âver-i pâkdür. Tab'-ı mu'ciz-nümâsı çihre-küşâ-yı ma'ânî ve zihn-i nüktedânı hakâyıkla Mânî-i sâî ma'ârif-i cüz'î vü küllî ile ârâste ve elbis-i ma'ânî ile pîrâste olup hâtır-ı âtır-ı deryâ-mü'essiri esâlib-i suhinde her vechile sâ'î ve ekâlîm-i kelâmı kelimât-ı hayr-endîşi ile dervîş-i dâ'î olma gın her fende kelimât-ı hayât-efzâsı firevân-ı vird-i zebân-ı âşıkân-ı cihandur. Tarz-ı hicvde nîze-i zebân ile ta'ne-zen-i Cân Memî olup nüde- mâ-yı zamânun hem-demidür. Anlar da mukâbelesinde hançer-i hicv ile sîne şikâfı olmuş. Lâf u güzâfı andan kalmaz. Beher hâl bu ebyât-ı zevk-bahş ol şehsüvâr-ı şevk-rahşundur sebt olundu. Gazel :

Bezm-i meyde yakamaz şevk ile dâmâne yeter
Geçemez lâle-sıfat çâk-i girîbâne yeter

Esb-i nâz ile bugün yügrügüsün meydânun
Gelmeye hüsn ile sen Husrev-i hûbâna yeter

Dâne-i hâl ile arz eyleme dâm-ı zülfün
Şâhbâz-ı nazarun murg-ı dil ü câne yeter

Bas safâ geldüğü agyâr yıkılsun gitsün
Meclis-i meyde ana bir iki peymâne yeter

Âbdâr olsa n'ola lü'lü-i nazm-ı Sâ'î
Bir güherdür bu ki gûş-ı şeh-i devrâne yeter

SIRRÎ: Trabzonî'dür. Mukeddemâ tahsîl-i 'ulûm ve tekâmîl-i fûnûn idüp isti'dâd-ı zâtîsî mecâlis-i 'ulemâ'-yı a'lâm ve mehâfil-i fuzalâ-yı 'izâmıda imzâ olundukdan sonra hâtır-ı hatîr-ı serâyir-i ser pür-alâyiş-i 'avâik u 'alâyıktan teberrâ itmekle âhir zevî'l-meşâyih-i kibâre teşebbüs ü te'alluk idüp anların dahi hazâyir-i kudsi'ü'l-mü'essirlerin fevâ'id-i mâlâ-nihâyelerinden isti'dâd u istifâde itdüğinden sonra tâlib-i erbâb-ı belâgat ve râgıb-ı ashâb-ı fesâhat Rûm İli beglerbegisi olup fevt olan merhûm Hasan Paşa mezkûrun envâ'-ı 'ulûm u ma'ârifle ârâste olduğın istima' idüp kemâyenbagî ri'âyet gösterüp kâtib eylemişdi. Pâşâ-yı mezbûrun vefâtlarından sonra rûzgâr-ı zûrkâr yüz döndürüp nice yüzden cefâyâ yüz tutup muhâlefet eylemenin zübde-i âl-i 'Osman Hazret-i Sultân Selîm Han'un dârü's-saltanatları olmag ile müşerref olan mahrûse-i Kütâhiyye'ye teveccüh idüp karâr eylemişlerdür. Hutûnun envâ'ına kâdir husûsâ nesh ü ta'lîkda mâhir ve diyâr-ı Rûm'da emsâli nâdir ve kıt'ası makbûl-i zurafâ-yı devrândur. Halhali dâ'iresine varmışdur ve ba'z-ı zemînler ihtirâ' itmişdür ki erbâb-ı tab' ana tahsîn eylemişlerdür. Musâhabet-i dil-küşâsı ferah-fezâ olmagın ashâb-ı devlet gâyet i'tibâr eylemişlerdür. ve şî'ri fevka'l-hadd nâzûkdür. Zümre-i şu'arâ içinde hayli iştihârı vardır. Bu matla' u beyt anundur.

Meded o kaddi çenârum vefâdan el çekdi
El ucı ile olan merhabâdan el çekdi

Diğer : Kanı bir sünbül-i hoş -bû bu cihan bâğında
‘Ârız-ı yâre düşer zülf-i semensâdan yeg

Diğer : Can derdi sanma hicr ile vardı huzûra Kays
Benden sorun firâk-ı elemin ol dahi uyur

SÂLİKÎ: Edirnevî’dür. Tab’-ı nâzüki cânib-i nazma sâlik ve nefes-i pâki savt ü nakş edâsında tarz-ı ‘Acem’e mâlik idi. Hayfâ ki ol rind-i lâubâli rûz u şeb hûb endîşe ile ‘âşık-pîşe ve hemîşe bu deyr-i harâb-âbâda bâde-i nâbla lâ-ya’kıl-ı bed-mest ü üftâde vü şurîde-hâl ü perîşân me’âl iken bi’z-zarûre mülk-i bekâyı özleyüp terk-i ‘âlem-i fânî kılup ravza-i câvidânîye raht-ı ikâmet çeküp ‘ayş u ‘işretten mahrûm kalmış. Ümmîddür ki ol cânibde arkası üzre yatup anda huzûr itmiş ola ve ittifâk-ı zurafâ-yı Rûm budur ki musâhabet ile hânendeliği eş’ârına gâlib ola. Feemmâ her kaçan kim şu’arâ ile şî’r ü şu’ûr itse elfâz-ı rekîk ile yârânı rencide idüp bî-huzûr itmeden berî degüldi. Beher hâl bu bir iki matla’-ı pür-garâîb anundur bu defter-i ‘aca’îbe sebt olundu. Nazm :

Ey kaşı yâ murg-ı dil uçmaga kûyundan yana
Tîr-i müjgânun yiter her lahza bâl ü per ana

Diğer: Bilmez yolunu varmaga ol Ka’be-i cânun
Her yana dönüp turduğı bu kible-nümânun

SEBZÎ: İstanbullı’dur. Şu’arâ-yı selefdendür. ‘İlm-i zâhire iştigâl gösterür iken gâyetde şî’re harîs olmanın tarîkden ferâgat idüp ehl-i cihet zümresine ilhâk ve akrânı içre tâk olup el’ân hatîb-i hoş -âvâz ve gülşen-i nazma bülbül-i nagme-sâz ve peyrev-i mümtâz olmuş. Eş’ârı gâyetde pür-sûz ve pesendide-i erbâb-ı rümûzdur ve’l-hâsıl geşt-i zâr-ı cihânda ve sebze-zâr-ı devrânda şî’rden gayri bir cev hâsıl itmemiş ve bu devrde şu’arâ-yı nev içre pür-kühen ve üstâd-ı suhen geçinür. Ebyâtı bî-hadd ü lâ-yu’addur. Cümlesinden bu matla’-ı meşhûr ve bu beyitler anlarındur sebt olundu. Nazm :

Âteş-i ‘ışkı beyân itmege açsam dehenüm
Yanar odlara o dem her kim işitse suhenüm

Diğer : Kangı meclisde ki nâz ile o cânân otura
Kalmaya zulm ü sitem fitne-i devrân otura

Şem’e kim didi giyüp üsküfünü dildâre
Şöyle karşı tura kim ayagina kan otura

SEYFÎ: Gelibolı’dandur. Rûz u şeb tahsîl ve tekmîl-i fazilet için hıdmet-i ‘ulemâ-yı ‘âlî-himmet iderken nâgâh İstanbul karşusunda olan Tobhâne’de mest ü bî-haber gezerken bir cây-i ‘âlîden aşaga uçmuş. Murg-ı rûhı aheng-i ravza-i ‘aden ü kevser itmiş. Ol bülbül-i gülşen-zârun şâh-bâz-ı tab’ı hümâ-pervâz ve akrânı içre sayd-ı ma’ânî itmekle mümtâz idi. Tabî’at-ı şî’riyyesi gülistân-ı ma’rifetde gül-bîz ve meydân-ı şecâ’atde seyfi-i kâtî’ gibi tîz. Bu

bir kaç matla' gün gibi meşhûr ve makbûl-i merdüm-i nezdîk ü dûr olmanın mestûr olundu
Şi'r :

Anlar ki cennet istedi 'ukbâya saldılar
Eblehleri bugün yine ferdâya saldılar

Var bir haber getir diyü ahvâl-i dehrden
Kavm-i elest Seyfî'yi dünyâya saldılar

Diğer : Düşdi mû-yı miyânına gönlüm
Öldi işbu arada yok yire kim

Diğer : Âsiyâ-veş başum hevâda yeler
Dögeyin taşlar ile ben kendüm

Diğer : Lebün yanında mercan bir hacerdür
Gözüne göre nergis bî-basardur

SİPÂHÎ: İstanbullı'dur. Dergâh-ı mu'allâda 'ulûfeci yesârdandur. 'Arsa-i nazmda fâris-i nevres ve meydân-ı şî're merd-i tâze heves kimesnedür. Bu bir iki matla' anundur sebt olundu. Şi'r :

Bezmimüz telh eyleyüp sunma bize sâkî 'arak
Basmasun 'işretüne rindâne lutf it yâd ayak

Diğer : Mu'attar kıl nesîm-i lutfun ile pîr-i Ken'ân'ı
Hazîn itme gel ey Yûsuf cemâlüm pîr iken anı

SEMÂ'Î: İslâmbol'dandur. Dergâh-ı felek-bârgâh-ı pâdişâhîde Solag-zâde olmanın zurafâ-yı zamân içre Solag Hasan dimekle meşhûr-ı cihân olmuştur. 'Âlem-i cevânîde 'Acemi oğlanı bölüğünde nice müddet muvazzaf olup ol bâb-ı 'âlî-mekânda sâhib-devletlere ve a'yân-ı dîvâna nice hıdmeti sebkât itmiş. Âhirü'l-emr mezkûrlarun edâ-yı nâ-müveccehlerinde rencîde-hâtır olup terk-i hıdmet kılup ve her dem vahşi-sıfatlarla ülfet itmegi terk idüp dervîşlik semtin ihtiyâr kılup müsâfîret tarîkı ile seyâhat özleyüp diyâr-ı Mısır'a varup âsitân-ı felek-âşiyân-ı Gülşenî'de karar idüp ol dergâhun bendeleri silkinde münselik olmuşlar. Ba'dehu nakd-i vücûdı pûte-i mahabbetde hâlis itmege sikke-hâne-i Bagdâd'a gelüp 'attâr-ı burc-ı evliyâda tamâm 'ayâr olup dergâh-ı 'arş-penâh-ı şâh-ı şehidâna ve ravza-i mutahhar-ı şâh-ı merdâna revâne olup yüzlerin sürüp hıdmet-i nukabâ-yı 'âlî-himmet idüp sâhib-sikke vü sûret olup men 'aref sırrından bâ-haber ve erbâb-ı turûk içre rümûz-ı tarîkatden behrever olmuşlar. Tab'-ı sâfi-i sihr-nümâsı selâset-i nazm ile mevsûf ve lisân-ı pâk edâsı fetânetle ma'rûfdur ve nazm-ı tasavvuf-âmîzi âbdâr. Bu gazel-i dil-pezi'r anundur. Gazel

Pertev ki şem'-i mihr-i ruh-ı yârdan gelür
Bir lem'adur tecellî-i didârdan gelür

Tab'um çerâğı Kâsım-ı Envâr'dan yakar
Bûy-i vefâ dehânuma 'Attâr'dan gelür

Nukl-i şarâb meclis-i gamda yeter bana

Şol hûn-ı dil ki dîde-i hûnbârdan gelür

Halvetde su yirine içer sûfi bâdeyi
Gördün mi kâfiri bize inkârdan gelür

Âzürde hâtır olma Semâ'-i bî-dile
Mestânedür o hâne-i hummârdan gelür

SEHÂYÎ: İstanbullı'dur. Babası pâdişâh-ı ferîdûn-haşmetün matbah-ı hümâyûnunda tavukçı başı idi. Sene isnâ ve seb'in ve tis'â mi'enün Recebinde vefât itdi. Yiri mahlûl kalmagın mezkûr Sehâyî'ye babası yiri sadaka buyuruldu. Hâlâ hıdmet-i mezbûrda cân u gönülden evkâtın sarf itmek üzredür. Eyülükle efvâhda meşhûr ve sehâ-yı tab'ı elsîne mezkûr ve her an hıdmet-i erbâb-ı kemâl ve mülâzemet-i 'ışk-ı cevânân-ı hurşîd-misâl ile 'ayş u 'işretde ser-efrâz u kâmrân ve cûd ü ihsânla mümtâz-ı akrândur. Tabî'at-ı şî'riyyesi bed degüldür nîk olmakdan hâlî degül. Bu bir matla' u beyt anlarındur. Bu evrâka sebt olundu. Beyt :

Zahm-ı tîr-i yâr ile ey dil tolı kansın yine
Kaşlarınun yâyına benzer ki kurbansın yine

Diğer : Nice itsün kişi ragbet cihânun 'izz ü câhına
Mahabbet şekl-i mihnet âhirinde devletün let var

SIRRÎ Çelebi: Erbâb-ı kalemden mevlid-i ferah-fezâsı hümâyûnı Tarâbefzûn'dur. Yâr-ı latîf ü şâ'ir-i zarîf eş'âr-ı 'âşıkânesi makbûl-i tabâyî'-i erbâb-ı devlet ve güftâr-ı rindânesi pesendîde-i ehl-i fazîlet olup hemîşe mülâzemet-i a'yân-ı dîvân ve dem-â-dem mâyl-i sohbet-i sâhibân-ı 'izz ü şân olup 'ale'l-husûs bende-i hâs-ı Sultân Selîm-i pür-efâzıl olan Celâl Beg'ün hıdmetinde kesb-i kemâl idüp ser-âmed-i akrân u emâsil olmuşlar. Hatt-ı nesta'lık yazmada bî-bedel ve 'arûz u kâfiye vü mu'ammâda sâhib-hâl kimesnedür. Zihn-i dakîk-güsteri esrâr-ı İlâhiyye'ye mâlik ve tab'-ı pür-hakîki turûk-ı envâr-ı nâ-mütenâhiye sâlik olmagın Sırrî diyü mezkûr yârân-ı suhen-perver ve meşhûr-ı merdüm-i bahr ü berdür. Cümle-i eş'ârı letâfet-i tab'ına dâldür ve hasb-i hâl-i 'uşşâk-ı bî-mecâldür ve nezâketden hâlî degüldür. Bu gazel şâhid-makâlidür ki ser-be-ser vasf-ı sâkî ve izhâr-ı bâde-i nâb-ı iştîyâkdur tahrîr oldu. Gazel :

Şarâb-ı nâbı devr itdür zamân-ı 'ayşdur sâkî
Egerçi bezm-i dehrün nûş-ı câmı nîşdür sâkî

Münevver itmeliden meclisi ol şem'-i bezm-ârâ
Sürâhî kan yudar gamdan katı dil-rîşdür sâkî

Uyuşmuş kanlar ile her müjem tennûr-ı mihnetde
Kebâb ile tatlu başdan başa bir şişdür sâkî

Ele aldı ayaga düşmüş iken bâde-i gül-reng
Gönül yapmaga sa'y eyler ne hayr-endîşdür sâkî

Gözi tarrâc ider dil nakdini ana dönüp bakmaz
Terahhum eylemez Sırrî ne kâfir kişidür sâkî

Diğer : Didüm ki yoluna cân virürin ben degül ki ser
Ol âfet-i zamâne gülüp didi mâ-hazer

Âyîne-i hod ki turup karşı söyledi
Tûtî Efendi kendüyi görmüş gibi meger

Tîga yapışma bilüme kol toladun diyü
Ey şâh-ı hüsün beglere lâzım durur meger

Pür zenk sanma âyîne sûret değışdirüp
Eyler safâ ile sana açmazdan nazar

Sırrî safâda ‘ârızına öykünürmüş âb
Yüze gelince utanup ammâ yire geçer

Diğer: Yanuna alup rakîbi eyledün seyr-i çemen
Yanuna kalur mı ey serv-i sehi seyr eyle sen

Fî harfî’ş-şîn

Mevlânâ ŞEMSÎ-İ Bagdâdî: Ehl-i ‘ilm zümresinden râkım-ı hurûfun babasıdır. Rûz u şeb evkât-ı bâ-berekâtın kütüb-i mütedâvile mütâla’âsına sarf idüp kûşe-i kanâ’at ihtiyâr ve ehl-i rûzgârdan pergâr gibi kenâr çizüp ve devâm-ı devlet-i pâdişâhîye ve ‘izz ü rif’at-ı şehenşâhîye ‘ale’-d-devâm kıyâm göstermişti. Ol yegâne-i ferzâne ‘alâ-ragmı zamânihi pâdişâh-ı huçeste-fercâmun nâmına mesnevî bahrinde üç kitâb nazm itmiştir. Her biri makbûl-i fuzalâ-yı zamân ve pesendîde-i fusahâ-yı cihân olmuş. El-hak ol nîkû-hısâl olan perverîşin dil mazmûn-ı belâgat-nümûn bulmagla bî-misâl ve ser-âmed-i emâsil idi ve zebân-ı Fârisî’de nice nice kasîdeler na’t-ı seyyîd-i enâm ve menkâbet-i e’imme-i kirâm diyü derc kılmışdır ve tarz-ı gazelde ‘âşıkâne dîvân tertîb idüp makbûl-i ehl-i ‘îrfân olmuştur. Cümlesinden bir gazel-i ‘âşıkâne ve bir nice matla’-ı bî-bahâne kalem-i dü zebâna gelüp mestûr oldu. Gazel :

Bahtem kez şumâr-ı ahterân dâim rakam gîred
Eger rûy-ı tur bâned hesâb ez mâhken gîred ²⁸⁴

Ve ger hüsn-i hatet râ hûş nüvîsi der nazar âred
Muhâlest in ki ez hayret Diğer desteş kalem gîred ²⁸⁵

Çunân benişt murg-ı hatrem der gülşen-i kûyet
Ke’zîncâ hîzed ü âheng-i gülzâr-ı İrem gîred ²⁸⁶

Çesân sûz-ı dil-i sad-çâk ez merdüm nihân sâzem
Ki şehbâ âteş-i âhem zi her cânib ‘alem gîred ²⁸⁷

²⁸⁴ Yıldızların sayısından sürekli rakam alan bahtım senin yüzünü görürse aydan az hesap olur.

²⁸⁵ Eger senin ayva tüylerinin güzelliğini bir hoşnüvis görürse, hayretinden, artık eline kalem alması muhaldir.

²⁸⁶ Fikir kuşum senin mahallenin gülşenine öyle kondu ki, buradan kalkıp da ârem gülzarına yönelir mi?

Siyeh çeşmân-ı Bagdâdî be-Şemsî rehnümün geştend
Ki der mülk-i ‘Arab sâzed vatan terk-i ‘Acem gîred ²⁸⁸

Diğer : Eger rûzî misâl-i sâye uftem zîr-i divâreş
Ne hîzem tâ netâbed ber serem hurşîd-i ruhsâreş ²⁸⁹

Demî hemçün habâb ez câm dîdem kâmrân hodrâ
Velî çün çeşm beguşûdem nedîdem der miyân hodrâ ²⁹⁰

Zân dehân vezân miyân bûs u kenârem ârzûst
Nîst çîzî der miyân u sad hezârem ârzûst ²⁹¹

Bâsegân-ı tu âşînâ âşînâ neşodîm
Heme âdem şodend ü mâ neşodîm ²⁹²

Diğer : Sen çekdügün zamânda kadehden şarâblar
Tâcın göge atar ferahından habâb lar

Diğer : Mihrdür yâ mâh yâ Rab rûy-i tâbânun senün
Kim hezâran çeşm ile çarh oldı hayrânun senün

Diğer : Ey yüzi gül zülfi sünbül peykeri gül hırmeni
Sebz ü hurrem reng ü bûyundan melâhat gülşeni

Diğer : Rakîb işitdüm ol şâhı seversen
Bizi incitme Allâh’ı seversen

ŞEVKÎ Çelebi: Eben ‘an ceddin Haleb î’dür. Ekâbir ü eşrâf ve sâhib-devletân-ı ferhunde-eltâf içre Sâhib-zâde Ahmed Çelebi demekle meşhûr ve ahlâk-ı hamîde ve cemâl-i zîbende ile sahâyif-i devrân-ı tarab-efzâda mestûr ve elsîne-i efvâhda bülegâ-yı belâgat-nümâda mezkûr ve asl u neseble ebnâ-yı cihân içre pâk haseb ve ehl-i dil-i mütemevvil olmanın vâlid-i emcedi evkât-ı ferruh-sâ’âtin ticârete masrûf kılup akrân u emâsil mâbeyninde eyülûkle ma’rûf olmuştur. Binâen ‘alâ-zâlik mezkûr Şevkî dahi mezbûr şehirde ol kâr u bâra mebzûl idüp h’âceler içre makbûl olmuştur ve bi’t-tab’ ehl-i şevk olmanın bu denlü iştigâl ve mevâni’-i mu’amelât ile yine rûz u şeb zevk ü şevkden eksük olmayup rümûz-ı nûkat-âyât-ı ‘ulûma vâkıf olan erbâb-ı ma’ârif karîn ü hem-nîşîn olup letâyif-i ma’ânî-i şevk-engîz ve zarâyif-i zevk-âmiz ve esnâf-ı eş’âr-ı huceste berekât ve envâ’-ı ma’ârif-i zibende-nikâtı tahsîl ü tekmîl itmişdür. El-hak lisân-ı ‘Arabî’de pesend-i fusahâ ve makbûl-i zurafâ ve zebân-ı

²⁸⁷ Yüz yerden yarılmış gönlümün yanışını halktan nasıl gizleyeyim, çünkü geceleri ahımın ateşi her taraftan yükselir.

²⁸⁸ Bağdatlı siyah gözlüler, ‘Acem diyarını terk edip Arap mülkünde vatan tutsun diye Şemsî’ye kılavuz oldular.

²⁸⁹ Bir gün gölge gibi , duvarının altına düşersem, yüzünün güneşi başıma güneş gibi vurmadıkça kalkmam.

²⁹⁰ Bir an köpük gibi , kadehten kendimi mutlu gördüm, fakat gözümü açınca kendimi ortalıkta göremedim.

²⁹¹ O ağızdan öpmek ve o beli kucaklamak arzusundayım. Ortada bir şey yok, fakat yüz bin arzum var.

²⁹² Senin köpeklerinle tanışamadık, hepsi adam oldu da biz olamadık.

Fârisî ile Türkî’de ol cevân-ı nâzenîn bir derecede mümâreset ü müdâvemet göstermişdür ki esnâ-yı musâhabetde kelimât-ı fasâhat-beyânına mütekellimân-ı zamân âferîn ve ‘ilm-i edvârda ma’lûmât-ı şîrîn harekâtı şöyledür ki hîn-i terennümât-ı tarâvet-nişânına müterennimân-ı fasîhü’l-beyân tahsîn dimiş. Mukarrer ve ol yâr-ı pâkize-güher henüz egerçi cevâhir-i ma’ânîye nev-hevesdür lâkin eş’âr-ı dürer-bârı makbûl-i gûş-ı herkes olmışdur. Bu bir kaç beyt-i ‘âşıkâne anundur tahrîr oldı. Nazm :

Hasret-i ebrun ile ey meh hilâlün kaddi ham
Lâlenün bagrına hâlün urdı yir yir dâg-ı gam

Hâk olurdum yolun üzre bulsam ey serv-i revân
Ben gubârun üstine tâ kim basaydun bir kadem

Dâg-ı pür-hûnum devât şerh-i sînem levh-i zer
Yazmaga dil mâcerâsını eliflerdür kalem

Nazîre li-mü’ellifihi :

Zerrece yok bildiler gûyâ devâsı derdimün
Kime sorsam anun için dir leb-i dildârı em

Sînem üzre sanma dâg ile elifdür şâh-ı gam
‘İşka serdâr eyleyüp virdi bana tabl u ‘alem

Geç günâhumdan dil-i dîvânemi yaz deftere
Didüm ol mâha didi dîvâneye yokdur kalem

Tîrini pehlûya çekdüm çekdi aldı ‘Ahdî’yâ
Anun için kanlar aglar çeşm-i zahmum dem-be-dem

Bu bir nice beyt-i âbdâr dahi ol şâ’ir-i ferzânenündür. Beyt :

Pençe-i sâkî ile câm-ı mey-i gülgûna bak
Mîhr-i ‘âlem tâbdur san beş hilâl üstindedür

Murg-ı dil sayd itmege dâneyle dâm olmuş durur
Zülf-i ‘anber bûy-ı cânânun ki hâl üstindedür

Sînen üstinde elifler üzre dâgun Şevki’yâ
Bir gül-i bî-hardur gûyâ nihâl üstindedür

Mevlânâ ŞUHÛDÎ: Karaamid’dendür. Aslında ‘Acem-zâde’dür. ‘İlm-i zâhire rûz u şeb tâlib ü râgıb olup meleke-i rasîhe tahsîl idüp dânişmend oldukdan sonra terk-i kayd-ı dünyâ-yı bî-bekâ kılup ‘âlem-i fakr u fenâ ihtiyâr kılmış. Tasfiye-i bâtın itmek arzûsıyla ser-pâ bürehne siyâhat iderek etrâf-ı cihâna revâne ve dervîşler içre ma’rifetle meşhûr-ı zamâne olup giderek ol vâdîden vâz gelüp bir kaç zamândur ki gâh Rûm İli’nde ve gâh Anadolu cânibinde hıdmet-i kuzât idüp evkât-ı ‘azîzin niyâbete nasb itmiş. Hadd-ı zâtında şûh-tab’ ve hûb-sohbet ve zât-ı pâki ma’rifetle ârâste ve zihn-i sâfî hikmetle pîrâste esnâf-ı şî’re kâdir ve zebân-ı Fûrs ü

Nevâyî'de mâhir şu'arâ-yı Rûm içre edâ-yı pâk ile meşhûr ve hüsn-i i'tikad ile efvâhda mezkûr eş'ârı rindâne ve güftârı 'âşikânedür. Bu bir kaç matla'-ı Fârisî mâsadak-ı hâl ve şuhûd-ı makâl diyü sebt olundu. Ebyat:

Çeşme-i çeşmem gehî pür-âb ü geh pür-hun şeved
Yâ Rab âb u âteş ez yek çeşme bîrûn çün şeved ²⁹³

Merâ cuz hûn-ı dil der gam nedîmî nîst hemdem-i hem
Dilem râ cuz hayâl-i tu refikînîst mahrem-i hem ²⁹⁴

Diğer : Mu'attar ideli rûy-i zemîni zûlf-i pür çinûn
Derûnı kan ile toldı hasedden nâfe-i Çîn'ün

Diğer : Meclisünde şevk ile yanmaga ey şâh-ı cihân
Mûmdur tende fitîl-i magz ile her üstühân

Diğer : Âftâb-âsâ eger 'arz eylesen dîdârımız
Görinür her zerrede bir vechile ruhsârımız

Diğer : Zülfün altında görüp hâl-i siyâhun didi dil
Gülşen-i Çîne düşen nâfe-i âhûdur bu

Diğer : Hat-ı sebz ile cânânun Şuhûdî la'ldür bârı
Zümürüdle murassa' hokka-i yâkûtdur gûyâ

ŞERHÎ: Zümre-i ehl-i kalem ve perverde-i erbâb-ı keremdür. Deyr-i cihânda âsûde-hâl ve müreffehü'l-bâl olan beni âdemdendür. Nâm-ı ferhundesî sâhibân-ı zeyn katında 'Abdü'l-Hüseyn dinilür. Evkât-ı hamsede niyâz-ı 'ışk-ı dil-berânı kendüye farz-ı 'ayn bilüp asl-ı pâki ve neseb-i tarab-nâki merdüm-i 'âlî-tebârdur ve peder-i nâmdârı nevâhi-i Bagdâd'da kal'a-i semevât dizdârıdır ve kendü dahi kal'a-i mezkûrda 'Azablar agasıdır. Binâen 'alâ-zâlik basît-i arzda vücûd-ı bâ-cûdı çeşm-i himmetle gözler a'lâ merâtibi. Üslûb-ı muhâsebede hünerver ve ahkâmda kitâbet-i sâhib-erkâm ve siyâkati dil-peziir ve akrânına gâlib ü bî-nazîr ve tarz-ı eş'ârda tab'ı gâyetde tâlib ü râgıb rûz u şeb tettebbu'-ı nazm-ı âbdâr-ı dürer-bâr-ı yârân idüp ekser-i şu'arâ ile yâr u musâhib ve fûnûn-ı suhene üç zebân ile peyrev-i erbâb-ı dil olup reng-i gazelde zebân-ı dürer-bârı câri vü kâyıldür. Kelimât-ı gamzedâyî ile gamze-i cevânân-ı gonce-dehân idüp efgende-i sehî-kaddân-ı nâzûk-miyân ve nâvek-efgen-i çeşm-i terkân-ı bedmeste nişâne olmanın hemîşe dil-i mecrûh ile ekser-i ebyâtında evsâf-ı bütân-ı yegâne ile kısadur ve dilin şürûh kılmadan hâlî degüldür. Bu ebyât-ı pür-nikât hasb-i hâlidür. Beyt :

'İşk ehli dergehünde can terceman çekerler
Ey pâdişâh-ı hûban gör kim ne can çekerler

Diğer: Kaddün görünce dil nice dürlü cefâ çeker

²⁹³ Gözümlün çeşmesi bazen yaşla, bazen kanla dolar. Ya Rabbi aynı çeşmeden hem su , hem ateş nasıl çıkar?

²⁹⁴ Bana, gamda yüreğimin kanından başka bir hemdem nedim yok. Senin hayalinden başka, gönlüme mahrem olacak arkadaş yok.

‘Âşıkı gör kapunda ne resme belâ çeker

Vaslun gamıyla dil elem-i bî-girân çeker
La’l-i lebün hayâline her demde kan çeker

Diğer : Habîbümsiz bana agyâr-ı yekdil hep hüçûm itdi
Belürdi her taraftan şimdi fitne fitne-kârumsız

Diğer : Tatalum şerh-i cefâ itmedi Şerhî senden
Sen de insâf idüben arada gör Allâh’ı

ŞÛRÎ: Bursa kurbünde Eskişehir’ dendür. ‘İlm-i zâhire iştigâl kılurken terk idüp ber-muktezay-ı mahlas şûride-hâl ve kayd-ı dünyâdan farîgü’l-bâl olup dergâh-ı felek-bârgâh-ı Mevlânâ-yı Rûm’un âsitânesine yüz sürüp Hayretî’nün birâderi Sîne-çâk’le rûz u şeb bî-bâk seyr ü sülûk ve temâşâ-yı her mülûk itmegi ihtiyâr itmiş. Müddet-i medîd ve ‘ahd-i ba’iddür ki Ka’be-i şerîfde şerrefehallahu ²⁹⁵ mücâvir olmışdur. ‘İlm-i edvârda hûb ve nakş u savt bağlamada usûlî kâyim ü mergûbdur. Eş’ârı tasavvuf-âmîz ve güftârı mahabbet-engîz ve ma’lûmâtı musâhabet ile şi’rinden garrâ diyü meşhûr ve ba’zı nazmı dahi makbûl-i tabâyi’-i şu’arâ-yı şûride-hâl ve pesend-i nüdemâ-yı perîşân-me’âldür. Bu şi’r anundur. Nazm :

Can virmeyicek derd ile dermân ele girmez
Cânun sakınursan yûri cânân ele girmez

Bu kûy-i harâbâtta erbâb-ı vefâya
Hayl-i gam-ı cânan gibi yârân ele girmez

Şîrin lebün kandine ey çeşme-i hayvân
Şûrî gibi bir vâlih ü hayrân ele girmez

ŞEVKÎ: Mısır’dan ‘Abdullah oğlıdur. Dânişmend tâifesindendür. Ma’rifet-i cüz’î ve küllî ile tettebbu’-ı eş’âr-ı mütekaddimîn ve cüst ü cûy-ı güftâr-ı fuzalâ-yı müteahhirîn itmede bî-bedel ve hadd-ı zâtında ehl-i şevk olup ‘ayş u işrete mâyil ve tâlib-i kelimât-ı ehl-i dil olduğu ecilden ol rind-i cihân sâhib-meşreb diyü meşhûr ve efvâh-ı a’dâda süst-mezheb diyü mezkûrdur. Hayfâ ki tarîkindan henüz ber-murâd u kâmrân olmamışdur. Ziyâde nâ-murâd kimesnedür. Töhmet-i ilhâdla hakkında dinilen söz isnâd idügi ehl-i ‘irfân yanında azharu mine’ş-şems ²⁹⁶ dür. Tabî’at-ı şi’riyyesi hûb u mergûbdur. Cümle-i nazmı muvahhidâne ve rindâne vâkı’ olmışdur. Bu bir kaç matla’ anundur. Ebyât :

Tutuşdı şem’-i şevkünle ‘aceb pervânedür gönlüm
Tolaşdı bend-i zülfünle igen dîvânedür gönlüm

Diğer : Göz yaşı huzûrum komadı bir nice demdür
Bilmem ki bu ‘âlemde benüm ol dahi nemdür

²⁹⁵ Allah onu şerefli kılsın.

²⁹⁶ Güneşten daha parlak

Diğer : Terk ü tecrîd-i fenâ ol ey gönül ir vahdete
 Elfi vâhid vâhidi elf anla düşme kesrete

ŞÂNÎ: Vardar Yenicesi'nden Garibî'nün kız karındaşı oğludur. Dânişmend tâifesindendir. Rûz ü şeb tahsilde olup 'ulûmı tekâmîl itmeden hâlî degüldür. Şân-ı şerîfi ve tab'-ı latîfi nazma râgıb ve mazmûn-ı meşhûn bulmaga tâlibdür. Egerçi gülîstân-ı ma'ânîde henüz gonce gibi nühüftedir lâkin eş'âr-ı revânından dil-i hûn-beste pür-şükûfte olur. Ümmîddür ki gülşen-i cevânîde zâtı nahl-i hünerden behremend ve ma'lûmât ile kendü akrânı içre ser-bülend ola. Bu bir kaç matla' u beyt anlarundur bu evrâka sebt olundu. Ebyât :

Bâg-ı ruhunda ol sanemün hatt-ı müşk-bâr
 Sahn-ı İremde tâze açılmış benefşe-zâr

Diğer : Bâdı nazarda 'âşîka ey şûh-ı şîvekâr
 Câdû gözün kırısmeler eyler geh sihr ider

Diğer : Ne bilür kâmet-i dil-cûn elemin bâd-ı seher
 O bir âvâre durur kendi hevâsında yeler

Diğer : Tîg-ı tîzünle terâş eyle ruh-ı rengînün
 Karasın görmeyelüm mûy-ı hat-ı müşkînün

Tarama şâne ile zülf-i 'anber-efşânun
 Hâtırın yıkma Efendi bir alay miskînün

Diğer : Cefâ fenninde artuk nüsha ma'lûmun degül ammâ
 Mahabbet dâstânı yâd olunsa okıdum dirsın

ŞEFİ'Î: Emîr-i huçeste-ensâb ve şefâ'at-bahş-ı şeyh ü şâb zümresindendir. Lisân-ı 'Arabî ve Fârisî'den bir mikdâr behremend ve tarz-ı şî'ri bir pâre dil-bend olmanın pesend-i erbâb-ı hûşmend olmuştur. Bu bir iki matla'-ı hûb anundur sebt olundu. Nazm

Nî'met-i vasla el irmezse yiter hûn-ı ciger
 Ey gönül ma'zûr tut hayru't-ta'âmı mâ hadar ²⁹⁷

Diğer : Göz açdırmaz atar tîrin müjen bu haste-hâl üzre
 Bizümle muttasıl ol gamzeler ceng ü cidâl üzre

ŞEMSÎ-İ Dîvâne: Karamânî. Pür-gûylukla nâ-mevzûnlukda şûhî-i sâni kuzât zümresinden ve bu devrün şu'arâ-yı nâ-mevzûn ve nüdemâ-yı nâ-meymûndandır. Vilâyet-i Karaman'da kasaba-i Eregli'ye karîb Zanîne nâm karyedendir. Şahs-ı garîb sûret ve merd-i 'acîb hey'et tab'-ı nâ-mevzûnla meşhûr-ı zenân-ı zamân ve edâ-yı nâ-merbût-ı dûnla mezkûr zebân-ı 'âlî-suhenân-ı cihân Uurlı Şemsü'd-din dimekle ma'rûf ve güftâr-ı gün-â-gün ile meze-i rûzgâr diyü mevsûf esnâ-yı musâhabetde garîbe etvâr ve evzâg-ı nâ-hem-vârdan hatt olunur. Kendü

²⁹⁷ En iyi yemek hazır olandır

zu'mı ile yegâne-i cihân ve ferîd-i zamân oldım sanup bir tarîkle mülâzım olup yigirmi beş akçe müderris olmuşlar. Ber-muktezâ-yı rûzgâr beyt

Felek be-merdüm-i nâdân dehed zimâm-ı murâd
Tu ehl-i fazlî vü dâniş hemîn günâhet bes ²⁹⁸

zât-ı habâset-şi'ârına hamâkat gâlib ve sıfât-ı kesâfet-nisârına zillet münâsib olmagla vechin mine'l-vücûh 'ilmden sûdmend ve tarîk-ı dânişmendlikden fâide bulup hûşmend olmamışdur. Derse kâdir olma[ma]ğın ol medreseden ferâgat idüp ol vâdîden ma'arife mâlik olma yup kaza semtine sâlik düşüp ol târîhde Anadolu kâdî 'askeri olan 'İvaz Paşa Efendi'nün üzerine kazâ-yı âsmânî ve belâ-yı nâgehâni olup başdan savmak için Mollâ eger kâdîlıktan hazzun var ise akrân u emâsil ile imtihan olmak gerekdür diyü cevâb virür. Çâr u nâ-çâr kendü emsâl bir nice nâ-hemvâr-ı cühhâli bulup anlarla imtihanâ râzı olmagı revâ görür. El-kıssa delûlûkle hasma galebe şeklin gösterdükde 'İvâz Efendi mezkûra âferin bire kellecik dir tek tek sakalına gülüp tahsîn itmiş diyü her kanda varsa takrîr ü tahrîr idüp tefâhür ider. Ba'de zamân kazâ-yı Katîf mahlûl olur. İşte tâli'ünde bir kâdîlık düşdi gidersen didükde ol merd-i mechûl giderin diyü kâbul eyler. Mezkûr Efendi tekrâr ider eger gitmezsen talâk-ı selâse üzerine olsun mı diyü cevâb virür imdi Katîf kâdîlığı düşdi didükde ihtiyâr idüp kazâyâ râzı olmuşlar. Mezkûra ba'zı yâran tahsîn yüzinden dirler ki şânunuza lâayk kâdîlık degüldür niye râzı oldun diyü riş-hand itdüklerinde n'eyleyüm şu makûle bir hâl vâkı' oldu eger 'avret boşamak vehmi olmayaydı kabûl eylemezdim diyü cevâb virür. Yârâna bu hitâb-ı müstetâbı hezl-güne gelmenin gâyetde hazz idüp gülmedin bî-tâb düşerler ve başına mezelemeg için meges-vâr üşerler. Ba'dehu üftân u hîzân Katîf'e revâne olup gitdükde ol zeminün âb u hevâsı mizâc-ı hâbîsine sâz-kâr u muvâfık olmamagla ol diyârı zem tarîkıyla kadh idüp bir gazel sebt oldu. Gazel :

Teb-i hasret cânımı gâyet ile itdi nahîf
Odlara yansun yıkılsun dilerüm mülk-i Katîf

Ey Süleymân-ı cihan şöyle za'îf itdi belâ
Göge of dir isen uçar hem çü pür mûr-ı za'îf

Gözlerüm yaşını bahreyne revân eyledi gam
Dervîşün yâdına gark-âb-ı belâ oldu hayîf

Elde avucda nesne yok idem 'azm-i sefer
Bir tehî dest kaldı gurbetde bî-çâre za'îf

Kaldım ayakda eyâ kân-ı kerem menba'-ı cûd
Dest-gîr ol Şemsîye bir çâre eyle ey latîf

Lahsa'yı da bu üslûb üzre ta'rîf idüp teşrîf buyurmuşdur. Eyzân gazel :

²⁹⁸ Felek câhil insanlara muradın dizginini verir. Sen fazilet ve bilgi ehlinin, bu günah sana yeter.

Seng-i mihnetle yapılmışdur binâsı Lahsa'nun
 'Âkıbet gamla yire giçer esâsı Lahsa'nun

'Âşık-ı dîdâr olup ider derûn-ı dilden âh
 Gözlerüm yaşı gibi çok mâcerâsı Lahsa'nun

Kâkülün serdâr olup serhadde çok başlar keser
 Şâh-ı 'âlem geçinür mîr ü gedâsı Lahsa'nun

Bunda kalanun başı vü gidenün malı gider
 Ehl-i 'ışk olur perîşân bu hevâsı Lahsa'nun

'Âşık-ı bî-çâreler Şemsî niçe itsün karar
 Yok durur bir gönül egler mehlikâsı Lahsa'nun

Bu makta'-ı nâ-mevzûn dahi gazellerinden nümûnedür. Beyt :

Şems degme bir üstâd tab'una şâgird olmazken
 Mürşid-i 'ışka şâgird oldu üstâd gördüğün gönlüm

Fârisî gazelleri bî-hadd ü bî-ma'nâ edâları lâ-yu'addur. Ahyânen nazmında bir mısra' veyâhud bir beyt-i mevzûn u ma'nâ bulunursa şüphe vü şâyibe yok ki anı gayrden sirkat itmiş. Sâbıkan Lahsa beglerbegisi olan Sâlih Paşa oğlu Mehmed Paşa hazretleri Lahsa'dan münfasıl olup tekrâr mukarrer buyrulduğu esnâda bir târîh-i garrâ buyurmuşlardur mezeden hâlî olmadığıçün hâlî üzre sebt oldu. Nazm

Bihamdillâh Mehmed Paşaya Lahsâ makarr şod
 Şeb-i zulmet berefte vü hûş âmed rûz bihter şod ²⁹⁹

Yekî seyyâre ber rif'at yekî der gûşe-i 'uzlet
 Yekî tâli'-i nîk-baht ü yekî diger bed ahter şod ³⁰⁰

Yekî râ genc ü ni'met yekî râ renc ü zahmet kerd
 Yekî ber taht yekî tahtü's-serâ hâlî mükedder şod ³⁰¹

Mukârin kerde-est şevk-ı cemâleş yek si'at-i lemsî
 Sa'âdet-i mâh tâli' u heme 'âlem münevver şod ³⁰²

Be-gû zâg-ı felek râ tûtiyân râ şehd bedih Şemsî
 Be-gû târîh-i û hemçün bedeh kand-i mükerrer şod ³⁰³

²⁹⁹ Allah'a hamdolsun Lahsa Mehmed Paşa'ya makarr oldu. Karanlık gece bitti, gün hoş geldi, daha güzel oldu.

³⁰⁰ Biri yücelirken biri uzlet köşesine çekildi. birinin talihi iyi, öteki talihsiz oldu.

³⁰¹ Birine hazine ve nimet, birine çile ve zahmet verdi. Biri tahta otururken biri toprak altında, kederli bir hal aldı.

³⁰² Cemalinin şevki dokunacak kadar yaklaştırdı. Ayın mutluluğu doğdu ve bütün âlem aydınlandı.

³⁰³ Şemsî, feleğin kargasına söyle tutilere bal ver, de ki onun tarihi iki şeker gibi mükerrer oldu (H. 950)

Hakkâ ki dîvânın eline alup söylediği mühmelâtın tarka-i hey'et ile 'acîbe-sûret ile okurken zevk ü safâsından kendüyi ferâmuş idüp harekât-ı 'acîbe ve hâlât-ı garîbeler eyler ki her gören bî-ihyâr zevkinden yıkılıp bir zamân bî-hûş olmak mukarrerdür. Ana binâen bu mecma'-i zurafâya yârân-ı suhendân ibrâmı ile erkâm olundu ve Katîf kâdîlığında Ferec nâm bir mültezim-i serencâm vefât idüp esbâb-ı mîrîden dellâlde harâc alup satıldukda bu iki beyti dimişdür. Bu beyitlerle haylî şâdmândur ve tefâhûri fevka'l-beyândur. Nazm :

Mültezim olalı Katîf'e Ferec
Derd ü gamdan bulmadı gönli ferec

Mâl-ı mîrî yiyenün hâli budur
Giyerüz esbâbı dellâlde harac

Sâbikan serdâr-ı 'âlî-mikdâr olan vezîr-i a'zâm Mustafâ Paşa vefât idüp yerine vezîr-i a'zâm olan Sinân Paşa diyâr-ı şarka 'asâkîr-i zafer-mü'essire serdâr-ı feth-âsâr nasb olundukda bir târîh-i meze-dâr-ı zîbâ diyüp müşârüniyleh paşaları ol târîh-i ra'nâda zikr itmışdür tahrîr ü tastîr olundu. Şi'r :

Bi lisânî 'Arabî kâle Şemsî târîh
Mustafâ Paşa râhe ebeden fecâe Sinân ³⁰⁴

ŞEYDÂ: Rûm İli'ndendür. 'Âşık Çelebi'nün şeydâsı demekle meşhûr ve envâ'-ı hutût yazmagla efvâhda mezkûrdur. Sâbikan perî-peyker ve mâh-manzar dil-berlerin sevdâsıyla vâlih ü şeydâ olup cevânib-i 'âleme bî-ser ü pâ seyr ü temâşâ iderek zevk almadığın ol rindînün nâm-ı ferâgat idüp dânişmend olmak ârzûsına düşer. El-hâsıl ol hâletden dahi behremend olmayacak Karaman Bâzârı'nda kıssa ve şeyyâdlık peydâ idüp kuvvet-i yevmiyye peydâsında 'âciz iken 'Âşık Çelebi İstanbul'a gelür vâsıt ile ana âşinâ olur. Ol esnâda 'Âşık Çelebi'ye Üsküb kâdîlığı virilür. Anunla bile gider ve bi'l-cümle mu'ammâ ve gazel ve şebistân-ı hayâle mütâla'a itmekle şeyyâd ismi kalıp ba'z ile şeydâ olur. Bu beyt anundur. Beyt

Şöyle müştâk -ı cemâlün geçer ey dost gözüm
Ruhun âyînesine baksam eger çâr olur

ŞİNÂSÎ: Rûm İli'nde Kilî'dendür. Ehl-i kalem zümresinden geçinür. Zurafâ içre rû-şinâs ve şu'arânun ebyâtın bî-kıyâs okıyup yazmışdur. Evkâtın kitâbet-i eş'âr-ı pür-sûz-ı erbâb-ı mihr ü vefâya ve güftâr-ı dil-efrûz-ı ashâb-ı sıdk u safâya bezl itmek üzredür. Bu matla'-ı rengîn anundur. Matla' :

Cân atup hançerüne karşı gönül vara gibi
Bir içim su dileyü tîguna yalvara gibi

³⁰⁴ -Şemsî, Arap diliyle tarih söyledi : Mustafa Paşa ebedî olarak gitti ve Sinan geldi.

Fi-harfi's-sad

SABRÎ Çelebi: İstanbullı'dur. Ehl-i dîvândan ism-i şerîfi 'Abdurrahman ve zât-ı latîfi perverde-i ehl-i 'irfân tab'-ı mustakîmi kemâl ile mevsûf ve zihn-i selîmi sabr-ı cemîl ile ma'rûf müddet-i medîd ve 'ahd-i ba'iddür ki ol nîkû-nihâd diyâr-ı Bagdâd'da tavattun itmiş şehir-i mezbûrda muhâsebe ve rûz-nâme hîdmetine nasb olunmuşdı. Âhir bir sene mikdârı Meşhedeynü'ş-şerîfeyn mütevellisi oldı. Hâliyâ ol gevher-kân-ı ma'rifet dergâh-ı mu'allâda mülâzemet-i erbâb-ı sa'âdet ve hîdmet-i erkân-ı devlet itmededür. Ümmîddür ki 'ankarîb be-kasd-ı maksûda irüp ber-murâd ola. Hakkâ budur ki zebân-ı Fârisî'ye bir derecede mümâreset göstermiş ki Fûrs dilinde eş'âr-ı safâ-bahş-ı ve güftâr-ı dil-keşi fusahâ-yı 'Acem şî'rinden edâsı ve ma'nâsı asla ve kat'â fark olunmaz ve tarz-ı kasîdede mânend-i Zâhîr-i Feryâbî ve fenn-i mu'ammâda Rûm'un Şihâb'ı ol zü-fünûn-ı 'âlem makbûl-i benî-âdemdür. Esnâ-yı musâhabetde tab'ı şûh ve üslûb-ı mu'ammâda bir mertebede rûsûh bulmuşdur ki ba'zı ebyâtdan kâyil-i mu'ammâ diyü kasd itmemiş mezkûr remz ü îmâ ile ve kavâyid-i mu'ammâ ile bir ism peydâ ider ki 'akl-ı 'ukde-küşâ küşâyışinden ve feth ü fütûhından vâlih ü şeydâ ve 'aciz ile gûyâ olur ve sanâyi'-i şî'rde kâmil-i şâ'irân-ı cihân ve 'arûz u kâfiye bilmede yegâne-i zamân selâset-i inşâ ile Vassâf-ı devrân ile tevâmân ve aksâm-ı şî'rün kavâid-i cüz'î vü küllîsine kâdir ve her bir fende üstâdân-ı pîşîn gibi mâhir. Zîrâ ki ebyât-ı şu'arâ-yı mütekaddimîn ve kelimât-ı fuzalâ-yı müteahhirînün dîvânların tettebbu' idüp cümlesinün matla'ların **Câmi'ü'n-Nezâyir** yazmış ve ba'zısına nazîre-i bî-nazîr dimiş ki ehl-i dil içre dil-pezi ve makbûl-i fusahâ-yı ekâbir olmuşdur ve mezbûr Bagdâd şehrinde olan şu'arâya ve 'ulemâ ve sülehâya ve fukarâya envâ'-ı insâniyyet ve ol diyâra 'Arab u 'Acem'den gelen fukarâ ve zurafâya ri'âyet idüp her birisin eltâf-ı cûd ile menzil-i maksûdına ırgürmüşdür. Gâyetde eş'âr-ı 'âşıkâne ve güftâr-ı rindânesinden bir kaç Fârisî matla'-ı âbdâr ki hasb-i hâl-i efkârdur ihtisâr üzre sebt olundı. Ebyât :

Zahmî ki zi tîr-i tu resed ber dil-i çâkem
Çeşmî şevved ü girye koned ber ser-i hâkem ³⁰⁵

Der tarîk-ı 'ışk-bâzî in ten-i hâkî-nihâd
Âhir ez 'ışk-ı tu ey şûh belâ ez pâ fütâd ³⁰⁶

Hüsn-i turâ kıyâs be-Yûsuf nemîkonem
Devrân-ı hüsn-i tust tekellûf nemîkonem ³⁰⁷

Zi tâb-i mey şevved her geh ki gul gul rû-yı zîbâyeş
Zi hayret mîşevem medhûş ü mahrûm ez temâşâyêş ³⁰⁸

Dâd ez hicr ü visâlem gam-ı 'ışk-ı tu ferâg

³⁰⁵ -Parçalanmış yüreğime senin okundan gelen yara, bir göz olur da mezarımın başında ağlar.

³⁰⁶ -Âşıklık yolunda bu toprak özlü vücut, ey şûh belâ, senin aşkından sonunda elden ayakta düştü.

³⁰⁷ -Senin güzelliğini Yusuf ile kıyaslamıyorum, bu çağ senin güzelliğinin çağıdır, abartmıyorum.

³⁰⁸ Şarabın verdiği kızarıklıktan, güzel yüzü ne zaman gül gül olsa, hayretten kendimden geçiyorum ve onu seyretmekten mahrum kalıyorum.

Hest ‘âşık belî ez huld u cehennem fârig ³⁰⁹

Bir kaç mu’ammâ-yı dil-küşâ dahi anların netâyic-i tab’ındandır sebt olundu. Mu’ammâ be ism-i ‘Îsâ

Hâk-i râh-ı şehî ki âverdî
Ez pey-i tûtyâ berâyı meneş

Ey sabâ kâhilî mekon ber-hîz
Hemçü surme be-dîde der fikenêş ³¹⁰

Mu’ammâ be-ism-i Bilâl

Zahm-ı tîg-ı ân nigâr-ı pür-kîne
Ez pey-i hem nümûde ber sîne ³¹¹

Velehu mu’ammâ be ism-i Behrâm

Sünbül ki hem çû ân hatt-ı reyhan ber-âmede
Ez zülf-i yâr dûr perîşan ber-âmede ³¹²

ve lehu mu’ammâ be-ism-i Seyyid

Hest ahvâl-i mâ ez û müşkil
Beste-i zülf-i yâr bâdâ dil ³¹³

Bu bir iki Türkî mu’ammâ dahi anlarındır. Mu’ammâ be-ism-i ‘Alî :

Gel gel ki yoluna gözi yaşından ey püser
‘İşk agniyâsı her biri saçdı birer güher

Mu’ammâ be-ism-i Hamid:

Giriftârı olaldan yumamaz göz
Dil ol ebrû kemandan gice gündüz

Mevlânâ Hilâlî’nün bir matla’ından ‘Ârif ismin istihrâc itmişdür. Matla’ :

Âhir ey hûn-rîz-i men yek dem be-hûnhârî be-bîn
Çeşm-i rahmet bâz kon sû-yı giriftârî be-bîn ³¹⁴

Mevlânâ Nâsır-ı Neccârî’nün bu matla’ından ism-i Mîr istihrâc kılmış. Matla’ Be ism-i Mîrek

³⁰⁹ Senin aşkının gamı hicrandan ve kavuşmadan beni fariğ kıldı. Evet, âşık cennet ve cehennemden fariğdir.

³¹⁰ Benim için sürme olsun diye getirdiğin şahın yolunun tozunu, ey saba tembellik etme, kalk da sürme gibi gözüme serp.

³¹¹ O kinli güzel, ardarda sineme kılıç yarası açtı.

³¹² Tıpkı o reyhan tüyler gibi biten sümbül, yarin zülfünden uzakta perişan bir halde bitti (yeşerdi).

³¹³ Bizim halimiz ondan daha müşkildir. Gönül yarin zülfüne bağlansın.

³¹⁴ Ey benim kanımı döken, bir an olsun bu hunharlığa bak, acıma gözünü aç da ben tutsağa bir bak.

Subh-dem terk-i hâb mî goftem
Sâye râ âftâb mî goftem ³¹⁵

Ma'lûm-re'y-i erbâb-ı keremdür ki mu'ammâ-yı hod aslında bir mübhem nesnedür ki 'ale'l-husûs mu'ammâ tarîkıyla rakam olmuş. Beytten kavâyid-i mu'ammâ ile bir ism peydâ itmek ziyâde müşkil ve pesend-i ehl-i dildür. Zîrâ ki Sultân Hüseyin Baykara devrinde Pehlevân Mehmed nâm bir mu'ammâ-yı nîk-encâm bunlara benzer şu'arâ-yı zamânun ebyâtından bir iki ism peydâ idüp Hazret-i Nevâyî'nün hıdmetine iletür. Mezkûra hezerân hezâr 'izzet ü hürmet idüp erbâb-ı hüner içre nâmdâr itdükdün sonra tab'-ı mustakîmi hakkında bir risâle-i 'azîmi zuhûra getirüp sebt itmiş. Bunların hod nice nice bunlara benzer üstâdân-ı zamâna beyitlerinden isimler istihrâc idüp meşhûr ü makbûl-i merdiyân-ı ferzâne olmuşdur. Bu Türkî rubâ'î dahi anlarındur. Ruba'î

Sun nûş idelüm şarâb-ı nâb ey sâkî
Turma kerem it eyle şitâb ey sâkî

Tâ kim çıkuben başa şarâb ey sâkî
Ref' ola aradan bu hicâb ey sâkî

Diğer : Zülf-i miskîn ile ey dost hevâdâr oldum
Ne belâ-yı siyeh imiş ki giriftâr oldum

Diğer : La'lünle câm bâde olaldan emiş karış
İtdi sürâhinün açup işi serzeniş

SÂBİRÎ Çelebi: İstanbullı'dur. Kuzât zümresinden seyyid-i 'âlî-neseb ve hüsn-i i'tikâd ile pâk-mezheb ve kazâ ve kadere râzı vü sâbir ve emn ü emânet ve dîn ü diyânetle kâdî-i fukarâ ve ekâbir zât-ı huçeste sıfâtı ma'ârifle pîrâste ve tab'-ı nezâket-nümâsı kemâl ile ârâste ve mazmûn-ı belâgat-nümûn ile emîr-i hümayûn gibi emîr-i kelâm tahayyülât-ı bârîk ile Şeyh Kemâl gibi makbûl-i havass u 'avâm ve eş'ârı bir mertebede muhayyel ü musanna'dur ki zurafânun ittifâkı budur ki Rûm'da Zâtî ve Emrî'den sonra hallâk-ı ma'ânî ve akrânınun serâmed-i zamânı olmaga erzânîdür. Zîrâ ki güftârında hâs ma'ânî bî-hadd ü lâ-yu'addur. Mâsadak-ı hâl ve şâhid-i makâl bir gazel-i bî-bedel rengîn-i zîbâ ve bir kaç matla'-ı pür-mesel ol şâ'ir-i nîkû-hisâlündür bu evrâkda sebt olundu. Gazel :

Degül bu kavs-ı kuzah âh idince ben haste
Yeşil kızıl tütünüm oldı çarha peyveste

Kararsa geçse n'ola benzi nâfe-i Çînün
Hevâ-yı kâkülün itmişdür anı dembeste

Dilerse kanımı döksün ko çeşm-i pür mestün
Dem-i safâ da anun gibi hoş gelür meste

³¹⁵ Sabah vakti uykuyu terk ediyordum, gölgeye düşmüş gün ışığı diyordum.

Ruhun varaklarına öykinürmiş al kâğıd
Bilür ne reng olacağın gireydi bir deste

Lebün dirisi geçerken Mesîh Sâbirî'yi
Revâ mı gezdiresin ey tabîb-i dil-haste

Ebyât : Emsem lebün didükce ağız açmadı nigâr
Yokdan gelür ne söylesem ol şûh-ı şîve-kâr

Dilden şikâyet dehen açdı çü zahm-ı ten
Dil yardımını itse gelüp hancerün ne var

Diğer : Çekmeden bâr-ı gamın kâkül-i 'anber-bûnun
Düşdi ey saçları sünbül göbeği âhûnun

Virme gîsû-yı dil-âvîzine dil cânânun
Göz göre agzına atılma bir ejderhânun

Diğer : Sebze-veş dîdede bu 'aks-i hat-ı cânâne
Benzer ol revzen içindeki biten reyhâne

Cânı bir katre siyeh kan dimiş ehl-i hikmet
Benzedirse n'ola dil hâl-i leb-i cânâne

Ol kadar atdı dile yâr kamış oklarını
Döndi gönlüm şu neyistanda yatan aslane

Diğer : Bir toz kopardı hattı çıkınca 'ızârdân
Hiç gün yüzi görünmez olupdur gubârdân

Deryâ-sıfat çek ol dür-i şehvârı sîneye
'Agyâr-ı hâr u has baka tursun kenârdan

SAFÂYÎ Beg: İsm-i şerîfi Ahmed Çelebi ve mevlid-i latîfi Konya'dur. Sâbikan pâdişâh-ı dârâ-mekân a'nî Hazret-i Sultân Süleymân Han'un devlet ü rif'atle vezîr-i a'zâmı olan Rüstem Paşa'nun kethüdâsı olan zübde-i evlâd-ı Nebî ya'nî Mustafâ Çelebi'nün ferzend-i dil-bendidür. Cedd-i büzürg-vârı Velîyü'd-din-zâde Ahmed Paşa'nun evlâdındândur. Haseb ü neseb ile hülâsa-i seyyidân-ı âlî-himmet ve eben 'an ceddin sâhibân-ı ma'rifet ve melâz-ı dervîşân devr-i rûzgâr 'ale'l-husûs mülecca-i fukarâ-yı Hazret-i Mollâ Hudâvendigâr 'aleyhirrahmetü'l melikü'l-gaffâr hâlâ ol tâlib-i erbâb-ı ma'ârif pâdişâh-ı gerdûn-menziletün eyyâm-ı sa'âdetinde ze'âmete mutasarrıf kimesnedür. Tab'-ı safâ-âyîni kemâl-i mertebede safvet ile mevsûf ve envâ'-ı ma'ârifle ma'rûf zebân-ı Fürs'ün fûnûnun bilmede hûb ve tabî'at-ı şî'riyyesi mergûb ve nazmı lü'lü-i âbdâr gibi tamâm a'yâr idüğü ma'lûm-ı nükte-dânân-ı rûzgârdur. Lâkin vâdî-i nazma gâlib ü râgıb olmadugı ecilden igende eş'ârı iştihâr bulmamışdur. Hakkâ budur ki kîlk-i gevher-bâr ile hatt-ı dîvânı bir resme gubâr-ı nakş u nigâr ider ki dîde-i ulu'l-ebâr nezzâresinden hayrân ve mânend-i devât engüşt-i hayret-i der-dehân

olması mukarrer ve mübassırân içre mu'teberdür. Mezkûrun cümle-i eş'ârındân bir gazel ile bir kaç matla' u beyt anlarundur sebt olundu. Gazel :

Çün gedâ-yı kûy-ı yârüz 'izz ü câhı n'eylerüz
Dûd-ı âhımız yiter kayd-ı külâhı n'eylerüz

Dil şeb-i vaslunda kâni'dür cemâlün şem'ine
Tâb-ı ruhsârun yiter mihr ile mâhı n'eylerüz

Kesret-i dünyâ içün bî-hûde gavgâlar nedür
Pâdişâh-ı hayl-i gam olduk sipâhı n'eylerüz

Ger Süleymân-ı zamân olsan alur bâd-ı fenâ
'Âkıbet berbâd olan bu taht-gâhı n'eylerüz

Biz Safâyî pâdişâh-ı dehre baş indirmezüz
Dergeh-i dil-ber yeter özge penâhı n'eylerüz

Diğer: La'lin lebüne benzemese ey nigâr la'l
Cevherler içre bulmaz idi i'tibâr la'l

Diğer : Bende-i makbûl-i 'irfân ol ki sultanlık budur
Hor bakma bir karıncaya Süleymanlık budur

Diğer : Gevher-i eşkümle pürdür dâmenüm fahr itmezin
Bir iki dînâr ile dünyâya sığmaz âsmân

Diğer : Din bahâr-ı hüsnine dildâr garrâlanmasun
Ey Safâyî su gibi dîdâr eglenmez geçer

SABRÎ: Rûm İli'nde Demirhisâr'dan erbâb-ı timârdan idi. Tarîk-ı ma'ârifde tevsen-i fikri cüst ü çâlâk ve vâdî-i eş'ârda rahş-ı tab'ı herkesden öndil almada bî-sabr u bî-bâk idi. Bu bir iki beyt-i dil-küşâ ol yâr-ı bî-hemtânundur sebt olundu. Şi'r :

Her ciger zahmı ki kıldı gamze-i nâvek-zeni
Mihrinün envârı dilde oldu rûşen revzeni

Eşm âfet gamze fitne kad kıyâmet hat belâ
Bunca hasm ile ne çâre yâ ne dirlik vâh beni

Sabriyâ bâkî degül aldanma mihr-i 'âleme
Bir hakikat fark ider ehl-i nazar her dem kanı

SADRÎ: Rûm İli'nde İştib'dendür. Dânişmend-i hûşmend zümresindür. Dâ'imü'd-dehr evkât-ı 'azîzin 'ilme sarf itmek üzredür. Nihâl-i tab'ı ve zekâ-yı bülendi mîve-i şî're mâyl zihn-i sâfi ser-âmed-i emâsıldür. Kemâl-i himmet ile hemîşe suffe-i safâda sadr-nişîn ve bârgâh-ı ma'ârifde 'izzetle dâ'imâ karîn ve beyne'l-akrân edâ-yı pâk ile meşhûr ve pesendîde-i cumhûr

ve hadd-ı zâtında ‘âşık- pîşe ve fenn-i nazmda dūr-endîşe musâhabeti hûb ve kelimâtı mergûbdur. Bu bir kaç matla’ u beyt sahîfe-i sudûrda zuhûr bulup mestûr olundu. Ebyât :

Hele ben kaddüne benzetmeyeyin şimdi anı
Bana da sonra çenâr itsün elinden geleni

Diğer : O gamzeler kılıcı tıgı ile sîne yarar
Ne çalışur ne çeker zahmeti nesine yarar

Diğer : Gerek dervîş-i dil-rîş ü gerek şâh-ı cihân olsun
Sana ‘âşık geçen gelsün benümle imtihân olsun

Diğer : Gezüp agyâr ile karşumda her gâh
Bana âh itdirürsün işde Allâh

Diğer : Lebi helvâsın o şîrin dehenüm lutfından
Bana ‘ahd itmiş idi şimdi peşîman dirler

Diğer : Ayak basdukda ‘ışka terk-i ser itmek gerek ‘âşık
Belî bezl-i sehâ itmek durur mestâneye lâyık

Diğer : Müjgânı vasfı herkese derd oldu o şehün
Kat’a okınmayup götürüldi du’â-yı seyf

Diğer : Râhib seni koyup büte tapdı çün ey sanem
Deyr-i cihânda göreyin anı kadîd ola

SIDKÎ Çelebi: Zümre-i ehl-i ‘ilmdendür. Hâlâ Şam kâdîsı olan Hinnalı-zâde ‘Alî Çelebi Efendi’nün ferzend-i ercmendidür. ‘Ulûm-ı zâhire herkese kesb ise anlara mîrâsdur. Ümmîd-i küllî budur ki ol ‘âlî-neseb rûz u şeb ‘ilm-i evvelîn ile müşterî tenvîr ola ve âhirinle kemâl-i pîr ve eş’âr-ı şîrîn ü rengîn ile bî-nazîr ü dil-pezîr ola. Bu matla’-ı ‘âşıkâne ol cevân-ı yegânenündür. Matla’ :

Ayırup ben ‘âşık-ı dil-hasteden cânânımı
Ey felek hayf eyleyüp aldun bedenden cânımı

SIDKÎ-İ Diğer: İstanbulî’dür. Dergâh-ı a’lâ ve bârgâh-ı mu’allânun yeniçeri yayabaşlarındandır. Tab’-ı sâfî sıdk u safâ ile ârâste ve zihn-i pâki edâ-yı dil-küşâ ile pîrâste ‘arsa-i nazmun hüsrev-i çâbü-k-süvârı ve vâdî-i ma’rifetün emîr-i nâmdârı tarz-ı inşâ ile şî’r-i revânı tugra-nüvis-i Hâkânî ya’nî Hazret-i Nişânî Beg’den görmüştür. Kuvvet-i muhâfazası hûb ü mergûbdur. Bu gazel cümle-i eş’ârının güzîdesi ve ‘âşıkân-ı dil-fıkârun pesendîdesidür bu evrâka nakş u nigâr oldu. Gazel :

Bir merhamet umardı gönül hatt-ı yârdan
Bûy-ı vefâ belürmedi ol gül-’ızârdan

Zülf-i nigârı bâd-ı sabâ târumâr ider

Nîce şikâyet itmeyeyin rûzgârdan

Deryâ-yı firkâte düşeli rûzgâr ile
Hergîz eser görünmedi ey dil kenârdan

Sevdâ-yı zülfi ile karâr itmeyüp seher
Geçdi nesîm kâfile-i müşk-bârdan

Huşyâr olma bezm-i cihân içre Sıdkîyâ
Mest ol müdâm câm-ı mey-i huşk-vârdan

SABÂYÎ: Manâstır'dandır. Dergâh-ı mu'allâ bendelerinden gurebâ bölüğündendir. Tab'-ı bülendi şi'rde selîs ve elfâz-ı dil-pesendi nazmda nefîs ve Nevâyî vü Fûrs bilmede bî-hemtâ ve edâ-yı nâzûk ile meclis-ârâ olup üslûb-ı hututdan behremend ve ma'ârifle hûşmend kimesnedür. Mukaddemâ bâd-ı sabâ gibi her yana cüst ü çâlâk olup memâlik-i 'âleme bî-bâk su gibi revâne ve âteş gibi girift ile herkese zebâne çekmiş. Hâlâ bir mikdâr hâk-veş sükûn bulup hıdmet-i erbâb-ı 'irfâne bel bağlayup elinden gelen himmetin masrûf kılup zü-fünûn olan yârân içre eyü diyü ma'rûf olmadan hâlî degüldür. Bu bir kaç matla' u makta' ol yegâne-i ferzânenündür. Ebyât:

Her gelüp geçdükce hîç lâıyk mıdur sen dil-bere
Ey kemân ebrû çeke gamzen ucından dil-bere

Hâk-i pâ-yi kîmyâ-bahşuna yüzler süreli
Bitdüm ey sîmîn beden başdan ayaga ben zere

Diğer : 'Aks-i ebrûsı Sabâyî o ruh-ı gül-nârun
Bahr-ı eşkümde gezer sanki iki dâne semek

SÂNİ'Î: İstanbul'dur. Dânişmend tâifesindendir. Fünûn-ı ma'ârifle akrânı içre bî-nazîr ve sanâyî'-i nazmdan habîr ve eş'âr-ı 'âşıkânesi ve güftâr-ı mestânesi dil-peziirdür. Mâsadak-ı güftâr diyü bu matla'-ı dil-efrûz kîlk-i gülbîz ile ve bu beyt-i pür-sûz kalem-i güher-rîz ile dîdâr gösterüp nakş u nigâr olundu. Şi'r :

Nihâl üstinde ey gonçe seher kim cilve-gersin sen
Dem-â-dem çeşm-i bülbül den akan hûn-ı cigersin sen

Yazarken ey kalem engüştü vasfın ol perî-rûnun
Ne hâletdür 'aceb bilsem hem aglarum gülersin sen

SÂFÎ: İstanbul'dan ehl-i 'ilm zümresinden efdâl-i fuzalâ-yı zamân ve ekmel-i 'ulemâ-yı cihânun mustagnî-i dil pesendi olan 'Abdülğanî Efendi'nün dânişmend-i hûşmendlerinden olup 'ulûm-ı 'Arabîyye mütâla'asına sâhib-pend olup hem fünûnı gereği gibi tahsîl ve zebân-ı Fârisî'nün gün gibi ma'ârifin kendüye delîl idüp zuraflâ-yı suhen-senc yanında genc-i ma'lumâtı bî-renc ele getirüp âhirü'l-emr Erzurum'a varup Şîrvân seferinde ordu kâdîsı olan Muhîfî Efendi'nün niyâbetin idüp ba'dehu bir tarîk ile erbâb-ı timâr zümresine mukayyed

olup el-hak tabî'at-ı şî'riyyesi sâfî ve zihn-i pâki mu'ammâ ve 'arûz u kavâfî bilmede mâhir ve ebyât-ı pâkize dimege kâdirdür. Evsâf-ı bî-güzâfın istima' itdigümüz yârândandır. Sâbikan Tebrîz hâkimi olan Yûsuf Beg'ün bu matla'ına nazîre dimişdür ki Matla' :

Gülde gam fehmi eyledüm çâk-i girîbânın görüp
Goncede derd anladum agzı tolu kanın görüp
mezkûr gazeliyyâtından bu kâfidür. Gazel :

Tagılır 'aklumu ser-i zülf-i perîşânın görüp
Saçılır yaşımla leb-i la'l-i dür-efşânın görüp

Gülşen-i hüsninde seyr eylerken ol Yûsuf-ruhun
Düşdi gönlüm ansızın çâh-ı zenehdânın görüp

Yüregi agzına geldi yâremün ey kaşı yâ
Zahm-ı nevk-i nâvek-i hicründe peykânın görüp

Hüsni âyîne nazar kıldum bu gün gen yakadan
Matla'-ı mihr anladum çâk-i girîbânın görüp

Şâh-ı 'âlî-şân-ı iklim-i ma'ânî oldugun
Sâfî'nün anladılar tertîb-i dîvânın görüp

Sâbıkü'z-zikr müşârünileyh Muhîfî Efendi'nün nâibi iken Erzurum'da kış kıyâmet olup bir bağçe kenârında otururken penceresin açup bâğına nâzır oldukda Muhîfî Efendi buyurmuşlar. Mısra ' :

Ak sakallu kocacığ olmuş bâğ

Sâfî bu mısra'ı bediheten tekmîl itmiş ki Mısra' :

Bürçegi ak karıcuk olmuş tag

SÂFÎ: Edirnevî'dür. 'Attar-zâde demekle meşhûr ve hüsn-i edâ ile makbûl-i cumhûrdur. 'Ulûm-ı zâhire meşgûl iken 'ilm-i ebdâne cüz'î iltifât idüp ol fende fâyık ve tecrîbe-i küllîye ile tabîb-i hâzıkıdır. Esnâf-ı şî'rde zü-fünûn ve sanâyi'-i hikmet ü kânûn bilmede mânend-i Eflâtûn ve netâyic-i tab'-ı mevzûnı bî-misâl ve bî-mânend-i dürr-i meknûn vâkı' olmuşdur. Ol bî-nazîr-i zamân müddet-i medîddür ki İstanbul'da tavattun itmişdür. El-hak ahlâk-ı hamîde ile makbûl-i yârân ve pesend-i ehl-i hikmet ve çâre-sâz-ı erbâb-ı ma'rifet kimesnedür. Bu bir kaç matla' u beyt anundur. Şî'r:

Zeyn ider berk-i semenle hatt-ı reyhânun senün
Bir çukur bostanıdır çâh-ı zenehdânun senün

Diğer : Üstine ditremese gonçe-i nevrestelerün
Silküp atmazdı sabâ berg-i gül-i gülzârı

Sâkî girdâb-ı meyün bezmine bir gül iledür

Cür'a-i la'lün için oldu kadeh cerrârı

Diğer : Bâdâmi çeşm-i dil-bere öykündüğün duyar
Kahr ile rûzgâr anı kabdan kaba koyar

Diğer : Ne var il bagrumun başı gözetse sûfî peymânum
Kişinün dost başına bakar düşmen ayagina

SARFÎ : 'Acem'dür. Tokat'da tavattun itmişdür. Şûh tab' u hoş -sohbet ve dervîş-sıfât u âdemî-hilkat kimesnedür. Ol bülbül-i gülşen-i suhen nâgamât ile 'andelîb-i hoş -âvâ ve tûtî-i şeker-hâ 'ilm-i edvârda bî-hemtâ ve tanbûr u kemânçe destinde şöyle gûyâ olur ki gerek gerekmez sûfî-i sad-sâle kanuna uyup her nefesde semâ'a girüp 'ışk ile şifte vü meftûn ve şevk ile hâlî Diğer-gûn olması mukarrer ve mu'ammâ ve 'arûz u kâfiye 'ilminde ehl-i hüner ve tab'ı her vechile aksâm-ı şî're mâyil ve Türkî vü Fârisî bilmede kâmil. Râkım-ı hurûf ile ol nîkû-nihâd bir mertebede ittihâd itmişdür ki bir zerre ve bir şemme kalem-i müşkîn sevâd rakam idüp mihr gibi rahşân kılup 'ayân idemez. Bu bir kaç dilkeş ü sûznâk ve gill ü gışdan pâk ebyât anundur sebt olundu. Şî'r

Hoş ân ki cây der dil-i virân-ı mâ konî
Mânend-i genc der dil-i virâne câ konî ³¹⁶

'İyd şod pîr-i mugân ez reh-i ihlâs u safâ
Der-i meyhâne-i hod ber ruh-ı rindân be-guşâ ³¹⁷

SAFÂYÎ: Burûsevî'dür. Cevân-nevres ve vâdî-i nazmda tâze-heves tab'-ı safâ-bahşî râhat-fezâ ve âyîne-i kalbi gubâr-ı kudûretten mücellâ ve tarz-ı şî'rde hûb ve hüsn-i hat ile ehli yanında mergûb zîrâ ki rûz u şeb üslûb-ı hoş -nev lisân-ı 'Acem'e taklîd idüp meşk itmeden hâlî degüldür. Ümmiddür ki hüsn-i hattı terakkî bulup ol fende ferîd ola. Ol bülbül-i bahâristân-ı hünerün bu bir iki beyt mânend-i gül-i ter netâyic-i tab'-ı gülbîzi ve makbûl-i hâtır-ı meveddet-âmîzidür sebt olundu. Ebyât

Bahâr olsa açılsa gül çemenler murg-ı zâr olsa
Mey içüp 'arz-ı hâl itsem ben olsam ol nigâr olsa

Terahhum eylemez ol gonce hâl-i zâruma hergîz
Ser-i kûyunda bülbül gibi efgânum hezâr olsa

SÂDİK: Edirne kurbünde Hasköy'dendür. Ehl-i kalem kısmindân evkâtın 'ilme sarf kılurken şî're mâyil olup okımadan geçüp rûz u şeb nazm ile kitâbete müdâvemet gösterüp her birinden sûdmend ü hûşmend olmak üzredür. Sadâkat-ı tab'ı nazmda kem degül gâyetle edâsı hûb ve ma'nâsı mergûbdur. Lâkin şu'arâ içre sirkat-i ma'nâ ile şöhret-i tâm bulup ol bâbda benâm olmuş. Râkım-ı hurûf-ı tezkire eş'ârına vâkıf olup güftârın tettebbu' itmişdür didükleri gibi degüldür. Hayfâ ki erbâb-ı hased ana 'adâvet-i bî-hadd itmişlerdür. Faraza her kande

³¹⁶ Bizim viran gönlümüzde yer edinen ve hazine virane gönülde yerleşen hazineye benzer kişiye ne mutlu.

³¹⁷ Bayram geldi, ey pir-i mugan, meyhanenin kapısını ihlas ve safa ile rindlere aç.

mezkûrun gazelin bulsalar Sâdık'un sâdının başın tıraş idüp sin sûretine koyup ve dâlinin serin kesüp râ şekline yazup Sâdık'ı sârik sûretine koyup meşhûr itmegi kendülerine farz-ı 'ayn bilmişler. Halbuki anun eş'âr u ebyâtı zîb ü zeyn bulup mezkûr merdüm-i hâfıkayn olmakdan hâlî degüldür. Bu bir kaç matla' u beyt anlarundur sebt olundu. Şi'r :

İki 'âlemden geçürdi gönlümi tîrûn senün
Gayr-i dilberden 'alâkam kesdi şemşîrûn senün

Diğer : Çeküp yabana atınca okun yay
Gözi ardunca kaldı ey yüzi ay

Diğer : Mürdeler ihyâ iden ol pâye-i devlet gibi
Deyr-i 'âlemde Mesîhâ bir kurî sûret gibi

SALÂHÎ: Zümre-i kuzât-ı 'adâlet-güzârdandur. Nâm-ı latîfleri Hüseyin ve tab'-ı münîfleri peyrev-i şer'-i seyyid-i hâfıkayn ve zât-ı huçeste-hısâlleri Tırhala'dandur. Evân-ı cevânîde ol pâk-haseb tahsil-i 'ulûma rûz u şeb ragbet ve küllî mûmâreset gösterüp vücûd-ı bî-bedelinde ehl-i âdâb gibi kâbiliyyet olmagın emsâl-i bî-misâl içinde eyülükle mülakkab ve ma'ârif-i küllîye ile meşhûr-ı evlâd-ı 'Arab'dur. Zât-ı pâki salâh ile ârâste olup erbâb-ı fazl u belâgat yanında Salâhî mahlasın kendüye münâsib görüp kendülerine musâhib idinüp ve şi'r dimege ragbet göstermişler. Esâlib-i inşâda gereği gibi pesend-i münşiyân-ı fesâhat-şi'âr ve gazel ü mesnevîde belâgatle suhen-güzârdurlar ve lügaz u mu'ammâda hayli tahsîl idüp ol fenni tekmiîl itmiş. Nevâyî diline ve zebân-ı 'Acem'e ziyâde tâlib ü râgıb olup üç zebân ile şâ'ir-i kâmil ve her birinde merd-i kâbil kimesnedür. Bu gazel-i dürer-bâr ol yâr-ı nûkte-güzârundur haylî rengîn-i vakâr ma'ânî ile temkîn olmuşdur. Gazel :

Duhter-i rez ayagı meclisde hınnâlanmasun
Hane-i dilde metâ'-ı sabrı yagmalanmasun

Rûy-i cânânı görelden gitdi gelmez 'akl u dil
Kimseler yârı bu cehl ile temâşâlanmasun

Hîle idüp bakmasun yâre gözüm görmez diyü
Göz göre zâhid bize igende i'mâlanmasun

Görsün ol la'l-i leb-i dil-ber safâsı hâletin
Meclis içre bâde-i hamrâ musaffâlanmasun

Dün vefâ 'ahdi mi kılmışdun Salâhî bendene
Himmet eyle gel bugün ol va'de ferdâlanmasun

İttifâken ol merd-i kâmil-i rûzgâr sâhib-sa'âdetlerden birisinün hıdmet-i râhat-efzâsı ile kâmkâr u müterâzı iken dergâh-ı mu'allâdan âhbâr-ı kâdîlık irişür. Mâbeyne müfârekat düşdükde bu matla'ı dimiş sebt olundu. Matla' :

Cüdâ olmazdı benden âsitânundan rızâ ile

Felek dūr eyledi ammâ ki nâgeh bir kazâ ile

SIYÂMÎ: Galata'dandur. Dervîş-nihâd ve nîk-nijâd kimse geçinür. Hadd-ı zâtında echel-i enâsdan bir câhil birisi iken kendüye bir mertebede i'tikad gelmişdür ki meşâyih-i 'âlfî-mikdâra irşâd itmekde pîr-i kâmil ola keyfiyyet-i hâlınden bir şemme zikr olunur. Ol nûr evvelâ tâzîlikde terk-i 'alâyık-ı dünyevî itmegi sûret idüp arzû-yı sefer-i uhrevî-i cennet kılup hânkâh-ı Şeyh İbrâhim'e varmış. Bir mikdâr zamân tasfiye-i kalb kılmaga sâlik olup ve mûridân-ı cihân içre zemzeme bırakmış ol bâbda hayli keşf ü kerâmete mâlik olmuş. Âhir bermukteza-yı nefis ârzû-yı diyâr-ı Rûm idüp gelmiş. Mezkûr İstanbul mukâbelesinde olan Kâsım Paşa dimekle meşhûr bir kasabada karâr kılmış. Zâhiren 'ilm-i remilden vâkıf u habîr ve zamîr bilmede bî-nazîr geçinüp günde bir kaç dînâr hâsıl idüp bezl-i erbâb-ı dil itmeden hâlî degüldür ve tabî'at-ı şî'riyyesi bir mertebede su gibi cârî vü revân şâ'irdür ki bir gicede beş yüz beyt dimege kâdirdür. Zîrâ ki sâir erbâb-ı nazm gibi ma'ânî bulmaga mukayyed degüldür ve ekser-i şî'ri bî-ma'nâ vâkı' olmuşdur. Ahyânen eger bir beyitte ma'nâ bulunsa hiç şüphe vü şâibe yok ki gayri kimseden çalmışdur. Niteki hakkında bir kıt'a-i rengîn mânend-i dürr-i semîn Sadrî dimişdür. Kıt'a :

Şâ'irüm diyü alursun biregü ma'nîlerin
Be Sıyâmî niye iki nef'î bu nakkâllıgun

Çeşm-i tâtârını vasf eylemeden cânânun
Yeg idi sana göreydün yine remmâllıgun

Zurafâ-yı rûzgâra mâhfi olmaya ki mukaddemâ şehr-i İstanbul'da bir remmâl-i bî-'âr bir tatar-ı bed-girdâre kendüyi yef'alledürken basılıp ol mef'ûlün fi'l-i mühmeli beyne'n-nas darb-ı mesel olduğına binâen mezkûr remmâlün dahi hasb-i hâlî vâkı' olmada ziyâde münâsib düşmüşdür ve mezkûr mesnevî bahrinde peyrev-i **Ma'nevî** olup yüz pâre kitâb ve elli dîvân tesvîd itmişdür. Lâkin cümlesinden bir beyt sahîfe-i zuhûra gelüp meşhûr olmamışdur. Bu bir nice beyt eş'ârının güzîdesi ve kendinün nûr-ı dîdesi ve tab'-ı pâkinün pesendîdesi olmagın sebt olundu. Şî'r :

Görün şehr-i felekde vardı Bedrû'd-dîn'e suht'oldı
Şebistân-ı hayâl öğrendi oldu ehl-i hüner kevkeb

Diğer : Tobdur gabgabı dil mülkini feth itmek içün
Eyledi ehl-i dili hâsıl ı magbûn-ı üsküf

Diğer : Pîr-i gerdûn her seher şems-i cihânın gezdürür
'Âşık Ahmed durur ol ibn-i fülânın gezdürür

Fî harfî'd-dâd

ZÂYİ'Î : Bagdâdî'dür. Ehl-i 'ilm zümresinden idi. Evkât-ı şerîfin 'ulûma sarf iderken terk idüp eş'âr-ı dürrer-bâr cânibine mâyıl olup 'ömr-i latîfin ol fende hele zâyî' itmemiş. Esnâf-ı şî'ri bi'l-küllîye cem' idüp şâ'ir-i kâmil ve 'arûz ü kâfiye bilmede mâhir ve şî'r ü inşâ

anlamada müselleme-i şâ'irân-ı sâhîr ve dervîş-meşreb ü pâk-mezheb ve her zebâna kâdir ve lisân-ı Fârisî'de eş'ârı bî-hadd ve edâ-yı Nevâyî'de güftârı lâ-yu'addur. Cümlesinden bir âftâb-ı zühre-cebîn için mersiye tarîkı ile bir kıt'a mânend-i dürr-i semîn kalem-i müşkîn ile rakam kılmış makbûl-i zurafâ-yı 'âlem olmuştur ketb olundu. Kıt'a :

Her ay başında sanma ki bu pîre-Zâl çarh
Mâh-ı nev ile zînet idüpdür felek yüzün

Bir âftâb-ı zühre cebîn için ağlayup
Dırnag ile hırâş kılupdur melek yüzün

Bu matla'-ı beyzâ ve bir gazel-i garrâ cümle-i eş'ârındandır ki tahrîr olur. Matla'

İşitdüm geşt ider ol âfet-i can dil-rübâlarla
Bu gün bir lahza gördüm ol dahi yüz bin belâlarla

Gazel : Ay ile gün yüzüne hayran gice gündüz
V'ey çarh-ı felek başuna kurban gice gündüz

Sergeşte olup derbeder ister seni ey dost
Hurşid-i dırahşan meh-i tâban gice gündüz

Âhir ne ki ölmek gerek ey dil tutalum kim
Devr ide murâdunca bu devran gice gündüz

Salmış beni bir âteş ile âb arasında
Bu derd-i dil ü dîde-i giryan gice gündüz

Sergeşte gezer Zâyi'î'nün derd-i dilinden
Fânûs gibi günbed-i gerdan gice gündüz

ZA'FÎ: Dervîş-nihâd u hûb-nijâd olmanın dânişmendlik tarîkından ferâgat idüp siyâhat tarîkı ile seyr ü sülûk ve geşt ü güzâr-ı mülk her mülûka revâne ve hıdmet-i erbâb-ı 'irfâne mâyil ve ol fende levâzımın tekmîl kılup ehl-i tarîk içre kâmil olmuş. Zikr-i hayrın istima' itdigümüz fukarâ ve eş'âr-ı hûb-şî'ârın tettebbu' itdigümüz şu'arâ zümresindendir. Ser-â-ser eş'ârı tasavvuf ile müzeyyen ve cümle-i güftârı muvahhidâne ve mübeyyen vâkı' olmuştur. Bu gazel anundur sâhib-sülûka nâfidür. Gazel :

Okıdum ümmü'l-kitâbı anladum esrârını
Bilmişüm seb'a'l-mesânî dil-berün dîdârını

Arz mülkümdür benüm 'ışk ile şâh-ı 'âlemüm
Genc buldum istemem dehrün zer ü dînârını

Anladum bu kâlib-ı âdem neden endâzedür
Noktadan fehm eyledüm remz ü rümûzun vâırını

Tutmuşum elde kitâbum olup ashâb-ı yemîn

Nutk-ı hakkı anlayup bildüm nedür güftârını

Fazl-ı Hak'dan Za'fî'yâ buldun hayât-ı câvidân
'Aynuna alma sakın sen münkirün inkârını

ZAMÎRÎ: Müddet-i medîd ve 'ahd-i ba'iddür ki mahmiye-i Haleb'de tavattun itmişdür. Ecdâd-ı rûşen nihâdî Akkoyunlu tâifesinden olup sâbıkan diyâr-ı Bagdâd'a âyîne-i kalb-i safâ-âyînine cilâ vormegin mezbûr şehrden ta'dâd olınur. Lâkin ol perverişîn-zamîr evân-ı cevânide misâl-i mihr-i münîr cevânib-i 'âlemi devr ve her bir şey'ün gavrine irmege 'ale'l-fevr cidd ü cehd kılup imdâd-ı 'avâtîf-ı Rabbânî ve a'dâd-ı esnâf-ı Yezdânî irişüp cân u dilden cüst cûy-ı ehl-i hakikat ve güft ü gûy-ı turûk-ıpîrân-ı tarîkat ile hıdmet-i erbâb-ı ma'ârif idüp 'ulûm-ı zâhire vü bâtına ve her nesneye vâkıf olup kûşe-i kana'atda rûz u şeb da'vât-ı berekât-âyât ve sıyâmın ta'ât-ı huçeste-sıfât hazret-i Bârî 'izz-i ism-kârı olmuşdur. Mir'at-ı tab'ı mücâhede ve müşâhede ile müşârünileyhe bir haddede rûşen ve bir derecede gün gibi mübeyyendür ki rûmûz-ı İlâhiye 'ilme'l-yakîn meclâ olup anunla safâ bulup mücellâ ve musaffâ olmuşdur. Binâen 'alâ-zâlik serây-ı 'âlemde ihvân-ı safâ ve hallâk-ı vefâ içre her müşkil ve çâre-sâz-ı ehl-i dildür. El-hak tab'-ı vekkâdî envâ'-ı nazma şâmil ve hususa vâdî-i mesnevîde bir kitâb-ı selîs ve hitâb-ı nefîs ki sergüzeşt-i **Leylâ vü Mecnûn** diyü mânend-i dürr-i meknûn şöyle tahrîr kılmışdur ki 'akl-ı zü-fünûn mütâla'âsında âşüfte ve meftûn düşüp Mecnûn kendüden bî-haber olması mukarrerdür. Bu bir nice beyt kitâb-ı huçeste-meâb ki Nevfel kavmi Leylâ ile âheng-i cenk ü hûn-rîz-i bî-direng itdügündendür. Mesnevi

Yüzi üni çıkdı asmâna
Hancer bedeni boyandı kana

Seyl itdi sehâb-ı tîg-ı kanı
Çok âdemi urdı ok yılanı

Baş dikligi itdi deşti bostân
Yir yüzünü kıldı kan gülistân

Kan mevce gelüp irişdi dize
Kan içmege dil uzatdı nîze

Okdan ayaga yıkıldı kalkan
Kör itdi zere gözini peykân

Çün düzd gelüp ecel nihânî
Ugrılar idi metâ'-ı cânı

Hergîz kim ursa koç gibi baş
Cevşenler olurdu hurd ü haş

ZİYÂİY: Erbâb-ı timâr ve kitâb-ı 'âlî-tebâr ve sipâhî-i kâr-zâr zümresinden mevlüdi Erzurum ve seyyâh-ı her merzbûm ve mülâzım-ı ashâb-ı 'ulûm olup musâhabet-i dilkeş ile hoş -edâ ve mecâlis-ârâ letâyif-i bî-gışş ile safâ-bahş-ı rindân-ı bâ-nevâ rûz u şeb hıdemât-ı

erbâb-ı fazl u kemâl ü mülâzemetdür ki ashâb-ı câh u celâle mâyl ü râgıb ve eş'âr-ı dürer-bâr-ı gavvasân-ı buhûr-ı ma'ânîye yâr olan yârâna kâyil ü tâlib oldugına binâen ol serhadlerde olan şu'arâ-yı nâdir-gûyân ile hem-zebân ve ser-bâzân-ı dilâverân-ı cihâna yâr olup husûsâ Sâfî sâf-meşreb ile nazm dimede rûz u şeb dimeyüp birbirine nezâyir-i dil-pezir ve ebyât-ı bî-nazîr söylemeden hâlî olmazlar imiş. Bu bir nice matla' u beyt kendinün hasb-i hâlidür. Şi'r

Pertev salalı gönlümüze mihr-i cemâlün
Dîdemde mekân eyledi ol mâh-ı hayâlün

Diğer : Burc-ı dilde mihr-i yârı sanma nâ-peydâ yatur
Her gönülde zâhidâ bir şîr-i nâ-peydâ yatur

Fî harfî't-tâ

TAB'Î : Zümre-i mülâziminden Rûm İli'nde İştib nâm kasabadandır. Mezkûr efvâhda İştib-zâde demekle ma'rûf ve fûnûn-ı ma'ârifle mevsûf ve kütüb-i 'ulûmı tertîb üzre görmede yegâne ve dânişmendlikde akrân içre bî-bâhâne ve tabî'at-ı şî'riyyesi pâk ve güftârı ferahbahş-ı sûznâk bu bir iki matla' anundur sebt olundu. Şi'r :

Mîve-i vaslun umup meyl ideli sen dil-bere
Seng-i hicründen yimişdür nîce yirde dil bere

Başı bin yirde yararsa tîg-ı kahrın bakmayam
Çün neberd-i 'ışkdur bu kim bakar bunda sere

TUFEYLÎ : Mevlidi Diyârbekir kal'asınun içinden olup sâbıkan erbâb-ı sanâyi'den lâkin nezâket-i tab'-ı mevânî' olup ol kâr u bârdan vaz gelüp erbâb-ı timâra ve zu'emâ bölüğünde i'tibâr bulmuş ve Mollâ 'Alî diyü iştihâr olur. Sene elfde Bagdâd beglerbegisi Hızır Paşa ile Bagdâd'a gelüp yârân-ı safâ ve şu'arâ-yı hûb-edâya mülâkât-ı ferhunde-sâ'ât müyesser ü mukadder oldukda mü'ellif-i tezkire ile meveddet ü mahabbeti sâdık üzre musâhabeti küllî olup mezkûrun zihni mustakîm ve tab'-ı selîme kâdir ve fûnûnda mâhir olduğundan gayri 'Acem ü Rûm üslûbında a'lâ muferrik cildler peydâ idüp ve tarz-ı vassâllükde bî-hemtâ ve hoş hat kıt'alara rengîn hâşiyeler idici üstâd-ı a'lâ olup ve kendü tasnîfinde muhterî'-i zamân ve nahl-bende-i mübdi'-i cihândur. Zamân ile Ayas Paşa-zâde Yümnî mahlas Mehmed Beg hazretleri fasl-ı bahârda sancığına giderken Erzurum'da mülâkât idüp ol şîrîn-kelimât bu gazeli tesvîd idüp ol fenn-i şî'rde ferîde sunmuş. Gazel :

Geldün kadem getürdün eyâ mîr-i kâmrân
Derd ehli buldı Yümnî kudümünle tâze cân

Hayl-i şükûfe göz diküp olmuş idi nazar
Ta bâd-ı hoş nesîmün aç gözlerin revân

Gündüz yolunda bedrekan olmuşdı âftâb
Şeb tâ seher meh idi tapun üzre bâsbân

Ta'lık için cenâbuna bu çarh-ı lâciverd
Bir kıt'a oldı hâşîye encümle zer-feşân

Gel kıt'a kıt'a eyle yolunda vücûdunu
Şâyet Tufeylî seyr idesin tuhfe râyegân

Bu matla' dahi anlarındur. Şi'r :

Âhum irişdi mâha vü göz yaşı mâhına
Bu turfe hâletüm gelür ol mâhe mâhına

TAB'Î:İslâmbol'dandur. Dânişmend-i hûşmend tâifesinden tab'-ı pür-zîver olmanın şehr-i mezkûrun cevânları için şehrengîz-i mahabbet-âmîz dimiş ki makbûl-i erbâb-ı 'ayş ü huzûr olmışdur. 'Ulûm-ı 'Arabîyye'de akrânı içre mütâla'âsı pâk ve esnâf-ı şi'r bilmede cüst ü çâlâk zebân-ı Fârisî'de ebyât-ı muvahhidânesi hûb ve Türkî'de kelimât-ı rindânesi mergûb cümlesinden bir Fârisî ve bir Türkî matla' ile ihtisâr oldu ma'lûm-ı şu'arâ-yı rûzgâr ola tahrîr olundu Nazm :

Maksûd-ı âferîneş-i 'âlem likâ-yı tu
Ey tutyâ-yı dîde hâk-pây-i tu³¹⁸

Diğer : Çü işün gamzelerle katl-i insân ola Sultânüm
Sunıvîr leb-i la'lün ölmek âsân ola Sultânüm

TARZÎ: Mevlid-i tabâyi'-i makbûl-i memâlik-i 'âlemde şehr-i Dizfûl'dür. Vücûd-ı cûdında kâbiliyyetde eser peydâ ve nâsiye-i hünermende ma'ârif hüveydâ olmanın E's-selâmeti fi'l-vahdet ³¹⁹ fehvâsınca kesretten firâr birle dünyâ-yı gaddâr-ı bî-bekâda ferîd-i rûzgâr ve vâhid-i esrâr olmak ricâsıyla hoş -bû vü tebâr ve hıdmet-i peder-i büzûrg-vârından dûr ü mehcûr düşüp siyâhat tarîki ile etrâf-ı 'âleme 'ale'l-husûs Hicâz ümmîdiyle 'uşşâk-vâr 'Irak-ı 'Arab'a ve 'Acem'e âheng idüp degme makâle tab'-ı hevâ-sâzı râst gelüp karâr kılmayup ve zâd-ı ma'ânîden bî-nevâ olmamag için cüst ü cûy-ı her bâbdan güft ü gûyı dilden bırakmayup merdân-ı meydân-ı ma'ârifün ekserinün hıdmetiyle müşerref olup ve her birinün mecâlis-i şerîflerinden feyzâyil-i cüz'î vü küllî tahsîl idüp kesb-i 'ulûm-ı zâhir itmege diyâr-ı Bagdâd'a gelüp âb u hevâ-yı ile imtizâc kılup nice zamândur ki mezbûr şehrde ol merd-i vâhid tecrîd ile ferîd olup zindegânî kılup ve bu diyârın ekser-i şu'arâ-yı ma'ânî-endûzları ile eş'âr-ı pür-sûz dimeden mâ'ada her an hıdmet-i dervîşân-sûret ü ma'ânî idüp rûmûz-ı bâtına erbâb-ı hakîkate mazhar düşüp ol dervîş-i pâkize-sîret cîfe-i dünyâ-yı denîden mustagnî ve Sultân-ı sûret ü ma'nîdür. Hakkâ ki ol merd-i ekâbir-i ma'ânî ol fâris-i 'arsâ-yı nüktedânî tevsen-i tab'-ı ma'ânî-i nûrdân kişver-i nazma ma'tûf kılup ol vâdîde şâ'ir-i nâmdâr tarz-ı has ile suhen-güzâr ve hallâl-ı müşkilât-ı kasâyid-i pür-fevâ'id şu'arâ-yı selef olmagla yârân-ı suhen-şinâs içre pür-şegafdur. Râkım-ı hurûf-ı tezkîre ile ittihâdî bi'l-küllîye muhakkıkânedür ekser-i eş'ârı rindânesin yazup ve tettebbu' itmişdür. Bu gazel-i Fârisî cümle-i eş'ârındandur. Gazel :

Yâr ber mâ nazarî tâ endâht
Gayr râ ez nazar-ı mâ endâht ³²⁰

³¹⁸ Âlemin yaratalışındaki maksat, senin yüzündür. Ey ki senin ayağının toprağı göze sürmedir.

³¹⁹ Kurtuluş birliktedir.

³²⁰ Yar bize bir bakış atınca başkalarını bizim gözümüzden çıkardı.

Cilve-ger şod be-libâs-ı Yûsuf
Şûr der cân-ı Züleyhâ endâht³²¹

Dîd ‘aksî zi cemâleş Mecnûn
Tâ nazar cânib-i Leylâ endâht³²²

Âh-ı men der şeb-i hicran bisyâr
Şu’le der zeyl-i Mesîhâ endâht³²³

Şod mukayyed be-dû zülfeş Tarzî
Hişten râ be-belâ hâ endâht³²⁴

Cevâb li-mü’ellifihi :

‘Aks ber âb zi ruh tâ endâht
İztırabî be-dil-i mâ endâht³²⁵

Serv-i men âmed ü ber-ser-i mâ râ
Sâye ez ‘âlem-i bâlâ endâht³²⁶

Dü leb-i hîş be-dendân çü gezîd
Ân perî rahne be-canhâ endâht³²⁷

Dil-i sad gam-zede şod hâk nişîn
Tâ be-pâ zülf-i dü tâ râ endâht³²⁸

‘Ahdî ân şûh çü zed şâne be-zülf
Çâkhâ ber dil-i şeydâ endâht³²⁹

Bu bir kaç metâli’-i rengîn ol yâr-ı şîrîn-kelâmundur. Ebyât :

Der miyân-ı her du ebrû hâl-i ân Türk-tırâz
Râst mîmânend be-Hindûyî ki bâşed tîg-bâz³³⁰

Diğer : Ne hâlest în ki dâred ber-’ızâr ân terk-i yagmâyî
Mihek âverde behr-i imtihân takdîr-i tebâhî³³¹

Diğer : Ne çarham üstühân behr-i seg-i ân dil-sitân kerde
Be kerden rûhem ez bîdâd-i cevreş üstühân kerde³³²

³²¹ Yusuf’un elbisesiyle görünüp Züleyha’nın canını coşturdu.

³²² Mecnun Leyla’ya bakınca onun cemalinden bir yansıma gördü.

³²³ Hicrân gecesinde benim ahım, Mesihanın eteğine çok ateş saldı.

³²⁴ Tarzî iki zülfüne mukayyet oldu (bağlandı), kendini belalara attı.

³²⁵ Yüzünden suya bir akis atınca, bizim gönlümüze bir ızdırıp attı.

³²⁶ Benim servim geldi ve bizim üstümüze yüce âlemden gölge saldı.

³²⁷ O peri iki dudağını ısırınca canları yaraladı.

³²⁸ İkiye ayrılmış zülfünü ayağına atınca, yüz gam içindeki gönül, yere çöktü.

³²⁹ Ahdî, o şuh saçına tarak vurunca, şeyda gönlümü parça parça etti.

³³⁰ Türk güzelin her iki kaşının ortasındaki ben, tıpkı kılıç oyunu oynayan Hindu’ya benzer.

³³¹ O yağmacı güzelin yanağında taşıdığı şey ben değildir. âmtihan için yok etmenin takdiri mihenk getirdi.

³³² Ne felek beni o sevgilinin köpeği için kemik yaptı. Zulmü ile ruhumu kemik haline getirdi (taşlaştırdı).

Diğer : Zi hüsn-i hat-ı leb-râ zînet-i Diğer hüveydâ şod
Belî zi hüsn-i hat yâkût-serâ in rütbe peydâ şod ³³³

Bu gazel-i Türkî dahi ol ‘ârif-i billâhundur ki bir sâhib-devletlerden birinün kudûm-i şerîfine
bî-iştibâh dimişdür. Gazel :

‘Uşşâk-ı bî-nevâya nevâlar getürdünüz
Hoş geldünüz efendi safâlar getürdünüz

Bîmâr-ı derd-i hicr idi dil ey Mesîh-dem
Lutf eyledün fakire şifâlar getürdünüz

Zeng-i belâyı mihnet-i hicrânı ref’ idüp
Âyîne-i zamîre cilâlar getürdünüz

Müştâk idük efendi mülâkât-ı eşrefe
Kalbe cilâ vü rûha gıdâlar getürdünüz

Ref’ eyleyüp fütâdeleri hâk-i hicrden
Hırman başına hayl-i belâlar getürdünüz

TARZÎ-İ Diğer: Rûm İli’nden mevâlî-i ‘âlî-şân ve fuzalâ-yı devrânun pesendi olan Mevlânâ Pervîz Efendi’nün mülâzımlarından olup fûnûn-ı şî’re mâyil ve lisân-ı selâset-efzâsı nazma kâyil ve şî’r ü gazel tarzında bî-bedel ve tevârih-i latîf dimede şâ’ir-i zarîf eş’âr-ı dürrer-nisârlarından bir iki târîh-i ma’ârif-güzâr ki dürr-i bahr-ı fazîlet olan Muhitî Efendi ‘İmâdiye’ye kâdî oldukda söylemişler hûb u mergûbdur. Devr-i zamânda her biri bir târîhdür. Kıt’a :

Hamdülillâh ki ‘İmâdiye’ye hâkim oldu
Gün gibi ‘adl ile bir merdüm-i merd-i ‘ârif

Tab’-ı dür-bârı anun bahr-ı muhît oldu dilâ
N’ola esrâr-ı İlâhîye olur ise vâkıf

Kim ola diyü su’âl idicek erbâb-ı ‘ukûl
Didi târîhini kâdî-i Muhitî hâtîf

ve lehu eyzân :

Yine hâkim oldu ‘İmâdiye’ye bir
Şerî’atde ‘âdil güzîn-i efâzıl

‘Ulûmun dilâ oldu bahr-ı muhîti
Degül katre yanında ehl-i efâzıl

³³³ Ayva tüylerinin güzelliğinden dolayı dudak daha bir güzel süslendi. Evet bu güzellikten ötürü bana bu rütbe verildi.

Didüler kim ola o kân-ı fazîlet
Didüm târîhini Muhîtî-i fâzıl

TARÎKÎ: Rûm İli'nde Semendire'den sahâyîf-i eyyâmda evsâf-ı bî-güzâfî her vechile müstahsen ahlâk-ı pesendîdesi nâm-ı hüsnî gibi ahsen vâlidleri İstanbul'da Tavuk Bâzârı'nda câmi' ile medresesi ve 'imârât-ı huçeste-âyâtı olan merhûm 'Ali Paşa-yı pâkize-sıfâtun bendelerinden olup mezbûr 'imârâtun Sirez Sancagı'nda vakfî olan köylerün ba'zısını emânete zabt itmege subaşı nasb olmanın evlâd-ı güzîde-nihâdlarından mezkûr Siroz'a getirüp tavattun itmişler ve mezkûrun babaları mesâlihe sa'y-i tamâm gösterüp akrânı içre benâm olmuşdur. Sâbıkü'z-zikr 'âlem-i şebâbda ilâ hâzihi'l eyyâm kesb-i ma'ârife ikdâ kılup tahsilde kemâlât-ı pür-nikat meşîyyet buldurmışlar. Anda da karar itmeyüp yine hevâ-yı arzû-yı diyâr-ı İslambol idüp yârân-ı safâ ile ihtilât itmeden gayri tâlib-i erbâb-ı devlet ve mülâzemet-i ehl-i şevket kılup husûsâ âb-rûy-ı Âl-i 'Osmân vâris-i velâyet hazret-i merhûm Sultân Süleymân'la magfûr-ı merhûm Sultân Selîm Han'un sarây-ı hâsında âdâb-ı hayâ-güsterler ile perveriş bulan Çıkala-zâde Sinân Paşa'nun hıdmet-i murâd-bahşları ile müşerref olmuşlar. Çok zamândur ki ol eşca'-ı rûz-ı meydân u sayd-efgen şîr-i merdân tavr-ı sipâhilikda silâhşor ve tarz-ı cündhâlıkda çâbük ü cüst ve Pervîz Paşa-yı müşârünileyhün bâb-ı devlet-i mâbeyninde çavuşbaşılıkla kâm-yâbdur. Hâlâ dergâh çavuşbaşlarından feyz-yâbdur. Rûz u şeb erbâb-ı nazm ile musâhabet idüp nazm-ı ferâh-fezâsına irtibât virüp vücûd-ı pâkizeleri neşât üzredür. Sözleri makbûl-i yârân-ı nûkte-şinâs ve şî'r-i selâset-nümâsı bî-kıyâsdur. Husûsa bu diyârda tetebbu'-ı eş'âr-ı şâ'irân-ı ma'ânî-endûz ve sâhirân-ı sihr-âmûzlar ile mahrem ü hem-dem olup nazmda derd-i dilin gül gibi beyâna getürdi. Bu bir nice matla' anundur tahrîr olundu. Şî'r:

Hadeng-i gülşen sînemde batmış bir nihâlümdür
Anun her zahm-ı pür hûnı açılmış verd-i âlümdür

Diğer : Seng-i cevrun şol kadar cem' itdi cânâ 'âşıkun
Hâne-i 'ışkı yeniden var ise bünyâd ider

Bu gazel mü'ellif-i tezkire ile esnâ-yı musâhabetinde ihtiyâr idüp her birimiz bir gazel-i dürer-bâr bu evrâkda nakş u nigâr idüp tahrîr olundu. Gazel :

Haddünde gördi hattunı 'aynum 'ayan 'uyûn
Vasf ider anı rûz u şeb olmaz zeban zebûn

Berbâd idüp yıkardı gönül haymesin hasûd
Âh-ı derûnum olmasa ey dil-sitan sûtûn

Âhû-yı nergisün görelî ey perî sıfat
Taglara düşdi 'ışkla oldı cinan cünûn

Bezm içre câm-ı râz-ı dili gördi fâş ider
Pirâhenini gonçe-veş atdı deran derûn

Sâkî getür sürâhiyi ‘ayş idelüm müdâm
Çün kim olur anunla gam-ı dil-beran birûn

Nazîre li-mü’ellifihî :

Bir zerre görmedin dehenümden ‘ayan ‘uyûn
Oldı dekâyık-ı sıfatından zeban zebûn

İlden nihânı kalmadı râz-ı derûn-ı zâr
Oldı gamunla gül gibi perde deran derûn

İrmez binâ-yı hâne-i ‘ışka hâlel dahi
Kaddün hayâlidür ana ey dil-sitan sûtûn

Bir dil-bere dikili virüp gamdan ol halâs
Dilden gam-ı zamânı kılur dil-berân birûn

‘Ahdî-sıfat sıfâtun ider hergün ehl-i dil
Bir zerre görmedi dehenünden ‘ayan ‘uyûn

Fî harfî’z-zâ

ZUHÛRÎ: Şâm-ı şerîfde elan muhâsebeci olan Pirî-zâde Mehemed Çelebî’nün oğludur. İsm-i dil-küşâsı Mustafâ ve cân u dilden muhibb-i fukarâ ve hüsn-i rûz-efzûn ile feyz-bahş-ı şâh u gedâdur. Sipâhda ze’âmete mutasarrıf ve envâ’-ı ma’ârife vâkıf on sekiz yaşında olup pâdişâh-ı ‘adl ü dâd a’nî Sultân Murâd diyâr-ı Şâm’a ‘adâlet-nâme irsâl itdükde bu matla’-ı pür-hayâli netâyic-i tab’ından zuhûra getürmüşdür. Matla’ :

İrişdi şeh Murâd eyyâmı ‘âlem kâme gelmişdür
Begüm zulm itme ‘uşşâka ‘adâlet-nâme gelmişdür

Hakkâ budur ki cevân-ı kâbil ve hüsn-i hulk ile makbûl-i erbâb-ı dildür. Ümmîddür ki tab’-ı dürer-bârından nazm-ı güher-bâr zuhûr bulup şu’arâ-yı nâmdâr gibi meşhûr-ı rûzgâr ola. Bu gazel dahi anlarındur. Gazel :

Gelür fûrkat başında kalbe giryân olduğum demler
İrüp rûz-ı visâli yâre handân olduğum demler

Eyâ mihr-i cihân-ârâ hazer kıl dîd-ı âhumdan
Seher geh âteş-i hicrûnle sûzân olduğum demler

Sakın âlûde-hân bulmasun ey şûh dâmânun
Visâlün ‘ıydına şevk ile kurbân olduğum demler

Tuyurdı sırr-ı ‘ışkun dâg-ı sînem mest olup cânâ
Lebün şevki ile çâk-i girîbân olduğum demler

Semâ’ından Zuhûrî vecd olup çarha girür eflâk
Dem-i hicrânda ney gibi nâlân olduğum günler

Fî hurûfî'l-'ayn

‘ÂRİF Çelebi: ‘Acem-zâde Şeyh İbrâhim’ün kızı oğludur lâkin Rûm’da neşv ü nemâ bulmuş. Efvâhda Fethullah Çelebi demekle mevsûf ve kemâl-i ma’rifetle ma’rûf el-hak ol ‘ârif-i devr-i zamân ve kâşif-i esrâr-ı nihân ‘ilm-i hey’et ü hendesede bî-misl ü bî-hemtâ vâdî-i suhende ‘ârif-i müşkil-küşâ ve zât-ı şerîfi envâ’-ı ma’lûmâtla ârâste ve ‘unsûr-ı fûnûn-ı ‘ulûmla pîrâste ve dikkât-i tab’ı pâki gâyetde hûb u mergûb ve kudret-i zihni safâ ile nihâyetde mergûb ve akrân içre ‘ulûm-ı ma’kûleyi tertîb üzre görmüş ve kütüb-i menkûleyi geregi gibi bilüp severmiş. Beyne’l-fuzalâ fazl ile meşhûr ve ‘inde’ş-şu’arâ şî’rde mâhir ve zihn-i selîmi ve tab’-ı müstakîmi her birinün fenninde şu’arâ-yı pîşîn gibi nazma kâdir bir derecede ki mütekaddimîn ü müteâhhirînün musanna’ u muhayyel kasâyidine nazîreler diyüp envâ’-ı iltizâm-ı mâ-lâ-yelzem kılmışdır ki ‘akl-ı hurdedân mütâla’asında hayrân kalur ve fûnûn-ı mu’ammâ ve lügazde sâhib-tahkîk ve mukâta’at u gazeliyyâtı ser-â-ser ebyâtının ma’ânîsi dakîk üslûb-ı mesnevîde Şeyh Nizâmî’ye peyrev ve bende-i Hazret-i Câmî sûz-ı Hüsrev olup hamse dimiş. Andan ma’âda pâdişâhımızun sa’adet ile taht-ı Kayser’e cûlûs itdüğü zamânı ve tevârih-i Âl-i ‘Osmân’ı yüz bin beyt **Şeh-nâme** dimişdür. Hakkâ budur ki kuvvet-i şî’riyyesi bir mertebededür ki günde beş yüz beyt dimege kâdirdür lâkin kitâbeti mümkün olmadığı ecilden günde iki yüz beytle iktifâ itmişler idi. Nazm-ı dürer-bârı hakkında şütür-gürbe vâkı’ olmuş dirler idi. Binâen ‘alâ-zâlik Rûm’a gelen şu’arâ-yı ‘Acem yanında edâ-yı güftârı pe-sendide olmamışdır. Bu gazel-i Türkî anlarındur ki iştihâr bulmuş tahrîr olundu. Gazel :

Geldi hüsnün gülşenine bir hat-ı gül-bû dahi
Başuma rûz-ı ezelde yazuymuş bu dahi

Di hat-ı reyhânını yâkûta anmasun bize
Kim anun üstine geldi şimdi bir yazı dahi

Geldi uş dil-ber segi sen çekme zahmet ey rakîb
Kim yetişdi dâmenüm almaga bir ulu dahi

Kâmetün bir servdür kim ola anun bârı gül
Hoş ‘aceb olaydı ger virseydi şeftâlû dahi

‘Ârifî yetmez mi gamzen okları katl itmege
Kim kurupdur yaylar her kûşede ebrû dahi

Nazîre li-mü’ellifihi :

Nâfe hattundan nümûne sebze-i dil-cû dahi
Gül gibi dâgun yakupdur lâle-i hod-rû dahi

Görmege dîdâr-ı pâkûn ‘âşık-ı şeydâ gibi
Her yana yiler sabâ her sü revândur su dahi

Kaşların sergeştesi şehir içre ancak meh degül

Kûh-ı sahrâda gözün dîvânesi âhû dahi

Genc-i hüsnün üzre ejder zülf yitmez mi şehâ
Hâlden nâzır kodun bir bende-i hindû dahi

İtlerün saffında bin kez gerçi gördün ‘Ahdî’yi
Dimedün bir kez ser-i kûyumda kimdür bu dahi

Sâbıkü’z-zıkr mezheb-i zen-i dünyâyı bu beyitlerde beyân itmiş **Şehnâmes**indendir. Nazm :

Sepîdî zeden çehre-i kıyr râ
Ne sâzed cevân zengî-i pîr râ ³³⁴

Meger zîn heme şevher bî-kerân
Ez ân mânde-i bîkr tâ in zemân ³³⁵

Ki her şeb kuşî şevherî ey ‘acûz
Ki tâ râz-ı şâmet neyufted berûz ³³⁶

Be ‘ahd-i tu ey bîve-i bî-salâh
Ne sûzed çerâg-ı kesî tâ sabâh ³³⁷

‘ALÂYÎ: ‘Acem-zâdedür. Asl u neseble fahr-ı seyyidân-ı ‘âlî hasnebün sâhib-râzı olan Mîr Muhyî-i Şîrâzî’nün oğludur. Nahl-i vücûd-ı pür-esmâr-ı müntehâsı ravza-i Konya’da sehâb-ı ma’ârifden emtâr-ı hüner ile neşv ü nemâ bulmuş. Sultânü’l-‘ârifin ve burhânü’l-muhakkıkîn ve hâdî-i râh-ı yakîn a’nî Mevlânâ Celâlü’l-hak ve’d-dîn hazretlerinin dergâh-ı âsmân-bârgâhların ilticâ idüp hulefâsı silkinde münselik olup müddet-i medîd ve ‘ahd-i ba’îd ol âsitânede peyrev-i mürşidân râh-ı Hüdâ irşâd-ı fukarâ ve mesnevî-hân-ı Hazret-i Mevlânâ olmuş ve bi’t-tab’ hâtır-ı âtır-ı deryâ-mü’essiri fûnûn-ı rûmûza şâmil olduğına binâen bir derecede ‘ulûmı zabt itmiş ki bî-ihtiyâr fuzalâ-yı Rûm’ı lillâhi derrehhu kâyil didürdigi ma’lûm-ı merdüm-i nezdik ü dîr olduğu efvâhda ve elsîne mezgûr ü meşhûr ve tesânif-i fevâid-güsterleri bî-hadd ve eş’âr-ı dil-küşâları üç dilde lâ-yu’addur ve tarz-ı inşâda elfâz-ı dil-küşâları dil-pezîr ve fenn-i mu’ammâ ve ‘arûzda resâil-i kavâid-perverleri bî-nazîr ve sanâyi’-i şî’riyyede hünerverler içre dilîr ve ashâb-ı fazl u cûd yanında benâm ve suhen-verân-ı zamân u mîr-keîâm bu bir iki beyt-i a’lâ ol yâr-ı ‘allâmenündür. Gazel :

Hergizem fikr-i tu ez hâtır-ı mahzûn ne reved
ve’z derûn-ı dil-i men derd-i tu bîrûr ne reved ³³⁸

Yâd-ı la’let ne konem her nefesî k’ez çeşmem
‘İvaz-ı âb beher gûşe hûn ne reved ³³⁹

Zevk-ı mestî zi leb-i la’l-i tu çun yâft dilem
Çi koned ger zi pey-i bâde-i gülğûn ne reved ³⁴⁰

³³⁴ Kara yüzünü beyaza boyamak, yaşlı zenciği gençleştirmez.

³³⁵ Meger bu kadar çok kocaya rağmen bu zamana kadar bekar (taze) kalmışsın.

³³⁶ Ey koca karı, akşamki sırrının açığa çıkmaması için her gece bir koca öldürürsün.

³³⁷ Ey güvenilmez dul kadın, senin sözünle kimsenin lambası sabaha kadar yanmaz.

³³⁸ Senin fikrin hiç bir zaman mahzun hatırımdan çıkmıyor; gönlümün içinden senin derdin çıkmıyor.

³³⁹ Her nefes gözümde su yerine her köşeye kan gitmedikçe dudağımı anmam.

Dil be Leylî-sıfâtân berî hâzır bâş (?)
Kes neyâmed bereh-i 'ışk ki Mecnûn ne reved ³⁴¹

Ger 'Alâyî pey-i hûbân be reved ma'zûr est
Mî keşed 'ışk gîrîbân-ı dileş çün ne reved ³⁴²

Diğer : Evsâf-ı hüsnüni ki dil-i nâtüvân okur
Bir tıfıldur ki ay yüzi gül **Gülsitân** okur

Diğer : Gerçi sihr-engîzdür zülfün gözün mestânedür
Hırmen-i hüsnünde ey meh rûyunun bir dânedür

Meh-cemâl-i yâre bir sûretlü sîmîn-âyîne
Zülf-i dil-dâre güneş ziynetlü zerrîn şânedür

'UBEYDÎ Çelebi: Edirnevî'dür. Kuzât zümresindendir. Tab'-ı şerîfî gâyetle bî-nazîr ü hûb ve zihn-i latîfî nihâyette kemâl ile dil-pezîr ü mergûbdur. Rûz u şeb tahsîl-i ma'rifet ve her an tekmîl-i fazîlet idüp kütüb-i 'ulûmı tertîb üzre görmüştür. Aksâm-ı şî're kâdir ve her bir fende misli nâdirdür. 'Ale'l-husûs tarz-ı gazelde edâ-yı nâzûk ile Hasan-ı Pehlevî ve sûz ü güdâz ile Rûm'un Hüsrev'i ve 'ilm-i edvârda nâgâmât-ı dil-küşâ ile şevk-bahş-ı 'uşşâk-ı bâ-nevâ ve terennümât-ı hoş -nevâ ile tûtî-i şeker-hâ gibi nagme-serâ ve savt u nakş bağlamada makâmât-ı bülend ile pîşrev-i ehl-i rûzgâr ve her bir terkîbi hevâ-yı dil-pesend ile hasb-i hâl-i 'âşıkân-ı dil-efkâr olmanın bir mertebede şuyû' u iştihâr bulmuşdur ki vasf u medhe ihtiyâc yok. Hadd-ı zâtında asl u nesebde kıdvetü'z-zühhâd ve 'umdetü'l-'ibâde ve nâkil-ı kelâm-ı Nebî a'nî kutbü'l-evliyâ Nebî Efendi'nün ferzend-i ercمندidür. Ol pîr-i 'azîzün nice nice keşf ü kerâmâtı zâhir ve tefâsir ü ehâdis yazduğı müfessirîn ü muhaddisîn katında makbûl ü müsellemler-i meşâyih-i ekâbir ü asâgirdür. Ol mürşid-i ehl-i islâm kâffe-i enâm ile pâdişâh-ı nîkû-fercâmun i'tikâd-ı küllîsine mazhar düşmüşdür ve mezkûr 'Ubeydî dahi dervîş-nihâd ve pâk-i'tikâd ve nîkû-sîret 'âşık-ı sâdık ve etvârına sözleri mutâbık 'arsa-i ma'rifetde ferzâne-i cihân ve zebân-ı Fârisî ve mu'ammâda yegâne-i zamândur. Eş'ârı tahayyül-âmez ve güftârı mesel-engîz ve makbûl-i tabâyî'-i şu'arâ ve pesendîde-i zurafâdur. Cümlesinden bir kaç matla'-ı dil-sûz çün mihr-i dil-efrûz ve bir gazel-i 'âşıkâne hasb-i hâl-i rindâne-i zamâne diyü gün gibi rahşân u tâbân olup ihtisâr üzre zuhûr bulup nakş u nigâr oldu ta sahîfe-i rûzgârda pâydâr kala . Gazel :

Dahi ser-hâb olmamışdı dîde-i pür-hûn iken
Nîl vâdîde degüldi başımız Ceyhûn iken

'Ârızun kim hiç gözler görmemiştir ana halk
Nîce teşbîh itsün ayı ey perî mādûn iken

³⁴⁰ Gönlüm senin al dudağından sarhoşluk zevkini tattığı için gül renkli şarabın peşinden gitmesin de ne yapsın?

³⁴¹ Leyla sıfatlılara gönül vermişsen hazır ol çünkü Mecnun'un gitmediği aşk yoluna kimse gelmez.

³⁴² Alâyî güzellerin peşinden gidiyorsa ma'zurdur, çünkü gönlümün yakasını aşk çekiyor, nasıl gitmesin?

Tâlib-i ‘iksîr-i ‘ışk almaz anı bir mangıra
Ehl-i dünyâ mâlının ki eşrefi altun iken

Dahi Kays adı yazılmamışdı dîvâna ezel
Ben mahabbet yazusunda baş açık mecnûn iken

Varını isâr idüp dil-ber yolunda düşdi eşk
Ey ‘Ubeydî mâlik-i gencîne-i Kârûn iken

Diğer : Eski kulların koyup çok tâze kul idindi yâr
Hey nice arturdi kulların görün ol şehir-i yâr

Diğer : Taglar taşlar yarıldı itdigüm feryâddan
Tâli’üm taş yarmada kalmaz benüm Ferhad’dan

Diğer : Gamunla pâymâl olan dil-i vîrânı anmazsun
Ele ihsân idersün genc-i vaslun anı anmazsun

Diğer : Hat-ı ruhsâruna gülşende sebze dil uzatmışdur
Yüzine vurmagin bâd-ı sabâ bir pâre yatmışdur

Diğer : Sûfî gice kazâ kılur iken ‘Ubeydî’yâ
Egmiş kıyâm kaddini geçmemiş nâmazda

Diğer : Kılıç ile yürür hûnî güzeldür çeşm-i kattâlün
Siyâh tel tâkınur bir Rûm ili mahbûbıdur hâlün

Mezkûrun buna benzer eş’âr-ı ‘âşıkânesi ve güftâr-ı rindânesi bî-hadd ü lâ-yu’addur. Cümlesi efvâhda mezkûr ve âfâkda meşhûrdur tahrîr ü tesvîd lâzım degüldür ve bu bir iki mu’ammâ-yı garîb dahi anlarundur. Mu’ammâ Be-ism-i Receb

Ger öykünürse görüp ol kadd-i bülendün şîvesin
Silkûn dirahtı koparun dalın koman bir mîvesin

Bu mu’ammâ dahi anundur. Mu’ammâ be-ism-i Âdem

Dimesün sana ‘adû iki gözümsin şâhım
Çıkarur iki gözinün birisini âhum

Bu mu’ammâ-yı âbdâr dahi anlarundur. Mu’ammâ be-ism-i Süleymân

Bahre ey gavvâslar girdükde ihsân eylenüz
Dîde-i ‘âşık gibi sende sade f yokdur denüz

Ümerâdan biri Midilli’ye sancak begi oldukda mezbûr ‘Ubeydî şehirde kâdî iken bu târîh-i dil-keşi hoş dimişdür bu evrâkda sebt olundu. Kıt’a târîh :

Midilli sancagı zât-ı sa’âdet intisâbunla
Bihamdillah ki ‘ünvân buldı ey mîr-i suhendânum

Didi bir yire cem' olup fakîr ü agniyâ ol
Anun târîhini ey zübde-i ashâb-ı 'irfânüm

Yine her biri iki kat olup târîhini dirler
Livâ-yı devletün yüce ide her demde Sübhân'um [972]

‘ÂŞIK Çelebi: Bursevî'dür. Seyyid-i 'âlî-neseb ve emîr-i pâk-haseb kuzât zümresindendir. Hoş fehm ü şûh tab' ve şî'r ü inşâda bî-nazîr ve esnâf-ı şî'rden habîr kelimât-ı selîs ile meclis-ârâ ve ebyât-ı nefîs ile râhat-efzâ edâ-yı pâk ile akrân içre yegâne ve zihn-i müdrîk ile meşhûr-ı zamâne ve hadd-ı zâtında ber-muktezâ-yı mahlas 'âşık-ı hûb-rûyân-ı zamân ve şifte-i perî-peykerân-ı cihândur. Ol sebebden ser-â-pâ eş'ârı 'âşıkâne ve cümle-i güftârı vâsf-ı dil-berân-ı zamâne ve hasb-i hâl-i mestân-ı meyhâne vâkı' olmuşdur. Mâsadak-ı hâl bu matla'-ı pür-hayâl ol şîrîn-makâlündür sebt olundu. Matla' :

Olup her zahm ağız her bir fitil anda zebân yir yir
Derûnum çâkin eyler 'âleme şerh ü beyân yir yir

Nazîre li-mü'ellifihi :

Çemende turmayup akan degül âb-ı revân yir yir
Seni arayı gitdi eşk-i çeşm-i 'âşıkân yir yir

Diğer : Dimâg-ı cânı müşk-âsâ pür eyler bûyî ser-tâ-ser
Kesilmişdür göbeği nâfe ile zülfünün benzer

Diğer : Cigerde âteş-i 'ışkunla yanmış tâze dâgum var
Er ocagı gibi dâim söyünmez bir çerâgum var

Diğer : Kadem basup gele çün kabr-i Kays'a nâka-i Leylâ
Mezârı üstine örter deve tabanı bir kemhâ

Kulagıma çalındı nefha-i ney nefha-i sûra
Nefes oghlymış anunçün ider dil mürdesin ihyâ

Nazîre li-mü'ellifihi :

Gören hınnâlu destün 'aksini çeşmümde dir cânâ
Belâ bahrinde batmış nîce mercân durur gûyâ

Meger hâr üstine dir dir güli gördi turup ditrer
Ki ana reşk idüp bilmen ne öter bülbül-i şeydâ

Kelâmı ehl-i dünyânun ziyâd eyler gamun 'Ahdî
Kulak tut gör ne söyler nây ile çeng-i tarab-efzâ

‘İŞRETÎ Efendi: İstanbul kurbünde Yenihisâr'dan ve zümre-i kuzâtdandır. Sâbıkân ol kâşâne-i 'ayş u huzûrun yegânesi ve hum-hâne-i zevk ü sürûrun ferzânesi tahsîl-i ma'ârif ve

fünûn-ı ‘ulûma vâkıf oldukdan sonra ber-muktezâ-yı mahlas rûz u şeb ‘ayş u ‘işret ve musâhabet-i erbâb-ı devlet idüp hâlâ akrân içre meşhûr ve kemâl-i ma’rifetle efvâhda mezkûr cümle-i eş’ârı ‘âşıkâne ve ‘işret-engîz ve güftârı rindâne ve muhabbet-âmîz vâkı’ olmuştur. Cümlesinden bu gazel-i bî-bedel ki hasb-i hâl-i ehl-i dil ve erbâb-ı ‘ışka nâfi’dür sebt olundu. Gazel :

Ey şâh-ı ser-firâz nazîrûn mi var senün
Ya ben kulundan özge esîrûn mi var senün

Bana tasadduk eyle zekât-ı visâlünü
Benden muhal efendi fakîrûn mi var senün

Göster bahâr-ı hüsnünü efgânlar eylesün
Dil murgı gibi zemzeme-gîrûn mi var senün

Hak’dur benüm tarîk-ı mahabbetde mürşidüm
Ey zâhid-i belâ-zede pîrûn mi var senün

Dilber mahallesinden ırag olma ‘İşretî
İki cihânda bir dahi yirûn mi var senün

‘İZÂRÎ Çelebi: Edirnevî’dür. Dânişmend-i hûşmend tâifesindendir. Safâ-yı zihn-i selîm ve zekâ-yı tab’-ı mustakîm ile şâ’ir-i bî-hemtâ ve nezâket-i güftâr ile meclis-ârâ ve rûz u şeb tahsîl-i ma’rifet ve tekmîl-i fazîlet idüp güzîde-i akrân ve pesendîde-i yârân olup zebân-ı Fârisî’nün mûmâreset ile durûb-ı emsâli zabtına kâdir ve ebkâr-ı ma’ânî teshîrinde merd-i şâ’ir-i sâhir ve mazmûn-ı nâzûk ile edâ-yı dil-küşâyâ sâlik ve elfâz-ı pâk ile güftâr-ı rûh-efzâyâ mâlikdür. Hayfâ ki ol yâr-ı ve şâ’ir-i zarîf tarîkından henüz behremend olup mülâzım olmamış. Ümmîddür ki ‘an karîbü’z-zamân ber-murâd olup akrân içre ser-bülend ola ve hadd-ı zâtında ol nîkû-nihâdun i’tikâdı pâk ü sâf olmanın haccü’l-Haremeynü’ş-Şerîfeyn idüp bir sene anda i’tikâf itmiştir. Râkım-ı hurûf ile hukûk-ı sâbıkası Edirne ve İstanbul’da bir mertebede vâkı’ olmuştur ki mümkün-i tesvîd ü tahrîr degül. Ol tûtî-i şeker güftâr ve ‘andelîb-i gül-i gülzârün eş’ârı tarab-engîz ve güftârı gül-bîz ser-â-ser vâsf-ı lâle-’izârân-ı rûzgâr ve hasb-i hâl-i ‘âşıkân-ı zârdur. Bu bir kaç matla’ u beyt-i pâk eş’âr-ı tarab-nâklerindendir. Şi’r:

Dik gelmek istedi kad-i bâlâ-yı dil-bere
Tûbâyı dikdiler depesi üstine yire

Diğer : Nihâlden koparup goncesin gülistânun
Koparma yüregini ‘andelîb-i nâlânun

Diğer : Hevâyâ yeltenüp eşküme deryâ dil uzatmıştır
Çekelden rûzgâr eksüklüğün bir pâre yatmıştır

Diğer : Cism-i nizârum üzre bâr-ı belâ iken ser
Başumdaki belâlar üstine oldu serîr

Diğer : Kanlu peykânun görince sînede cânânunun
Yüregi agzına geldi zahm-ı hûn-efşânunun

Nazîre li-mü'ellifihî :

Çeşm-i zahmum görmedük tîrin diyü cânânımın
Kande eyler kûrlığına çeşm-i hûn-efşânımın

Bu ebyât-ı pâkize dahi anundur. Ebyât

Ben nice besleyeyin yârelerüm kim yalunuz
Bir nice akçe bamuk sînedeki dâğ ister

Diğer: Nâle eyler cism-i lâgarda 'İzârî cân-ı zâr
Bir megesdür düşdi gûyâ 'ankebûtun dâmına

Diğer : Nâleme ey dil ceres teşbîh olunmaz hâsılı
Söze gelse bir firenk oğlanıdur çalar dili

Nazîre li-mü'ellifihî:

Dil uzadup ağıza almış ceres ehl-i dili
Sözünü bilmez yabane söyler anlamaz dili

Bu gazel-i âbdâr dahi mânend-i dürr-i şehvâr anlarundur. Gazel :

Girmedi silsile-i 'ışka çü dürr-i şehvâr
Depesini delerek katdı katâre leb-i yâr

Sîne sadrına geçürse yiridür nâvekini
Gözini açdı anı gördi bu zahm-ı ten-i zâr

Alımaz zerre-i hâk-i rehini çehremden
Kurı yire akıdur yaşını çeşm-i dür-bâr

Aldanup bâd-ı seher öykünürmiş ruhuna
Dek sovak geçer açılmasun igende ezhâr

Dürr-i dendânı peyâmın sade-i deryâdan
Tatlu diller döker almaga 'İzârî enhâr

Pûşide olmaya ki pâdişâh-ı kâm-yâb a'nî Sultân Süleymân-ı felek-cenâb sâlik-i râh-ı savâb
olup yasag-ı bâde-i nâb itdükde ol şâ'ir-i şîrîn-keîâm bâde-i gül-fâm ile meyhâne hakkında bir
matla'-ı mestâne dimişdür sebt olundu. Matla' :

Meyhâneler kapandı vü bitdi şarâb işi
Devşür simât-ı 'işreti oldu hoş -âb işi

'İLMÎ-İ Bagdâdî: El-asl u huceste-nesl olup vâlid-i erşedi ve mürebbî-i nühsendi zümre-i
erbâb-ı 'ulûmdan olmak temennâsı ile hıdmet-i 'ulemâ-yı 'izâm ve mülâzemet-i fuzalâ-yı

kirâm idüp tekmîl-i ma'rifet-i belâgat-meşhûn ve tahsîl- fazîlet-i fesâhat-nümûn iderek müderrisîn-i nîkû-makâl ve sâlikân-ı ashâb-ı vecd ü hâl içre şöhret-i tâm ile pâkize-nihâd Mollâ Hüseyin Ferahşâd dimekle benâm olup evkât-ı ferruh-sâ'âtin nesâyih-i müslimîne ve irşâd-ı muvahhidîne mebzûl kılup erbâb-ı 'ukûl arasında hayli makbûl olmuştur. Sâbıkü'z-zikr anların nazar-ı kimyâ-eserleriyle mis vücûdların zer idüp rûz u şeb hem-dem-i erbâb-ı hüner geçinüp ve nîkû-halef olmak ricâsıyla 'ömr-i 'azîzin telef kılmayup elveledü sırru ebihi ³⁴³ muktezâsınca mukaddemât-ı 'Arabî'ye ikdâm idüp nakd-i vücûdun nahve sarf itmekle 'ulemâ-yı devrânun zü-fünûn-ı zamânı ve hükemâ-yı cihânun emîr-i nüktedânı pesend-i tab'-ı Sultân-ı Rûm a'nî Mirzâyî-i Mahdûm sene tokuz yüz seksen yidide sa'âdetle 'Irak-ı 'Arab'a ve Meşhedeyn-i Şerîf'e kâdî-i 'adâlet-nişân ve müftî-i zî-şân oldukda dânişmendi olup nice müddet fetvâ yazmagla kesb-i kemâl ve ma'ârif-i nezâket-me'âl bulup ol yâr-ı bî-kayd zümre-i erbâb-ı kâmûs rûsûm-ı erkam yazma ga dest-res bulup ve hutût-ı muhtelif meşkinde müsellemler-i sığâr u kibâr ve pesend-i ümerâ-yı 'âlî-tebârdur. Husûsâ tarz-ı nesh-i ta'lîkda peyrev-i kutb-ı Yezdî ve gâybâne şâkird-i Sultân 'Alî-i Meşhedî olup kıt'a dercinde mânend-i hoş -nüvisân-ı zamân matlûb-ı pîr ü cevândur. Tab'-ı sâf-ı pâki üslûb-ı nazm-ı belâgat-nümâda bî-hemtâ ve zihn-i rûşen-i derrâki nesr-i fesâhat-fezâda yektâ ve elsîne-i selâsede eş'âr-ı dürrer-bâr ve nazm-ı âbdâr dimede misâl-i yârân-ı ebrâr-ı selîs ü hem-vâr ve musâhabet-i dil-küşâsı ferah-fezâ-yı dil-i germ-i merdüm-i ahrârdur. Zamân-ı evâilde kendü başına Sultân-ı şehir-i zevil olan Böke Beg'ün ferzend-i bülendi olan Me'mun Beg'ün hıdmetinde kâtib-i dîvân ve güzîde-i a'yânıdır. Ol şûh-tab' u şîrîn-güftârun bu gazel-i bî-bedel-i hûb-eş'âr netice-i fehm-i sâz-kârıdır tahrîr olundu. Gazel :

Görüp yârı gamun³⁴⁴

Bu ma'nâdan dilâ gâyetde mihnet dîdeyüz senden

Yeter ötdün çemende yalnız bir söyle bir dinle

Biz ey bülbül figanda artucak şûrîdeyüz senden

Nisâr-ı râh-ı dil-dâr eyledün bir demde makdûrun

Biriz ey çeşm-i güher-bâr ihsan dîdeyüz senden

Libâs-ı himmeti degdirmezüz çirkâb-ı dünyâya

Sana baş egmezüz ey dehr-i dâmen-i çîdeyüz senden

Bizi her düne memnûn itmedün lutf itdün ey himmet

Ki 'İlmî gibi şimdi 'âlem-i 'ulvîdeyüz senden

Diğer : Ebr-i zülfün tagıdup perde-i ruhsâr itdi

Ol güneş yüzlü yine gündüzümüz tar itdi

Kapayan çeşmi degül hâb-ı hayâlündür kim

Girmesün gayr diyü kapuyı dîvâr itdi

³⁴³ Çocuk babasının yolundadır.

³⁴⁴ Hiçbir nüshada olmadığı için mısra yarım kaldı.

Ne gedâyum ki senün tavf-ı ser-i kûyunda
Beni gördükde sadâ eylemeden ‘âr itdi

Diğer : Meydür bizüm tarîk-ı melâhatde pîrimüz
Ey beng yok senün ile hayr ü fatîrimüz

Bu gazel-i Fârisî dahi anlarundur sebt olundu. Gazel :

Merâ kez dest-i gam peymâne-i ‘işret nigun bâşed
Be-bezm-i u ki coz şâdî ne gunced bâr çun bâşed ³⁴⁵

Dil-i sîr ez hayâtem ez tu ân dem mîşevd râzî
Ki ez tîget çü murg-ı nîm-bismil gark-ı hun bâşed ³⁴⁶

Menem der bezm-i vasleş kerde câ hoş hayretî dârem
Ki îñ devlet füzûn ez yârî-i baht-ı zebun bâşed ³⁴⁷

Ne dârem tâb-ı bî u zîsten cân dâdenem evlâ
Bekûy-ı nîstî kâş imşebem gam reh-nümûn bâşed ³⁴⁸

Mecû sabr ez dil-i ‘İlmî ki can çun tu şûhî şod
Kucâ Diğer der an dil tâkat-i sabr u sükûn bâşed ³⁴⁹

‘ÂRİF Çelebi: İstanbul’ dandur. Dergâh-ı mu’allâda hazîne-i ‘âmire kâtiblerinden olup nice nice menâsıb-ı şâyeste-ikbâl olmanın lâıyk akrânına fâıyk olmuştur. Âhir fermân-ı Sultân-ı cihân-sitân ile vilâyete tahrîrin itmişler. Erbâb-ı timârı kendüden hoş nûd idüp âhirü’l-emr dergâh-ı şâh-ı cihânda seksen bin akçe ze’âmetle müteferrika olmuşlar. El-hak merd-i ‘ârif ve rümûz-ı umûrdan vâkıf eş’âr-ı dürer-bârı muhakkıkâne ve güftâr-ı nezâket-güzârı muvahhidânedür. Sene tis’â ve semânîn ve tis’â mi’ede ferzend-i ercmenleri ‘Ârif-zâde dimekle iştiâh bulan Mustafâ Çavuş-ı sâhib-i hûşemr-i Sultân-ı cihân-metâ’ Sultân Murâd ile Bagdâd’a gelüp hıdmetlerine müşerref oldukda vâlid-i erşedlerinün nazmın istima’ idüp bu tezkireye yazılmasına tâlib oldu. Bu bende dahi tahrîr olunmasını münâsib gördi . Gazel :

Tıfl-ı dil rahm -ı tenüm içre degülken ‘alaka
Yazdı Kassâm-ı ezel h’ân-ı belâdan nafaka

Kodı utmak için tıfl-ı dili dîdelerüm
Bezm-i mihnetde olan nukl-ı ‘unâbı tabaka

³⁴⁵ Benim gam elinden (hüzünden) mutluluk şarabı varsa (Hüzünlü olduğum halde) onun meclisine mutluluktan başkası sığmaz (hüzün oraya giremez).

³⁴⁶ Hayattan bıkan gönlüm ancak senin kılıcınla yarı canlı kuş gibi kana bulanınca razı olur.

³⁴⁷ -Ben ona kavuşma meclisinde güzel bir yer edindim, şaşarım ki bu devlet zebun bahtımın yardımından daha fazladır.

³⁴⁸ -Onsuz yaşamaya tahammülüm yok, benim için ölmek daha evladır. Yokluk mekanına doğru bu gece keşke gam bana kılavuz olsa.

³⁴⁹ -İlmî’nin gönlünde sabır arama, canım senin gibi bir şuh (küstah, arsız, neşeli) oldu. O gönülde artık sabır ve sükuna takat nereden olsun.

Gayriden sorma gam-ı hicri gel e benden sor
Sıgmaya binde biri nîce kitâb u varaka

Kadd-i bâlâsına dil düşeli buldı rif'at
Serve sarılmag ile buldı 'ulyâyı 'aşaka (?)

Dergehün sâilidür 'Ârif ider şey' li'llâh
H'ân-ı vaslundan umar lutfuna lâıyk sadaka

Diğer : Ferş-i nakşından gözün yum 'arş-ı a'lâyı görüp
Sufle meyl itme gönül tâk-ı mu'allâyı gözet

Âhum ol denlü kanâdil asdı tâk-ı çarha kim
Bend-i reh şâyet sakın deyr-i Mesîhâ'yı gözet

Ey ümîd-ber kılan dâim harâset üzre ol
Bûstân-ı dilde olan nahl-i hurmâyı gözet

Diğer : Gamun bezminde kaddüm çeng idelden bâr-ı hicrânun
Ser-â-pâ ana rengin târlar çekmiş durur yâ *

Diğer : 'Aks-i mâh-ı nevle mâh-ı hançer-i yâri görüp
Saldılar reşk eyleyüp 'Ârif suya hançerlerin

'ULVÎ Beg: İstanbûlî. Za'im 'Alî Çelebi demekle meşhûr ve 'uluvv-i şân ile efvâhda mezkûr Rûm İli beglerbegisi'nün dîvân-ı 'âlî-şânında defter kâtiblerindendir. Hadd-ı zâtında şûh-tab' u hoş -sohbet rûz u şeb tâlib-i kesb-i kemâl-i ma'rifet üzre olup 'âlî-meşreb ü pâk-mezheb ve şî'r ü inşâ ile ser-âmed-i akrân ve fehm ü firâsetle yegâne-i devrân geçinür. Eş'âr-ı pür-sûzı ve güftâr-ı dil-efrûzı meşhûr ve makbûl-i merdüm-i nezdik ü dîr olmak üzredür. Bu gazel ile bir iki beyt ol şâ'ir-i bülend-himmetün nazm-ı dürer-bârı ve eş'âr-ı şeker-güftârındandır. Gazel

Vechi var meyden kızarsa dil-berün zîbâ yüzi
Bu mukarrerdür kızardur bâde-i hamrâ yüzi

Tîgını 'üryân iderse her yalun yüzlü güzel
Ben buyun 'âşıkları döndürmeye kat'â yüzi

Dâg-ı 'ışkî dil metâ'ı üzre ursam yaraşur
Gâlibâ mergûb olur tamga ile kâlâ yüzi

Yüzi döymezi âh-ı serde yâre karşı kimsenün
Âsidür gâyetde ol mihr-i hûbân-ârâ yüzi

Şöyle pürdür dâg-ı hûnîn ile sînem 'Ulvî'yâ
Lâle-i Nu'mân ile zeyn oldu san sahrâ yüzi

Diğer : Cân atup her şeb dilâ ol şem'-i cem'-ârâya düş

* Bu mısra'da vezin düzelmiyor. Tek nüshada olduğu için bir şey söylemek mümkün olmadı.

Yakmasun pervâneler bâl ü perîn araya düş

Sözlerin dillerde mezkûr ola dersen ‘Ulvîyâ
Düzme koşma sözleri ko ‘âlem-i ma’nâyâ düş

‘ULVÎ-İ İSTANBÛLÎ: Dânişmend tâifesindendir. Derzi oğlu dimekle meşhûr tab’-ı şûhî nezâketle efvâhda mezkûr hakkâ budur ki durûb-ı emsâl bulmada peyrev-i Necâtî ve mazmûn-ı belâgat-nümûn ile mânend-i Zâtî ve edâ-yı nâzûk ile misâl-i Hayâlî ve selâset-i elfâz ile reşk-i Hilâlî geçinürse yiridür. Zîrâ ki gülbin-i tab’-ı vekkâdı libâs-ı isti’dâd ile pirâste ve nihâl-i kâmeti hıl’at-i mevzûniyyet ile ârâste olmanın ol bülbül-i nagme-serânun bu vechile ser-â-pâ kasîde ile gazeliyyât-ı nefisi ve terci’-bend ile tahmisi makbûl-i tab’-ı erbâb-ı mihr ü vefâ ve pesendîde-i hâtır-ı ashâb-ı sıdk u safâdur. Her an ‘uluvv-i himmetin şi’r ile musâhabete ve hîdmet-i ehl-i ma’rifete sarf idüp her birinden ahz ü cerr ile fâ’idemend ve beyne’l-akrân ser-bülend olmışdur ve bu harâb-âbâda geleli hemîşe kayd ü bend-i cihândan azâde ve dil-dâde-i dil-berân-ı zamân ve sergeşte-i devrân kimesnedür. Bu gazel-i pür-mesel anun eş’âr-ı muhayyel-i bî-bedelindendir. Erbâb-ı ‘ayş u huzûra ve ashâb-ı zevk ü sürûra mefhûm ü ma’lûm ola diyü bu evrâk-ı dil-firîb ve defter-i ‘âşıkâna sebt olmuş. Gazel :

Çengi men’ eylerse mutrib zâhid-i mecnûnede
Dinlesün nâyı o yir hem şer’a da kânûne de

Dil virelden câm-ı la’lünle gubâr-ı hattuna
Tövbe itdüm bâde-i gülğüne de ma’cûne de

Garka viridi ‘âlemi ey Yûsuf-ı Mısr-ı cemâl
Eşk-i çeşmüm gâlib oldu Nîl’e de Ceyhûn’e de

Nân-ı huşke kâni’im gam yemezüm dünyâ için
Minnetüm yok tâlib olman gence de Kârûne de

Ol şehe billâhi söylen dost lar lâıyk mıdur
Şâd idüp agyârı ‘Ulvî bendesin mahzûn ide

Diğer : İşler yüregüm yâreleri bitmez onulmaz
Sabr eyleyelüm çâre nedür bitmez iş olmaz

Günden güne artarsa n’ola hüsn-i dilârâ
Gülzâr-ı cinânun gül-i ra’naları solmaz

Diğer : Ey gönül gayriye meyl eyleme cânan bir olur
Birinün ‘ışkı derûnunda yiter can bir olur

Diğer : Fütâde dilleri seyr eyledükde toprakda
O şehsüvâr didi kim gönüller alçakda

Diğer : Berâber görme servi ol nihâl-i mîve-i tâze
Metâ’-ı hüsne ey h’âce bilürsün olmaz endâze

- Diğer : Hattı gelicek yâr beni firkate saldı
Gam çekme gönül kim çoğı gitdi azı kaldı
- Gitdükçe gönül tâlib olur genc-i visâle
Hırs ise ziyâd olmada ‘ömr ise azaldı
- Diğer : ‘Adem gülzârına bir gonçe-leb cânânımız gitdi
Dirîg ol serv-i kad sîmîn-beden tîz bitdi tîz yitdi
- Diğer : Gâyet ile güc olur ‘âşıka terk-i dil-ber
Nâsihün sözine aldanma kolayın söyleyler
- Diğer : Ey dil hikâyet-i gamı nâdâna söyleme
Mecnûn-ı ‘ışk isen n’ola yabana söyleme
- Diğer : İ’tikâd-ı yâre gelmez zemm-i düşmenden hâlel
Kâ’inat içre meseldür gerçi men yesma’ yahil ³⁵⁰
- Diğer : Nazm-ı ‘Ulvî’ye n’ola dirsem Necâtî tarzıdur
Besler oldı bîkr-i ma’nâlar bulup nîce mesel
- Diğer : Kerem kıl alma sînen sîne-i mecrûh-ı ‘Ulvî’den
Bilürsün ey tabîb-i cân onulmaz yâre bî-merhem
- Diğer : İhtirâz it yıkma ‘âşık gönlün ey çeşm-i gazâl
Bu meseldür herkesin gönlünde bir arslan yatur

Mevlânâ ‘ABDÜ’L-VÂHİD: Zübde-i sâhibân-ı pâk-a’kâyid ve vâreste-i keyd-i erbâb-ı mekâyid ve hâtır-ı ‘âtır-ı kûyûd-ı cihândan azâde olmaga sebep bu ki Ebû Bekr-zâde dimekle elsîne-i havass u ‘avâmda mezkûr ve meşhûr-ı merdüm-i eyyâmdur. Ol mürebbî-i gül-i gülistân-ı suhen-verân ve masdar-ı ‘ilm ü ‘irfân ve menşe’-i ma’ânî vü beyân vücûd-ı ‘âlî-makâmı nazar-kerde-i sâhib-nazarın kirâmı olmagın mecmû’a-i nazm-ı pür-nizâmda Nâmî mahlas ile ihtirâm-ı tâm bulmuşdur. Mevlid-i pür-sürûr-ı şehir-i Mardîn ve zâtı makbûl-i erbâb-ı dîndür. Ol sâlik-i mesâlik-i hikmet ve mâlik-i memâlik-i fazîlet kuzât-ı ‘âlî-derecât ve hükâm-ı ‘adâlet-isbâtandur. El-veledü sırru ebihi ³⁵¹ muktezâsınca dânişmend-i pâk-iz’ân ve mütâla’a-i tefâsir ü ehâdisde bî-nazîr-i erbâb-ı ‘irfân ve zebân-ı Fârisî’de ser-âmed-i zebân-ı dânân ve hurde-şinâsân-ı cihândur. Şeb ü rûz ol yâr-ı şem’-i nazm-efrûz meyl-i eş’âr-ı pür-sûz ve cüst ü cûy-ı güftâr-ı şâ’irân-ı ma’ânî-endûz kılup ve ol nîkû-halef şu’arâ-yı selefün ekser-i gazeliyyâtın tahmîs idüp şöyle irtibât virmişdür ki râkımları görse ferah bulup tab’-ı selîsleri inşirâh u inbisât bulurdı. El-hak musâhabeti dil-küşâ ve letâyif-i i gamz-edâdur. Cümle-i nazm-ı pür-edâlarından bu gazel-i şîrîn matlab olup hasb-i hâl-i dil-i gangîn olmagın kendüme enîs dutup tahmîs olunup bu tezkireye sebt olundu. Muhammes

³⁵⁰ İşiten (duyan) bozulur

³⁵¹ Çocuk babasının yolundadır.

Ey büt-i lâle-ruh-ı serv-kadd-i hoş harekât
 Cüyed ez telhî-i hicr-i tu dilem fevz ü necât
 Ez zebân-ı tu boved tûtî-i bî-çâre nikât
 Ey leb-i la'l-i tu şîrin zi şekker hem zi nebât
 Mîbered Hızır zi la'l-i leb-i tu âb-ı hayât³⁵²

Sûy-i gülşen be hırâm ey gül-i ter hem çü semen
 Mu'tedil geşt hevâ bâg-ı cihan deşt-i Hoten
 Müjde ey 'âşık-ı âvâre-i âşüfte suhen
 Nev-bahâr est safâ-bahş şod etrâf-ı çemen
 Vakt-i an şod ki koned bûlbûl-i gûyâ nagamât³⁵³

Pây-bend-i dil-i mâ ney ser-i mûy-i tu boved
 Niyyet-i râh neverdan ne be kûy-i tu boved
 Ne hemin maksad-ı 'uşşâk be-sûy-i tu boved
 Garaz ez Ka'be heman dîden-i tûy-i tu boved
 Ver ne hergiz ne boved meyl be-sûy-i 'Arafat³⁵⁴

Ey zi seyr-i der-i tu ehl-i nazar dîde cilâ
 Ki ez u geşte musaykal dil-i ehl-i safâ
 'Âlem ez bûy-ı semensây-i tu hoş-bû zi hevâ
 Ez gubâr-ı reh-i tu borde meger bâd-ı sabâ
 Be meşâm-ı dil ü can mîresedem hoş nefehât³⁵⁵

'Ahdî'yem geşte be-pâpûs-ı tu mâyil sanemâ
 'Âciz ez dergeh-i tu şod merdüm-i kâhil sanemâ
 Pey be-sırr-ı dehenet hest çü müşkil sanemâ
 Çün koned vâsf-ı kadet Nâmî-i bî-dil sanemâ
 Z'ân ki hest ân kad-i ra'nâ-yı tu 'âlî zi sıfât³⁵⁶

'ÂLÎ: Mevlîd-i şerîfî İstanbul ve nâm-ı latîfî Mustafâ Çelebi'dür. Beg-zâde dimekle meşhûr ve hulk-ı 'azîm ile güzîde-i cumhûr ve akrânı içre makbûldür. Tahsîl-i 'ulûm-ı zâhire kılurken ferâgat eyleyüp tarîk-ı Halvetî'ye sâlik ve seyr ü sülûkında tasfîye-i batın kılup nice ma'ârife mâlikdür ve hadd-ı zâtında 'âlî-mezhep ve sâhib-meşreb kimesnedür. Hâlâ rûz ü şeb himmet-i 'âlîyesin ma'rifete sarf idüp zebân-ı Fûrs'e mûmâreset gösterüp 'arûz u mu'ammâ

³⁵² Ey lâle yüzlü, servi boylu, hoş hareketli güzel; gönlüm senin ayrılığının acısından kurtuluş arar. Senin dilinden biçare papağan nükteler söylemeye başlar, senin al dudağın şekerden de, nebattan da tatlıdır. Hızır senin al dudağın dan hayat suyu götürür.

³⁵³ Ey taze gül, yasemin gibi gülşene doğru salın; hava, bağ-ı cihan ve Hoten ovası güzelleşti. Ey avare ve perişan sözlü âşık, sana müjde, ilkbahar mevsimidir, çemenin etrafı mutluluk verir oldu. Bûlbûlün ötme vakti geldi.

³⁵⁴ Bizim gönül bağımız senin saçının ucu olmasa sâliklerin niyeti senin diyarına doğru gitmek olmasa, âşıkların maksadı sana doğru olmasa, Ka'be'den garaz senin yüzünü görmek olmasa, asla Arafat'a doğru kimse meyletmez.

³⁵⁵ Senin kapını seyretmekten nazar ehlinin gözleri cilalandı. Çünkü onunla safa ehlinin gönlü temizlenmiştir. Âlem senin yasemini andıran kokundan güzel kokularla doldurmuştur. Senin yolunun tozundan sanki sabah rüzgarı bir şeyler almış. Canıma ve gönlüme güzel kokular gelmekte.

³⁵⁶ Ey sanem, ben Ahdî senin ayağını öpmeye mayıl oldum, senin dergahına erişmeye tembel kimseler aciz kalır, senin ağzının sırrına ermek müşkil olduğundan âşık Nâmî senin boyunu nasıl vâsfetsin. Çünkü senin o güzel boyun sıfatlardan daha üstündür.

fünûnından habîr ve şî'r ü inşâ sınıfından gayrîler gibi âgâh u bî-nazîr 'ale'l-husûs fenn-i tevârihde müverrih-i dil-pesend ve makbûl-i erbâb-ı hûşmenddür. Mukeddemâ pâdişâh-ı zaman a'nî Sultân Süleymân cânibinden emr-i 'âlî cârî olup cânib-i mezâr-ı pür-envâr ciger-kûşe-i seyyidü's-sakaleyn ve ehl-i sünnetün kurretü'l-'aynı olan İmâm Hasaneyn Rıdvanullahi 'aleyhim Kerbelâ sahrasına nehr-i 'âlî cârî itdükde bir târîh-i âbdâr mânend-i dürr-i şehvâr silk-i nazma münselik kılmış ki teşne dillere zikrinden safâ vü hayât-ı cân-fezâ peydâ olmuştur. Ol târîh-i garrâ budur ki bu evrâkda sebt olundu. Kıt'a fî't-târîh :

Güyyîâ bu çeşme bir sakkâ durur
Râh-ı Hak'da teşne eyler cüst ü cû

Lülesi anun dehendür su dili
Dil döker kime olursa rû-be-rû

Su gibi ezberlemiş okur revân
Mâcerâ-yı dehri 'âlî sû-be-sû

Önüne kim gelse dir târîh için
Mâ Hüseyinle Hasan 'ışkına su

'ARŞÎ: Rûm İli'nde Yenibâzâr'dan ehl-i 'ilm tâ'ifesinden idi. Akrânı arasında 'ilm ile mümtâz ve şu'arâ mâbeyninde şâhbâz fikreti hüma-âsâ 'arş-pervâz olup evc-i a'lâdan ma'ânî nice himmet ile şikâr ve tûtî-tab'-ı şeker-rîzi bülbül-i dil-sitân olup re'y-i gülûbîzi gül gibi efkârün 'arûsun der-kenâr kılmış. Egerçi eş'ârun aksâmından behremend idi lâkin üslûb-ı târîhde bî-mânend ü muhayyel ü pür-mesel altı tarîkla nice nice tevârih peydâ itmiş müverrih idi ve sohbet-i hassı ferah-bahş-ı dil-i gam-gîn ve ebyât-ı tarab-güsteri dilkeş ü rengîn vâkı' olmuştur. Cümle-i tevârih-i bî-misâlinde biri bu ki melikü's-su'arâ-yı zamân olan Hayâlî mevtine dimiş ziyâde nâzûk ü sûznâk ve su gibi revân ve 'uyûbdan pâk ve hayâlden hâlî degüldür. Kıt'a-i târîh :

Hayâlî kim gazel-i sıyt ü sadâsın
Tamâmet nüh kıbâb-ı çarha saldı

Çeküp şimşîr-i şî'r-i âbdârın
Hezârân pehlevân-ı nazmı çaldı

Bu meydân içre sultân-ı cihândan
Semend-i tab' ile öndüller aldı

Yumup göz sâhil-i hestîden âhir
'Adem bahrine mâhî-vâr taldı

Didüm 'Arşî işidüp ana târîh
Sözi dilde Hayâlî gözde kaldı

Bu matla'-ı dervîşâne ol şâ'ir-i 'arş-âşiyâne eş'ârındandır hasb-i hâl-i erbâb-ı tarîkat ve vasf-ı hâk-nîşînân-ı kûy-i hakîkatdür nakş u nigâr-ı ber-sahîfe-i rûzgâr oldı. Matla'

Bize dek geldi gerçi kim firâz-ı kûy-ı cânânun
Hele biz üstine yol sürdük alçakdan gelüp anun

‘ADNÎ Beg: Hamid İli sancagındandır lâkin zamân-ı evâilde İslambol’da tavattun itmişlerdür. Asl u neseble pâdişâh-ı nîkû-nijâd hazretlerinün âbâ vü ecdâd-ı pâk nihâdlarına samîm-i kalbden sadâkatle ‘ubûdiyyet yüzinden hıdmet idüp ekser-i zamân mecâlis-i behişt-âyinlerine yüz sürüp sohbet-i hayât-efzâlarıyla kâmbîn olan erbâb-ı ‘izz ü temkîndendir. Husûsâ vâlid-i büzürgvârı bi’t-tab’ envâ’-ı nazma mâyil olup li’llâhi derrehu kâyil dimege kâbil kılmışdur. Mezkûr Sultân-ı leşker-şiken-i İrân u Turân’un çavuşları silkinde du’âcı olmanın mahlas-ı latîfin Du’âyî itmişler. Eş’âr-ı belâgat-engîzi bî-hadd ve güftâr-ı fasâhat-âmizi lâ-yu’addur. Sâbıkû’z-zikr dahi hakan-ı cihângîrün çavuşları içre du’acı Ahmed Çavuş dimekle iştihâr-ı tâm bulup akrân arasında benâmdur. Zihn-i nâzüki edâ-yı pâk ile suhen-güzâr ve tab’-ı zarâfet-nümâsı her nesneden haber dâr ve letâfet-i musâhabetle ve zerâfet-i nezâketle şâ’ir-i zarîfdür. Hükm-i pâdişâh-ı ‘âlem-penâh ile sene seb’a ve semânîn ve tis’â mi’e Muharremînün evâhirinde Bagdâd’a geldükde hıdmet-i şerîfleri ile müşerref oldukda eş’âr-ı dürer-bârı tezkâr olundı budur ki nakş u nigâr oldu. Nazm :

Her seng-i cefâ kim atar ol Bosnevî dil-ber
Dokınmaya şâyed diyü can sînede dîtrer

Diğer : Nîtekim şehir olur tahta mâlik
Serîr-i hüsne sen dahi kezâlik

Gazel : Gözlerüm yaşına rahm itmezsin ey nûr-ı basar
Seyl-i eşküm cûş idüp dünyâyı gark ider basar

Bâde gibi bir dürlü kanlu yatagısun diyü
Bâgbân âveng idüp engûrı anunçün asar

Canla ben müşteri iken sen metâ’-ı vaslunı
Her neye olursa ey nâzûk miyânun bana sar

Gözlerün her dem harâmîler gibi kan atmada
Gamzen âdemler helâk eyler saçun yollar basar

‘Adnî’nün ger külbe-i ahzânına kılsan nüzûl
Cân u dildür ‘arz olan ‘izz-i huzûra muhtasar

Diğer: Nîce yazam güzelüm vâsf-ı miyânun bilemem
Mû gelür başlayıcak çünkü zebân-ı kaleme

‘ULÛMÎ: Dergâh-ı mu’allâ yeniçerilerindendir ve mevlidi İstanbul’dur. ‘İlm ü salâh ile sülehâ ve ‘ulemâ içre makbûl kimesnedür. Hazret-i Şeyh Emîr Neccârî ‘aleyhi’r-rahmetül-Bârî neslinden olan Şeyh ‘Abdü’l-latîf Efendi’nün hıdmet-i şerîfine irişüp irâdet-i sâdık gösterüp tarîk-ı Nakşibendî’den behremend ve yârân içre tarîkla ser-bülenddür. Mezkûr şeyh Ka’be-i Şerîf’e varup mücâvir olup nice nice ‘azîzlerden ‘izz ü temkîn ve âyin-i dîn tahsîl ü

tekmîl itmiş. Ana binâen zâtı kemâlât-ı ‘ulûm ile pirâste ve ahlâk-ı hamîde ile ârâste ve zebân-ı Fârisî’ye ve hatt-ı nest’lika hayli mûmâreset gösterüp ve tarz-ı Nevâyî’ye ve mu’ammâya cehd idüp gereği gibi hâsıl ve pesend-i ehl-i dil olmuş. Eş’âr-ı dil-pezîri mahabbet-endûz ve güftâr-ı bî-nazîri pür-sûz vâkı’ olmuşdur. Bu bir nice metâli’ u beyt anundur tahrîr oldı. Ebyât:

‘Uşşâka hâk-i râhun olur kuhl-i çeşm-i cân
Soksun gözine sürmesini ehl-i Isfâhân

Diğer : Dilâ yâr olmaz idün ‘ışk ile ger sende ‘âr olsa
Kuşlamazdun cünûn ehline ‘aklun sana yâr olsa

Diğer: Eşmez idi seg-i yâr benüm hâk-i mezârum
Olmasa eger bûy-ı kebâb-ı dil-i zârum

Diğer: Bî-kîne benden yüzün döndürdi ol ârâm-ı dil
Dost düşmen oldı düşmen hâsıl itdi kâm-ı dil

Bu mu’ammâ dahi anlarundur. Mu’ammâ be ism-i Kemâl

Ger her du ebrû-yı turâ bâşed ser-i da’vî be-hem
Hîzed husûmet ez miyân çun hâl-i gerded hakem ³⁵⁷

‘AŞKÎ: İstanbûl mukâbelesinde vâkı’ olan Üsküdar nâm kasabadandur. Babası dergâh-ı mu’allâ yeniçerilerinden imiş ve kendü de ol bölükde iken nâgâh gerdiş-i devr-i felekden tokuz yüz altmış üçde teninde bir ‘ârıza peydâ olmuş. Hıdmetinde kusûr ve zahmetle rencûr olduğu ecilden ‘ulûfesin kesmişler. Ol esnâda pâdişâh-ı dîn-penâha ve Hakan-ı Süleymân-bârgâha bir gazel-i garrâ diyüp sunmuş matla’ı budur. Nazm :

Pâdişâh-ı cihân penâhun ben
Nîce yıl ışiginde çâker idüm

Haste oldum kesildi dirliceğüm ³⁵⁸
Sag olursam solag olam dir idüm

Pâdişâh-ı cihân a’nî Sultân Süleymân-ı zamâna bu gazel bahâne olup tekâüd tarîkı ile on akçe ihsân buyurmuşlar. Hâlâ Sultân-ı felek-âşiyânun du’â-yı hayrın vird-i zebân ve mûnis-i cân itmişdür ve hadd-ı zâtında ber muktezâ-yı mahlas ‘ışk-ı İlâhîye mahrem ve esrâr-ı nâ-mütenâhiye hem-dem kimesnedür. Bu bir kaç beyt anundur sebt olundu. Şi’r:

Çâk çâk itdi yakasın subh-ı sâdıklar gibi
Tâze dâg urdı felek bagrına ‘âşıklar gibi

Lâle vü nergis tutar bezm-i çemende sâgarı
Olma ayık sen dahi mahrûm fâsıklar gibi

³⁵⁷ Eger iki kaşın birbiri ile kavgalı olsa, senin benin hakem olunca düşmanlık ortadan kalkar.

³⁵⁸ -ila ahire tamamı Tezkire-i Hasan Çelebi’dedür (Müstensihin notu). Burada adı geçen şairin nereli olduğu konusunda bazı tereddütler hasıl olmuştur, çünkü Hasan Çelebi’de geçen Aşkî Yenihisarlı’dır(bkz. C II s.636).

Mollâ ‘İMÂD: ‘Acem Semerkand î’dür. Eyyâm-ı cevânîde ve ‘âlem-i fânîde tahsîl-i ma’rifet ve tekâmîl-i fazîlet itmege rûz ü şeb ragbet gösterüp fûnûn-ı ‘ulûmdan haber dâr ve ol vilâyetde dânişmend olan yârân içre nâmdâr olmuş. Âhir arzû-yı temâşâ-yı diyâr-ı Hind ve seyr-i memâlik-i Sind idüp terk-i vatan-ı aslî kılmış nîce müddet ol diyârlarda erbâb-ı ma’ârifle bahs ü müzâkere üzre olup her vâdiden vâkıf olmuş. Ol esnâda niyyet-i tavâf-ı Ka’be-i şerîf şerrrefehellahu ³⁵⁹ ve ziyâret-i Medîne-i Münevvere kılup tevîk-ı Yezdânî ve ‘inâyet-i Rabbânî hâdî-i râh olup ol dergâh-ı felek-bârgâhlara irişüp aksâ-yı maksûda husûl bulup ‘ibâdet-i vâcibü’l-vücûd ya’nî farz olan karz edâ olundukdan sonra hıdmet-i erbâb-ı ‘ulûma irişmek için diyâr-ı Rûm’a gelmiş. İstanbul’da tavattun kılup tarîk-ı ‘ilme mübâşeret idüp dânişmend-i hûşmend oldu. Hadd-ı zâtında ‘ilm-i kelâmı kemâl ile vücûdî ârâste ve fenn-i hendese vü hey’etle tab’ı pirâste ve kütüb-i ‘ulumı tertîb üzre görüp her birinden envâ’-ı istidâd ve her fenden bir dürlü fâ’ide kesb idüp murâda irmek üzre olmanın makbûl-i tabâyi’-i ‘ulemâ-yı Rûm ve pesend-i hâtır-ı fuzalâ-yı her merzbûm olmuşdur ve fenn-i mu’ammâ ve tarîk-ı ‘arûz ü kâfiye bilmede hûb ve Fârisî şî’r dimede edâ-yı pâk ile ebyât-ı hayât-bahşı dilkeş ü bâde-i nâb gibi bî-gışş ü mergûbdur. Bu bir iki matla’-ı dil-firîb anundur. Şî’r:

Be-kûyet şeh-i hûbân gedâ-yı hâk-nişînem
Gedâ-yı kûy-ı tuem pâdişâh-ı rûy-i zemînem ³⁶⁰

Velehu: Z’ân sanavber-kad cüdâ tâ mând pâ der gil merâ
Çün sanavber gayr-i bâr-ı dil neşod hâsıl merâ ³⁶¹

‘İZÂRÎ : Karamân Eregli si’ndendür. Vâlid-i ercmend-i ser-bülendi sipâhî tâifesiinden ahlâk-ı hamîde ile ma’rûf ve evsâf-ı pesendîde ile mevsûf kimesne imiş. El-veledü sırru ebihî ³⁶² kendüleri dahi zümre-i küttâbdan olup ‘ilm ile akrânına gâlib ve hoş -nüvisân-ı dehr içre serâmed-i kâtib ‘âlem-i şebâbdan ilâ hazihi’l-eyyâm ol merd-i ferhunde aklâm itmek ile ma’ârif ile benâm olmuşdur. Üslûb-ı dîvânîde Tâc-zâde-i sâni nesh-i ta’lîk ve nesh-i celî vü reyhânî ve nesh-i hafîye gâyet ile a’lâ ve ol vâdîde bî-hemtâ on iki kalemi yazmaga kâdir ve fûnûn-ı ma’rifetde kemâl-i dânişle zü-fûnûn-ı ‘âlem ve her kande olsa rûz ü şeb fuzalâya hem-dem ve cebhe-i nâsiyetde âsâr-ı zekâ ve fazîlet-i mübeyyen ü peydâ ve çihre-i idrâkinde envâr u kâbiliyyeti rûşen ü hüveydâdur. Hemîşe ol yâr-ı nîk-endîşe musâhabet-i ashâb-ı devlet ve mülâzemet-ierbâb-ı fazîlet idüp sâbikan magfûr Sultân Süleymân’un kapıcıları kethüdâlığından çıkup Mar’aş beglerbegisi Gülâbî Mehmed Paşa’nun kâtib-i dîvânı olup ba’dehu İskender Paşa oğlu Ahmed Paşa hıdmetinde olmuşlardır. Bî’l-fî’l merhûm Sâlih Paşa oğlu emîrû’l-ümerâ ve’l-kirâm Lahsâ Paşası Mehmed Paşa’nun dîvân kâtibi olup anların iltifât-ı şerîflerine mazhar düşüp rûz ü şeb meclis-i behişt-nişân ve mehfel-i münîf me’âlî ‘üvânları ile müşerrefdürler. Eş’âr-ı dürer-bâr ve ebyât-ı huçeste-şî’ârları vâsf-ı lâle-’ızârân-ı devrân ve hasb-i hâl-i ‘uşşâk-ı nâtüvândur. Bu bir nice nazm-ı dil-sûz mânend-i seyyâre-i ‘âlem-efrûz ufk-ı tab’ından tulû’ idüp âfâka şuyû’ bulmuşdur. Ebyât

Gehî mihr ü vefân egler beni geh cevîr ü sedâdun

³⁵⁹ Allah onun şerefini artırsın.

³⁶⁰ Ey güzellerin şahı, senin diyarında bir garip köleyim; senin diyarının kölesiyim ve yeryüzünün padişahıyım.

³⁶¹ O servi boyludan ayrı, ayağım çamurda kalınca, servi gibi gönül yükünden başka elde ettiğim bir şey olmadı.

³⁶² Çocuk babasının yolundadır.

Bihamdillah ki gitmez dilden ey meh bir nefes adun

Diğer: Çeküp tîg-ı cefâyı her taraf müjgân-ı hûnrîzün
Olur mâyl dem-â-dem kana çeşm-i fitne-engîzün

Diğer : Bir dem benüm ârâm idemez sîne de cânım
İllerle turur oturur ol serv-i dilârâm

Diğer: Zevk alur gamdan kimisi kimisi şâdîdedür
Her biri ehl-i cünûnun başka bir vâdîdedür

Diğer: ‘Arz itse kâmetin n’ola ol serv-i dilpesend
Kim beglerün olur kulına himmetin bülend

Bu gazel-i âbdâr-ı dürer-bâr elfâz-ı pâk-i hemvâr ile ol şeker-güftârundur. Gazel :

Nâz ile tekellüm ide ger ol güher-elfâz
Agzından o şîrîn dehenündür saçar elfâz

Ey dürr-i girân-mâye söze ger dehen açsan
Cân riştesine lutf ile eyler haber elfâz

Vasf-ı der-i dendânunı nazm eyledüğüm bu
Manzûm ola söz anda olur mu'teber elfâz

Söz geçmedi la'l-i lebüne yok yire hayfâ
Deri gibi delindi yüregüm ey dürer elfâz

Şîrin-lebün vasfı durur dilde kelâmum
Olsa n'ola ger şi'r-i 'Izârî şeker elfâz

Bu gazel dahi anların cümle-i kelimât-ı hayât-efzâ ve nikât-ı dil-küşâlarındandır. Gazel

Bir bûsesi alınmaz iken yüz cefâ ile
Pehlûya çekdüm ol sanemi bin belâ ile

Hâlüm müşevveş oldu perîşân olup şehâ
Çîn-i zülfün andı dil gice nâgeh hatâ ile

Yıllar durur ki devr iderin şehrini dirîğ
Bir gün mukâbil olmadum ol mehlîkâ ile

Âvâreler yeler yüpürür kûy-i yârda
Gezmekde bûy-ı zülfi o şûhun sabâ ile

Öldürmek istediği odur tîr ile beni
Alışdum ey ‘İzârî dün ol kaşı yâ ile

‘ATÂ : Edirnevî’dür. ‘Ulûm-ı zâhire iştigâl gösterüp kânûn-ı edâ ile sözleri ebdâne muvâfık ve ‘ilm-i hikmetde hekim-i hâzık geçinür. Egerçi tabâbet-i müslîmînde sözleri çok lâkin günde yüz kez berş yimeden gayri hüneri yokdur. Hey’et-i garîbe ve sûret-i ‘acîbe ile meze-i rûzgâr ve şeb ü rûz herze-kird ü bî-kâr ve müdâvemet-i berşden gâyet za’if ü nâtüvân ve tenâvül-i kahve ve afyondan nizâr u nahîf ü bî-cân olmışdur. Gûyâ ki sûreti nesh olup veyâhûd mezheb-i tenâsühi kavî ile rûh-ı pâki âhir kâlîba hulûl itmiş. Evzâ’ u etvâr-ı ‘acîbe ile zurafâ içre makbûl ve üslûb-ı hicv ü hezde bir tarîkla hezzâl ü heccâv idi ki fi’l-mesel beyâzî vü siyâh-güftâr-ı muzhık-ı âbdâr ile şüst ü şû ve her vâdî-i cüst ü cû idüp ve ebyât-ı tarzîk dimede ana irüp anun yanında ol vechile yüz agardamazlardı. Gazeliyyâtı bî-hadd ü lâ-yu’addur cümlesinden bu gazel ki ebyâtının âb-ı rûyudur bir kaç beytle sebt olundu. Gazel :

Dem-be-dem gözlerimün yaşları akmag ister
Yâr kûyundan anuñcün beni ayırmag ister

Bükülüp şâh gibi kaddüm inledügi bu kim
Mîve-i cânımı ol yâr koparmag ister

Bir iki dâg ile ey lâle geçinme ‘âşık
Yalnız ol yüzi gül sînede bîn dâg ister

Devr-i bî- rahmun elinden nice kan aglamayın
Beni bir cân-ı ‘azîzimden ayırmag ister

Ey ‘Atâ işigi kelbi dirilürmiş o rakîb
Kendüyi âhir ögüp göge çıkarmag ister

Diğer: Seni bin dürlü belâlarla gören ‘âşıka bak
Gam-ı ‘Azrâ ile yolunda ölen Vâmık’a bak

Gündüzün zerk u riyâlarla gezen zâhidi gör
Karanuda yüzini yire süren fâsıka bak

Mezkûrun tarîk-ı hicvde ma’ânî-yi rekîk ile mukatta’âtı çokdur yazmasını terk-i edeb bilüp tesvîd olmadı lâkin cümlesinden bu kıt’a ki çendân elfâz-ı mühmelesi yok kahve fincânı husûsunda Küçük Tâbi vâfında dimişdür sebt olundu. Kıt’a :

Ne revâdur serika sâhibi Tâbî sen iken
Bana isnâd idüben eylesin bühtânı

Dâyiren ben bilürem n’eydüğini gel berüye
Sana çalmak nic’ olur göstereyin fincânı

Mezkûr Tâbî kahve-hânedan fincân çalmagla iştiâh bulmuşdı kıt’aya andan sezâvâr olmuşdur.

‘İLMÎ Karamân’da Ermenâk nâm kasabadan bir hatibün oğlıdur. Sâbıkan kasaba-i Lârende’ye varup ‘ilmi tahsîl ve fûnûnı tekmîl itmek ârzûsıyla müddet-i medîd kasaba-i

mezkûrede mücâvir olup bir mikdâr isti'dâd peydâ itmiş. Âhir sene selâse ve sittîn ve tis'â mi'ede şehir-i İstanbûl'a gelüp pâdişâh-ı 'âlem-penâha bir kasîde sunup esbâb u libâs ve zer-i bî-hisâb ve ihsân-ı bî-kıyâs ihsân itmişler ber-murâd olmuş. Ana binâen akrâmı içre dânişmend ta'dâd olunur. Hâlâ her an yârân ile mübâhase-i 'ilmi ve her dem tettebbu'-ı sanâyi'-i eş'âr-ı 'Acemî idüp fûnûn-ı 'arûz ü kâfiye bilmede sâyir yârân gibi hûb ve eş'ârı mergûb olmadan hâlî degüldür. Bu bir kaç ebyât anundur. Ebyât :

Çeküp sabrum yakasın dest-i cevrun çâk çâk eyler
Senün vallahi şîven ey perî âdem helâk eyler

ve lehû : Cemâl-i şâhid-i ma'nâyı gün gibi görür zâhir
Gubâr-ı gussayı kondurmayın mir'ât-ı idrâke

ve lehû: Kanlı yaş akıdur bagrı delinmekden degül
Girdi dûd-ı âteş-i hasret kebâbun 'aynına

'ÂRİFÎ-İ İstanbûlî : Hüseyin Çelebi demekle meşhûr ve hüsn-i hulk ile pesendîde-i cumhûrdur ve hadd-ı zâtında ma'rifet semtine sâlik ve çok ma'ârifet mâlik ve dîvân-ı hümayûn kâtiblerinden iken ferâgat eyleyüp tarîk-ı tasavvufa heves idüp hankâh-ı Şeyh İbrâhim'e varup çok nesneye dest-res bulmuş. El fakru fahrî ³⁶³ muktezâsınca olup kûşe-i kana'at ihtiyâr ve erbâb-ı bugz ü hasedden kenâr itmiş. Eş'âr-ı muhakkıkânesi ve güftâr-ı muvahhidânesi çok ve pâk ü sâf idüğüne güzâf yok. Cümlesinden bir iki beyt-i âbdâr bu evrâka sebt olundu. Beyt :

Dâg-ı elem melûluna bâg içre lâleler
Def'-i melâl idün diyü sunar piyâleler

Sînemde kanlu dâgıların üzre penbeler
San kûh-ı gamda lâledür üstinde jâleler

'ÂRİFÎ: Rûm İli'nde Yenişehir'dendür. 'Ulûm-ı zâhire meşgûl iken mâyil-i sohbet-i 'ârifân-ı zamân yanında makbûl ve tâlib-i hıdmet-i meşâyih-i cihân ve tasfiye-i bâtın itmege cidd ü cehd-i bî-girân ile terk-i şöhrat ve kayd-ı dünyâ-yı pür-mihnet kılup hevâ-yı Ka'be-i mu'azzama ve ravza-i seyyid-i 'Arab u 'Acem ile arzû-yı mahrûse-i memâlik-i 'âlem kılup sâlik-i râh-ı pîrân-ı 'âlî-himem olmuş. Ol sefer-i mübârek-eser ile müsâfir-i bahr ü berr fuzalâ-yı 'Arab u 'Acem'den fâidemend ve ehl-i 'irfân içre hûşmend ve musâhabet-i tasavvuf-âmîzi pesendîde ve kelimât-ı pâk-edâsı makbûl-i yârân-ı güzîde ve vâdî-i fakr u fenâda sâlik-i râh-ı Hudâ olmuşdur. Ol vechile râkım-ı hurûf-ı tezkire hâk-i pâyinden çok ma'ârif tahsîl ü tekmîl idüp ba'z-ı fûnûna vâkıf ve her nesneden âgâh u 'ârif-i billah olmuşdur ve mezkûrun muvahhidâne ve muhakkıkâne eş'ârı çok ve eyüliginde söz yok. Bu matla' Hayâlî Beg'e nazîre diyü anundur sebt olundu. Şi'r:

Murg-ı kudsîdür ten-i lâ-şeyde rûh-ı pâkimüz
Yine meyli asledür yokdur ecelden bâkimüz

³⁶³ Fakirlik övüncümdür (Hadis), El-Aclunî, **Keşfü'l-Hafâ**, Beyrut 1352, C.II, s.87

li-mü'ellifihî :

Başka 'âlem itdi zâhir sûz-ı 'ışk-ı pâkimüz
Mîhr ü meh anda şerâr-ı âh-ı âteş-nâkimüz

‘AZMÎ: Kûtâhiyye kurbünde Gedüs nam kasabadandır. Ehl-i timâr tâifesindendir. Rûz u şeb erbâb-ı ma'ârifetle hem-nîşîn ve ashâb-ı devletle kârin olmagla tahsîl-i ma'rifet ve tekâmîl-i fazîlet ve zebân-ı Fûrs'e mümâreset ve fûnûn-ı şî're müdâvemet itmeden hâlî degüldür. Binâen 'âla-zâlik eş'âr-ı dürrer-bârı pâk ve kelimât-ı şeker-güftârı ferah-nâk ve pesend-i ehl-i idrâkdür. Bu gazel-i muhayyel-i bî-bedel ile bir iki kıt'a-i pür-mesel ol nâzım-ı nazm ebyâtıdır bu evrâka sebt olundu. Gazel :

Dendân-ı yâri didi gören bî-bahânedür
Olmaz cihânda buncılayın bî-bahâne dür

Cân nakdi ile biz de harîdârun olalım
Cânâ meta'-ı vaslun içün di bahâ nedür

Kesb itmege dişün gibi bir dürr-i şâh-vâr
Açup dehen sadepler idermiş bahânedür

Yârün meta'-ı vaslı mîdur ân-ı hüsn mi
Bâzâr-ı 'ışk içinde olan bî-bahânedür

'Azmî yolunda cân ile kurbanun olduğu
'İyd-ı visâle irmek içün bir bahânedür

Bu kıt'a dahi anundur.

Çok zamândur sîne-i sad-pâre tîg-ı yârdan
Yâreler irişmedüğine kati mecrûhdur

Vasla irüp secde-i şükr itmedünse sehv ile
Çekme gam ey dîl sakın bâb-ı kazâ meftûhdur

Kıt'a ve lehu eyzan :

Beglere bin ma'rifet harc eylesen degmez pula
Şimdi meyli dirhem ile bunların dînâredür

Sikke-sûret ol yûri gel itme izhâr-ı kemâl
İ'tibârı şimdi halkun cübbe vü destâredür

Bu kıt'a-i sûdmend dahi anundur Kıt'a :

Dâhil olsan kirâme ey 'âkil
Eyle tahfîf ile edâ-yı selâm

Belki ta'cîl idüp kıyâma dahi
İhtisâr eyleyüp uzatma kelâm

‘İYÂNÎ-İ Konevî: Dânişmend tâifesindendir. Zât-ı ferhundesî envâ’-ı ‘ulûma şâmil ve tab’-ı hucesesi ebyât-ı manzûma mâyl ve her birinde pesendîde-i fuzalâ ve makbûl-i şu’arâ ve hutût-ı muhtelif yazmaga gereği gibi mâlik ve aksâm-ı şî’rden gazel semtine sâlik imiş. Hayfâ ki evân-ı cevânîde ve ‘unfuvân-ı zindegânîden behrever olup kâmrân olmadan terk-i ‘âlem-i fânî idüp ravza-i câvidânı mekân itmiş. Sahîfe-i devrâne kalem-i dür-feşândan bu gazel-i nâzûk-beyân zuhûra gelüp ‘iyân olmuş. Gazel :

İrer mi ‘ıyd-ı vasl-ı yâre kurban olmayan ‘âşık
Bulur mı genc-i lâ-yefnâyı vîrân olmayan ‘âşık

Olımaz bezm-i erbâb-ı hakâyık sırrına mahrem
Delüp ta bagrını ney gibi nâlân olmayan ‘âşık

İletmez kaldı işin başına râh-ı mahabbetde
Düşüp ayaklara hâk ile yeksân olmayan ‘âşık

İrişmez zâhidâ vicdân-ı pâk-i pîr-i maksûda
Nice yıl hankâh-ı gamda mihmân olmayan ‘âşık

‘İyânî şâhid-i maksûda olmaz hâsıl ı vâsıl
Libâs-ı ‘ârdan şevk ile ‘üryân olmayan ‘âşık

‘ATİKÎ: Şemahî’ dendür. Libâs-ı fakr u fenâ ihtiyâr idüp câme-i ‘âriyeden ‘âr kılup köhne vü nev-dünyâdan âzâde düşüp ol rind-i üftâde lâubâli meşreb ve vâsi’ül-mezheb olmanın neşâ’-ı câm-ı ‘ışk ile müdâm mest ve hayâl-i gubâr-ı hatt-ı hûbân ile dürd-âşâm ve dil-i şikestesî hayrân ve rind-i bâde-perest kimesnedür. Bu bir nice beyt-i Türkî vü Fârisî anundur. Nazm :

Çeşm-i agyârda ziyâ n’eyler
Kör olan çeşme içre mâ n’eyler

Diğer : Arada hâtır-ı cânânı gözlerüm yohsa
Fenâ-yı düşmene bir âh-ı ‘âşıkâne yiter

Der gûş terâ der hâb-ı dîdem ey büt mehveş
Meger ez tâli’-i men bûd ahter der güzâr imşeb ³⁶⁴

‘İYDÎ: Kütâhiyye’ dendür. Nâmı Bayram’dur. Pâk dil ü sâf meşreb kimesnedür. Tab’-ı selîm ve ‘akl-ı mustakîm ile ârâste vü yegâne-i zamân ve hüsn-i mu’aşeret ü musâhabet birle pirâste vü ferzâne-i cihândur. Ol şâ’ir-i nîkû-nâm u nîk-fercâm ber-muktezâ-yı vasf-ı tâm silk-i dervîşâne sâlik ve bî-misl tahkîka mâlikdür. Edâsı selîs ü pür-mesel ve ma’nâsı nefîs ü bî-bedel ü muhayyel vâkı’ olmuşdur. Bu bir kaç beyt-i pür-sûz hasb-i hâl-i ‘âşıkân-ı dil-sûz anundur.

‘Âşık-ı âşûfteler dîvâne şeklin bağlamış
Bâde-i ‘ışkunla dil meyhâne şeklin bağlamış

³⁶⁴ Ey ay yüzlü sevgili, seni rüyamda gördüm, yoksa talihimden midir ki bu gece üzerimden yıldız geçti (Talihim yaver gittiği için) ?

‘Ârizun şevkıyle can çıkdı bedenden raks urup
Şem’üne per yakmaga pervâne şeklin bağlamış

Eyleyelden dil-berâ zencîr-i zülfün ârzû
‘Âşık-ı âşûfteler dîvâne şeklin bağlamış

Hâne-i dil ‘ışkun ile tolalıdan ser-be-ser
Serverâ sînem benüm vîrâne şeklin bağlamış

Nîce yanmasun gönül hicr âteşinde ‘İydî’yâ
Şâh unuttı bendesin bîgâne şeklin bağlamış

Diğer : Zâhidâ biz meclis-i ‘ışk içre hâlât ehliyüz
Meylimüz yok zühd ü takvâya harâbât ehliyüz

Pîr-i ‘ışka biz mürîd olup melâmet hırkasın
Giymişüz râh-ı mahabbetde irâdet ehliyüz

Diğer : Âftâb-ı himmetün ben hâke pertev salsa ger
Zerre denlü kalmaz idi zulmet-i gamdan eser

Diğer : Ruhun şevkıyle bagrın yakdı lâle
Lebün hicriyle kan aglar piyâle

Kadüm çeng itdi gam bezminde ol yâr
N’ola ney gibi kılsam âh u nâle

Lebün içre gören dendânunı dir
Kamerdür kim ihâtâ itdi hâle

Degül hatt-ı ruhı devründe yârün
Nedür bir goncede bu denlü jâle

Suna ‘uşşâka la’lün âb-ı hayvân
Revâ mı ‘İydî-i dil teşne kala

Fî harfî’l-gayn

GUBÂRÎ Çelebi: Karamân kurbünde Akşehir’ dendür. Zümre-i erbâb-ı ‘ulûmdan ve fûnûn-ı ‘ilm-i zâhire iştigâl üzre iken diyâr-ı Rûm’da nâgâh âsâr-ı ‘ışk-ı İlâhî ve cezbe-i envâr-ı nâ-mütenâhîye irişüp tasfiye-i bâtın itmek için ‘örf ü izâfeti koyup ‘azm-i niyyet-i Ka’be-i şerîf ve hevâ-yı ravza-i latîf kılup zâd-ı sefer-i uhrevî ârzûsıyla mukîm ve Medîne-i Mustafâvî idüp müddet-i medîd ve ‘ahd-i ba’îd ol âsitân-ı felek-âşîyânlarda mekân tutup kûşe-i ‘uzlet ve genc-i vahdeti hüsn-i ihtiyârıyla ihtiyâr itmiş. Âhir ber-muktezâ-yı rûzgâr mihr-i vatan-ı aslî gâlib olup be-tarîk-ı sılâ diyâr-ı Rûm’a ‘avdet kılmış geldükden sonra âyine-i tab’larına gerdiş-i devr-i rûzgârdan gubâr-ı melâmet ve gerd-i meşakkat konup ol vadîde hayli zahmet çeküp âhir yine lutf-ı pâdişâh-ı ‘adâlet-güster ve Sultân-ı ehl-i hünerün ihsân-ı bî-nihâyesi mukârin ve ‘inâyât-ı bî-gâyesi mu’âvin olup maksad-ı maksûdına ırgürüp kendüden hoşnûd

kılmış. hakkâ budur ki ol nîkû-halef bakıyye-i şu'arâ-yı selefdür. Hadd-ı zâtında dervîş nihâd u pâk-i'tikâd kimesnedür. Zebân-ı Fârisî'de ma'lûmâtı hûb ve eş'âr-ı mahabbet-iş'ârı ser-â-ser mergûb ve tab'-ı şerîfî rûz u şeb semt-i şî're râgıb ve zurafâ-yı cihân içre mahbûb-ı musâhabeti ve âdâb-ı sohbeti ve şöhet-i zâtı eş'ârına gâlib. Bu gazel ve bir kaç beyt-i meşhûr anundur mestûr oldu. Gazel:

Dest-i kudret yazdı hattun mushafın bâb üstine
Kıl kalemle geldi zülfün kodı i'râb üstine

Çeşm-i hûn-bârum ham olmuş kâmetüm üzre benüm
Gözelerdür gûyiyâ bağlandı tolâb üstine

Câmi'-i hüsnünde kaşun üzre alnun pertevin
Nûr inmişdür sanur kim görse mihrâb üstine

Çeşm-i seyl-âbumda cismüm sanasın bir gâhdur
Geldi tahrîk-i hevâdan düşdi girdâb üstine

Eyleme düşnâmunı eksük Gubârî'den sakın
Rûy-i şefkatden nazar soldukça ahabb üstine

Diğer : Bakmaga pîr-i mugan her dem şarâbun 'aynına
Câmdan 'aksün ider gördüm habâb un 'aynına

Kâmetüm oldu kemân başum kemânçe kâsesi
Mâ-hasal başdan başa döndüm rebâbun 'aynına

Ol kadar pâmâl-i gam oldu Gubârî kim şehâ
Hâk-sâr-ı gam olup döndüm türâbun 'aynına

Diğer : Ser-i kûy-i vefânun hâk-sârı
Ayaklar topragı ya'nî Gubârî

GAFÛRÎ Çelebi: İstanbul'dandır. Erkân-ı devlet ve a'yân-ı sa'âdet içre Bahşı-zâde diyü mezkûrdur ve ecdâd-ı nîkû-nijâdı eben 'an ceddin pâk-i'tikâd u sâf-nihâd olmagın evvelâ tarîk-ı Nakşibendiyye'den merhûm-ı magfurunleh Erdebilli Sinân Efendi hazretlerinden bi'at idüp müddet-i medîd riyâzet üzre olup vücûd-ı müdriki erbâb-ı dilden ve sem'-i latîfî ehl-i şenîden olmagla gâyetle melekeye sâlik düşüp her vâdiye cüst ü cû iderek yâr-ı hûb-hû tahsîl-i 'ulûma sâlik olup mizân-ı 'akl-ı pür-cemîlenün noksânın tekmîl itmege hıdmet-i 'ulemâ-yı zamân ve mülâzemet-i fuzalâ-yı cihân ihtiyâr idüp ol yâr-ı dil-pezir merhûm Çivi-zâde ve Saçlı Emir'de dânişmend ve şerîkleri içre eyülükle bî-mânend olup 'aceze'sş-şeyu âhirehu³⁶⁵ mâsadakınca Sultân Süleymân 'aleyhirrahme ve'r-rıdvân hâcelerinden mülâzım olup el veledü sırru ebihi fehvâsınca zümre-i çavuşân-ı 'âlî-şân-ı pâk-iz'âna lâhık olup erbâb-ı dîvândan oldum diyü 'âdet-i kadîmesin terk itmeyüp tekrâr tarîk-ı Nakşibendiyye'de sâlik-i

³⁶⁵ Bu şeyin sonu eksikti, tamamlanmamıştı.

hâcegânîde merhûm-ı magfûr Hakîm Efendi hazretlerinin tilmizlerinden ve halîfe-i mütelezzizlerinden sâhib-seccâde Şa'bân Efendî'den dest-i irâdet alup sa'îd kılmışlardır. Tasfiye-i bâtın kılup teshiye-i memâlik-i kulûb idüp âyîne-i kalbi gerd-i kudûretten müberrâ ve hidâyet-i Rabbü'l-a'lâ irişüp yolunda kadd-i dil-berân gibi mustakîm olup âhir-i 'ömrüne dek 'ilm-i şerî'atden ferâgat itmeyüp hemîşe tâlib-i 'ilmlere ta'lîm ve her bir 'ulûmun fûnûnı tefhîm itmede a'zîm himmeti olup hâlî olmazlar imiş. Sene ihdâ ve tis'în ve tis'â mi'enün Muharreminde emr-i Sultân Murâd Hân ile ferzend-i dil-bendi ve a'yân u erkânun dil-pesendi sâhib-i 'akl u hoş-fakîh Mehmed Çavuş diyâr-ı Bagdâd'a gelüp bu bende-i nâ-şâd ile mülâkât idüp evsâf-ı vâlid-i büzürgvârların zebân-ı fesâhatü'l-beyânından ısgâ kıldum. hakkâ budur ki vâlidleri gibi kemâlat-ı bî-nihâyetle güzîde-i yârân-ı nüktedân şâ'irân-ı sihr-sâz ve dânişmendân ile hem-râz olup musâhabet-i dil-küşâsı ekâbir ü a'yân içre makbûl ve erbâb-ı devlet içre meşhûr. Bu gazel-i bî-bedel-i dil-cû peder-i pür-mesel-gûlarundur sebt olundı. Gazel:

O nâzûk cismüne pirâhenün cânâ düşer ditrer
Şu'â-ı şemsdür âb üstine gûyâ düşer ditrer

Yaşum fâş ideli 'ışkum beni hicründe büt tutdı
Şu mâhî gibi sâhilde iter deryâ düşer ditrer

Bu şem'-i bezme karşı in'ikâs-ı câm-ı pür-sahbâ
'İzârün üstine ey dil-ber-i ra'nâ düşer ditrer

Eline câm-ı la'lin alsa meclisde dilâ dil-ber
Güneş ruhsârı şevkiyle meye gûyâ düşer ditrer

Kalur cânsûz Gafûrî künc-i mihnetde koma cânâ
Gidince can ta'allukdan beden tenhâ düşer ditrer

GUBÂRÎ: Rûm İli'nde Horpeşte nâm kasabadandur. Ehl-i 'ilm zümresin- den ma'ârif-i cüz'î vü küllî ile makbûl-i hâs u 'âm ve kasaba-i mezkûrun reşk-i gülistân olan câmi'i içre hâtib-i hoş-âvâz ile misâl-i 'andelîb ve tabî'at-ı şî'riyyesi pâk ve 'arsa-i nazmda tevsen-i fikri cüst ü çâlâk eş'âr-ı nefisi dil-peziâr ve bu gazel tahmîs-i bî-nazîr vâkı' olmuştur. Mânend-i nass-ı kâti'dür sebt olundı. Gazel:

Kendüm bu çeşm ile iki göz bir deger menüm
Devr-i sipîhr-i çarhda nevbet deger menüm

Ahbâr-ı 'ışkı ehle degirmek murâd ise
Hâtîf kemâl-i 'ilmine mâhîr deger menüm

Gösterme görmesin yüzün agyâr-ı bed-nazar
İki gözüm berü gelesin göz deger menüm

Çok salma tîg-ı gamzeni gönlüm yarasına
Su kapmasun hevâlanur 'aynum deger menüm

Berdâr-ı dâr-ı zülfün olaldan Gubârî'yem
Mi'râca irdüm ayagı yire deger menüm

GAMMÎ Beg: 'Antabî'dür. Müddet-i medîd ve 'ahd-i ba'iddür ki ol diyârda alay begidür. Ber-hilâf-ı mahlas bir güler yüzlü nedîm-i devrân ve zarâfet ü nezâketle hemîşe gül gibi şâd ü handân dâimâ neşât üzredür. Hadd-ı zâtında muhibb-i fukarâ ve melâz-ı şu'arâ kimesne olup ma'ârif-i cüz'îden küllî habîr ve akrân içre bî-nazîrdür. ve zebân-ı Fûrs'un kavâid-i pür-fevâidinden haberdâr ve pesendîde-i ehl-i rûzgârdur. Tabî'at-ı şî'riyyesi revân ve eş'ârî fire-vân ve gamz-edâ-yı 'uşşâk-ı nâtüvândur. Meşhûrdur ki ol fenn-i şî're 'allâme olan kasîrû'l-kâme olmanın bir gün bir kevkeb-i baht-ı humâyûn ve necm-i tâli'i meymûn olan Tâli'i nâm bir şâ'ir-i hûb kelâm zarâfet yüzünden mezbûr Gammî'ye dir ki Gammî mahlas itmeden Şâdî mahlas itmen sana münâsib idi. Hemân anlar dahi hâzır cevâb olup dir ki anun gibi mahlasa senün gibi tâli'-i meymûn kimesne gerek. Bu bir iki beyt anlarun netâyic-i tab'ındandır kalem-i 'anber-bârla nakş u nigâr olundu. Şî'r:

Ol gonce sözde kim leb ü dendân açar kapar
Dürr ile tolu hokka-i mercân açar kapar

Diğer : Gamîden ey gözi âhû rakîb elbetde dûr olmaz
Kara kulluk durur gûyâ ki almış yanın aslanun

Makâlî nazîre dimişlerdür şöyle kim

Ey benüm cânum soran ol rûy-i zîbâdan cüdâ
Mâhî-i sekbenün ahvâlin n'olur mâdan cüdâ

li-mü'ellifihi :

Hâsıl olmaz geşt-i 'ömr ol rûy-i zîbâdan cüdâ
Sebze-i nev-restenün hâli n'olur mâdan cüdâ

GINÂYÎ: İstanbullı dîvân-ı hümayûn kâtiblerindendir. Sûret-i ma'nâda kelimât-ı pâk ile meclis-ârâ ve hüsn-i edâ ile bî-hemtâ rûz u şeb mah-rû dil-berlerle sohbetine sâlik ve fehm-i şûhî letâyif-i rengîne mâlikdür ve kalb-i gînâ-perveri mustagnî-i dünyâ-yı fânî ve esnâ-yı musâhabeti ekser-i şebistânîdür. Bu bir iki beyt anundur. Beyt:

Dergâh-ı Hak'dan isterüz ancak murâdımız
Erbâb-ı 'izz ü câhe degül istinâdımız

Diğer : Ol nihâle el irişmez yûri ikdâm itme
Yâd idüp mîve-i vaslın tama'-ı hâm itme

Diğer : Ey lâle-ruh güle nice teşbîh idem seni
Sen pâdişâh-ı 'âlem o dervîş-i Gülşenî

Ma'lûm-ı erbâb-ı 'ukûl ola ki şehri İstanbul'da bir merd-i bisyâr-gû ve herze-gird-i bed-hû hadd-ı zâtında yâr-ı musâhib ve hemîşe mülâzemet-i erbâb-ı menâsib idüp kelimât-ı nâ-

münâsible nâkil-i rivâyet-i bî-tedbîr ve nâşir-i hikâyât-ı İbn-i Kesîr olup müstem'an-ı fazîlet-iktisâb ve hoş-fehîmân-ı mü'eddeb mezkûr İbn-i Kesîr lakabıyla mülakkab itmişler. İttifâken bir kerre kapudanlıkla vezîr olan Piyâle Paşa'nun sohbet-i sürûr-efzâsına irişüp 'âdet-i kadîme üzre güftâre gelüp İbn-i Kesîr ba'z-ı kelimât takrîrine şürû' itdükde müşârünileyh Gınâyî ol meclisde bulunup mezkûrun bu denlü güftâr-ı dürûga iksâr ile ibrâm u ikdâmın gördükde bu beyti bedîheten anlarun kalem-i kır-fâm ile erkâm itmişler. Beyt :

Meclisi sıkles ile eyledi sîr
N'aceb müksir olur İbn-i Kesîr

GINÂ'Î: İstanbul'dandur. Dervîş-ma'îyyet ve nîkû-hilkat 'ilm-i zâhire 'ömrin sarf idüp bir mikdâr temettü' bulmuş ve zebân-ı Fârisî vü Nevâyî'ye cidd ü cehd ile sa'y-i küllî gösterüp şu'arâ-yı mütekaddimîn ve zurafâ-yı müteahhirînün devâvinin tettebbu' itmiş. Tab'-ı bülendi her birinden behremend ve akrân arasında hûşmend olmuş idi ve evkât-ı mübârekin kitâbetle sahhâflığa ve ekser-i zamânın fikr-i şî'r-i sâfa bezl itmek üzredür. Kuvvet-i şî'riyyesi pür-zîver ve makbûl-i cumhûr olmuşdur. Güftârı musanna' ve eş'ârı mülemma' ve gazel-i muhayyel-i pür-mesel vâkı' olmuşdur. ve bu bir kaç matla'-ı 'âşıkâne vü rindâne anundur sebt olundu. Şî'r:

Beni ferdâya saldugun bu gün ey kâmeti tûbâ
Şikâyet eyleyem Hak hazretine olıcak ferdâ

Diğer : Kıyâm it kâmetin göster didüm bâg-ı letâfetde
Görürsün didi katlin anı ol servüm kıyâmetde

Diğer : Yüzün görüp didiler âftâb-ı enver ana
Ne yüz ile ola her âyîne berâber ana

Diğer : Var iken hicrûn ile gönlümüzün tarlığı
Dehenün yok yire eyler bu cefâ-kârlığı

li-mü'ellifihi :

Tîgına arkanup olmasa hun-hârlığı
Bıçgı itmez idi bunca dil azârlığı

GARÎBÎ: Rûm İli'nde Yenice'den dânişmend tâifesindendir. Tab'-ı pâki ma'ânî-i garîb bulmada tîz ve eş'âr-ı revânı elfâz-ı dil-firîb ile mahabbet-engîz ve tabî'at-ı şî'riyyesi bir hadde dürr-i pür-zîverdür ki ekser-i ebyâtı şu'arâ mâbeyninde makbûl ve eyülûkle meşhûr. Bu bir kaç matla' u beyt eş'âr-ı dürrer-bârinun pesendîde ve güzîdesidür gûş-ı sarrafân-ı nezdîk ü dûrdur tahrîr olundu. Eş'âr:

Bâzâr-ı gamda eşk-i güher-bâra kim bakar
Sarraf-ı dîde bir kurı dükkan açar kapar

Diğer : Ma'cûnî bir müferrih efendiye bendeyüz
Dükkânına gelen kişi hayrân olur gider

Diğer : Allar giymiş tonanmış bezme gelmişdür şarâb

‘Aklını bezm ehlinün âl ile almışdur şarâb

Diğer : Gezdirür kurs-ı mehi tabla içinde hâle
Müşterî dirhem-i encümle dile kim âle

Mezkûr Garîbî ‘âlem-i şebâbda bir şehvâr-ı zerrîn rikâba üftâde-i dil-dâde iken bir dîv-sîret rakîbî hicv itmiş. Mezkûr hicvden hayli ter düşüp kâdıya varır. Müşârünileyh ol esnâda bedîheten bu târîhi ol hârûn başına tevcih diyü sebt itmiş bed degül nîkdür. Kıt’a Târîh:

Beni hicv itdi diyü da’vâ idüp bir ebleh
Kâdıya varup itdügi sicillât ile

Ben de inkâr kılup hâsıl ı bu da’vânun
Didüm ol arada târîhini ebyât ile

Fî harfî’l-fâ

Mevlânâ FUZÛLÎ(‘aleyhir rahme) **-İ Bagdâdî**: Kemâl-i ma’rifetle kâmil ve fûnûn-ı fezâyil ile fâzıl şûh-tab’ u şîrîn-sohbet ve ‘ilm-i hendese vü hey’et ile ebdân-dân ehl-i hikmet ve ehâdis ü tefâsir ile peyrev-i şeri’at hadd-ı zâtında bende-i ehl-i tarîkatdûr. Ol pîr-i nîkû-hisâl mazmûn-ı belâgat-nümûn bulmagla bî-misâl idi. Üç zebân ile asnâf-ı şî’re kâdir ve tarz-ı mu’ammâ ve ‘arûzda mâhir üslûb-ı inşâ-yı selâset-engîzi müsecca’ mânend-i Hâce-i Cihân makbûl-i ehl-i zamân ve kavâid-i pür-fevâid-i kasâyid-i fesâhat-âmîzi mülemma’ misâl-i kasâyid-i Hâce-i Selmân ve dil-pesend-i ehl-i ‘irfân ve semt-i mesnevîde **Leylî vü Mecnûn** mânend-i dürr-i meknûn sebt itmişdür ve nice nice Türkî vü Fârisî resâil yazmışdur ve dahi **Ravzatü’ş-şühedâ**-yı Mevlânâ Hüseyin Vâ’izi be-tarîk-ı terceme **Hadikatü’s-Sü’edâ** nâm bir kitâb ki sergüzeşt-i hazret-i imâmdur itmâmına ikdâm kılmışdur hâlâ meşhûr-ı hâs ü ‘âmdur derc kılmış. Hakkâ budur ki kendü tarzında muhteri’ ve tarîk-ı ma’ânîde mübtedi’ ve şahid-i fikri elfâz-ı pâk ile müzeyyen ve gün gibi câme-i zerrîn-i ma’nâ ile a’yân içre mübeyyen ve lisân-ı Tâzî’de olan ebyâtı fusahâ-yı ‘Arab’da meşhûr güftâr-ı Nevâyi-âyîni Türkân-ı Mogol yanında mezkûr ve zebân-ı Fûrs’de olan dîvânı pesendîde-i şu’arâ-yı her merzbûm ve eş’âr-ı Türkîsi makbûl-i zurafâ-yı Rûm olmışdur. Cümlesinden bir kaç matla’-ı Fârisî ve bir nice Türkî beyt ve bir gazel-i ‘âşıkâne ki meşhûr-ı merdüm-i devr-i zamânedür sebt oldı ve sene selâse ve sittîn ve tis’â mi’ede maraz-ı tâ’ûn ile mat’ûn olup Diğer-gün olmışdur. Nazm :

Merâ ey şem’ meyl-i girye şod der hicr-i yâr imşeb
Tu be-nişin girye-i can-sûz râ bâ men güzâr imşeb ³⁶⁶

‘Aks-i kadd-i u âyîne berübûd zi hat kerd
Z’în vâsıt hod râ hedef-i tîr-i belâ kerd ³⁶⁷

Seng-i bîdâd-ı bûtân âyîne-i dilrâ şikest
Her temennâyî ki der dil dâştem sûret best ³⁶⁸

³⁶⁶ Ey mum, bu gece yarin ayrılığında ben ağlamaklı oldum. Sen otur, can yakıcı ağlayışı bu gece benimle bırak(bana bırak).

³⁶⁷ Onun boyunun yansıması aynayı ortadan kaldırdı ve hata yaptı. Bu yüzden kendi vâsıtını bela okuna hedef yaptı.

li-mü'ellifihi

Seng-i ân peyman şiken peymâne-i dil râ şikest
Çeşm-i ümmîdem habâb-âsâ ez u tarfî ne-best³⁶⁹

‘Âşıkı revnak zi etvâr-ı men-i hayrân girift
‘Aşk ez Ferhâd sûret best ez men cân girift ³⁷⁰

Diğer : Kemâl-i hüsn virüpdür şarâb-ı nâb sana
Sana helâldür ey mugbeçe şarâb sana

Bu ebyât-ı pür-nikât ol şâ'ir-i şîrîn-kelâmundur. Ebyât :

Sabrum alup felek bana yüz bin belâ virür
Az olsa bir metâ' ana el çok bahâ virür

Düşdüm belâ-yı 'ışka hıredmend-i 'asr iken
El şimdi benden aldugı pendî bana virür

Diğer : Büt-i nevresüm namâza şeb ü rûz râgıb olmış
Bu ne dîndür Allah Allah büte secde vâcib olmış

Diğer : Olur ruhsâruna gün la'lüne gülberg-i ter 'âşık
Sana eksük degül gökden iner yirden biter 'âşık

Diğer : Nûrını mâh mihr-i ruhından alur müdâm
İnkâr iderse şehir-i güvâhum durur tamâm

Diğer : Penbe-i merhem-i dâg içre nihandur bedenüm
Diri oldukca libâsum durur ölsem kefenüm

Diğer : Cânı cânân dilemiş virmemek olmaz ey dil
Ne nizâ' eyleyelüm ol ne senündür ne benüm

Diğer : Ney gibi her dem ki bezm-i vaslunı yâd eylerüm
Ta nefes vardur kuru cismümde feryâd eylerüm

Diğer : Dost bî-pervâ felek bî-rahm devrân bî-sükûn
Derd çok hem-derd yok düşmen kavî tâli' zebûn

Diğer : Yürütmenüz 'arakı meclis içre bâde ile
Helâl-zâdeyi koşman harâm-zâde ile

Diğer : Şöyle ra'nâdur kim serv-i hırâmânun senün
Kim gören bir kez olur elbette hayrânun senün

³⁶⁸ Güzellerin acımasız taşı gönül ayinesini kırdı, kalbimdeki her temenni gerçekleştirdi.

³⁶⁹ O vefasızın taşı gönül kadehini kırdı, ümit gözüm köpük gibi ondan bir fayda elde edemedi.

³⁷⁰ Aşıklık, hayret içindeki benim tavırlarımdan revnak buldu. Aşk, Ferhad'dan suret, benden de can buldu.

Gazel: Bırakdı hâke hüsnün âftâb-ı ‘âlem-ârâyı
 Götürdi yir yüzinden mu’ciz-i la’lün Mesîhâ’yı

İki gözden revân itmiş sirişküm kâmetün şevkı
 ‘Asâ-yı mu’cizi gör kim iki bölmiş bu deryâyı

Bükülmiş kaddümi kurtarıgör kullâb-ı zülfünden
 Hatâdur çekmesün çok bagrı çökmüş bir sınık yayı

Ruhun üzre ham-ı ebrunı görmek isterüm ammâ
 İgen düş-vâr olur gün var iken görmek yeni ayı

Şarâb-ı nâba lutf it muhtesib kahr ile çok bakma
 Mükedder kılma ‘aks-i tîreden câm-ı musaffâyı

Yidi gündür o mâhı görmezem âhum şerâıyla
 N’ola kılsam benâtü’n-na’ş ile yeksân Süreyyâ’yı

Göresin yâr halk eşküm temâşâsına cem’ olmuş
 Eger nâgeh görünse ol perî gel gör temâşâyı

Fuzûlî eşk seyliyle perîşân olma sabr eyle
 Ana hem-vâr ola âhir tutup turmaz bu dünyâyı

FİKRÎ Efendi: İstanbul’dan ve kuzât zümresindendir. Mâşî-zâde Dervîş Çelebi demekle meşhûr vâlid-i ‘azîzi Semâniye’de müderris iken fevt olmuştur ve kendü de ‘ilm-i zâhiri tertîb üzre görmüş hoş-fehm ü şûh-tab’ ve dervîş-nihâd u hûb-i’tikâd kimsedür ve üslûb-ı nazmda gereği gibi şâ’ir ve tarz-ı mesnevîde misli nâdir Mevlânâ ‘Abdullah Hâtîfî’nün mesnevîle-rinden ve Mevlânâ Mehemmed ‘Assâr’un **Mihr ü Müşterî**’sin ve ekser-i fuzalâ-yı ‘Acem kitâbların terceme itmişdür ve ba’zı yirlerinde ma’ânî-i hâs ile tasarruf-ı küllî itmişdür. Eş’âr-ı bî-nazîri ve güftâr-ı dil-pezîri vâfir ve makbûl-i fusahâ-yı ekâbirdür. Bu bir kaç beyt anundur. Beyt :

‘Ayn-ı hâ kirpik elif üstinde med ebrûdur
 Âh ezelden ser-i sevdâ-zedeme yazudur

Diğer : Kef-i pâ-yi seg-i yâre şu denlü gözlerüm sürdüm
 Kabarmış göz göz olmuş ol kefi pâ sonradan gördüm

Diğer: Şeb-i gamda kara hâlün gamıyla dilde dâgum var
 Şeh-i ‘ışkum hazînem içre cevher şeb-çerâgum var

Tolu içdüm sifâl-i seglerünle pâdişâh oldum
 Ki yâran devletinde kâse-i Cem’den ferâgum var

FAZLÎ Çelebi: İstanbullî’dur. Kara Fazlı demekle meşhûr ve makbûl-i tabâyî’-i nezdik ü dūr mukaddemâ fûnûn-ı ‘ilm-i zâhire iştigâl üzre iken terk kılup tâlibî-i ma’rifetullah Zarîfî

Hüseyin Efendi'nün hankâh-ı latîfnde i'tikâf idüp tarîk-ı hulûsîde nice nice halvet çıkarup murâda irişüp bâtını sâf itmege sâhib-behre vü irşâd olmuş. Ber-muktezâ-yı rûzgâr ve ârzû-yı hatt-ı nefis-i bed-girdâr ile zümre-i küttâbdan olup dergâh-ı şâh-zâde-i kâm-yâbun re'is-i küttâbı olmuş. El'an kemâl-i fazl ile beyne'l-fuzalâ ma'rûf ve fûnûn-ı belâgatle 'inde'l-bülegâ mevsûf ve aksâm-ı şî'r semtine tab'ı sâlik 'ale'l-husûs mesnevîde hamseye mâlik ve kasâyid-i pür-fevâyidi musanna' ve inşâ-yı ferah-efzâsı müsecca' ve tarz-ı gazelde hûb ve terci'-bend ile rubâ'ıyyâtı mergûb sene ihdâ ve seb'în ve tis'â mi'ede 'âlem-i fânîden ravza-i câvidânîye mâyil ü râgıb olmuş. Eş'âr-ı şeker-bârından bu bir gazel-i pür-mesel ile bir kaç beyt münâsib-i hâl-i 'uşşâk ve vasf-ı hûbân-ı sâhib-mezâkdur. Gazel:

Sen bu kemâl-i hüsn ile mihr-i felek misin nesin
Nev'-i beşerde görmedük yohsa melek misin nesin

Gözlerüm içre oynayan sensin iki gözüm benüm
Bilsem iki gözümdesin yohsa bebek misin nesin

Kutb-ı murâdum üzre çün dönemedün yakıl yıkıl
Ey başum üzre devr iden çarh-ı felek misin nesin

Dünye gamın 'alaf gibi gel yime 'işret it dirin
Hiç kulag kabartmadun sûfî eşek misin nesin

Lezzetini kelâmunun ehl-i mezâk olan bilür
Yohsa be Fazlî sözde sen kân-ı nemek misin nesin

Bu bir nîce beyt ü matla' dahi anundur.

Sana göz 'âşık u dil 'âşık u cân ile ten 'âşık
Tenümde her kılum cânâ olupdur cümleten 'âşık

Diğer : Gel tîgun ile başumı çal iki pâre kıl
Sûr-ı 'azîm-i 'ışkına yârün nikâre kıl

Diğer : Didiler sakın seni tutar cefâsı taşına
Geldi hep didükleri ben mübtelânun başına

Diğer : 'Aklum aldun ey perî diyü nice da'vâ kılam
Şâhideynüm cân u dil anlar da senden cânibe

Mezkûrun bin dâne muvahhidâne rubâ'îsi vardır. Binden birin kalem-i dü-zebâne tesvîd idüp beyân ider. Rubâ'î :

Yenbû'-ı vücûd ya'nî ser-çeşme-i hû³⁷¹
K'olmuş bu nigûn tas anunla memlû
Feyzinde anun nahl bulunmaz ammâ
Her kişi alur feyzini mikdâr-ı sebû

³⁷¹ Varlık kaynağı, yani onun kaynağı

FIGÂNÎ: İsm-i şerîfî Ramazan ve mevlid-i latîfî Trabzon'dur. Şâ'ir-i metîn ve sâhir-i sihr-âferîn ve zihn-i selîmî nazmda selâset ile mergûb ve tab'-ı mustakîm-i şi'rde istikâmetle hûb. Nâgâh kazâ-yı âsmânî ve belâ-yı nâgehâniye râst gelüp ol ser-efrâze töhmet-i gammâz ugrayup bir matla'-ı hicv-âmiz vezir olan İbrâhim Paşa hakkında dimişler diyü selbine emr olunmuş. Dâr-ı İstanbul'da ber-dâr olup ser-efrâz-ı dünyâ ve mümtâz-ı 'ukbâ olmuş. Tarz-ı gazelde bî-nazîr elfâza kâdir ve üslûb-ı kasîdede gâyetle şâ'ir-i mâhir. Bu ebyât-ı 'âşıkâne ve kelimât-ı rindâne anlarındur. Hasb-i hâl-i 'âşıkân ve vird-i zebân-ı 'ârifân-ı devrân ve meşhûr-ı cihân ve makbûl-i ehl-i zamândur ki sebt olundu. Şi'r:

Virdüm dehân-ı dil-bere dil gâybâne ben
Mikdâr-ı zerre görmedüm andan nişâne ben

Diğer : Ol gonce gül gibi takılır hâre muttasıl
Bülbül gerekse gönlünü gen tut gerek tarıl

Diğer : Hâlün gamıyla tâzeledüm sîne dâgını
Yakdum dil ehlinün o söyünmüş çerâgını

Diğer : Ruhsârlarun zülfün içün itdi şehâdet
Bir dîni karadur ki ider şemse 'ibâdet

Bu gazel-i hûb-ı dil-firîb ol şâ'ir-i nîk-üslûbundur. Gazel :

Gözümün kasrını idinse hayâlün n'ola cây
Şeh-i 'âdildür idinse yiridür sırça sarây

Şeb-i firkatde gözüm h'âb ile ceng eylemege
Müjeden bağladı ey meh yine bir kara alay

Bâm-ı çarh üstine nâlem çıkuben tıfl gibi
Aşaga inmege korkar çıkırup dir ey vay

Bir nefes nâleme râm olmaga komaz diyü ben
Gösterür illere barmakla beni bezmde nây

Ayagı ellere taksîm idesin bezmünde
Niçün ey sâkî Figânî kuluna degmeye pây

FİRÂKÎ: Kütâhiyye'den zümre-i 'ulemâ ve sülehâdan 'ömr-i dırâzın va'z u nesâyih-i müslimîne ve ehâdis ü tefâsir-i Kur'an-ı mübîne sarf idüp **Ma'nevî** ve **Mesnevî**'den maksûd hâsıl kılup ehl-i fazl-ı vücûd içre kâmil ve makbûl-i erbâb u ehl-i dil kimesnedür. Zîrâ ki şevk-ı cevânân ile mesrûr ve gâh firâk ile mehcûr. Bu gazel-i 'âşıkâne ol firâk-keşîde-i zamânenün eş'âr-ı abdârındandır ve güftâr-ı şeker-bârındandır ve hasb-i hâl-i ehl-i cünûn ve vasf-ı dil-berân-ı zü-fünûndur. Gazel:

'Âşıkâ nâz eylemez dil-ber egerçi az olur

A benüm çok sevdiğüm bu ne dükenmez nâz olur

Tâli'ümde âh kim ben sevdiğüm meh-pâreler
Gün-be-gün her-câyılıklar eyleyüp mümtâz olur

Veh ki bir şehbâza el virmez hevâ-yı 'ışkda
Pâyine düşdüklerüm ekser hümâ-pervâz olur

Yâre karşı yâreler açsam 'aceb mi sînede
Lâleler açılmaga başlar kaçan kim yaz olur

Ey Firâkî şehrimüz şâhin yuvasıdır bizüm
Anun içün aneden toғанımız şehbâz olur

Bu bir kaç matla' u beyt anundur ki sebt olundu. Beyt:

Gülşeninde 'âlemün bu sırra irmez hîç kes
Zâglar âzâde vü bülbül giriftâr-ı kafes

Diğer : Kanlu yaşum dem-be-dem deryâ gibi eyler hurûş
Bilmezem kandan gelür her dem bana yâ Rab bu cûş

'İşk pul pul dâg ile zeyn itdi 'üryân sînemi
Oldum İbrâhîm-i Edhem'den Firâkî hırka-pûş

FAHRÎ: Bursevî'dür. Ehl-i cihât kısmından ve devrün zurafâsından ve bu 'asrun şu'arâ-yı nâmdârânından olduğundan ma'adâ ol rind-i cihân-peymâ efşân bir zamân nahl-i bend-i bî-misâl ve hutût-ı mukata'ât kesmede sâhib-kemâl ve hemîşe şifte-i cevânân-ı sâhib-hâl olup ebyât-ı pür-nikâtı ser-â-ser hasb-i hâldür. Bu bir nice matla' 'arus-ı fikrinden şâhid-makâldür. Ebyât :

Fahri'yâ dil vireli bir dil-ber-i sengin dile
Âsiyâb-ı mihnete gendüm varup un olmuşum

Diğer : Hâl-i hindû bir dilinde sarık u çâlâkdür
Dür ugurlamaga geldi hokka-i yâkûtdan

Diğer : Yâ Rab o serv-i semenber ide mi 'ahde vefâ
Yoksa cânım ala mı hasret ile cevır ü cefâ

Fahri'yâ künc-i belâda yatur idüm bîmâr
Şerbet-i la'l ile yâr bana virdi şifâ

FİRDEVSÎ: Zümre-i mülâzimînden rûz u şeb fûnûn-ı 'ulûma müdâvemet gösterüp beyne'l-akrân bî-misâl ve her fende sâhib-kemâl ve zebân-ı Fârisîde zabt-ı durûb-ı emsâl itmiş Seyyid 'Alîoğlu'nun **Şerh-i Gülistân**'ına nice nice cevâb ü su'âl kılmış ve kava'id-i 'arûz u mu'ammâ bilmede zü-fûnûn ve **Kânûn-ı Şifâ**-yı Bû 'Alî yazmada hikmetle Eflâtûn tab'-ı güher-rîzi envâ'-ı nazma sâlik ve her birinün edâsına mâlik zîrâ ki Mesîhî'nün şehrengîzine

nazîre dimiş. Sâir şu'arânun nezâyirinden müstahsen ve pesend-i zurafâ-yı sâhib-suhen olmuşdur. Hadd-ı zâtında emîrû'l-kelâm ve tevârih-i bî-nazîr ile meşhûr-ı hâs u 'am ve ser-â-ser ebyât-ı hayâl-engîzi musanna' ve kelimât-ı misâl-âmîzi müsecca'dur. Sene ihdâ ve seb'in ve tis'â mi'ede Firdevs-i Berîn ve ravza-i cinânda hem-dem-i hûr u 'ayn ârzûsıyla terk-i 'âlem-i fânî ve mukîm-dâr-ı câvidânî oldu. Bu bir kaç matla' u beyt ol bûlbûl-i gülşen-i cân ve tûtî-i şekeristân-ı cinânundur sebt olundu. Ebyât:

Hatt-ı ruhsârını ol nev-hat güzel itse tırâş
'Âlem içre fitneler kopar kesilür nice baş

Diğer : Görüp kemâl-i hüsn ile ey mâh sende şem'
Barmagla gösterür seni her encümende şem'

Gerçi ki şeb külâh giyüp 'arz-ı hüsn ider
Lîkîn şebih olunmaz ol şeh levende şem'

Diğer : Sürdün agyârı kapudan işiden didi muhal
Yirine itün görüp ben de didüm ni'me'l-bedel

Bu gazel dahi ol şâ'ir-i firdevs-âşiyânenündür. Cevân-ı ebrû-kemân ve Türkân-ı bî-âmân vasfında vâkı' olmuşdur. Gazel:

O çeşm ü ol müje-i bî-âmânı seyr eyle
Önüne yaymış okun Türkmânı seyr eyle

Dil almag ile komaz câna kasd ider zülfi
Neler ider bana ol dil-sitânı seyr eyle

Derûn-ı sînemi gamz ile çâk ider ey dil
Gör ol perî bana n'eyler nihânı seyr eyle

Libâs-ı surh ile seyre revâne oldu yine
Ne kanlara girür ol yâr-ı cânı seyr eyle

Ruhunda gönlümi Firdevsî'yâ temâşâ kıl
O bâgda olan âb-ı revânı seyr eyle

FEVZÎ Çelebi: Mar'aş'dandır. Zümre-i mülâzimîndendir. Dâvûd Paşa h'âcesi dimekle meşhûr ve takvâ vü tahâretle makbûl-i cumhûrdur. Tahsîl-i 'ulûm itmek için seyr-i memâlik-i 'Arab u 'Acem ü Rûm ve hevâ-yı her merzbûm idüp Mısır'da tavattun itmiş. Evkât-ı 'azîzin 'ilm-i dîne ve ders-i müslimîne sarf kılmış. Ebnâ-yı zamân içre kemâl ile mevsûf ve etvâr-ı huçeste-hisâl ile ma'rûfdur. El-hak fevz-i gülistânun bûlbûl-i destân-serâsı ve ol ezhâr-ı ma'ânînin eş'âr-ı dil-küşâsı gül gibi rengîn ve gamz-edâ yı dil-i hazîn vâkı' olmuşdur. Şi'r:

Çü gördüm hâl-i müşkîni ruh-ı dil-dâre yapışmış
Didüm sünbül saçun depret meges gülnâre yapışmış

O zülf ü hâl-i ruhsârı görelden kalmadı şekküm
Ki Mûsâ tıfl iken Fir'avn önünde nâre yapışmış

Bu gün sevdâ-yı zülfünle perîşan haldür Fevzî
Ki ders evrâkını yile virüp eş'âra yapışmış

FEYZÎ Çelebi: Rûm İli'nde Edirne'dendür. 'İlm-i zâhire meşgûl iken terk idüp tasfiye-i kalb için diyâr-ı Mısır'a vardukda sipâhî bölüğüne geçüp erbâb-ı dîvâna dâhil ü mahsûb ve pesendîde-i ashâb-ı kulûb olmuş. Gülşen-i ma'ânîde hâtır-ı 'âtır-ı feyz-güster ve gülistân-ı nazmda tab'-ı gülbîzi rûh-perver ve eş'âr-ı hayâl-âmîzi pür-ziver ve Nevâyî ve Fûrs taklîdinde makbûl-i cumhûrdur. Zîrâ ki her birinden behremend ve geregi gibi anları bilmede hûşmend ü ercmenddür. Bu matla'-ı dil-sûz ol şâ'ir-i dil-efrûzundur. Gonca gibi nühûfte iken gül gibi şükûfte olup nümâyân u 'ayân oldu. Şi'r:

Şem'e pervâneleri sanma ki bîhûde yanar
Cezbe-i hüsn-i dil-efrûzun ile od da yanar

Diğer : Pâyini tomrukda gördi gonca-i nevrestenün
Benzinün uçduğı budur bülbül-i dil-hastenün

FÜRÛĞÎ: Kayseriyye'dendür. Dânişmend tâifesiinden zümre-i sâdât-ı 'âlî-nesebden seyyid-i pâkize-haseb kimesnedür. Mukaddemâ tarîk-ı Nakşibendiye'ye sülûk itmek temennâsıyla fî zamânına İstanbul'da olan 'ukalâ-yı cihânun hûşmendi ya'nî Hakîm Çelebi Efendi'nün hankâhını penâh idüp hem-nîşîn-i erbâb-ı 'irfân ve peyrev-i sâlikân-ı devrân geçinüp âhir yine ba'zı yârânun ilhâhî ile dânişmend olmag ricâsı ile okıyup yazmak semtine sâlik ve kendü akrânı içre makbûl-i ehâlî olmuş. Eş'âr-ı Fârisî ve Türkî tettebbu'ndan bir an hâlî olmamagın fûrûg-ı nazm-ı pür-envârı ziyâ-bahş-ı her mahfel ve rahat-resân-ı 'âşıkân-ı bî-dildür. Bir gazel ile iki beyt sebt olundu. Gazel:

Nihâl-i kadd-i dil-cûyun senün şâh-ı gül-i terdür
Dehânun tâze gonca ruhlarun gül-berg-i ahmerdür

Görünce hâlünü rûyunda kaldı merdüm-i dîde
Kararı gönlümün zülfünde ey meh-rû mukarrerdür

Gubâr-ı hattı zâhir olalı rûyunda cânânun
Dilâ âyîne-i ehl-i safâ haylî mükedderdür

Riyâz-ı cennetün zâhid sana alması ey vay
Ki sîb-i gabgab-ı sîmîni yârün bana bihterdür

'Aceb mi mûrlar cem' olsa la'li üzre dil-dârun
Leb-i şîrîn-i can-bahşî Fürûgî şehd ü şekkerdür

Diğer : Seg-i dil-ber yatagında benüm zîbâ turagum var
Sarây-ı taht-ı dünyâdan ferâgum var ferâgum var

Kolumda dâg u şerhümle şehâ bir yâdigârum var
Gedâyum bâg-ı ‘âlemde elümde berk ü bârum var

Tolaşma kûyum etrâfin diyü gel eyleme cevri
Begüm zann eyleme bu devr içinde ihtiyârum var

FERDÎ-İ Acem: Mevlidi Erdebil’dür. ‘Âlem-i kesretten geçüp vâdî-i vahdet özleyüp terk-i ihvân-ı safâ ve yârân-ı vefâdan ve efrâd-ı anâsdan ferd ile musâhabet itmeyüp tek ü tenhâ temâşâ iderek diyâr-ı Rûm’a gelmiş. Hadd-ı zâtında şûh-tab’ u şîrîn-sohbet ve ebyât-ı ferah-efzâsı zebân-ı Fârisî ve Türkîde gâyetde hûb ve esnâ-yı musâhabetde kelimât-ı dil-küşâsı letâyif-i reng-â-reng ile mergûbdur. Bu bir kaç beyt anlarundur. Nazm:

Dil-i şûrîde bend-i zülf-i tû did
Fikr ü sevdâ-yı û dırâz keşîd³⁷²

ve lehu: Ol âfet gerçi şimdi şöhre-i şehir-i melâhatdür
İgende ana magrûr olma sen kim şöhet âfetdür

Yanunca ol sehî kâmet salınsa gerçi şöhetdür
İgende ana magrûr olma ey dil şöhet âfetdür

ve lehu: Nerm eylesem ‘aceb mi dilin âh u vâh ile
Kim bir hisâr alınur iki güvâh ile

FERÂĞÎ: Edirnevî’dür. Dergâh-ı ‘âlem-penâh u felek-bârgâhun yeniçeri tâifesindendir ve kayd u bend-i dünyâdan ferâgat idüp âsûde-hâl u fârigü’l-bâl olmuştur. Rûz u şeb evkât-ı şerîfin ve sa’at-i latîfin ‘ilm-i zâhir ü bâtına sarf kılup dânişmend-i hûşmend olmuş ve sanâyî’-i şî’rden behremend ve her vechile tab’-ı sâfî vâdî-i nazmda su gibi revân ve zihn-i pâki zekâ-yı dil-cû ile pesend-i pîr ü cevân ve edâ-yı Nevâyî’de ferah-bahş ve zebân-ı Fârisî’de güftârı dil-keş tarz-ı inşâda kâbil ve mu’ammâ fenninde peyrev-i merdüm-i efâzıl ve ‘ilm-i mûsikî bilmede fâyık ve her sâzda usûlî âvâzesine muvâfık ‘ale’l-husûs dervîş-meşreb ve i’tikâd-ı pâk ile bende-i ehl-i mezheb kimesnedür. Egerçi üslûb-ı gazelde kâmindür lâkin metâli’ semtine tab’ı mâyıldür. Bu bir kaç matla’ hasb-i hâl ve şâhid-i makâl vâkı’ olmuştur. Matla’:

Mümkin olmaz senden ayrılmak belî imkânı var
Can virem hasretle zirâ her işün âsânı var

Diğer : Bilün koçmuşlar öpmüşler ruh-ı zîbânı varmışlar
Nihâl-i gülşeni egmişler andan gül koparmışlar

Diğer : Pâyine düşüp bir güzelün uydum ulaştım
Geh kâküline gâh miyânına tolaştım

³⁷² Perişan gönüm senin zülfünün bağına gördü, onun (zülfünün) fikri ve sevdası uzun sürdü).

- Diğer : Kaddün resîde nahli çağında cûy-bârun
Sen serv-i mu'tedilsin adı büyük çenârun
- Diğer : Mutribün kavli karârı sâkinün peymânı var
Kim sizünle hem-demüz tâ sagârun devrânı var
- Diğer : Geçdi gönlüm gitmedi ruhsâr-ı âlünden gözüm
İmdi bildüm ben de sevmiş hâk-i pâýün yıldızum

FAZLÎ: Mevlânâ Fuzûlî'nün oğludur. Safâ-yı zihn-i selîm ve zekâ-yı tab'-ı müstakîm ile ârâste 'arûs-ı cümle-i hayâlî ziver-i kavî-i tab'-ı kerîm ile pirâste hâlâ 'ilm-i zâhire meşgûl ve künc-i 'uzletde kanâ'at ile hamûl ve üç zebân ile aksâm-ı şî're mâlik ve rûz u şeb her birine müdâvemet göstermege sâlik binâen 'alâ-zâlik fenn-i mu'ammâda zihn-i 'ukde-küşâ ve turuk-ı tevârihde tab'ı i'câz-nümâ ebyât-ı 'âşıkânesi sûznâk ve kelimât-ı rindânesi rengîn ü pâk olmagın hûb u mergûbdur. Fârisî ve Türkî beyitler ve kıt'a-i 'Arabî anundur.

Der çunin 'ıyd-ı mübârek hûnin cigerân
Hest çun beyzâ-i rengîn bekef-i hoş siyerân³⁷³

Be-katlem tîg-i zerrîn ber kemer ân sîm-ber beste
Zi şâdî çün nemîrem behr-i katl-i men kemer beste³⁷⁴

Gam çü şod üstühân ber rehğüzer dâred
Tâ seg-i yâr âyed ez hâk ber dâred merâ (?)³⁷⁵

ve lehu Türkî:

Künc-i ferâgatümdür meyhâneler bucagı
Başum kesilse kesmen ol kûşeden ayagı

Bu 'Arabî kıt'a dahi anundur na'tda vâkı' olmuşdur. Kıt'a-i 'Arabî:

Nusalli 'alâ hayri'l-berâyâ Muhammedin
Nûr-ı mısâhî'l-bedri'l-cemâlihi

Habîbun lehu Rabbü'l-berıyyeti vâsıfun
Lekad fâza men salli 'aleyhi ve âlihi³⁷⁶

FÂNÎ: Rûm İli'nde Alacahisâr'dandur. Dervîş-nihâd ve yâr-ı nâ-murâd ve ber-muktezâ-yı mahlas fânî-hey'et ü haste-sıfât kimesnedür. 'Âlem-i bî-bekâyı fânî görüp raht u bahtın dükeli âteş-i 'ışka yakup kayd u bend-i cihândan âzâd olup râh-nümâ-yı erbâb-ı sünen ya'nî Hazret-i Zarîfî Hasan Efendi'nün hankâh-ı şerîfine ve hıdmet-i hâk-i pâ-yi latîfine yüz sürüp irâdet-i sâdik gösterüp 'ahd ü peymân bağlayup müddet-i medîd irşâd-ı dilkeşlerinden ve 'ahd-i ba'id

³⁷³ Öyle mübarek bir bayramda ciğeri kan ağlayanlar, iyi tabiatlıların elindeki yumurta gibidir.

³⁷⁴ O gümüş göğüslü güzel katlim için beline altın kılıç kuşanmış, mutluluktan ölmek üzereyim, o beni öldürmeye azmetmiş.

³⁷⁵ Gam beni, sevgilinin köpeği gelip alsın diye bir kemik gibi yola atar.

³⁷⁶ İnsanların en hayırlısı, dolunay gibi parlak (nurlu) Muhammed'e salat ve selam ederiz. Yaratılmışların Rabbi onu sevgilisi olarak nitelemiştir; ona ve âline salat getiren de kazançlı çıkar.

kelimât-ı murâd-bahşlarından murâdât-ı uhrevî ile ber-murâd olup tasfiye-i bâtın ile maksûdâtın hâsıl itmiş. ‘İlm-i zâhirde cüz’î ve küllî sa’y göstermiş zebân-ı Fârisî’yi tahsîl ve durûb-ı emsâlin tekmîl idüp ol bâbda kâmil olmuş. Zîrâ ki ol seyyâh-ı bahr ü sâhil sene seb’a ve hamsîn ve tis’â mi’ede seyâhat tarîkıyla ‘Irak-ı ‘Arab’a ve vilâyet-i ‘Acem’e seyr ü sülûk ve meyl-i dîden-i diyâr-ı her mülûk kılmış. Ol seferde çok nesneler istifâde itmiş. Sâbikan diyâr-ı Bagdâd’da râkım-ı hurûf-ı tezkîre ile ittihâdı olmagın hâlâ ekser-i zamân bu garîb-i diyâr olan dervîş-i bî-yârı ve künc-i gamda dil-rîş-i nâtûvân u zâr olan dil-efkârı hâkden ref’ itmege kadem-i rencîde kılup kûşe-i bî-tûşesine gelüp enîs ü mûnis ve hem-celîs olmadan hâlî degüldür. ve hukûk-ı sâbika bir mertebede vâkı’ olmuşdur ki tahrîr ü takrîre imkân yok. Tabî’at-ı şî’riyyesi aksâm-ı nazmda gâyetle hûb ve tarz-ı gazel ü kasâyid ü mesnevîde mergûbdur. Kendü hasb-i hâlin **Belâ-zâde** nâm bir kitâb-ı sürûr-encâm nazm itmişdür ziyâde dervîşâne vü muhakkıkâne vâkı’ olmuşdur belâ-zâdelere nâfi’dür. Bu beytler anundur. Ebyât:

Bezm-i ‘âlemde olaldan âh kim kaht-ı şarâb
Suyı solmuş âsiyâbe döndi bu deyr-i harâb

Diğer : Bir köhne kasr imiş görinen çarh-ı bî-karâr
Meh ‘ankebûtı hâle imiş ana perdedâr

Diğer : Sergeşteyüz felek gibi yokdur sükûnumuz
Mecnûn’a çıkdı silsile ile cünûnumuz

Diğer : Rakîb kâfirün ile birliğüz çün şâhımız birdür
N’ola ger dinimiz ayrı ise Allah’ımız birdür

Diğer: ecnûn başında tan mı murg itse âşiyâne
Lak lak yuvası kılmış velleylî sen zamâne

Diğer : Bu dem-i ‘âlem ‘aceb bilmezem bir dem oldugın
Bir nefeslik ‘ömrüne habs-i nefes eyler habâb

Diğer : Şeb-i firkât meger şâm-ı eceldür subhı yok hergîz
Ne meh anda ziyâ-güster ne virür zîb ü fer kevkeb

Diğer : Dîde-i hûn-bâridur her biri bir âvârenün
Anun içün Fânî’yâ meyde habâbı gözlerüz

FÂNÎ: Edirnevî’dür. Devr-i rûzgâr ile pîr-i fânî ve kûşe-i kanâ’atün Sultânı evkâtın sahhâflığa sarf itmek üzredür. Kuvvet-i şî’riyyesi pür-halâvet ve hiddet-i zihn-i müdrîki neşâ’-ı ‘ışk ile pür-keyfiyyet vâkı’ olmuşdur. Bu rindâne vü mestâne gazel ol pîr-i bî-bedelündür. Gazel:

Devr-i la’lünde senün mey-hâre bir ben bir habâb
Baş açık yalun ayak âvâre bir ben bir habâb

Sâde dil-i sâf derûnuz eylerüz âyîne-vâr
Pâk çeşm ile nazar dîdâre bir ben bir habâb

Destüne Cem gibi câm al cân ile başı senün
Gelmişüz ayagina isâre bir ben bir habâb

Raht u bahtın suya salmış bâda virmiş varını
Bî-dil ü bî-hânüman bî-çâre bir ben bir habâb

Kâ'inâtı hiçe satmış dehri almaz 'aynına
Var mıdur dirlerse Fânî-zâde bir ben bir habâb

FENÂYÎ: Gerçi mevlidi Magnisâ'dur lâkin İstanbul'da neşv ü nemâ bulmuş şu'arâ-yı selefden ve zurafâ-yı nîk-halefden geçinür. Zâhiren fakr u fenâ semtine sâlik ve her vechile zevk u safâ cânibine mâlik ve hadd-ı zâtında 'âleme mustagni ve esnâ-yı musâhabetde letâyîfî pür-ma'nîdür. Ol şâ'ir-i suhen pervâz akrânı içre ser-firâz kimesnedür. Zurafâ mâbeyninde zarâfeti şî'rîne gâlib ve herkes sohbet-i hassına tâlib. Bu bir kaç matla' u beyt anundur. Nazm:

Tîr-i gamzen mühri çıkmaya derûn-ı sîneden
Pâre pâre rîze rîze çâk çâk olsa beden

Diğer : Hasret-i la'lünle cânâ dem-be-dem kan agların
Gözlerüm yaşı 'akîke dönse cânâ gam yimen

Diğer : Gördi nihâl-i kâmetini sen semenberün
Bin pâre oldu kalbi hasedden sanavberün

Diğer: Viresiye alup on almakdan
Tokuz olsun Fenâyî nakd olsun

FEDÂYÎ: Dergüzîn'dendür lâkin çok zamân olmuş ki ârzû-yı tavâf-ı Beytü'l-harâm ve niyyet-i ziyâret-i ravza-i fahrü'l-enâm ile terk-i vatan-ı aslî kılup maksad-ı maksûdına müyesser olup memâlik-i Rûm ve 'Arab'ı ticâret iderek geşt ü güzâr idüp âhir şehir-i Haleb'de karâr dutmuş. Aslında nîkû-hılkat ve âdemî-sîret merdüm-zâdedür. Tabî'at-ı şî'riyyesi ziyâde küşâde olmanın hemîşe tettebbu'-ı şu'arâ-yı selef ve dem-be-dem cüst ü cûy-ı zurafâ-yı pâk halef idüp güft ü gûy-ı nazm-ı dürer-bâr itmeden hâlî degüldür. Yârân-ı suhen-senc içre güftâr-ı güher-bârı mânend-i genc vâkı' olmuşdur. Bu bir nice matla' anundur. Ebyât:

Gehî ez dîde bâşem der belâ gâhî be-derd ez dil
Nedârem ez dil ü dîde be-cuz derd ü belâ hâsıl³⁷⁷

Bes ki âmed der gamet hûn-ı ciger ez çeşm-i ter
Beste şod müjgânem ez hûn-ı ciger ber yek diğer³⁷⁸

Bahâr u vakt-i gül ez ân rû cünûnem pîş mî âyed

³⁷⁷ Bazen gözümden dolayı belaya, bazen de gönlümden dolayı derde düşerim. Gönlümden ve gözümden dert ve beladan başka bir kazancım yok.

³⁷⁸ Senin gamınla , ıslak gözlerimden ciğerimin kanı öyle çok geldi ki, kirpiklerim ciğer kanımdan dolayı birbirine yapıştı.

Ki ez bâd-ı bahârem bûy-i yâr hîş mî âyed³⁷⁹

Nişeste ber serîr-i nâz u ez her sû esîrâneş
Nihâde dest belâ-yı dest ez behr-i fermâneş³⁸⁰

Bebîn derûn-ı şafak-ı şâm-ı ‘ıyd şekl-i hilâl
Misâl-i sâgar-ı sîmin zi bâde mâlâmâl³⁸¹

Zi rûy-i nâz dey migoft bâ men türk-i mest-i men
Ki ey bîzâre âhir kuşte hâhî şod be-dest-i men³⁸²

FEDÂYÎ-İ Edirnevî: ‘Alî Bâlî dimekle meşhûr ve hüsn-i letâfetle pesend-i cumhûr idi. Sene tis’â ve sittîn ve tis’â mi’ede terk-i ‘âlem-i fânî kılup cânın fedâ-yı yârân idüp tâlib-i ravza-i câvidânî oldu. Hâl-i hayâtında ol cevân-ı mâh-ruhsâr şâh-zâde-i cevân-baht-ı nâmdârun kapusunda sipâhî-i kâm-kâr ve âfiz-ı suhen-güzâr idi ve nakş u savt okımada makbûl-i herkes zîrâ ki ziyâde sâhib-hüsn ü hûb-nefes kimesne idi. Bu bir kaç matla’-ı ‘âşıkâne ve ebyât-ı rindâne ol şâ’ir-i fânîden nişânedür bu evrâkda sebt olundu. Şi’r:

Rind-i fânîler gibi dâr-ı fenâdan geçmişüz
Zâhidâ sanma şarâb-ı dil-küşâdan geçmişüz

Tâlib-i dîdâr olaldan cennet-i kûyunda dil
Ey Fedâyî el yuyup her mâcerâdan geçmişüz

Diğer : Gerçi kim bagruma tîg-ı gam-ı firkat geçdi
Hânçer-i hicri dil ü cânuma kat kat geçdi

Dile göndermedi ‘ahd itmiş iken oklarını
Bana ol kaşı kemân hayli zarâfet geçdi

Rişte-i ‘ömrümüz irişdi tamâm âhirine
Câme-i sabrîmuza sûzen-i hasret geçdi

FÜNÛNÎ: Kastamonî’dür lâkin ravza-i İstanbul’da nihâl-i vücûdı neşv ü nemâ bulmuş. Fünun-ı şî’r ü inşâyı gereği gibi hıfz idüp edâ ile meclis-be-meclis okıyup sohbet-ârâ ve ol bâbda hezârân fenle kıssa-h’ân-ı bî-hemtâ idi. Feemmâ beyne’n-nâs sırka ile müttehim ve ol kâr u bârda bî-kıyâs elem çekmededür. Mezkûrun eş’ârı bî-hadd ü çokdur ammâ bu matla’ından sûretlüsü yokdur sebt olundu. Matla’:

Ka’be’yi turma safâ ile ararken sanemâ
Gördi bozuldı kapun Ka’besi kible-nümâ

³⁷⁹ Baharda ve gül vaktinde bahar rüzgarı bana yarin kokusunu getirdiği için deli oluyorum.

³⁸⁰ Naz tahtına oturmuş ve esirleri her yandan fermanına uymak için ellerini elinin üstüne koymuşlar.

³⁸¹ Bayram gecesinin şafağındaki hilalin şekline bak; tıpkı şarapla dolu gümüş bir kadeh gibi.

³⁸² Dün gece benim mest Türk’üm, nazlanarak bana şöyle diyordu: Ey bîçâre sonunda benim elimle öleceksin.

Sânî mahlas iden Cân Memî şeh-zâde Sultân Bâyezîd seferin zamân ile varup İstanbul'da olan şu'arâ vü zuraîfaya hicv tarîkıyla bir mektûb-ı nev-üslûb nazm idüp irsâl itmiş. Müşârünileyhe şöyle zikr ider söyler. Beyt:

Fünûnî fûta peydâ itmege varır mı hammâme
Enîs-i Şîrvân olan o düzd-i câmeken n'eyler

Mezkûr Fünûnî dahi ol esnâda bir kıt'a-i hezl-âmîz Sâni-i fitne-engîz hakkında derc itmişdür. Nezâketden hâlî degül küllî zarâfet harc itmişdür beyân u 'ayân oldu. Kıt'a

Seferdedür didiler Can Memî'yi
Sefer bir kıt'a-i âteş durur hem

Didiler geçdi ol Nemrûd-ı sâni
Didüm geçdi ise can ber cehennem

Fî harfî'l-kaf

KANDÎ: Burûsevî'dür. Gâyetde şâ'ir-i şîrîn-keîâm ve mülk-i suhende emîr-i pür-nizâm imiş. Hadd-ı zâtında üstâd-ı kannâd devr-i rûzgâr-ı telh-kâm ve perverde-i çarh-ı bî-ârâm ve nâ-murâd kimse imiş. Eş'âr-ı şeker-rîzi dil-pezi ve güftâr-ı tarab-engîzi bî-nazîr ve beyne'n-nas tevârih-i musanna'ı bî-kıyâs ve tarz-ı gazel ü kasîdesi hûb u mergûbdur diyü meşhûr u mezkûrdur. Lâkin bu matla' u beytden gayrı ol tûtî-i şekeristân-ı ma'ânînin eş'âr-ı halâvet-bahşı ve nazm-ı dil-keşin görmedüm budur. Beyt:

Çün dolaşdun zülfüne ey dil perîşân ol yüri
Kara bahtun var imiş ney gibi nâlân ol yüri

Pâdişâh-ı 'âlem olursan rakîbâ gam degül
Dâmen-i dildârı ko var Mısır'a Sultân ol yüri

Dahi huçeste-sıfâtun Zâtî fevtine bu târîh dahi anlarundur sebt olundu. Kıt'a :

Göçüp 'ukbâya rihlet itdi Zâtî
Ana rahm etler ide Hayy-i dâver

Behişt içinde câm-ı selsebili
O merhûma suna sâkî-i Kevser

Çü gördi Kandî anun irtihâlin
Didi târîhini göçdi suhen-ver

KUDSÎ: İstanbullî'dur. Sâbikan şehir-i mezbûrun emîni olan Bâyezîd Çelebi'nün oğludur. Ehl-i 'ilm zümresinden tabî'at-ı pâki cânib-i şî're mâyîl ve ol fende hayl-i kâbildür. Evsâf-ı pâkûn işitdigümüz şâ'ir-i sihr-sâzun rûh-ı pâki şâhbâz-vâr ravza-i kudse pervâz idüp anda karâr kılmış. Bu matla'-ı âbdâr anlarundur. Matla':

Benümçün kimse gam yir yok dil-i gam-h'ârdan gayrı
Döner yok üstime bu çarh-ı keç-refîârdan gayrı

Diğer : Başumsa kana boyandı şarâbı n'eyleyin
Cigerse odlara yandı kebâbı n'eyleyin

KUTB-I KÂTİB: Yezd'dendür lâkin 'amedd-i medîd ve 'ahd-i ba'iddür ki tahsîl-i ma'ârif-i İlâhî ve tekmîl-i kemâl-i nâ-mütenâhî itmek için kutb-ı felek-i dâir gibi sâyir olmadan berîdür. Pây-i himmetin dâmen-i tevekküle çeküp şehir-i Bagdâd'da sâbit-kadem olup mülâzemet-i hoş -nüvisân-ı zamân ve cüst ü cûy-ı üstâdân-ı cihânun mukatta'âtın cem' eyleyüp manzûr-ı enzâr-ı dîde-i hoş -feşân idüp her an meşk-i hatt-ı nesh-i ta'lîk itmege kemâl-i derecede cehd kılmışdır. Hâlâ kıt'a-nüvislîkde Enîs-i zamân ve belki Mîr 'Alî-i devrân ve rik'a meşki Mîr Muzaffer gibi 'azîz-i erbâb-ı temyîz kalem-i 'anber-bârından vücûda gelen her elifi gayret-efzâ-yı nihâl-i bâg-ı na'îm mânend-i kadd-i dil-berân-ı râst u mustakîm ve her bir dâli reşk-i dâl-i ravza-i cinân misâl-i 'anberîn dâl-i bütân-ı zamân ve her bir mimi haclet-bahş-ı çeşme-i âb-ı hayvân gûyâ ki feyz-resân-ı gonce-dehenân-ı cihândur. Seyrinden hoş -nüvisân-ı eyyâm devât-ı ser-beste gibi dem-beste olmaları mukarrer ve engüşt-i hayret-i der-dehân-ı erbâb-ı hünerdür. Âsmân-ı nazmda kevkeb-i tab'ı rahşân ve zihn-i latîfi nükte-şinâs-ı makbûl-i yârândur. Bu bir nice beyt-i Fârisî anundur. Ebyât:

Be ragm-ı men ân meh sû-yı düşmen dem-be-dem bîned
Tegâfûl mikonem tâ u be-sû-yı gayr kem bîned³⁸³

Mîşevêd ân bî-vefâ her lahza yâr-i Diğerî
Mîdehem ber ragm-ı u men hem karâr-ı diğerî³⁸⁴

Va'de dâdî dûş u mâ şem'-i tarab efrûhtîm
Rûy nemûdî be-dâg-ı nâ-ümîdî sûhtîm ³⁸⁵

Ber ümîd-i va'de-i dîdâr-ı û
Reftem ü nevmîd ez ân kû âyedem³⁸⁶

Dûş bî-tâbâne âmed ber ser-i kûy-ı tu Kutb
Sû-yı u bîn yek nazar kû ez segân-ı kûy-ı tust³⁸⁷

KURBÎ: Akkirmân'dan feemmâ peder-i büzürg-vârı ve ecdâd-ı nîkû-şî'ârı memâlik-i 'Acem'den ve merdmân-ı sâhib-keremdendür. Kendü Rûm'da neşv ü nemâ bulup hıdmet-i 'ulemâ idüp dânişmend-i bî-nazîr ve 'ulûmun envâ'ından habîr ve musâhabet-i temkîn ile yâr-ı dil-pezi kimesnedür. Zebân-ı Fârisî'nün kavâ'id-i pür fevâidin bilmede bî-hemtâ ve müşkilât-ı tarz-ı Nevâyî'de hall-i 'ukde-küşâ ve hatt-ı nesh-i ta'lîk yazmada peyrev-i hoş -nüvisân-ı devrândur. ve fenn-i mühr-kenlikde nâm-âver-i zamân ve pesend-i üstâdân-ı

³⁸³ Benim rağmıma o ay yüzlü her an düşman bakar, başkasına az baksın diye görmezden gelirim.

³⁸⁴ O vefasız, her an başkasının yarı olur, ben de ona karşı başka bir karar veririm.

³⁸⁵ Söz verdin dün gece neşe mumunu yaktık. Görünmedin, ümitsizlik ateşine yandık.

³⁸⁶ Onun görüşme vaadinin ümidiyle gittim, fakat onun geleceğinden ümitsizim.

³⁸⁷ Dün gece Kutb, senin diyarına bitkin bir halde geldi. Ona bir kez olsun bak, çünkü o senin köyünün köpeklerindendir.

cihândur. Ebyât-ı belâgat-disârı ve eş'âr-ı fesâhat-âsârı dürr-i yetîm gibi semîn ve der-gûş-ı ehl-i yakîndür. Bu nazm-ı pür-nizâm ol ferhunde nâmundur bu evrâka tahrîr oldı. Ebyât:

Gözümün yaşını sil dime şehâ nemdür bu
Kim belürse acıyasın iki gözüm demdür bu

Diğer : Mîzâb-ı şîşeden akıcak cûy-veş şarâb
Döndi piyâle bezmde mânend-i âsiyâb

Diğer : Esâs-ı meykede yıkıldı gitdi olmadı âbâd
Egerçi dirler idi muhkem olur kâfirî bünyâd

Diğer : Kahveyi teşbîh kılmak bâdeye heyhâtdur
Bâde magz-ı rûh-perver kahve kışriyyâtdur

MÎR KADRÎ-İ Acem: Diyâr-ı Şîrvân'dandur. Seyyid-i pâk-neseb ü asl ile 'âlî-hasebden idi. Evvelâ siyâhat özleyüp sene ihdâ ve sittîn ve tis'â mi'ede Ka'be-i şerîfe ve Medîne-i Münevvere seyyidü'l-enâm 'aleyhi's-salatü ve's-selâm ile müşerref olmuş âhir temâşâ-yı diyâr-ı Rûm ve kesb-i safâ-yı her merzbûm ile İstanbul'a gelmiş zümre-i fuzalâ ile müzâkere ve mübâhase itmeden hâlî degül idi ve hadd-ı zâtında zübde-i 'âlî-ensâb ve pâkize-i ulû'l-elbâb ve makbûl-i A'câm u 'Arab olmuşdur. Zîrâ ki tab'-ı güher-rîzi 'ulûm-ı zâhire ile ârâste ve zihn-i hayâl-engîzi mu'ammâ ve hey'et ü hendese ile pirâste sohbet-i tarab-efzâsı hûb ve kelimât-ı dil-küşâsı mergûbdur. Hayfâ ki bu yirlerde kadr ü kıymeti bilinmeyüp diyâr-ı Haleb'de tavattun itmiş. Bu bir kaç matla'-ı Fârisî ve Türkî beyt hasb-i hâl ve şâhid-i makâl bu evrâkda semt-i rakam buldı. Nazm:

Hadeng-i ân cefâ-cû der dil-i agyâr nenişîned
Çunân şâh-ı gülî der pehlû-yı her hâr nenişîned³⁸⁸

Der âmeden be-hâk-i deret dîr kerdeîm
Şermendeîm ez tu vü taksîr kerdeîm³⁸⁹

Zâhid ne konem bâ tû suhen ez mey-i gülgûn
Hest în suhen ez dâ'îre-i 'akl-ı tû bîrûn³⁹⁰

Diğer : Geçüp sûfî riyâdan sâf ol meyl-i şarâb ile
Dil-i pür-zengüni yur mey ile âftâb ile

Okunmaz olmasa ger vasf-ı hatt-ı 'ârız-ı cânân
Yazup ey hâce dünyâyı ser-â-ser bir kitâb eyle

KUDSÎ: Burûsevî'dür lâkin ol perverde-i 'ulemâ şehir-i İstanbul'da neşv ü nemâ bulup eyyâm-ı tufûliyyetden hıdmet-i ehl idüp okıyup yazmak semtine sa'y-y-i tamâm gösterüp lisân-ı

³⁸⁸ O cefakarın oku, başkalarının kalbine saplanmaz; öyle bir gül dalı her dikenin ardına oturmaz.

³⁸⁹ Kapının toprağına gelmekte geciktik, sana karşı mağçubuz, hata ettik

³⁹⁰ Ey seninle gül renkli şarap hakkında konuşmam. Çünkü bu söz senin akıl dairenin dışındadır.

‘Arabî’den ve zebân-ı ‘Acem’den gereği gibi zevk-i tâm hâsıl itmiş. Cân-ı pâk-i akdesi her ‘ilmün vâdisinden habîr ve ehl-i idrâk olan şâ’irân-ı zamân içre bî-nazîr olup zümre-i ehl-i kalem ve hem-nişin-i sâhibân-ı tâc u ‘âlem ve kâtib-i dîvân-ı paşayân-ı mu’azzam olmuş. Sâbıkan pâdişâhımız Dârâ-yı kitî-sitân ve merhûm Sultân Süleymân Hân ‘azm-i sefer-i ‘Irak kılup diyâr-ı Bagdâd’ı feth itdükde Süleymân nâm bir beglerbegi ‘adâlet-encâme virmiş. Mezkûr Kudsî şehir-i mezkûrda anların cem’i-i mühimmât-ı erkânına ve umûr-ı ‘âlî-şânına kâtib-i dîvân olmuş. Ol arz-ı mukaddeslerde tavattun itmişler. El-kanaa’atü kenzun lâ yufnâ³⁹¹ mûcibince künc-i kanâ’atde câme-i tevekküle dâmen-i himmetin çeküp dünyâ-yı dîn için minnet-i dânen çekmeden berî ve bunun gibi nesnelerden geridür. Ol pîr-i nûkte-şinâsun ebyât-ı huceste âyâtı bî-kıyâsdur. Cümlesinden bu gazel ki münâsib-i mihr ü mahabbet ve hasb-i hâl-i ehl-i mihnetdür bu evrâkda yazıldı. Gazel:

Her dem ey kanlu yaşum dîde-i terden gitme
Gönlüm eglencesisin bâri nazardan gitme

Çünkü gam gîcelerinde bana sen oldun enîs
Beni tenhâ koyup ey mâh seherden gitme

Yâdigâr itdi seni çün bana ol lâle-’ızâr
Sakın ey dâg-ı belâ kanlu cigerden gitme

Feth-i bâb eyleye çok kanlu kapu açâ gönül
Bekle meyhâne kapusını bu derden gitme

‘Âkili hûbları nâz ile dîvâne ider
Kudsî’yâ ‘âkil isen hiç bu yirden gitme

Fî hurûfî’-kâf

KÂTİBÎ Efendi: Galata’dandur. Seyyid ‘Alî Çelebi demekle meşhûr ve cûd u sehâ ile ‘Alî-vâr mezkûrdur. Dergâh-ı mu’allâ bendelerinden olup bakıyye-i şu’arâ-yı selef ve tetimme-i zurafâ-yı nîk-halef idi. ve deryâ seferinün bî-kusûr kerrât ile fevâidin gemicilerün bi’t-tamâm gerek olan kavâ’idin bilmiş. Ana binâen sene sittîn ve tis’â mi’ede deryâ-yı Basra’da kapudan nasb olundu. Mezkûr bir kaç kadirga ile ve bir nice nefer levend-i hünerver ile Mısır yakasına çıkmak ârzûsıyla bî-vakt deryâ-yı bî-pâyâne girüp gerdiş-i devr-i rûzgâr hevâ-yı muhâlif ile deryâ-yı ‘ummâna cûş u hurûş bıragup bunların keştîlerin ve mâl ü menâllerin ve dilâver erlerin ve bî-misâl yigitlerin garka-i bahr-ı fenâ ve zevrâk-ı vücûdların bûd iken nâ-bûd kılmış. Âhirü’l-emr seyyâh-ı deryâ-yı Hind ve sergeşte-i vâdî-i Sind ve sahrâ-neverd ü Çîn ü Mâçîn ve müsâfir-i rûy-i zemîn olup nice nice belâ vü meşakketler ve dürlü dürlü cefâ vü mihnetler görmüşler ve envâ’-ı ‘acâyibât u garâyibât seyr kılmışlar. Yine tevfk-ı Yezdânî irişüp bin dürlü felâketle üftân u hîzân ve temâşâ-yı Türkîstân u ‘Acemîstân idüp bu diyâre geldükde sergüzeştin ‘ale’t-tafsîl tesvîd ü tahrîr kılup bir kitâb itmiş ve pâdişâh-ı Îrân u Turân a’nî Sultân Süleymân Hân’un hıdmetine ‘arz-ı hâl diyü sunmuş. Hezerân lutf u ihsân-ı bî-

³⁹¹ Kanaat kaybolmaz bir hazinedir.

girândan sonra yüz elli akçe tekâ'üd tarîkı ile 'ulûfe sadaka buyrulmuş. Bu denlû perîşânlıktan kurtulup cem'iyet-i hâtır ile pâdişâhun ıyyâm-ı sa'adetinde âsûde-hâl ve müferrihü'l-bâl iken fevt oldu. Eş'âr-ı tarab-nümâsı bî-hadd ve güftâr-ı dil-küşâsı lâ-yu'addur. Cümlesinden bu bir kaç beyt-i âbdâr ihtisâr olunup kalem-i müşk-bâr ile ihtisâr olındı. Nazm:

Hadeng-i gamze-i mestünle sâkî sîne-çâküm ben
Demidür sun lebün câmin be-gâyet derd-nâküm ben
Yolında öldüğüme yanmaz idüm dil-berün ammâ
Mezârum üzre bir gün ugramaz ana helâküm ben

Diğer : Mihri gönülden ol sanemün çün berî degül
Çarh ile nakd-i eşki alnımın deri degül

Bir Husrev-i zamâneye Ferhâd'dur gönül
Şîrîn adın anman ol anun eri degül

Ta'n itdüğünü 'âşık mescidde vâ'izün
Meyhâne içre anma müsâvî yeri degül

Diğer : N'ola mücrîm isek yârın şefâ'at-h'âhımız vardur
Tayansın zühbine zâhid bizüm Allâh'ımız vardur

KELÂMÎ: Kerb-i belâ-yı pür-belâdandır. Kurretü'l-'ayn-ı seyyidü's-sakaleyn a'nî şâh-ı şehîdân Hazret-i İmâm Hüseyin radyallahu 'anh dergâh-ı felek-bârgâhında tekve-i âbdâlân-ı Rûm olan hankâh-ı dervîşân-penâhun perverîşîn-zamîri ve çerâg-efrûz-ı bedr-i münîri ve ferah-bahş-ı dil-hâ-yı gamzede olan Hüseyin Dede hıdmetlerine evân-ı cevânîde irâdât-ı sâdık gösterüp anların tertîb-i muvâfıklarıyla nây-ı vücûdların çün şehd-i fâyık itmek için râh-ı tarîkate sâlik olup envâ'-ı âdâb ile çok ma'rifete mâlik olmuş. ve ber-muktezâ-yı devr-i zamân temâşâ-yı gül-i gülşen-i cihân ârzûsıyla mânend-i bâd-ı sabâ vezân ve misâl-i âb-ı cârî revân olup riyâz-ı memâlik-i 'Acem'e yüz sürüp tâlib-i gül-i gülzâr-ı hüner olan nev-şükûfte gonc-femlerle bende-i pîrân-ı hakikatver geçinen sâhib-keremlerle mu'âşeret ü musâhabet idüp cihân-dîde ve sohbet-azmûde olmuş. Binâen 'alâ-zâlik erbâb-ı ma'rifet olan ehl-i cihân içre Cihân Dede demekle benâm ve dervîşân-ı zamân arasında emîr-i kelâmdur. Zîrâ ki silk-i nazmda dürr-i nazmı intizâm-ı tâm bulmuşdur. ve fenn-i mu'ammâ ve şebistân-ı hayâlde nâmdâr ve bu dünyâ-yı deyr-i sâlde müverrih-i rûzgâr ve nutk-ı pâki mantık u kelâmda sâhib-takrîr ve 'ibârât-ı tasavvuf-âmîzi bî-nazîrdür. Hâlâ ol âsitâne-i şerîfde ve zâviye-i münîfde sâhibân-ı sikke vü sûret olan dervîşler mâbeyninde sâhib-i post u kisvet bir ihtiyâr-ı tarîkat-şî'âr kimesnedür. Bu ebyât-ı 'âşıkâne ol dervîş-i yegânenündür. Şî'r:

Âb-gûn-ı gerdûn-ı dündan kimse olmaz kâm-yâb
Hiç bir leb teşne-i sîrâb kılmış mı serâb

Diğer : Virdi tenüm hâkini tâ yile devrân-ı 'ışk
Oldı müselleme bana seyr-i beyâbân-ı 'ışk

Diğer : Sanma kim sînemde ‘ışkunda dil-i hun-hâredür
Kûşe-i külhanda yir tutmuş bir âteş-pâredür

Nazîre li-mü’ellifihî:

Âl ile gönlüm alan bir dil-ber-i mekkâredür
Yıkmaga dil kişverini ‘Ahdî âteş-pâredür

GÜNÂHÎ: Vardar Yenicesi’ndendür. Hazret-i Mollâ Hudâvendigâr’un âsitân-ı felek-medârına yüz sürüp ol silke tasfiye-i bâtın için münselik olmuş nefsinde dervîş-nihâd u pâkize-nijâd ve nîkû-i ‘tikâd kimesne iken kendü ‘acz-i tarîkıyla dergâh-ı İlâhî ve bargâh-ı nâ-mütenâhîde me’âsî vü günâhkâr ve melâmet-i zerre-i rûzgâr ‘add itmiş. Ekser-i eş’ârı tasavvuf-âmîz ü mesel-engîzdür. Bu beyt ü matla’ anundur. Ebyât:

Pîr-i Cibrîl’i kodun deşt-i fenâda süst pey
Âferîn ey ‘arsagâh-ı lâ-mekânun yügrigi

Diğer : ‘İşk ehli hatt-ı ‘ârız-ı zîbâdan aglamaz
Pervâne dûd-ı şem’-i dil-ârâdan aglamaz

Cûş-ı sirişkden ten-i pür-dâguma ne gam
Mâhi olan temevvüc-i deryâdan aglamaz

Kanlu yaş ile ocaguma su koyar diyü
Dil dem mi var ki dîde-i pınardan aglamaz

GEDÂYÎ: Antâliye’ dendür. Ehl-i kalem zümresinden dervîş-meşreb ve peyrev-i ehl-i tarab olmagın ol şâ’ir-i sâhir hânkâh-ı Hazret-i Mollâ Hüdâvendigâr’a ilticâ idüp ol dergâh-ı gerdûn-medârda nice müddet mücâvir olup tahsîl-i Mesnevî ve tekâmîl-i Ma’nevî kılmış ve kitâbet-i nesta’lıkda kâtibân-ı diyâr-ı Rûm içre hâlâ bî-misl ü bî-mânend ve ebyât-ı dervîşâne ve kelimât-ı muhakkıkânesi pesend-i erbâb-ı dil ve hasb-i hâl-i cevânân-ı mihr-i kesel vâkı’ olmuşdur. Bu gazel anundur. Gazel:

Çün cemâlün mihrine saldı saçun müşkîn nikâb
Gün gibi girdi sehâba mâhtâbum âftâb

Âftâb alnun habîbüm ruhların bedr-i tamâm
Hâlesin zülfün durur hâlün düşer ana şehâb

Gurre-i garrâ cemâlündür hilâl ebrûların
Benlerin ‘akd-i süreyyâ ‘ârızundur mâhtâb

Künc-i gamda derd ile hemdem olup ‘ayş itmege
Eşk-i çeşmüm mül yiter hem gül gibi bagrum kebâb

Hasbetenlillah ana bir bûse ihsân eyle kim
Âsitânundan umar çün kim Gedâyî feth-i bâb

KEYFÎ: Amasiyye yanında Çorum sancagından dânişmend tâifesindendir. Rûz u şeb tahsîl-i ‘ulûm ve seyr-i her merzbûm idüp tâlib-i sohbet-i ehl-i ma’rifet ve bende-i erbâb-ı fazîlet geçinürken tarîkden hüsn-i ihtiyârıyla vaz gelüp ehl-i timâr olmak ârzûsıyla Rûm İli beglerbegisinin hıdmet-i şerîfinde mülâzemet üzredür. Ümmîddür ki ‘an karibü’z-zamân ol ma’ânî gülşenine ‘andelib ber-murâd u kâmrân ola zîrâ ki ziyâde nâ-murâd u nâtüvân kimesnedür. Tabî’at-ı şî’riyyesi keyfiyyetden hâlî degül. Ber-muktezâ-yı mahlas ol güzîde-i nîk ü bed ekser-i eş’ârında beng ü şarâb beslemege mukayyeddür. Gâhi bir târîh dimekle müverrih-i eyyâm geçinür ve fi’l-cümle pesendide-i yârân olmagla makbûl-i hâs u ‘âm oldum sanur. Bu bir kaç matla’ u beyt anundur keyfiyyet-bahş-ı rindân-ı cihân ve hasb-i hâl-i ‘uşşâk-ı zamândur Ebyât:

O yârün h’âba varmış çeşm-i pür-hışmı çatup kaşın
Uyur şehbâz-ı vahşidür kanadına çeküp başın

Diğer : Yüz çevirür nâsih-i bed-lehce rûy-i hûbdan
Vechi yok yüz söylesün ben geçmezem mahbûbdan

Diğer : Şöyle mest olmuşuz ey Keyfi kıyâmet kopa ger
Haşr olup gice bizüm geçmeye keyfiyetimüz

Diğer : Lebi câmina Keyfi rûh-ı sâni diyü meyl itdüm
Begüm gözdür bilür evvel nazarda yiyecek aş

Mevlânâ KÂTİB: Vilâyet-i Anadolu’da Kastamonı kurbünde Sinob nâm kasabadandır. Zamân-ı cevânide hıdmet-i mevâlî-i ‘ızâm ve unfuvân-ı şebâbda mülâzemet-i ‘ulemâ-yı fihâm idüp zümre-i ehl-i ‘ulûma mülhak ve hûş-mendân-ı devrân içre vâridât-ı gaybiyye ile muvâfık olmak ile aksâm-ı fûnûndan behremend olup yârân-ı safâ ve ihvân-ı vefâ mâbeyninde meleke-i râsih peydâ itmekle şems-i cihân-ârâ gibi ‘ilmle yektâlıkda ‘âlemi aralayup emsâl ü akrânından mümtâz ve mânend-i şâ’îrân-ı sihr-sâz-ı nükte-perdâz olup zamân-ı evâilde bergüzîde-i erbâb-ı dîvân ve ümmîd-i dil-i ümmîd-dârân a’nî sene ihdâ ve tis’în ve tis’â mi’ede eyâlet-i Lahsa’dan münfasıl olan makbûl-i sülehâ-yı devrân merhûm ü magfûrunleh Sâlih Paşa oğlu Mehmed Paşa hazretlerinin şeref-pâye-i mu’allim ligi ile müşerref idi. Binâen ‘alâ-zâlik ekser-i nikât-ı huceste-berekâtı ve ma’lûmât-ı bî-gâyâtı anlardan tahsîl ve cem’-i kemâlâtı anların vâsıtasıyla tekâmül itmişlerdür. Nezâket-i tab’larından âsâr-ı hüner kemâl-i şems fi’t-tamâm peydâ vü hüveydâdur. Sâbıkü’z-zikr nâgehân hikmet-i İlâhî ile ‘âvâriz-ı cismânîden derleme hasteligine mübtelâ ve teb-i muhrîk içre zâr u bî-devâ kalup âhirü’l-emr ol yegâne-i ‘asr bin dürlü belâ ile derleyüp zahmetden ihtilâs bulup lâkin ol merd-i perhîz-kâr-ı sâhib-ihlâsun lisân-ı fasîhü’l-beyânına ve zebân-ı suhen-sencâmına bir mikdâr rekâket müstevlî olup kûşe-i vahdet ihtiyâr idüp ‘ilmden ferâgat kılup çâr u nâ-çâr vâdî-i efkâra düşüp dervîş-sıfat ve pîr ü ehl-i hikmet olup gâyetde sâlih ü sâbir ve nefsi bed-girdâr ile ‘adâvete kâdirdür. Tevsen-i serkeş-i hevesi licâm-ı riâyâzet ile kendüye râm ve gınâsın alup tamâm-ı müştehasından nâ-kâm itmişdür. Perhîz-kâr u takvâ-şî’âr idi. Tekâ’üd idüp zühd ü takvâ ile ârâste ve esbâb-ı salâhiyyet ile pirâste idi. El-hak bir melek-hısâl ve firişte-fi’âldür ki dehân-ı

gaybdân-ı pâkinden ta'n u gıybet ü fahş kendiden sâdır olmayup zebân-ı Fûrs'e kâdir ve lisân-ı selâsede misli nâdir ve remz ü imâ-ı mu'ammâdan habîr ve rûmûz-ı nazm ü inşâda bî-nazîrdür. Zîrâ ki te'lîfâtından inşâya müte'allık-ı vaslû'l-hıtâb nâm esâlib-i mekâtib-i ferhunde-sipâhı zebân-ı kilik-i müşk-fâm ile erkâm kılup ve içinde münderic olan müşkilât-ı lûgat-ı pür-nikât cem' idüp aslû'l-cevâb diyü tesmiye itmişlerdür. Taraf-ı kasâyid-i pür-fevâid ü sanâyi'e sâlik ve nûkûd-ı **Mesnevî-i pür-Ma'nevî**'ye mâlik 'arûz bilmede pür-hüner ve kâfiye üzre bir lûgat-ı mu'teber yazmışdır ki makbûl-i tab'-ı erbâb-ı 'irfân ve memdûh-ı zihn-i suhen-verân-ı zamândur. Eş'âr-ı dil-küşâsı selîs ü hûb ve ebyât-ı gamzedâsı nefîs ü mergûbdur. Bu gazel-i pür-mesel-i bî-bedel ki vâsf-ı gül-ruhân-ı hüsn ve medh-i sehî-kaddân-ı zemendür gül gibi neşv ü nemâ bulup ve lâle gibi çihre-küşâ olup kalem-i dü-zebânla tahrîr ve lisân-ı seriyû'l-beyânla takrîr olundı. Gazel:

Kaddün anılsa gönlüme serv ü çemen gelür
Haddün anılsa lâle degül yâsemen gelür

Sa'yün eger safâysa işigin koyup
Billah sûfî Ka'beye gitmek neden gelür

Bir gün gelüp müşerref idem dimiş idi yâr
Ben bî-sitâre bilmezem ol gün kaçan gelür

Sayd itdi didiler seni şehrün güzellerin
Her ne gelürse ummadugun kişiden gelür

Gam çekmeden ne fâide baht-ı siyâhdan
Kâtib başına her kişinün yazılan gelür

ve Sâlih Paşa-yı merkûm raht-ı 'azîmeti ravza-i cennete çekdükde bu târîh-i du'â-âmîzi kalem-i gül-bîz-i müşk-rîz ile zuhûra getirüp sebt itmişler. Kıt'a Târîh:

Paşa-yı Sâlih ol merd-i gâzî
Tutmuşdı nâmı mülk-i cihânı

İsterdi Hak'dan dâ'im şehâdet
Buldı murâdın rûh-ı revânî

Hâtîf dilinden didi bu târîh
Cennât-ı Firdevs ola mekânı [992]

KEVSERÎ: İstanbul'dandır. Sipâhî-zâde'dür. Cemâl-i bâ-kemâl ile güzellik taht-gâhının şâhı ve hüsn-i mihr-efrûz ile âsmân-ı hünerün mâhıdır. Rûz u şeb erbâb-ı dil ü 'ukde-küşâ-yı her müşkil olan yârân-ı nûkte-dân ile hem-zebân olup mübâhase-i eş'âr-ı revân itmeden bir an hâlî degüldür. Ana binâen hemdem-i fukarâ-yı lâubâli olup âsitân-ı felek-âşiyân-ı Hudâvende varup kabâyı terk idüp külâh-ı temrîn ile 'abâ ihtiyâr kılup turuk-ı müsâfîret birle geşt ü güzâr-ı her diyâr iderek Kerbelâ-yı pür-belâya gelüp dervîşân-ı mihnet-keşân ile bî-nâm ü nişân olmaklığı kendüye iftihâr bilüp gird-bâd gibi sergeşte-i rûzgâr olup bir yirde karâr

itmeyüp diyâr-ı Rûm'a tekrâr 'avdet eyledi. El-hak ol gülbn-i gülistân-ı cevâni ve ol bülbül-i bostân-ı ma'ânînün eş'âr-ı âbdârı mânend-i âb-ı zülâl reşk-i âb-ı kevser ve güftâr-ı huçeste-etvârı pesendide-i şu'arâ-yı şîrîn-kâr olmuşdur. Matla'

Çıkarmış başını bakmaga gonce câme-h'âbından
Hemân dem-beste kılmış la'lüni görmüş hicâbından

ve lehu : Bâr-ı 'ışka ne sızar eşkümün ihrâcından
Aglamaz ey gözümün merdümü yük bâcından

Fî harfî'l-lâm

LÂYİHÎ: Rûm İli'nden Siroz'dan dânişmend zümresinden 'ulûm-ı zâhire ve kütüb-i mütedâvilenün mütâla'asına iştigâl gösterirken fakr u fenâ semtine sâlik ve tasfiye-i bâtın itmege mâlik olmak temennâsıyla tab'-ı şerîfleri ve hâtır-ı latîflerine bu lâyih olur ki seyr-i safâ-yı Mısır u Şâm ve tavâf-ı arz-ı beytü'l-harâm ve ravza-i münevvere-i seyyidü'l-enâm 'aleyhisselatü ve's-selâm itmege gerek 'örf ü izâfetden ve kayd-ı dünyâ-yı pür-mihnetden geçüp sahrâ-yı zevk u şevke yüz tutup Ka'be-i Şerîf'e ve ravza-i münîfe varmış. Nîce müddet ol h'âb-ı nijâdânda mücâvir olup ber-murâd olmuş. Âhir diyâr-ı Mısır'da sene seb'a ve hamsîn ve tis'â mi'ede beglerbegi iken vezîr-i a'zam ve âsâf-ı Sultân Süleymân-ı Cem-haşem ve şehen-şâh-ı encüm-hadem a'nî 'Alî Paşa-yı dîvân-ârânun h'âcesi olmuş. Zâtı kemâl ü fazl ile ârâste ve tab'ı fûnûn-ı ma'ârifle pirâstedür. Tarîk-ı şî'r ü inşâda beyne'l-akrân ferîd-i cihân ve 'arûz u kâfiye bilmede kava'id-güster-i şu'arâ-yı zamândur. Ol yegâne-i ferzâne eş'âr-ı muvahhidâne ve muhakkıkâne dimede bî-nazîr ve fakr u fenâ ehli yanında dil-peziir geçinür. Cümlesinden bu matla' nümüne diyü erbâb-ı fûnûna arz olunur. Matla':

Başumda tâc-ı gam elde 'asâ-yı fakr u fenâ
Benüm zamânede sâhib-livâ-yı fakr u fenâ

LATÎFÎ : Kastamonı'dan ehl-i kalemden üslûb-ı inşâda kendü re'yi ile bî-misl ü bî-hemtâ oldugıçün makeddemâ **Tezkîre-i Şu'arâ** yazmışdur lâkin pesend-i zurafâ ve makbûl-i fuzalâ olmamışdur zîrâ ki çok yirde ta'assub itmişdür. Esnâf-ı nazmda mâhir ve 'arûz u kâfiye bilmede şâ'ir-i sâhir ve zebân-ı Fârisî'ye ve 'ilm-i 'Arabî'ye bir mikdâr mümâreset göstermiş ve her birisine kemâl-i kudretin ve 'uluvv-i himmetin ve 'ömr-i latîfin ve eyyâm-ı şerîfin sarf itmişdür. Bu eş'âr anundur. Şî'r:

Biz kim gubâr-ı pâ-yi seg-i kûy-i dil-berüz
Ulularun ayagı tozu hâk-i kemterüz

Nakş-ı dü kevnî âyîne-i canda seyr ider
Fakr u fenâ serîrine mâlik Sikenderüz

Cem'den yeg itdi seb'a-i seyyâre vaktimüz
Sâkî bu devlet ile şeh-i heft-kışverüz

LATİFÎ-İ H'ânende: Vâlid-i büzürg-vârı diyâr-ı 'Acem'den vilâyet-i 'Arab'a gelüp şehr-i Haleb'de tavattun idüp tehhül itmiş. Mezkûr Latîfî mezbûr şehrde vücûda gelüp binâen 'alâ-zâlik şehr-i Haleb mevlid-i şerîfî olmuş. Hadd-ı zâtında dervîş-meşreb ve peyrev-i ehl-i tarab ve bende-i sâhibân-ı mezheb olmanın diyâr-ı Mısır'da Hazret-i Şeyh İbrâhîm'e kuddise sirruhu yüz sürüp cânîşini olan ferzend-i ercmendine irâdât-ı sâdık gösterüp ol silsileye bend olup akrânı içre fâik olmuş ve bi't-tab' 'âşık-ı cevânân-ı bî-misâl ve zülf-i perî-rûyân-ı hûb-cemâl gibi perîşân-hâl ve şûrîde ahvâldür. Zihn-i latîfî 'ilm-i edvâre üstüvâr ve nakş u savt okımda pesendide-i üstâdân-ı rûzgâr ve türkî bağlamada makbûl-i merdüm-i 'Irak u Hicâz ve safâ-bahş-ı 'âşıkân-ı nev-niyâz olmuşdur ve tabî'at-ı şî'riyyesi hûb ve musâhabet-i rûh-efzâsı mergûbdur. İki zebân ile nazma kâdir ve her birinde yârân gibi mâhir vâkı' olmuşdur. Bu bir iki Fârisî ve Türkî nazm-ı dürer-bâr ol yâr-ı hûb-girdârundur nakş u nigâr olundu. Ebyât:

Tenem râ suht dâg-ı dilberân âheste âheste
Resîd în âteş-i sûzân be dil âheste âheste³⁹²

Diğer : Deşt-i Hitâ'da aldı hatun bûyını gazâl
Müşk oldu nâfesinde anun katre katre kan

Diğer : N'ola 'üryân gelüben 'âleme 'üryân gitsem
El uzatmaya 'alâyık dikenî dâmenüme

LÂHIKÎ: İstanbul'dandur lâkin Edirne'de tavattun itmişdür. Merhûm Sultân Selîm zamânında zebân-ı Fârisî'de lûgat-ı kavâ'id-güsteri tazayyuk iden Halîmî Çelebi Efendi'nün ferzend-i ercmend-i hûşmendidir. Kendü dahi bi't-tab' halîmü'n-nefs ve sıfât-ı hamîde ile ve ahlâk-ı pesendide ile makbûl-i herkesdür. Ol lâhık-ı erbâb-ı kerem olan yâr-ı ferhunde-dem zümre-i ehl-i kalemdendür ve hutût-ı defterde erkâmı dil-pezir cüz'î lisân-ı 'Arabî'den haberdâr ve zebân-ı Fârisî'de nûkte-güzârdur. Tabî'at-ı şî'riyyesi esâlib-i suhende hûb u mergûbdur. Bu bir iki beyt anundur. Beyt:

Ele girmez mi sâkî bize sunsan bir ayak bâde
Yire ayag mı basardum sevincümden ben üftâde

Elimüz bir çanaga girse destünden kadeh sunsan
Bu devlet bana yiterdi efendi işbu dünyâda

LEM'Î: Burusâvî'dür. Lâmi'î Çelebi'nün nûr-ı dîdesi ve ferzend-i ercmend-i pesendîdesi idüğü rûşen-i ehl-i dil ve mübeyyen-i merdüm-i efâzıldur. Mezkûrun akrabalarından biri sûretâ kadla kasîrû'l-kâme ve fûnûn-ı fitne ile dehrde 'ulemâ kimesne varmış. Zurfâ-yı rûzgâr ol kara rûzgârı Lâmi'î nâmıyla nâmdâr kılmışlar. Mezbûrun mahlasları birbirinden müştak hiç birinün hakkına bir kimse barmak basup dakk dutamaz. Mezkûr Lâmi'î Efendi'nün tab'-ı latîf-engîzi ve hâtır-ı letâyif-bîzi küşâde olmanın envâ'-ı letâyif-i miskîn-âyât sergeşt-i erbâb-ı zarâyif-i huçeste-sâ'ât nigârı rakam ve gamz-edâ-yı dil-i pür-elem kılmış lâkin itmâm

³⁹² Dilberlerin ateşi yavaş yavaş tenimi yaktı. Bu yakıcı ateş yavaş yavaş gönlüme ulaştı.

bulmamış. Mezbûr Lâmi'î'ye bir gün işâret-i bâ-beşâret kılur ki bu evrâk-ı perîşânı cem' idüp encâme ırgüre. Binâen 'alâ-zâlik bi-hasbî'l-emr vâlid-i mâcid-i hâtır-ı gam-gîni teşrîh kılıcı letâyif ü dil-i hazîn teferrüc eyleyici zarâyifî cem' kılmış. Bi't-tamâm bilâ-kusûr kitâb-ı pür-sürûr ki nâm-ı şerîfî **Letâyif-nâme**'dür elfâzınun neşât-ı ferah-efzâsından dil-i gamgîn ve kelimât-ı rûh-bahşınun inbisât-ı dil-küşâsından dil-i gam-beste âzâd ve inşâ-yı müsecca'ından mülk-i harâb hâtır-âbâd olması mukarrer ve mütâla'ası pesendîde-i ehl-i hüner ve meşhûr-ı merdüm-i bahr ü berrdür ve sâbıkü'z-zikrûn eş'âr-ı pür-envârı gün gibi lâmi' ve lem'â-ı tîg-i zebân-ı âbdârını nass-ı kâtî' gibi sâtî'. Cümlesinden bir iki matla' u beyt-i âbdâr-ı pür-nikât anlarundur sebt olundu. Ebyât:

Cân virürsem n'ola bir tâze cevânun yolına
Kim durur varını harc itmeye anun yolına

Tîr-i müjgânını bir kez n'ola gönderse eger
Cânı kurban idem ol kaşı kemânun yolına

Diğer : Dirligünden el yudum gâyet za'îf oldı mizâc
Ey tabîb-i cân u dil ölmekden özge yok 'ilâc

Hâk-i pâyine yüz urup tûtiyâ didüm didi
Hey nazarsuz hâk-i pâyum tûtiyâdur gözün aç

Nazîre li-mü'ellifihi:

Cân metâ'ı buldı bâzâr-ı hicranda revâc
Gel hadeng-i 'ömrün ile ana lutf it kapı aç

Bûy-i zülfün isteyü oldum tapum derdnâk
Kapuna geldüm o yârim ola bu derde 'ilâc

Alışupdur bâde-i la'lünle başı hoş durur
Görmedüm 'âlemde 'Ahdî gibi bir nâzûk mizâc

Bu matla' dahi sâbıkü'z-zikründür.

Hat-ı cânânı gördükde gönül oldı katî gam-gîn
Didi dil-ber kara düşler mi gördün boldun miskîn

LÂZİMÎ: Edirne'dendür. 'İzz ü ze'âmetle sâhib-livâ olan Ramazan oğlu Pîrî Paşa Yesserallahu mâyeşâ³⁹³ nun kethüdâsı Dervîş Beg'ün oğludur. Evvelâ Pervâne mahlas idüp âhir Lâzımî tahallüsün kendüye lâzım görmüş. Lisân-ı 'Arabî'den cüz'î tahsîl-i ma'rifet ve zebân-ı Fârisî'de küllî müdâvemet gösterüp bir mikdâr tekellümüne kâdir ve vâdî-i nazmda nevres şâ'ir idi. İstanbul'a gelüp zurafâ-yı zamâne ve şu'ârâ-yı cihâne karışup âdâb-ı sohbet-i tarab-efzâ ve lâzime-i şî'r ü inşâ öğrenmek semtine sâlik ve her birine cüz'îce mâlik olup

³⁹³ Allah umduğunu (istediğini) kolaylaştırsın.

pâdişâh-ı ‘âlem-penâhun sene tis’â ve sittîn ve tis’â mi’ede bir gazel-i bî-bedel matla’ı budur ki tesvîd olundu. Matla’:

Dostlar mihmân idindüm dün gice cânâneyi
Şem’ ile cem’ eyleyüp bir araya pervâneyi

ve mezkûr Lâzimî bu matla’-ı dil pezîre nazîre dimişdür matla’ı budur ki tahrîr oldu. Matla’:

Can revân itdüm görünce ‘ârız-ı cânâneyi
Vâsıl-ı şem’-i cihan-sûz eyledüm pervâneyi

Bu şi’ri didügi günün ertesi fevt oldu **İnnâ lillahi ve innâ ileyhi râci’ün**³⁹⁴ Hakkâ budur ki ziyâde nâ-murâd u dervîş-nihâd kimesne idi. Bu matla’-ı muvahhidâne ol yâr-ı yegânenündür. Matla’:

Kesretinden bir iki hemdem ile dünyânun
Seyr-i deşt-i ‘adem it ‘âlemi var tenhânun

LUTFÎ-İ ‘Acem: Dergüzîn’ dendür. Mahmûd-ı Har dimekle meşhûr ve zarâfet-i nâ-hem-vâr ile efvâhda mezkûrdur. Sâbıkan ârzû-yı Beytül-harâm ve meyl-i Medîne-i seyyidü’l-enâm ‘aleyhi vesellem ve temâşâ-yı Mısır u Şâm itmekle ser-geşte-i eyyâm olup hezârân meşakkat ile menzil-i maksûdına irişüp dünyâ-yı dünün bûd-ı nâ-bûdına mâyl olmayup âhirü’l-emr di-yâr-ı Rûm’a ve hıdmet-i erbâb-ı ‘ulûma yüz sürmek ‘özleng itmeyüp geşt ü güzâr ve serd ü germ-i rûzgâr çeküp şehir-i İstanbul’a geldi. Nefsinde meze-i rûzgâr ve kendü re’yi ile latîfe-güzâr geçinüp zurafânun hûşmendi ve şu’arânun ercmendi oldum sandı. Hâlbuki cümlelün rîş-handı olmuş idi. Âhir yine şehir-i Şâm’a ‘azm idüp ol arz-ı mukaddes cânibine irişdükde emr-i Te’alâ ve tekaddes ile murg-ı rûh-ı pâkin ravza-i kudse ta’zimle teslîm itmiş. Bu bir iki beyt latîfe yüzünden bir nigâr-ı zarîfe dinmiş anundur. Nazm

Tâ cihân bâşed hayât men tûyî ey nev-cihân³⁹⁵
Gel benüm hatun-ı devrânım Zelihâ-yı zamân

Diğer : ‘Âşık u bî-çâren oldum hem esîr ü nâ-tüvân
Senden ötrü ey kamer-tal’at-ı dil-ârâm-ı cân

ve ol yâr-ı sebük-bâr bu bir nice beyt-i ma’kûl nakş u nigâr itdirdi benümdür diyü güftâr kılır. Şi’r :

Görinür ‘âlem-i bâlâdan ancak âsman kalmış
Sana ‘ankâ-yı kudretten nişân bir âşiyân kalmış

Diğer : Kâkülünle gerdênün vasfını nazm itmişdi dil

³⁹⁴ (O sabredenler, kendilerine bir bela geldiği zaman) Biz Allah'ın kullarıyız ve biz O'na döneceğiz derler. Kur'an 2/156

³⁹⁵ Ey genç, dünya durdukça benim hayatım sensin.

Bûselikde hayli nâzûk hâl imiş üstâdânı

Diğer : Bezmimüzde nâlemiz benzer rebâb u nâye hem
Ehl-i meclis mâline sâgar hilâle aya hem

LA'LÎ: Kaysariye'dendür. Vücûd-ı ferahnâk-i bî-pâki kuyûd-ı hestîden âzâdedür. Sâbıkan mezkûr şehirde Süleymân Beg-zâde Dânişî mahlas ile ta'dâd olan Pîrî Çelebi'nün hemşire-zâdesi olup Artâdâyiye didikleri gibi 'âşık-ı dil-dâde nâ-murâd ve dil-rîş-i sâdık gama mu'tâd 'âlem-i cevânîde lisân-ı 'Arab'a heves ve zebân-ı Fûrs'e dest-res bulup havass-ı bahr-ı ma'ânî eş'âr-ı dürer-bâr ve nâkil-i ebyât-ı cevherdâr olup dürr-i hüneri ve güher-i dânişi rişte-i 'akla çeküp yârân-ı safâya hemdem 'ale'l-husûs makâlî selîs-i edâ ile mahrem geçinüp ekser-i zamân tetebbu-ı dürer-i âbdâr nazmların ve gazel-i kasîde-i medh-güzârına mazhar olup nice müddet âsitân-ı felek-âşiyân-ı Mevlânâ'da dervîşâne hıdmet ve ehl-i hakîkate mülâzemet itmişler. Siyâhat tarîkıyla gâh Mısır u Şâm ve gâh Haleb ü Bagdâd'a ve ravza-i mutahhar-ı evliyâ-yı kirâma üftân u hîzân gelüp ziyâret-i şâh-ı şehîdâne ve bârgâh-ı şâh-ı merdâne irüp Men 'aref sırrından âgâh u habîr olmaga sezâvâr fakîrdür. Bu matla'-ı dil-pezi benümdür diyü tahrîr itdürdi. Nazm :

Yanunda düşmen-i bed-hâhı zem itmeme benüm hânım
Kelâm-ı nâ-sezâ eyler tururken dü tenüm cânım

Diğer : Na'me-i 'uşşâkdan mutrib ser-âgâz eylesün
Başlasun şehnâze 'uşşâkı nevâ-sâz söylesün

Dâ'imâ suhen-i erbâb-ı kemâle tetebbu' idüp eş'âr-ı huçesteye mâyl olmanın Nişânî'nün bu nazm-ı pür-hayâline nazîreye kâbil olmuş ki Hüseyin adına tahrîr kılmışdır. Kıt'a :

Kulundur cümle hûbân-ı cihan bir pâdişâsın sen
Zamânunda begüm Sultân Hüseyin-i Baykara'sın sen

Cemâlün göster erbâb-ı safâ 'âlem yüzün görsün
Bu gün bu hüsn ile âyîne-i 'âlem-nümâsın sen

LİSÂNÎ: Ehl-i kalem zümresinden zu'emâ kısmından mevlid-i latîfi Adana ve ism-i şerîfi Ahmed Çelebi asl-ı pâkizeleri Ramazâniyân'un a'yânından olup şehir-i mezbûrda eyâlet ile hükümet iden Pîrî Paşa hazretleri mezkûrun zât-ı huçeste-sıfâtlarında kâbiliyyet fehm idüp niçe müddet mumâ-ileyh paşanın kâtib-i sırrı olup cüll-i himmetlerün tahsîle masrûf ve lüzûz-ı tekmîle ma'tûf kılmış. Binâen 'alâ-zâlik kitâbete liyâkat-ı küllîsi olup bi'l-fi'l vezîr-i sâlis ve ser-'asker-i zafer-rehber Mustafâ Paşa Edâmallahu celâlühü³⁹⁶ ferzend-i ercmenleri olan mahmiye-i Haleb'de beglerbegi iken meşîyyet-i takdîr-i Rabbânî birle murg-ı revânları gülzâr-ı cinânda âşiyân-gîr olan Mehmed Paşa'nun kâtib-i dîvân-ı 'âlî-şânı olmuşdı. El emru biyedillah³⁹⁷ hükmünce anlar fevt oldukda sâhib-sa'âdetlere hıdmet itmege irtikâb

³⁹⁶ Allah onun azametini (büyüklüğünü) devam ettirsin.

³⁹⁷ Bütün işler Allah'ın elindedir.

itmeyüp ferâgat sûretin gösterüp rûzgâr-ı zûr-kârda kûşe-i vahdet ihtiyâr itmek üzre iken mahdûm-ı ümerâ-yı vâlâ-güher a'nî İskender Paşa'nun ferzend-i dil-bendi olan Ahmed Paşa'nun hıdmet-i şerîfleriyle müşerref ve 'izz ü ikbâlle imâret-i Lahsâ'ya müteveccih olduklarında müşârunileyh Lisânî mansıb-ı kâtib-i dîvânı olmagı erzâni kılup nice nice ri'âyet-i küllîsîne mazhar düşüp şükrân üzre oldukları ma'lûm-ı erbâb-ı rûkûmdur. Beyt:

Merdûd-ı ser-i kûyun olup mübtezel oldu
Agyâr-ı siyeh-rûya bu işler güzel oldu

ve lehu: Geçdi Ferhâd ile Mecnun bana hemdem kalmadı
Vâdi-i 'ışkun bu gün vardır 'aceb tenhâlığı

Diğer : Tegâfûl eylemek yegdür Lisânî ta'n-ı nâ-ehle
Kulak dutmak bilürsün kavl-i a'dâya sefâhetdür

Fî Harfî'l-Mîm

MECDÎ: Edirnevî'dür. Zümre-i mülâziminden tab'-ı güher-çini sarraf-ı dürer-i ma'ânî ve elfâz-ı dil-keşinün beyânı hayât-bahş-ı mânend-i rûh-ı sâni safâ-yı hâtır-ı 'âtır zekâ-yı zihn ile mevsûf ve beyne'l-akrân cem'iyet-i kemâlât ve selâset-i muhâverât ve mülâyemet-i ahlâk ve fûnûn-ı ma'rifet ü fazl ve hıdmet-i rıfk ile ma'rûf ve sanâyi'-i eş'ârdan ve esnâf-ı inşâdan behremend ve gereği gibi her birinde dânişmend-i hûşmend hâlâ anda yârân içre bî-misl ü bî-mânenddür. Zîrâ ki şeb ü rûz ol şâ'ir-i ma'ânî-endüz tetebbu'-ı eş'âr-ı fuzalâ-yı 'Acem ve tecessüs-i güftâr-ı fusahâ-yı Rûm'ı rakam itmeden hâlî degüldür. Ol güzîde-i merdûm-i efâzıl bir mertebede nazma mâyildür ki ekser-i şu'arâ-yı Rûm'un tedîvânin cem' idüp matla'ların tertîb-i buhûr ri'âyet idüp **Câmi'ü'n-Nezâyir** yazmış makbûl-i asâgir ü ekâbir ve pesendide-i zurafâ vü şu'arâ olup meşhûr ve elsîne-i efvâhda mezkûrdur. El-hak mazmûn-ı gûn-â-gûn ve belâgat-meşhûn ile hâlâ bî-nazîr ve zebân-ı Fârisî ve Nevâyî'den bir derecede vâkıf u habîrdür ki takrîr ü tahrîre sığmaz ve kasâyidde şu'arâ-yı fasîhü'l-keâm içre tâk ve tarz-ı gazelde bülegâ-yı belâgat-nizâm mâbeyninde ma'ânî-i hâs ile yegâne-i âfâk ol tûtî-i şekeristân-ı hoş - edânun ve bülbül-i gülîstân-ı bülend-edânun ebyât-ı ferah-fezâsı gâyetde şîrîn ü nefis ve kelimât-ı dil-küşâsı elfâz-ı reng-â-renk ile rengîn ü selîs ve tahayyülât ile muhayyel ü pür-mesel vâkı' olmuşdur. Râkım-ı hurûf Edirne'de bir yıl mikdârı sa'âdet-hânesinde mütemekkin olmuşdur ve İstanbul ve Bursa'da defâ'at ile mülâkât idüp ekser-i zamân 'alâ-ragmı zamânihi yârâna hemdem ü hem-hâne olmuşdur. Nazm-ı dürer-bârın ve güftâr-ı âbdârın okıyup vird-i zebân ve hasb-i hâl-i dil-i sûzân idinmişdür. Cümlesinden iki dâne gazel-i bî-bedel sebt olundu. Gazel :

İstedüm kim ser-i kûyunda idem geşt ü güzâr
Önümi aldı benüm yoluma geldi seg-i yâr

Sana 'aşıklığımı halka dirin didüm ana
Yediye n'olsa gerek didi o demde dildâr

Bagrımın başları hicrünle bin oldu dimege
Ey tabîb-i dil ü can ‘âşıkun kaç başı var

Hayli itiligi var buldugun it gibi talar
Hele hırlı kudur âci’ degül ancak agyâr

Bir ramak kaldı yetiş Mecdî-i bî-çâre didüm
Azıcuk cânlu imiş didi o ‘İsî-güftâr

ve lehu eyzân :

Getüre jâle lebünden diyü ağız haberi
Gülşenün ağız açup bekler anı gonceleri

Rîşte-i zülfün ile sûzen-i müjgânundur
Dil-i mecrûhumun ancak ileri vü cigeri

Sen ne şîrsin ki ruhun ile lebün devrinde
Kullanup âteşe şem’i suya saldun şeker

Tîg u hançer gibi hûnileri takup yanına
Belde turur o şeh-i kişver-i hüsnün kemeri

Reh-nümâ kim ola Mecdî’ye reh-i gamda diyü
Aglar iken düşe geldi önüne eşk-i teri

Bu bir kaç matla’-ı bî-misâl ol şâ’ir-i şîrîn-makâlündür. Mâsadak-ı hâl ve şâhid-me’âldür.
Nazm :

Seher bezm-i çemende jâle ile gonce-i hamrâ
Mey ile subha kalmış şîşedür agzında bir elma

Diğer : Tûtî-i gûyâ ne denlü söylese andan yana
Nisbet itmez rûyunı âyineye ehl-i safâ

Diğer : Teşbîh kılmaz ehl-i safâ ana rûyunı
Tûtî ne denlü söylese âyîneden yana

Diğer : Hâk-i râh-ı yâri iltüp girdi servün gönlüne
Benzer ey Mecdî yolundan geldi gülzâre sabâ

Diğer : Sâkiyâ bir kasr-ı mînâ-fâmdur câm-ı şarâb
Kim çıkup başı kabâ kesb-i hevâ eyler habâb

li-mü’ellifihi :

N’eylerin ‘âlemde sâkî eyleyüp meyl-i şarâb
Câmdur destümde dâgum penbesi anun habâb

Diğer : Olmasa encüm içre meh-i nev yeni yaka
Bağışlamazdı câme-i dürr âftâb ana

Diğer : Eyle merdûd tek rakîb-i segün
Olayın ben senün itün köpegün

Diğer : Kuşagı ile düğme çözüdür birer birer
Vuslat deminde câme-i yâr aradan çıkar

Diğer : Şâhid-i şevke zeberced tâcîdur câm-ı şarâb
La'ldür ana konulmuş sâkîyâ her bir habâb

li-mü'ellifihi :

Meclis-i şeh sahn-ı gülşen havzıdur câm-ı şarâb
Nâ-şükûfte goncedür konmuş ana her bir habâb

Bu dahi anundur. Matla' :

Bana göstermemek ruhsâr-ı zîbâsını cânânun
Olupdur başı altından ser-i zülf-i perîşânun

MÜSLİM Çelebi: Kuzât-ı 'ızâm zümresindendir. Kâdî-i Şâm olan Hınnalu-zâde 'Alî Çelebi Efendi'nün birâder-i ercmen-i hûşmendidir. Ma'ârif-i rengîn ile ârâste ve 'izz ü temkîn ile zâtı pirâstedür ve rûz u şeb tahsîl-i 'ulûm idüp pesendîde-i merdüm-i Rûm olmuş. ve zebân-ı Fârisî'yi tekâmîl kılmış zîrâ ki tettebbu'-ı eş'âr-ı şu'arâ-yı pîşîni ve kasâyid-i fusahâ-yı müteahhirîni bir bir görüp her birine nazar-ı kimyâ-eser ile nâzır olup nazîre dimiş ki makbûl-i şu'arâ-yı güzîn ve müsellemler-i erbâb-ı 'ulûm ve meşhûr-ı her merzbûm olmuştur. El-hak tarz-ı kasâyidde dil-pezi sözleri çok olup ve üslûb-ı gazel-i Fârisî ve Türkî'de bî-nazîr olduklarına söz yok. Her bir dilde ma'ânî-i gûn-â-gûn ile zü-fünûn-ı 'âlem ve makbûl-i 'Arab ü 'Acem. Eş'ârından bir matla' u beyt-i dil-pezi bu evrâka sebt olundu. Beyt :

Menzil olmaz 'âşıkâ hâk-i der-i dil-ber kadar
Ey zihî devlet ki kadri ola hâk-i der kadar

Devlet-i dünyâyı n'eyler 'âşık-ı dîdâr olan
Hazz ider bir kez nezâre kılssa dünyâlar kadar

Bu kıt'a-i dil-pezi dahi anların güftârındandır tahrîr olunur. Kıt'a :

Her kişi kim cihanda ola nâmdâr-ı 'ışk
Halk arasında ana hezâr i'tibâr olur

Görmez misin şu bülbül-i mesti ki 'ışk ile
Bir murg-ı bî-nevâ iken adı hezâr olur

MÜFREDÎ-İ 'Acem: İsfahan'dandır lâkin müddet-i medîddür ki tecrîd tarîkıyla tek ü tenhâ ehad-ı nâsdan ferd ile âşînâ olmayup kendü vâdîsinde ferîd olup terk-i diyâr kılup geşt ü güzâr iderek hevâ-yı diyâr-ı 'Arab a'nî seyr-i bilâd-ı Mısır u Şâm u Haleb ve arzû-yı kişver ve cüst ü cûy-ı her merzbûm temennâsıyla Rûm'a gelüp hıdmet-i erbâb-ı safâ ve mülâzemet-i şu'arâ

itmeden bir an hâlî degüldür ve bi't-tab' şî're mâyl ve ekser sözi hasb-i hâl-i 'âşıkân-ı bî-dil vâkı' u lâmi' olmuşdur. Bu matla' u beyt anlarundur. Nazm :

Âh-ı Mecnûn ger zi derd-i 'ışk ez gerdûn gozeşt
Âh yâ Rab çü ne konem kâr-ı men ez Mecnûn gozeşt ³⁹⁸

Hâhem ki şevd hâk-i dereş bisterem imşeb
K'ez nâz kadem-i rence kuned ber serem imşeb ³⁹⁹

Hudâ merâ zi tu ez dil-sitan cüdâ ne koned
Cüdâ şoden zi tu key mitevan Hudâ ne koned ⁴⁰⁰

MUHYÎ Çelebi: Şehr-i Nigde'den mülâzimîn zümresindendir. Sâbıkan mevâlî-i dîn içre kelimât-ı bülend ile şems-i tabân ve ehâlî-i güzîn mâbeyninde kemâlât-ı dil-pesend ile mihr-i dırâhşân ve haseb ü nesebi 'âlî-şân ve nûr-ı dîde-i müftî-i devrân olan vâris-i ahlâk-ı Nebî a'nî Hazret-i Ahmed Çelebi'nün vasfında dinilmiş. li-mü'ellifihi Kıt'a :

Tûyi ki ez eser-i 'ilm-i Hazret-i Ahmed
Be ümmetân-ı Muhammed reh-i Hudâ bahşed ⁴⁰¹

Tu Hâdî-i reh-i dîni ki bâb-ı fâzıl-ı tu
Be gümrehân-ı tarîkat reh-i hüdâ bahşed ⁴⁰²

Tû ân fasîh-keîâmî ki ez selâset-i nutk
Suhenverân-ı zamân-râ fasîh-edâ bahşed ⁴⁰³

i'âdesinden mülâzım olmuşdur. Kemâl-i ma'rifetle mevsûf ve hüsn-i hulk ile ma'rûf 'ulûm-ı hayât-bahş ile rûh-ı revânın ihyâ ve kelâm-ı mantık ile zebânın gûyâ kılmış ve beyne'l-akrân ehliyyet ile meşhûr ve 'inde'ş-şu'arâ fesâhatle mezkûr ve inşâ-yı bî-nazîri sahâyif-i devrde mestûr ve aksâm-ı nazmda üç zebân ile şî're kâdir ve her birinden edâ-yı nâzûk ile şâ'ir ve ma'nâ-yı bîkr bulmada sâhir-i mâhir ve mesnevî tarzında mânend-i **Ma'nevî Leylî vü Mecnûn** dimiş ki nice nîce ma'ânî-i hâs ile mazmûn-ı pâk rakam kılmış ve kasâyid ü gazeliyyât üslûbunda dürlü dürlü dürr-i meknûn gibi nazm-ı belâgat-nümûnı der-gûş-ı erbâb-ı kerem itmiş. Bu gazel ile bir kaç matla' u beyt anundur sebt olundu. Gazel :

Reh-i 'ışk içre idersem n'ola da'vâ-yı kadem
Nûh yaşından urur merdûmek-i dîdem dem

Sen lebi âb-ı hayâtı koçan ölmez dirler

³⁹⁸ Mecnun'un ahı aşk derdinden dolayı feleği asmışsa, ya Rab ben nasıl ah çekmem. Çünkü benim işim Mecnun'u da geçti.

³⁹⁹ Bu gece kapısının toprağı yatağım olsun isterim. Nazından başıma çile ayağını vursun bu gece.

⁴⁰⁰ Ey sevgili Allah beni senden ayırmasın. Allah korusun senden ayrı kalmaya nasıl tahammül edilebilir?

⁴⁰¹ Hazret-i Ahmed'in ilminin eseriyle (etkisiyle) Muhammed ümmetine Allah yolunu bahşeden sensin.

⁴⁰² Sen din yolunun kılavuzusun. Senin faziletli kapın tarikat yolunu şaşırınlara hidayet bağışlar.

⁴⁰³ Sen akıcı konuşmasıyla zamanın şairlerine fesahat bağışlayan o fasih sözlüsün.

‘Ahdüm olsun seni cânâ koçayum ölmez isem

Yâr ellerle yabanlarda el oyunın oynar
Çekdirür ‘âşık-ı pâmâl olana derd ü elem

Tâb-ı meyden rûh-ı sâkîde olan katre-i mey
Görinür gözüme berk-i gül-i terde şebnem

Her gazel kim okudı Muhyî ruhun vasfında
Başladı şevk ile tahrîre anı nây-ı kalem

Diğer : Gezerken yâr ben bîmâr ile âheste âheste
Didiler kim ölmelü oldı cânun gezdirür haste

Diğer : Sehâb-ı zülfünü ref’ eyleyüp nîkâbı gider
Efendi seyr idelüm gün yüzün hicâbı gider

Diğer : Yog ise elde eyâ h’âce ne var güherimüz
Devletünde toludur dâmen-i çeşm-i terimüz

Diğer : Olma ey dîde iğen ter tolu hâk olsan gerek
Sen de ey ten germe gögsün sîne-çâk olsan gerek

Diğer : Hicrüm yoluna ugrasa nâgeh o gül beden
Eyler cefâ yolun sapıdur bir tarîk ilen

Diğer : Senden yanup yakılmaga cânâ meleklerle
Tütüdi duhân-ı âteş-i âhum feleklere

Diğer : Nîce bir seng-i melâmetle suna kâse-i ser
Kurtuluş yok mı ‘aceb serzeniş-i a’dâdan

Diğer : Yûsufi elden çıkardum bilmedüm kadrin diyü
Bagrına taşlar basupdur keffe-i mîzânı gör

Diğer : Gice yazdum Muhyî’yâ sûz u güdâzum şerhini
Suhte em der-hıdmet-i şem’e kodum pervâneyi

Diğer : Künc-i firkatde koyup Muhyî-i tenhâ dil ü cân
Uydı hâl ü hattuna her biri bir sevdâda

MUHYÎ-İ Konevî: Vâlid-i emcedi mürşîd-i râh-ı Rabbânî ve râh-nümâ-yı tarîk-ırahmânî a’nî Şeyh ‘Abdül-kâdir Geylânî’nün hulefâsından olan ‘umdetü’s-sülehâ ya’nî Şeyh Yahyâ’nun oğludur. Hâtır-ı ‘âtırî envâ’-ı ‘ulûma şâmil ve her birisinde gereği gibi kâmil ve hemîşe tevekkül ile dergâh-ı İlâhî-penâh ve fûnûn-ı ma’ârif ile ‘ârif-i billah kimesnedür ve zebân-ı selâsede eş’âr-ı tasavvuf-âmîzi ve güftâr-ı nesâyih-engîzi vâfir ve sanâyi’-i şî’re kâdir kimesnedür. Bu bir nice beyt anundur. Şî’r :

Hızr-ı hatt-ı mushaf-ı hüsnün eyâ ma’şûk-ı Hak

Tavr-ı Tûr-ı 'ışkda Mûsâ'ya oldu hem sebak

Diğer : 'Âşık-ı dîdâr olan mazhar-ı envâr olur
Sâdık-ı dildâr olan mahrem-i esrâr olur

Diğer: Sevâd-ı dü dîde süveydâ-yı dil
Ne bâşend hâlî zi süveydâ-yı dil ⁴⁰⁴

MAHVÎ: Kastamonî'dan zümre-i mülâzimîndendir. Fehm ü firâsetle akrânı içre bî-nazîr ve mütâla'a-i 'ilmiyyesi gereği gibi dil-pezîr ve tettebbu'-ı eş'âr-ı mütekaddimîn ve güftâr-ı mihr-âsâr-ı müteahhirîn itmede tab'ı sâf ü pâk ve zebân-ı Fûrs'ün müşkilâtın ve envâ'-ı nîkâtın anlamada zihni cüst ü çâlâk El-hak tabî'at-ı şî'riyyesi pesend-i zurafâ-yı zamân-ı pâk ve her beyti hasb-i hâl-i 'âşıkân-ı nâtüvândur ve vird-i zebân-ı cevânân-ı cihândur. Güftâr-ı dürrer-bârının cümlesinden bu beyt sebt olundu. Matla' :

Ko gamun n'ola bu cân mülkine Sultân olsun
'Akl u dil bende olup hükmine fermân olsun

MEŞÂMÎ Beg: Konevî'dür. Merhûm Rüstem Paşa'nun 'izz ü ferr ile kethüdâsı olan Mustafâ Çelebi'nün ferzend-i ercmenidür. Asl ü neseble hülâsa-i rûzgâr ve ber-güzîde-i âferid-kârı ya'nî Ahmed-i Muhtâr'un Salavutullahî'l-melikü'l-'allâm³⁸⁸ evlâd-ı 'ızâmundandır. Mezkûrun zât-ı ferhun de-âsârı savb-ı ma'ârifle pirâste ve hâtır-ı 'âtır-ı huceste-etvârı evsâf-ı hamîde ile ârâstedür. Ma'lûmât-ı pâki zebân-ı Fârisî'de pesendîde-i yârân-ı nükte-dân ve şî'r ü inşâda makbûl-i merdüm-i cihândur. Hâlâ mezkûr sene seb'în ve tis'â mi'e şeh-zâde-i kâm-bîn ü kâm-yâbun bâb-ı sa'âdet-me'âbında i'zâz-ı tâm ile kâm-yâbende ve ol bâbda devlet ü rif'atle karîn olan sâhib-devletler ile hem-nîşîn ve geşt-i zâr-ı 'âlemde ze'âmete mutasarrıf el-hâsıl envâ'-ı fûnûna vâkıf kimesnedür. Mezkûrun kalem-i 'anber-bârından isâr olan eş'âr-ı müşk-âsârının sevâdından meşâm-ı cân mu'attar ve sahîfe-i nazm-ı pür-envârının beyâzından dîde-i dil münevverdür. Mâsadak-ı güftâr bir gazel-i âbdâr ve bir nice beyt-i müşk-bâr-ı 'anber-bâr kalem-i güher-nisâr ile nakş u nigâr oldu. Ta mazmûn-ı şîrîn-girdârun mahfî iken âşîkâr ola. Gazel :

Boşala kîse-i kan kâse-i 'umman dükene
Ne gam-ı dil ne nem-i dîde-i gıryan dükene

Şu kadar arayayın şâhid-i maksûdumı kim
Cüst ü cûda talebüm rahşına meydan dükene

Çekmezem gam çekerüm çeşmüme hâk-i kademün
Eger ey nûr-ı basar kuhl-ı Sıfâhan dükene

Dîdeden hûn-ı ciger olmaya bir dem hâlî
Bahrlar berr olsa deryâ-yı firâvân dükene

⁴⁰⁴ - Gönlün süveydası olan iki gözün karası, gönül sevdasından mahrum değildir.

³⁸⁸ Melik ve allâm olan Allah'ın selamı onun üzerine olsun

Gide mi fikr-i leb-i yâr Meşâmî dilden
K'andan hiç ola mı la'l-i Bedehşan dükene

Diğer : Şâh-ı mârân dirilür zülf-i 'abîr-efşânun
Kaç başı var ki ana öykine ejderhânun

Diğer : Muhît-i eşküme nisbet didüm kim bir şimersin sen
İşidüp didi oldum bahrisinden çok şirinsin sen

Diğer : Devr için bildük nîce Cemler serencâm eylemiş
Biz de câm aldük ele fikr-i serencâm eyledük

Diğer : Cîger hûn oldu gamdan çıkdı can mümtehen gitdi
Gel e şimden girü rahm it ölen öldi giden gitdi

Diğer : Fakr u felâket içre bulunmaz nazîrimüz
Bir bûriyâye münhasırûz yok hasîrimüz

MEDHÎ: Gelibolı'dandır. Dânişmend-i hûşmend tâifesindendir. Ser- âmed-i fuzalâ-yı cihân a'nî müftî-i zamânun hıdmetinde rûz u şeb tahsîl-i ma'ârif ve envâ'-ı 'ulûma mânend-i akrân vâkıf olmuştur. Yârân-ı hoş -tab' içre mütâla'ası hûb u mergûb diyü meşhûr ve pesendide-i 'ulemâ-yı nezdîk ü dûr olmuştur. Tabî'at-ı şî'riyyesi bed degül nîk vâkı' olmuştur medhden mu'arrâ ve ta'rifden müberrâdur. Bu bir iki beyt-i garrâ ol pâk-edânundur. Eş'âr :

Kıldı revâc-ı la'lüni bu hatt-ı müşk-bâr
Yâkuta viridi hüsn-i hattın hüsnün iştiâr

Diğer : Vâsf-ı ruhsârını vâsf it o mehün matla'da
Ser-i a'dâyı nihâyet anasın makta'da

Diğer : Dem-be-dem gonceye gülşende lebün vâsf eyler
Hak bu kim bülbül-i gûyâ katî rengin söyler

MÜDÂMÎ Beg: İstanbul'dandır. Dergâh-ı mu'allâda sipâhi oğlanı bölüğündendir. Sîne Bülbülü Mehmed Çelebi dimekle efvâhda meşhûr ve elsîne-i yârânda hüsn-i hulkla mezkûr hadd-ı zâtında dervîş-nihâd u pâk-i'tikâd hûb-sohbet ve muhibb-i ehl-i ma'rifet kimesnedür. Zîrâ ki zamân-ı evâilde ve 'unfûvân-ı cevânîde rûz u şeb lisân-ı 'Arabî'ye müdâvemet ve zebân-ı Fûrs'e mülâzemet gösterüp ve her birinden habîr ve kendi emsâli içre bî-nazîr olmuş ve bi't-tab' zihn-i latîfi şî're mâyil olmanın her an hem-nîşîn-i merdüm-i efâzıl ve hemdem-i şu'arâ-yı zamân ve mahrem-i zurafâ-yı cihân olup tettebbu'-ı eş'âr-ı şu'arâ-yı mütekaddimîn ve cüst ü cûy-ı güftâr-ı fusahâ-yı müteahhirîn itmeden bir zamân hâlî olmayup erbâb-ı ma'ârif içre çok rumûz-ı 'ulûma vâkıf olmuştur. Hâtır-ı deryâ mekâtırı vâdî-i eş'ârda âb-ı revân gibi revân u pâk ve esâlib-i inşâsı gamz-edâ-yı dil-i gamnâk ve tarz-ı târîhde müverrihân-ı zamân içre makbûl-i pîr ü cevân olmuştur. Ber-muktezâ-yı mahlas ser-â-ser ebyât-ı safâ-bahşı rindâne ve keyfiyyet-i kelimât-ı dil-keşi mestâne ve hasb-i hâl-i ehl-i fenâ

ve vasf-ı dil-berân-ı zîbâdur. Cümlesinden bir gazel-i ‘âşıkâne ile bir kaç beyt-i bî-bahâne bir târîh-i yegâne kalem-i letâyif-nigârla nakş u nigâr oldu. Gazel :

Cihanda bir dutar câm-ı ecel dervîş ü sultânı
Dirîgâ kimseye bâkî degüldür ‘âlem-i fânî

Düşürür câhden câhe seni çarh-ı felek âhir
Eger Yûsuf gibi dahi olursan Mısır Sultânı

Makarr olur mukarrer sana çünkim tahte-i nâ-bût
Tutalum kim senün olmuş dilâ taht-ı Süleymânî

Yedi iklime şâh olsa üşürmez başına halkı
Kabûl itmez Hüdâ’ya kul olan ‘ünvân-ı dünyâyı
Sanasın bir ‘imâretdür bu vîrân olacak dünyâ
Müdâmî bir iki günlük içinde halk mihmânı

Diğer : Ben tururken niçün agyâr ola ol yâr kuli
Ne revâdur ola her ecnebi hünkâr kuli

Diğer : Dil-i mecrûhumı sanma yalnız gamze deler
Bir yanadan anı ey kaşı kemân gam zedeler

Diğer : Leblerün emsem didüm ol dil-bere em hâ didi
Kimseye bu sırrı ifşâ eyleme em hâ didi

Diğer : Şol kadar viridi ferah kalbüme cânâ gam-ı ‘ışk
Elem-i hicri unutturdu bana ‘âlem-i ‘ışk

Şöyle mest oldu Müdâmî ki özün fehm idemez
Sunalı bezm-i belâ sâkîsi câm-ı Cem-i ‘ışk

Diğer : Gam-ı dehri yimedi gussa-i Leylâ’yı yidi
Yok deyin ‘akl-ı ma’aşı delidür Mecnûn’un

Sâbıkan sene tokuz yüz altmışda merhûm Tukakin-zâde Mehemed Paşa Mısır’a paşa oldukda ol şâ’iri-i dil-peziir tab’-ı nükte-gîrden bu târîhi ki bilâ-nazîr dimiş sebt olundu. Kıt’a Târîh:

Vâlî-i Mısır olan o sultânun
‘Adli gün gibi ‘âleme toldı

Bâg-ı ‘âlem sehâsı mihrinden
Gonceler gibi açılup güldi

İşidüp ‘adlini şeh-i ‘âlem
Hâtır-ı ‘âtır safâ buldı

Vâlî-i Mısır idince a'dânun
Yüzi berk-i hazân gibi soldı
Bu Müdâmî didi ana târîh
Devlet ile 'azîz-i Mısır oldı

MU'ÎNÎ Çelebi: Edirnevî'dür. Zümre-i kuzâtdan beyne'l-akrân 'adl ü 'adâletle mu'în-i fukarâ ve dîn ü diyânetle bî-hemtâ asl-ı nîkû-zâdı dervîş-nihâd ve dil-i âzâdı kayd-ı ta'âllukdan geçüp silsile-i 'ışka düşüp perî-rû dilberlerün zülfine gönül bağlayup hemîşe ümmîd-i visâl ile hurrem ü şâd ve şehristân-ı vücûdî ol hevâ ile âbâd zâtı 'ulûmun fûnûnında gereği gibi kâbil ve 'akl-ı dûr-endîşi ekser-i kütübün mütâla'asında kemâl ile kâmil ve eş'âr-ı huçeste-âsârı hûb ve şehristân-ı hayâl ile güftârı mergûb zîrâ ki kesb-i ma'rifeti ve âdâb-ı sohbeti tahsîl ve tetebbu'-ı nazm-ı mütekaddimîn idüp zebân-ı Fârisî'yi sâyir yârân gibi yigrek tekâmîl kılmış. Hakka budur ki ol nâzım-ı nazm-âferinün eş'ârı 'anberîn-bû ve güftârı dil-cû vâkı' olmuşdur. Bu bir kaç matla'-ı murassa' anundur. Şi'r:

Zülfine degdigüm illerde kılup efsâne
Saklayamadı bu sırrı taracıkdur şâne

Nakş-ı agyâr degül yazmaga lâyük likin
Kesseler suratını kâbil idi efsâne

Diğer : Geç ey vâ'iz sıratun havfın anma lutf-ı Hak çokdur
Geçenlerden işitdüm ben ki anda korkuluk yokdur

Diğer : Çü girdi bir şikem-hâre yirinden kalkmaz tenbel
Boşandı duhter-i rez anun içün sâkîyâ humdan

MÎREK HEKÎM: İstanbul'a mülhak kasaba-i Eyyûb-ı Ensârî 'aleyhi'r-rahmetü'l-bârî dendür. 'Acem-zâdelikle ma'rûf ve haseb ü neseble seyyîd-i pâkize ve ahlâk-ı hamîde ile mevsûf ve padişâhımızun bâb-ı hümayûnunda mânend-i Eflâtûn hekîm-i hâzık ve güftârında nedîm-i sâdık ve 'ilm-i hikmetde Aristo-yı sâni vü fûnûn-ı muciz ü ebdânda Behmenî-i Yunânî ve şi'rün aksâmında mâhir ve iki zebân ile nazmı vâfir ve her bir dilün edâsında gereği gibi şâ'irdür. Tertîb-i dîvân itmişdür ve kasâyidi dahi makbûl-i yârândur. Cümlesinden bir kaç matla'-ı Fârisî ve bir nice Türkî beyt ü makta' sebt olundu. Şi'r:

Mâlîd be ruh kâtib-i eşk ez müje nem râ
Cârist besî tecrübe kerdîm kalem râ ⁴⁰⁵

Haste-i rûyî şodem tedbîr mî bâyed merâ
Beste-i mûyî şodem bencîr mi bâyed merâ⁴⁰⁶

Diğer : 'Âşık öldürmekdür ol şemşîr-i 'üryandan ümîd
Başa gün togmagdur ol hurşîd-i candan ümîd

⁴⁰⁵ Göz yaşı kâtibi kirpiğinden yaşı yanağa sürdü. Kalemi çok denedik, çok câridir.

⁴⁰⁶ Bir yüze hasta oldum (vuruldum), bana tedbir gerek, bir saça (kıla) bağlandım, bana zincir gerek.

Diğer : La'l-i cân-bahş-ı dehân-ı yârdan dil cân umar
Hastedür dârü'ş-şifâ-yı gaybden dermân umar

Diğer : Can derûn-ı hâlvet-i dilde seni tenhâ sever
Mâsivâyı n'eylesün şol bende kim Mevlâ sever

Diğer : Dehr bâğı içre kim bâd-ı hazân hîzân olur
Çehre-i zerdüm gibi berk-i rezân rîzân olur

MUHÎTÎ Efendi: Zümre-i kuzât-ı huceste-etvâr ve hükkâm-ı 'adâlet-şi'ârdandur. Mevlid-i vücûd-encüm-i sa'd-ı bî-nühûsı cezîre-i Rodos'dur. Tahsîl-i 'ulûm ile zât-ı bî-'adlin tekâmül itmege güzîde-i mevâli-i 'ızâm kâdî-zâde ve zübde-i fuzalâ-yı zevî'l-ihirâm ve gül-i gülşen-i istifâde Bostân-zâde Mehemed Çelebi'nün tilmîz-i bî-nazîrlerinden olup zîrâ ki ol hîredmend-i dil-pezîr Şâm-ı şerîfde ve Edirne ile İstanbul-ı latîfde nice müddet niyâbet idüp hükûmet-i şer'iyye icrâsında makbûl ve mütâlâ'a-i 'ulûmda rûz u şeb meşgûl iken ba'dehu mezkûr efendileri Anadolu kâdî 'askeri oldukda Erzurum'a efendisi cânibinden kassâm 'askeri olup varmışlar. Pâdişâh-ı kişver-küşânun evâmiriyle Lala Mustafâ Paşa 'asâkîr-i zafer-kirdâra serdâr olup şehir-i mezbûra gelüp karar kıldukda paşa-yı müşârünileyh sâbıkü'z-zikri h'âce idinüp ol yâr-ı deryâ-dil için müstakil âsitâne-i sa'âdet-âşiyâne 'arz-ı mülâzemet revâne idüp mülâzım olınup sâni yen seksân akçe ile ordû-yı hümayûn kâdisi olup bi-hasebi't-tarîk bî-minnet-i 'ulemâ-yı eşfâk yigirmi ve otuz yıl mukâtî' olmayan menzi-let-i fazîlet-refîkleri mâbeyninde kat' idüp pâye-i 'ulemâyâ kadem basmışlar ve hadd-ı zâtında ol 'âlî-himem akrân u emsâl içre meşhûr u mezkûrdur. Mezbûr paşa ile Şîrvân seferin seferleyüp döndükde vezîr-i a'zâm merhûm vefât eyledükde İstanbul'da tekrâr pâdişâh-ı 'âlem-penâha bir bî-nokta kasîde-i a'lâ ve bir rik'a fûnûn-ı inşâ idüp sunmışlar. Ol Sultân-ı gerdûn-gulâm mansıb-ı âher virilmesine hatt-ı hümayûn peyâm buyurmuşlar. Kasîde-i mezkûrun bir nice beyti tahrîr oldı.

Ehl-i 'âlem devr-i 'adlünde olur âsûde-hâl
Tan degül olmasa dilde dâverâ eger hilâl

Tâli'ün hem-ser olursa mihrle her dem revâ
K'ehli diller derdüne olur müdâvim mâh u sâl

Mâ-hazâr medhûn ehl-i dillere olur harâm
Ger kelâm olur ise her dem sürûr encüm hilâl

Tâli'üm ol haddedür kim dûd-ı âhumla müdâm
Gülmedüm 'ömrümde asla görmedüm resm-i visâl

Her kim olursa olur mesrûr-ı 'âlem kâm ile
Kâm ile vasl-ı murâd olur müdam emr-i muhâl

Ba'dehu gerdiş-i devr-i zamân ile harmân-ı Sultân-ı Îrân u Turân ile vilâyet-i Bagdâd'a sene tis'în ve tis'â mi'ede defterdâr-ı mâl-ı yakîn olan gül-i gülzâr-ı dâniş ü nev-nergis-i ehl-i bînîş ve a'yân-ı câh ü celâlün nahl-i ser-bülendi a'nî Lâle-zâr Efendi'nün nûr-ı hadîka-i behîşt-i

mânendi olan Ahmed Efendi ile mezbûr Muhitî gelüp erbâb-ı devlet ashâb-ı fazîlet ile ‘ayş u ‘işret ve şu’arâ-yı hoş -tabî’at ile musâhâbet-i ‘arîfâne ve mübâhase-i dânişmendâne idüp husûsâ sene ihdâ ve tis’in ve tis’â mi’e Muharreminde âsitâne-i mülk-âşiyâne şâh-ı şehidâne revâne olup ziyâretleriyle müşerref oldukda bu gazel-i dil-pezîri sebt itmişler. Yârân-ı zamân ve suhen-sencân-ı cihân nazîre dimişler. Gazel :

Kemingâh-ı safâdan zâhir olup lutf-ı zebânı
Bihamdillah ziyâret eyledüm şâh-ı şehidânı

Sen ol şâh-ı güzînün kurretü’l-’aynısın ey server
Olur Yûsuf ile İsmâ’il anun kulı kurbânı

İki ‘aynum efendi ravzasına sen gül-i âlün
Birisi nehr-i şâhî birisi nehr-i Süleymânî

Sipihr üzre şafakla encüm-i tâbendeler yir yir
Işıklardur ki seylâb eylemişdür el içün kanı

Muhitî mâteminde böyle kan dökmezdi çeşminden
Eger ‘ayn-ı sa’âdet bilmeyeydi kendüye anı

li-mü’ellifihi :

Harîmünde yanar gönlüm olup kandil-i nûrânî
Dü-çeşm-i hûn-feşân ana iki yâkut-ı rummânî

Bu dahi mezkûrundur. Beyt :

Hâkden ref’ eyler idün zerre-i nâçiz-vâr
Âftâbum zerre denlü olsa bana i’tibâr

li-mü’ellifihi :

Gördi kim düşdüm bisât-ı kurbe mânend-i gûbar
Hışm ile silküp beni atdı yabane rûzgâr

Bu kıt’a dahi ol bahr-ı şi’re muhît olan deryâ-dilündür kanâ’at bâbında dimişlerdür. Kıt’a:

Ey Muhitî umarum dergâh-ı Hak’dan rûz u şeb
Kullarını gayre muhtâc eyleyüp ac itmesün

Mâh muhtâc olduğuçün âftâbe eksilür
Hak Te’âlâ sag gözi sol göze muhtâc itmesün

MUHYÎ Çelebi: Edirnevî’dür. ‘Acem Fethîoglu demekle meşhûr ve fûnûn-ı garâyib ü ‘acâyible efvâhda mezkûr ‘ilm-i ma’kûle rûz u şeb mûmâreset gösterüp dânişmend-i hûşmend ve her ‘ilmden fâidemend ve ol tarîkden sûdmend-i ercmend olmak üzre iken dünyâ vü mâfihâ ârzûsın bi’l-küllîye gönülden çıkarup hayât-ı ebedî ve devlet-i sermedî iştiyâkı ile yârândan ve akrândan geçüp tecrîd vâdisinde tâk olup Ka’be-i şerîfe ve harem-i ravza-ilatîfe revâne ve envâr-ı şem’-i İlâhîye cân atup pervâne olmuş. Nice müddet ol ‘azîm mekânlarda

âşiyân tutup âhir murg-ı rûh-ı hü mâ-pervâzı âsitân-ı Hazret-i Şeyh İbrâhim kuddise sirruhu şebbâz-vâr nüzûl kılmış. Ol vech ile sâhib-jende ve dervîş-i dil-i zinde olup tasfiye-i bâtin itmiş kayd-ı bedenden halâs bulup halâyık içre makbûl olmuş. ve hadd-ı zâtında rind ü lâubâli ‘âşık-ı şûrîde-hâl ve reh-rev-i âşüfte-me’âl olmanın yârân-ı bî-gam içre dîvânelıgla müttehem ve dîvâne-râ kalem-nist diyü rakam itmişler. Ol merd-i zebân-âver ü suhen perver zihn-i müdriki şî’re mâyil ve tab’-ı nâzüki nazmun aksâmında kâmil geçinür. Eş’âr-ı muvahhidânesi bî-hadd ve güftâr-ı şâ’irânesi lâ-yu’addur. Nazm u nesr ile te’lifât-ı rindânesi çok ve tasnîfâtının hiç birinde bahâne yok. Cümle-i ebyâtından hemân bu matla’ı ki bir mısra’ı tazmîndür mahlasına münâsib olmagla sebt olundu. Beyt :

Muhyi’yâ mâ şod îm zinde be mey
Ve mine’l-mâi külli şeyin hayy ⁴⁰⁷

MİSÂLİ: Edirnevî’dür. Hasan Çelebi demekle meşhûr ve hüsn-i hulk ile makbûl-i tabâyi’-i şu’arâ-yı nezdik ü dûrdur. ve sîret-i pâk ile cevân-ı nîkû-hısâl ve sûret-i hüsn-i hattı yakût-ı revân-bahşla bî-misâl ve güftâr-ı lezîz ile tûtî-i şîrîn-makâl ve mazmûn-ı gûn-â-gûn ile mânend-i dürr-i meknûn ve kendü dahi fi’l-hakîka şu’arâ-yı suhendân içre hüsn-i edâ ile Rûm’un Hasan’ı ümmîddür ki nihâl-i ‘ömri bârver olan şâhid-i suheni gülşen-i ‘âlemde berk ü bâr-ı hüner ile ercmend ve semere-i nazmdan behremend ve mânend-i Kemâl-i Hucend-i ser-sebz ola. Zîrâ ki eş’âr-ı dürrer-bârı der-gûş-ı sâhibân-ı hûş ve vird-i zebân-ı ‘âşıkân-ı medhûşdur. Cümlesinden bir nîce matla’ u beyt-i sûznâk ki pesend-i ehl-i idrâkdür sebt oldu. Ebyât:

Kaçan kim gelse sâkî bâde-i gül-reng meydâne
Safâ ile o dem raksa girer meclisde peymâne

Diğer : Hâr u has cem’ olsa ey gül-ruh ser-i Kays’a ne var
Âdemün başına çok nesne getirür rûzgâr

Diğer : Çıksa agzumdan lebün didüm ki sag olmak ba’îd
Didi ol ‘İsî-nefes var çıkmaduk canda ümîd

Diğer : Dime sen pâ-yi bûse ‘âşık-ı zârı muhâldür bu
Öperler sâ’id-i sîmînüni eller güzeldür bu

Koyup kûyunda gönlüm râh-ı ‘ışkun ihtiyâr itdüm
Gönül kalsun begüm yol kalmasun dirler meseldür bu

Nazîre li-mü’ellifihi :

Rakîb-âsâ dimezsın bezme ben zârı muhâldür bu
Ana şâdî bana gam kısmet-i rûz-ı ezeldür bu

Didüm katl eyledün gayrı anunçün ölürin gamdan
Ölen ardınca ölmüş yok didi evvel meseldür bu

⁴⁰⁷ Ey Muhyi biz şarapla hayat bulduk. Her şey sudan hayat bulur (Kur'an 21/ 30)

Bu bir nice matla' u beyt dahi anundur

Dimezler kim gelen ol pâdişâh-ı 'âlem-ârâdur
Giderler seyr-i hûn-kâr itmege 'âlem-i temâşâdur

Diğer : Bâg-ı ruhuna geldügi dem tûtî-i hatun
Uçdı çemenün revnakı ey nahl-i letâfet

Diğer : Ölse rakîb-i rû-siyehi ol şehün n'ola
Bir kara yüzlü ölmek ile ne ziyân ider

Diğer : Rûşen oldı bezmimüz meydâna geldükde şarâb
Kasr-ı şevkûn sâkîyâ h'îş tutmadı câmina

Diğer : Ham-ı ebrû-yı yâre benzeyelden hükm idüp bildüm
Misâlî eger yilün var iken re'yinde tugranun

MUHTÂRÎ: İstanbullı haseb ü nesebi Âl-i Resûl ve etvâr-ı ferhunde-âsârı ulu'l-ebsâr mâbeyninde makbûl zâhiren Ayasofya kâtibinün birâderi dimekle ma'rûf ve hâliyâ evân-ı cevânîde rûz u şeb tahsilde olmagın ma'ârifle mevsûf ve vâdî-i nazma tâze heves ve eş'âr-ı dil-pesendi pesendîde-i herkes hemîşe şî'r ile hemdem ü mahrem olmagla mazmûnı kendü gibi dilkeş ve elfâz-ı pâki bî-gışdur ve kendü semtinde sözleri hayli hayâl ile muhtâr u muhayyel ve nazm-ı dürer-bârından bir nice matla'-ı bî-bedel ki her biri bir dürlü mesel ile merkûm ve pesend-i vechi gibi tab'-ı zurafâ-yı Rûm olmışdur. Bu evrâk-ı ferhundeye tahrîr ü tastîr ider. Ebyât:

Zülfün açup nesîm ide mi haddin âşikâr
Ol günü gösterür mi 'aceb bana rûzgâr

Diğer : Lebün sırrın n'ola keşf itse güftâr
Söz ile açılır 'âlemde esrâr

Diğer : 'Aks-i mihr-i 'ârızunla rûşen eyle şâmımız
Sâkiyâ toldur meh-i tâbâne dönsün câmımız

Diğer : Olmış âşüftesi ol kâkül-i 'anberbârun
Vechi-vâr olsa perîşân güzelüm destârun

Diğer : Kalup kıyâmete hasret yolunda sâye gibi
Ayakda kaldum o kaddi çenâra iremez el

Garîk-ı bahr-ı firâkum o yâre irmez el
Ümîd-i vash ko ey dil kenâra irmez el

Diğer : Mestânele aglarsa sana hâlini 'âşık
Hışm eyleme söyleyeni ko söyleden gör

Diğer : Pend idüp turma yanumda beni gamnâk itme
Yûri zâhid bana turdukca kasâvetsin sen

Diğer : Libâs-ı şâhid-i ma'nâ degül mi Muhtârî
'Aceb mi şi're letâfet virürse hüsn-i edâ

MAKÂLÎ: Zümre-i mülâzimîndendür. Anadolu vilâyetinde Alaşehir'dendür. Beyne'l-akrân bülend-himmet ve rûz u şeb tâlib-i ma'rifet ve zurafâ içre letâyif-i reng-â-reng ile sâhib-makâl ve şu'arâ mâbeyninde şûh-tab' u şîrîn-edâ ve hüsn-i kelâm ile nîkû-hısâl ve her an esnâ-yı musâhabetde durûb-ı emsâl ile mukayyed ve tabî'at-ı şi'riyyesi hûb u mergûbdur ve kûhsâr-ı 'âlemde hemîşe Ferhâd-veş 'âşık-pîşe ve zâviye-i dünyâda şîrîn-dehenler yâdıyla sâhib-endîşe olduğuna bu eş'âr-ı dil-keşe mâlikdür. Bu sahîfe zurafâyâ sebt olundu. Beyt :

Sînemün dâğın gören atar melâmet sengini
Gel gör ey şîrîn-dehen tag ile taşun cengini

Diğer : Bu çarh-ı pîrezen ey dil degüldür mâye-i devlet
Kişinün başı sag olmak durur sermâye-i devlet

Diğer : Görüp ruhsâr-ı yâri bâgda açıldılar güller
Gözünden nergisün uykusını uçurdu bülbüller

MAKÂLÎ: Alaşehir'den Anadolu sancagında erbâb-ı timârdan 'add olunur. Tabî'at-ı şi'riyyesi pür-zîver olmanın şu'arâ-yı nâmdârdan geçinür. Eş'ârı hayâl-âmîz ve güftârı emsâl-engîz ve tarz-ı kasâyidle makbûl-i merdüm-i nîk ü bed olmuş ve bu bir gazel-i meşhûr kendinün icâd-ı hâsı olduğu efvâhda mezkûr zîrâ ki açar kaparı iltizâm-ı mâlâyelzem idüp pesend-i tab'-ı şu'arâ ve makbûl-i hâtır-ı zurafâ olsun diyü kalem-i müşğîn ile rakam-ı rengîn kılmış ve 'âşıkân-ı nazar-bâzun hasb-i hâli ve kendinün şâhid-makâlîdür sebt olundu. Gazel:

Dil hânesin gam-ı ruh-ı cânân açar kapar
Halvet-serâ-yı hâsını Sultân açar kapar
Seyr itdürür iki dizi lülü-yi şehvâr
La'l-i lebün ki hokka-i mercân açar kapar

Şehperlerini nâz ile şâhin-i zülf-i yâr
Can murgunun şikârına her an açar kapar

Ben 'andelibin ol yüzi gül görse nâz ile
Destinde bir kitâb-ı **Gülistân** açar kapar

Derbânun olmuş ey sanem agyâr-ı bed-likâ
Hayfâ ki bâb-ı cenneti şeytân açar kapar

Nazmun Makâlî komadı ragbet cevâhire
Sarrâf-ı dehr bir kurî dükkân açar kapar

Makâlî rast :

Halk maktûl-i çeşm-i yâr ey dil
Ol dir bilen sen de anlara kâil

Bulıcak ol meh dü hefte kemâl
Didiler âya sen buradan yıl

Nîce teşbîh idem kadd ü ruhuna
Her biri anlara teşbîh degil

Gül ise bir palâs-pûş çıkar
Serv ise gedâ-yı pâ-der gil

Gazeli şâ'irâne söylemede
Kim degüldür Makâlî'ye kâil

ve lehu : Yârdan horsend ü a'dâdan melâmet-dîdeyüz
Şâkirüz gülden velîkin hârdan rencîdeyüz

Hâsılı çekdük girîbân-ı te'âllukdan eli
Serv gibi gülşen-i 'uzletde dâmen-çîdeyüz

Sıfle-i tab' onlar idrâk eylemezler kudretüm
İrtifa'-ı şânımız var 'âlem-i 'ulvîdeyüz

Ana kaldı kim dehânun yâdına ey mâh-rû
Başımız alup 'adem iklîmine 'azm ide yüz

Bezle zeyn olduk Makâlî halka halka dâg ile
Rûy-i yâri görmege başdan ayaga dîdeyüz

MUHYÎ Çelebi: Zümre-i kuzât-ı 'âlî-derecât ve letâfet-i fehm ile mühim-sâz-ı erbâb-ı hâcâtındur. Nihâl-bûdı şükûfe-i dânişle tâze vü ter ve hadîka-i 'ulûmda nahl-i hayâtı ile semere-i fazl u belâgatle bârverdür. 'Ale'd-devâm zamân-ı cevânîde ilâ hazîhi'l-eyyâm bir an ta'tilde geçirüp fevt idüp zelîl olmamışdur. Ol merd-i müeddeb rûz u şeb dimeyüp bir edîb-i ferhunde-hısâl önüne diz çöküp kesb-i kemâl ve tahsîl-i fazîlet-i nîk-me'âl idüp ba'dehu dürer-i deryâ-yı hünerden mâlik-i dürr-i sîmîn olmaga hıdmet-i 'ulemâ-yı mütebahhirîn ve menâsıb-ı ehl-i dünyâdan mansıba yakîn düşmege mülâzemet-i ümerâ-yı 'adâlet-âyin kılup hemîşe ol dakik-endîşe kelimât-ı pür-nîkât-ı dil-küşâyıla zîb-i encümîn a'yân-ı suhen-perverân ve fasâhat-ı pür-melâhat-i rûh-efzâ ile firîb-âmûz gamze-i peydâ vü girân olup meydân-ı eş'ârda kemiyyet-i kilik-i vâsıtî haram-ı cihân-neverdi tab'-ı revân gibi cüst ü çâlâk ve âb-ı sâfi gibi hayât-bahş-ı cân-ı gamnâk ve 'arsa-i güftârda zebân-ı 'uzviyyet-i Makâlî-i bî-mânend zihn-i pür-hayâli bâd-i vezan gibi revândur ve a'yân mâbeyninde 'ıyândur ve rûmûz-ı ta'miye-i mu'ammâdan âgâh olduklarına gâh gâh hâllâl-ı müşkilât-ı mu'ammiyât-ı erbâb-ı nîkât olup turuk-ı müşkil-i erkâmda ehl-i fehm ü zekâ gibi benâm olmuşdur. Bu gazel anlarundur. Gazel:

Zümre-i 'uşşâka oldun ey dil-i ser-geşte baş
Unıdursun gel e bir gün sakın gâfil me-baş

Kimseye baş egmez idi geçinürdi kelle ser
âarbı baş egdürdi kul itdi beni bir ser-tıraş

Birbiriyle başların n'îçün egerler yâ gibi
Çünkü ok gibi yolunda togridur ol iki kaş

Çıkdı gönlümden gözümünden nâle vü yaşum benüm
Râz-ı 'ışkı serverâ itdikleriçün halka baş

Şenligi yok bir harâb-âbâd imiş dünyâ-yı dîn
Gelmeyeydüm Muhyî'yâ ben bu harâb-âbâde kâş

Bu matla' dahi anlarundur. Beyt:

Cefâ sengiyle cismün gömgök itmiş ol perî-peyker
Urulmuşsun yine ey 'âşık-ı mihnet-zede benzer

MEŞREBÎ: İstanbulî'dür. Erbâb-ı sâz u tarâb zümresinden idi. Şûh-tab' u hoş -sohbet ve esnâ-yı musâhabetde latîfe-i latîfî makbûl-i sâhibân-ı hoş-meşreb olmanın hemîşe hemdem-i ashâb-ı 'ayş u 'işret ve mahrem-i erkân-ı devlet ve türkî dimede dilîr ve savt ü nakşî bî-nazîr ve nagamât-ı dil-keşi dil-pezîr ba'z-ı yârândan keyfiyyet-i hâlin işitdügimiz şu'arâ-yı hoş -edâdandur. Tabî'at-ı şî'riyyesi hûb u mergûb vâkî' olmuşdur. 'Alî nâm bir cevân-ı nâzenîn ve bir mâh-ı zühre-cebînün 'ışkıyla dest-i zîbâsına dâg-ı âteşîn yakmış ol esnâda ol şâ'ir-i mahabbet-endûz bir gazel-i pür-sûz dimiş bu evrâkda bir iki beyti erkâm olundu. Şî'r:

Dilâ yazuksınırdı öpmege 'âlemde cân anı
Elinden yandum ol dâgun ki yakdı dest-i cânânı

Bozulmasun diyü yârün fitîl-i dâg-ı cân-sâzı
Ana bend eyledüm bir nice yirden rişte-i cânı

'Alî 'ışkına yüz bin dâg-ı şevk ur Meşrebî cânâ
Erenler sikkesidür yan seversen Şâh-ı Merdânı

MU'İDÎ: Üsküb kurbünde Kalkandelen dimekle meşhûr kasabadandur. Evsâf-ı hamîdesin gûş itdügümüz şu'arâdandur. Sâbıkan müftî 'Alî Çelebi Efendi'nün mu'îd-i ercmendi ve tilmîz-i hûşmendi olmuşlar. 'Ulûmı tertîb üzre görmege hüsn-i cemîl ile sa'y-i küllî idüp her bir fenni tahsîl itmişler. Akrân arasında ehliyyet-i mâlâ-nihâyetle mevsûf ve kâbiliyyet-i bî-gâyetle ma'rûf ve zihn-i pâki esnâf-ı şî're kâdir ve envâ'-ı 'ulûma geregi gibi kâdir ü mâhir ve tarz-ı mu'aşşer ü tesdîsde hûb ve üslûb-ı murabba' u tahmîsde mergûbdur. Cümlesinden bir gazel-i âbdâr ki hikâyât-ı hasb-i hâl-i rûzgâr veşikâyet-i devr-i bed-girdârdur sebt olundu. Gazel:

Tâli'üm nahs oldugı çarh-ı sitemgerden midür
Başuma bunca belâ dilden mi dil-berden midür

Defter-i 'uşşâka yazmışsun rakîbi tualum
Gel sen insâf eyle andan ol bu defterden midür

‘İşk mıdur ya gül midür bülbülleri nâlân iden
Na’rası bezm ehlinün meyden mi sagârdan mıdur

Düşmene uyma didüğümçün beni düşmen sanur
Dostlar billâhi suç benden mi dil-berden midür

Ey Mu’îdî gice gündüz gülmeyüp kan aglamak
Kendü kendünden midür yohsa güzellerden midür

MEYLÎ: Kayasıra’dandur. Dânişmend zümresinden ve bu devr hûşmendindendür. Fünûn-ı ‘ulûma tab’ı mâyl ve her bir fende kâbil ü kâmil olmak ümmîdiyle rûz u şeb tahsîl itmede hüsn-i cemîl ve sa’y-i küllî gösterüp iltifât-ı ma’rifet itmiş ve cüz’î vü küllî semt-i şî’re mâyl olmanın Meylî mahlas itmiş. Bu bir iki beyt-i ‘âşıkâne ki vâsf-ı hûbân-ı zamânedür anundur sebt oldı. Beyt:

Kâkülünle çıkamaz başa şehâ sünbül-i ter
Olamaz kâmet-i bâlâna berâber ‘ar’ar

Kıl kadar dolaşacak nesnesi yokdur ey dil
Ne revâdur dolaşa yâr miyânına kemer

MAHFÎ: Gilân’dandur. Sâbıkan ve siyâseten Gilân pâdişâhı olan Sultân Muzaffer Şâh’un şâ’iri idüm diyü sene tokuz yüz altmış beşde diyâr-ı Rûm’a gelüp erkân-ı devlete mülâzemet idüp a’yânı kendüden rencide-hâtır kıldukda dîvân-ı Sultânîden sürölüp ol harâretle kapucularun birisinün devâtla urup başın yarmış keşân keşân vezîr-i a’zâma iletürler. Pâdişâh-ı ‘âlem penâh a’nî Sultân Süleymân-ı felek-bârgâh hazretlerine ‘arz-ı hâl sunup bin dürlü belâlarla beş on akçe ‘ulûfeye mâlik olmuş. Aksâm-ı şî’r dimege sâlik geçinüp müddet-i medîddür ki kendü re’yi ile pâdişâh-ı ‘âlem-penâhun nâmına Şâh-nâme nazm itmege evkâtın zâyî’ itmeden hâlî degüldür. Tabî’at-ı şî’riyesi bu beytlerden ma’lûm-ı erbâb-ı ‘ulûm ola. Nazm:

Tokuz altmış beşinde tamâm
Nebî hicretinde ‘aleyhi’s-selâm

Açıldı gül-i bâg-ı bezm-i cihân
Ferah-bahş oldı zemîn ü zamân

Diğer : Zi gerd-i sipeh şod cihân nâ bedîd
‘İnan sürdi Konya’ya Hân Bâyezîd

Gel imdi işit vâsf-ı devr-i zamân
Kazâ şerhine hem idelüm beyân

Diğer : Felekden dönüp gerdiş-i rûzgâr
Döner çarh-ı gerdûn bulunmaz karâr

Kamu tag u taş oldı çün nev-bahâr
Kızıl kan küffârdan lâle-zâr

Mezkûr Mahfî bu ebyâtı okıdukda bir dürlü okur ki hiç rekâketi belürmez. Bir kerre mezbûra su'âl itdüm ki bu okıdugun ne usûl ve ne ahenkdür. Hemân hazır cevâb olup didi ki bu re'y-i Mahfidür. El-hak mezkûrun latîfesi şî'rinden iyü vâkı' olmışdur. Bu beyitler dahi benimdür dir. Fihi nazm:

Şehâ ger nümâyî tu âheng-i harb
Muti'-i tu gerdend ez şark u garb⁴⁰⁸

Eger bâ tu hurşîd kîn âvered
Şeb u râ felek ber-zemîn âvered ⁴⁰⁹

MERÂMÎ: İstanbullı'dur. Dergâh-ı a'lâda dîvân-ı hümayûn kâtiblerindendir. Hoş-fehm ü hûb-tab' kimsedür. Bu bir iki beyt anundur. Beyt :

Şâdmândur gayriler zevk ü visâl üstindedür
Gussa vü gamla gönül dâim melâl üstindedür

Mihr ü mâhı nîce teşbîh idem haddüne kim
Birisi noksan birisi hod zevâl üstindedür

MÜBÎNÎ: Edirne'den dânişmend tâifesindendir. ve rûz u şeb tahsîl-i 'ulûma mûmâreset gösterüp akrân u emsâl içre pür-ma'rifet olmak üzredür. Ümmîddür ki ol bâbda mânend-i yârân-ı sâhib-kemâl-i behremend ü kâmrân u bî-zevâl ola. Üslûb-ı nesta'lîk yazmada hûb ve kûşîşi ve kitâbeti mergûbdur. Bu devr şu'arásındandır. Sözleri elfâz-ı pâk ve ma'ânî-i sâf ile müzeyyen ve zurafâ mâbeyninde mübeyyen cümle-i ebyâtından bu bir nice matla'-ı rindâne kalem-i dü-zebâne gelüp tahrîr ü tesvîd olundu. Ziyâde 'âşıkâne vâkı' olmışdur. Şî'r :

Bakmadı yaşuma bakdum o meh-i tâbâne
Ne sitârem bana yüz yudı vü ne cânâne

Diğer : Merdüm-i dîdeme her dem o perî-rû görünür
Gözüme gayrı görünmez yine hep o görünür

Diğer : Magrûr olalı ol meh haddine nice yıldur
Ey hatt-ı siyeh yetiş haddini ana bildür

Diğer : Giceden subha dek bîdâr idüm ol mâh-ı tal'atsüz
Benüm göz yaşı gibi yıldızı düşkün sa'âdetsüz

MURÂDÎ-İ 'Acem: Vilâyet-i Bistâm'dandır. Zât-ı sürûr-encâmı Bâyezîd-i Bistâmî 'aleyhi'r-rahme neslinden dervîş-nihâd ve gâyetde pîr-i nâ-murâd hemîşe takva vü tahâretle pâk-i'tikâd olmanın arzû-yı tavâf-ı Beytül-harâm ve meyl-i ravza-i Nebi 'aleyhi's-selâm ve ziyâret-i eimme-i kirâm idüp sene 955'de âhir diyâr-ı Rûm'a gelmiş. 'Âkıbetü'l-emr hükm-i İlahî ve takdîr-i nâ-mütenâhi ile sene 968'de dârü'l-bekâyâ varup hem-nîşîn-i hûr ü 'ayn olmak

⁴⁰⁸ Ey padişah savaşa yönelirsen doğudan ve batıdan sana herkes itaat eder.

⁴⁰⁹ Eğer güneş seninle ederse, felek gece vakti onu yeryüzüne getirir.

ricâsıyla meyl-i huld-ı berrîn idüp sene semân ve sittîn ve tis'â mi'ede vedâ'-ı yâr-ı cânı ve terk-i 'âlem-i fânî kıldı. **İnnâ lillâhi ve innâ ileyhi raci'un** ⁴¹⁰Aksam-ı şî'rde hûb 'ale'l-husûs kasîde-i musanna' H'âce-i Selmân'ı tettebbu' idüp nazmına nazîre dimiş. Makbûl-i şu'arâ-yı 'Acem ve zurafâ-yı Rûm ve pesend-i erbâb-ı rûkûm ve hâtır-nişân-ı sâhibân-ı 'ulûm olmuşdur. El-hak ol siper-i rûşen-dil olan şâ'irün eş'ârı vâfirdür. Bu bir nice matla' ki hasb-i hâl-i nâ-murâdân-ı devr ü zamân ve vird-i zebân-ı mestmendân-ı cihândur. Nazm:

Murâdî der cihân her çend kerdem terk-i vâdihâ
Ne dîdem vâdî-i hoş-ter zi künc-i nâ-murâdihâ ⁴¹¹

Der kûy-i nâ-murâdî ez hîç reh-güzârî
Ne girifte hâtır-ı kes hergiz zi men gubârî ⁴¹²

Be gird-i kûy-i tu ez 'âşıkân-ı zâr menem
Be dâm-ı tu zi esîrân-ı hâk-sâr menem ⁴¹³

Nazîre li-mü'ellifihi

Helâk-ı şîve-i ân şûh-ı 'işvekâr menem
Harâb-ı dîden-i ân çeşm-i pür-humâr menem ⁴¹⁴

MURÂDÎ-İ Bagdâdî : Bu bende-i kemterün küçük birâderidür. 'Ulûm-ı zâhire mûmâreset gösterüp her an mülâzemet-i ehl-i ma'rîfet idüp tahsîl itmeden hâlî degül ümmîddür ki ehl-i hünerden behremend ve noksânın tekâmîl kılup ercmend ola. Zîrâ ki hâfız-ı kelâm-ı mecîd ve kava'id-i tecvîd bilmede ferîd ve nakş u 'amel ve savt u gazel okıması âvâz-ı hazînle mergûbdur. ve şî'r icâdında tabî'atı ziyâde hûb vâkı' olmuşdur. Sâbıkan seb'in ve tis'â mi'ede bir mektûb-ı mahabbet-efzûn bu diyâr-ı gurbetde cigeri pür-hûn ve kûşe-i bî-tûşede hâlî Diğer-gûn olan bende-i mahzûne irsâl kılmış içinde bir gazel-i bî-bedel sebt itmiş. Hâliyâ bu risâle-i müşğîn-sevâda bu bende-i dildâde ol şâ'ir-i nâ-murâd olan nîkû-nijâdun gazelin ketb itdi ta kim sahâyif-i rûzgârda mestûr u mezkûr olup yâdigâr ola. Gazel:

Çü aldı egnine ol mâh-ı câme-i âbı
Sehâb-ı haclete girdi sipihr mehtâbı

İta'ât itmez idüm zühd birle su-be-su
Medâr-ı secde-gehüm olsa kaşı mihrâbı

Belâ vü derd-i nigârumla âşînâ olalı
Nîst külli rifâkî küllî ashâbî ⁴¹⁵

⁴¹⁰(O sabredenler, kendilerine bir bela geldiği zaman) Biz Allah'ın kullarıyız ve biz O'na döneceğiz derler.
Kur'an 2/156

⁴¹¹ Muradî dünyada her ne kadar vadileri terk etmişsen de muratsızlık köşesinden daha güzel bir vadi görmedim.

⁴¹² Muratsızlık diyarında yolculardan hiçbiri benden incinmez

⁴¹³ Senin diyarının etrafında inleyen âşıklardanım. Senin tuzağına düşmüş zavallı esirlerdenim.

⁴¹⁴ O işveli güzelin edâsından helâk olan benim, o mestane gözleri görmekten harap olan benim.

⁴¹⁵ Hiç bir dostum ve arkadaşım kalmadı

O serve sâyesi hem-râh olmasun diyü dil
Ne gündüzün günü ister ne gice mehtâbı

Murâdî mülteci oldu o şâh-ı der-köhne
Umar açıla yüzine sa'âdet ebvâbı

MUTİ'Î: Konevî'dür. Dânişmend zümresinden Hâfız-ı Konevî'nün birâderidür. Tabî'at-ı şî'riyyesi revân lisân-ı 'Arabî'de ve zebân-ı Fârisî'de olan ebyât u eş'ârun tettebbu'nda mânend-i akrân ve hemîşe mutî'-i ehl-i hüner olmakdan ma'ârif-i cüz'î vü küllîden behredâr olmuş. Bu bir iki beyt anındur. Şî'r:

Her kaçan kim kâküli ruhsâr-ı cânânı bürür
Gûyiyâ ebr-i siyeh hurşid-i rahşâmı bürür

La'lüne kasd itdügümce zülfini hâyil kılur
Sanasın zulmet durur kim âb-ı hayvânı bürür

MİNNETÎ: Zümre-i kuzât-ı hûb-sıfâtdan olup mevlid-i şerîfi Kütâhiyye sancagında Kula nâm kasabadandır. Evân-ı şebâbda cüst ü cûy-ı râh-ı savâb kılup tahsîl-i 'ulûm için geşt ü güzâr-ı her merzbûm iderek temâşâgâh-ı erbâb-ı 'ukûl olan İstanbul'a varup nihâl-i vücûd-ı pür-cûdun âb u hevâsı sâz-kâr-ı ma'ârifle gül gibi tâze vü ter ve lâle-hürde mânendi zîb ü fer ve serv-i sehî misâli bâlâ çeküp merâtib-i 'ulyâ-yı kemâle gün günden irişüp neşv ü nemâ bulup emsâl ü akrâna gâlib olmak ârzûsıyla kemâlât-ı ehl-i dile tâlib ve cân u dilden nazm-ı Fârisî cânibine mâyil ü râgıb düşüp ebyât-ı hayât-efzâsı şu'arâ-yı rûzgârı vird-i zebân ve münşe'ât-ı münşiyân-ı belâgat-disârı hırz-ı cân kılup tab'-ı hudâdâdına ma'ânî-i hâss-ı dil-küşâ ile isti'dâd irişüp mehâbib-i eş'âr-ı âlem-ârâdan ber-murâd olduğına sene tokuz yüz toksan beşde iltifât-ı pâdişâh-ı âsmân-serîr ve 'inâyât-ı Sultân-ı cihân-küşâ-yı lâ-nazîrün yümn-i sa'âdetinde asl u neseble şâyeste-i imâret ve sezâ-vâr-ı eyâlet olan Hüseyin Paşa-yı 'âlî tebâr Lahsâ'ya beglerbegi kâm-kâr oldukda sâbıkü'z-zikr efkâr-ı bîkr ile bir târîh-i âbdâr-ı dürr-i şehvâr hâk-i pâ-yi kimyâ-âsârlarına duyurmuş der-gûş-ı suhen-güzâr ve pesend-i tab'-ı merdüm-i ebrâr olmuş. Fi't-târîh :

Bu gün sensin mürüvvet ma'deni lutf u kerem kânı
Revâdur olsa lutf-ı pâdişâhî sana erzânî

Bu peygâm-ı sürûr-encâmı gûş idüp didüm târîh
Bihamdillah bugün Lahsânun oldun mîr-i mîrânı

Paşa-yı 'âlî-şânun mesmû'-ı şerîfleri ve makbûl-i tab'-ı latîfleri olup mezkûr vilâyet-i Lahsâ'da bir kâdîlîg ile ber-murâd idüp ol pâk-nihâdî dünyevî imdâd ile kuyûd levâzımından âzâd itmişler. Târîh-i mezbûrda paşa-yı nîkû-nijâd müşârunileyhi kendüye küllî ri'âyet iderek Lahsâ'ya bile müteveccih oldukda diyâr-ı Bagdâd-âbâd'e gelüp zurafâ-yı hûb-nihâdlarla sadâkat yüzinden ihtilât idüp musâhabet-i garîbesi bî-minnet-i pür-neşât ve eş'âr-ı yâr ile irtibât yüzünden irişüp bu bir nice nazm-ı nefis-güftâr ol şâ'ir-i selîs kelâmundur. Ebyât :

Dimişsin nâvek-i müjgânuma sînen nişân olsun
Umulmazdı bu senden olsun ey kaşı kemân olsun

Diğer : Gûş dutmaz ‘andelîbân-ı suhen-perdâza gel
Var ise varmış durur gülşende h’âb-ı nâza gel

Diğer : Cemâlünden nikâb-ı zülfi kaldursan safâ artar
Bu rûşendür güneşden ebr ref’ olsa ziyâ artar

Diğer : Murg-ı cânı ‘ârızın ‘arz itse dil-ber söyledür
Bülbülü bâg içre gûyâ verd-i ahmer söyledür

Her nefes âyîne-i ruhsârıdur gûyâ iden
Tûtî-i tab’ı sakın sanman ki sükker söyledür

MEDHÎ Çelebi: Burûsâyî’dür. Mülâzimîn zümresindendir. Zekâ-yı tab’ ile beyne’l-akrân meşhûr aksâm-ı şî’rde tabî’atı pür-zîver ve tarz-ı kasîdede ma’ânî-perver ü medh-güsterdür. Her vechile şâ’ir-i pâkize-edâ olduğına kimsenün asla sözi yok zîrâ ki gazel-i bî-bedeli bî-hadd ü çok cümlesinden bir iki matla’ u beyt sebt olundu. Ebyât:

Benzermiş ebrûsı bir kîne gözi bâdâmına
Şâh-ı bâdâma dönüpdür kıl nazar endâmına

Medhiyâ bulmak dilersen yeter âfetden halâs
Konmasun murg-ı revânun dâr-ı dünyâ bâmına

ve lehu: Sanmanuz bâd-ı çemenden varak-ı gül götürür
Hâr ile kana boyanmış pîr-i bülbül götürür

MEDHÎ-İ İstanbûlî: Haydar-zâde dimekle meşhûr ve cemâl-i ‘âlem-ârâ ile makbûl-i merdüm-i nezdik ü dîr ve hüsn-i ahlâk-ı bî-hemtâ ile dil-fîrîb-i ‘âşıkân-ı şeydâ ve memdûh-ı dil-i şu’arâ ve nûr-ı çeşm-i zurafâ ve ser-âmed-i cevânân-ı mâh-likâ idi. Hayfâ ki evân-ı cevânîde terk-i ‘âlem-i fânî ve meyl-i ravza-i câvidânî kıldı. Hadd-ı zâtında rûz u şeb sohbet-i erbâb-ı ‘îrfâne cân u gönülden tâlib ve musâhabet-i şîrîn edâsı rengîn olmanın şî’rine gâlib idi. Gülşen-i cihânda hâl-i hayâtında ve bu dünyâ-yı bî-sebâtta nâgâh kazayla ol serv-i âzâde kendü mânendi bir lâle-’ızâre dil-dâde ya’nî ‘âşık-ı rûy-i Mazhar-zâde olup ve mezkûr Mazhar-zâde bu zamânenün ser-âmedi bir dil-ber-i bî-bahânesi ve ‘âşıkân-ı bî-cânun cânânesiydi. Sâbîkû’z-zikr anların hakkında bir gazel-i âbdâr mânend-i dürr-i şeh-vâr şikâyet tarîkıyla hasb-i hâl-i dil-i zâr diyü sebt itmiş ketb olundu. Gazel:

‘Akli bend eyledi zülfün buluben âzâde
Dil-i bî-çâre sana geldi şehâ feryâde

Virdi kâfirlere her bir sanem-i seng-dili
Ne kaza ugradı bu deyr-i harâb-âbâde

Hüccet ey şâh-ı cihân çünki zer efşân yaraşur
Rûy-i zerdüm süreyin hattuna ben üftâde

Kâdî oldukda Hüdâ kılduğı cevır ü zecrûn
Rûz-ı mahşerde cevâbın vire Mazhar-zâde

Mey-i ‘ışk içdi diyü mahkeme-i kûyunda
Medhi’yâ kasdı bu tagyîr idesin nâ-şâde

Fî harfî’n-nûn

NEV’Î Çelebi : Zümre-i mülâzimîndendir. Rûm ilinde Edirne kurbünde Malgara nâm kasabadandır. Gülbîn-i bûdı ve nihâl-i vücûdı mezbûr Edirne şehrinde bulmuş neşv ü nemâyı. Mezkûr şehre müte’allık oldukları nev’an ana dâl ve asl u neseble dervîş-hilkat ve âdemî-sîret nîkû-hısâl ve zât-ı şerîfi fezâyıl-i kudsiyye ile ârâste ve ‘unsûr-ı latîfi fûnûn-ı kemâlât-ı ünsiye ile pîrâstedür. ve zihn ü zekâvet ile beyne’l-akrân yegâne-i zamâne ve fehm ü firâset ve dânişmendlikde bî-bahâne müselleme-i ehl-i ‘irfân ve pesend-i merdüm-i cihândur. Tab’-ı mustakîmi envâ’-ı ulûma şâmil ve her bir nev’-i ilmün mütâla’asında kâmil ve ol tûtî-i şîrîn-zebân ve ol bülbül-i gülşen-i cân üslûb-ı kasâyidde fusahâ-yı mütekaddimîn gibi kemâl ile mükemmel ve tarz-ı mesnevîde hikâyâ-yı latîfle yârândan fâyık ve reng-i gazelde ma’ânî-i nazm edâsına mutâbıkdur. Râkım-ı hurûf bî-hadd ü lâ-yu’ad Edirne ve İstanbul’da hıdmetleriyle müşerref olmak müyesser olmuştur. El-hak gâyetde hoş-sohbet ve nihâyetde pâkize-tıynet ve kelîmât-ı muhakkıkânesi hayât-bahş-ı ehl-i tecrîd ve edâ-yı rindâne- sinden kemâl-i mertebede müsemma’ olan erbâb-ı hüner müstefîd olması mukarrerdür ve gazeliyyât-ı dil-keşi bî-hadd ü lâ-yu’addur. Cümlesinden iki dâne gazel-i pür mesel ma’ânî-i bî-bedel ile kalem-i dü-zebâna gelüp sebt olundu. Gazel:

Visâle va’de itmişdün ferâmûş eyledün gitdi
Meded rûh-ı revânüm ölmedin gel va’demüz yitdi

Eger güldür eger hâr-ı cefâ redd eylemez ‘âşık
Hemân lutf eyle ey gonçe gönülde her ne kim bitdi

Bizümle sûretâ oldun mülâyim va’dede ammâ
Dirîgâ ey gül-i ter hâr u haslar kavli berkitdi

İrişmez vasla bâr-ı ‘âşık-ı bî-sîm olan bildük
Kapunda aglayu aglayu cânâ işimiz bitdi

Okıyup yanuna tutsan el üzre yaraşur anı
Senünçün kendüyi illerde Nev’î dâsitân itdi

ve lehu Gazel-i âhir

‘Ârif dilinde nakş-ı hayâl-i habîbi gör
Gül goncesin gönülde bulan ‘andelîbi gör

Cânâ hicâb imiş nazar-ı mâsivâ-yı dost

Bezm-i visâle ma'nî olurmuş rakîbî gör

Hicründe ben garîbe ne nakş itdi rûzgâr
Kûyunda hûn-ı eşk ile şekl-i garîbî gör

Şemşîr-i firkatün dili sad-pâre eylemek
Rûz-ı ezelde kismet olunmuş nasîbî gör

Bahr-ı letâfet içre güher görmek istersen
Nev'î sözünü dinle kelâm-ı edîbî gör

Bu bir kaç matla'-ı matbu' dahi ol âsmân-ı hünerün ufk-ı tab'ından gün gibi tulû' idüp âfâkda şuyû' bulmuşdur. Kilk-i bedâyi' sûretiyle tasvîr ü tahrîr olundu. ve lehu matla':

Kızardı aglamakdan gözlerüm cây-i terahhumdur
Nazar kıl kim hicâb altında kalmış iki merdümdür

Diğer : Bâd-ı sabâ ile dinüz oynamasun gonce-ter
Yürek oynamasına ugramasun bülbüller

Diğer : Başî irişdi göge rif'ât ile her dünün
Hak budur kim katî alçaklığı var gerdünün

Diğer : Lebün câmina benzer yok dehânun gibi nâdirdür
Bunun keyfiyeti ta'bîr olunmaz zevke dâ'irdür

Diğer : Cigerde turmaz akar hûn-ı zahm-ı tîr-i nigâr
Örümcek ağı basar üstine bu cism-i nizâr

Marîz olanlara dirler sefer mübârekdür
'Adem diyârına gitdüğü bu ten-i bî-mâr

Diğer: Açıldı lâle vü gül bülbül oldu hûb nefes
Hevâlanur ise 'aceb mi gönülde dâg-ı heves

Ne karakollugun olsa Efendi baş üzre
Kalem misâli dilerse beni kitâbete kes

Diğer : Kaşuna ser-figende bende olsa mâh-ı nev lâyık
Olur şehri güzel her ay idinse bir iki 'âşık

Diğer : İdüp mukâbele n'eyler kitâb-ı sihr-i helâl
Senün cemâlüne baksun eger dilerse kemâl

Diğer : Yeter itdün şikâyeti gülden
Varak-ı diğer ey hezâr-ı çemen

Diğer : Şikâf oldu tenüm tîg-ı cefâdan
Koyup cânım beni çıkdı aradan

Diğer : Miyân-ı sebzen açıldı goncenin bedeni
Kenâre ‘azm idelüm ortaluk güzellendi

Diğer : Görmedüm mislün meger endîşe ile h`âbda
Yok nazîrün var ise âyîne ile âbda

Duhter-i rez destine hâtem takınmış sanurın
‘Aks-i la’lün her kaçan görsem şarâb-ı nâbda

Diğer : Agarup göz merdümü bî-nûr olupdur giryeden
Sanasın bir mürdedür cismüne sarılmış kefen

Diğer : Gider hevâ ile başlar o la’l-i nâb üzre
Habâblar gibi kim kef geçer şarâb üzre

Ol bülbül-i gülşen ve tûtî-i şeker-şiken **Tûtî vü Zag** nâm bir kitâb-ı sürûr-encâm nazm
itmişdür tevhîd inden bu bir beyt sebt olundu. Beyt:

Kıldı şefkâti o Hayy-i fi’âl
Gerdûn kafesinde tûtî-i âl

NÂMÎ Çelebi: Hamîdî’dür. Mülâzimîn zümresinden efvâhda Ca’fer Çelebi dimekle meşhûr
ve kâffe-i enâm içre hüsn-i i’tikâd ile mezkûr ve sâdıku’l-kavl olmagla makbûl-i tabâyi’-i
nezdik ü dûr ve beyne’l-akrân ‘ulûmda mütâla’âsı hûb ve zümre-i şu’arâ ve zurafâ yanında
sözleri mergûbdur. Bu bir kaç beyt netâyic-i tab’-ı râyicidür zuhûr bulup mestûr olundu.

Beyt:

Kapunda ‘âşika zillet rakîbe hayli ‘izzet var
Bugün zulm itme dünyâda begüm yârın kıyâmet var

Murâdum ölmedin ‘ıyd-ı visâl-i yâre irmekdür
Anunçün künc-i gamda rûze-i hicrâna niyyet var

Diğer : Ne feryâd itdi hicründe dil-i nâlânı anmazsın
Ne kanlar agladı hîç dîde-i giryânı anmazsın

Diğer : Müheyyâ oldı meclis sâkiyâ peymâneler dönsün
Bu bezm-i rûh-bahşun şevkine mestâneler dönsün

Dilâ câm-ı şarâb-ı ‘ışk-ı yârı şöyle nûş it kim
Felekler güm güm itsün başuna hum-hâneler dönsün

NİGÂRÎ: Galatavî’dür. Cedd-i büzürg-vârı Mısır diyârındandır. Şatranc-bâz ‘Abdülkâdir
dimekle meşhûr ve ol fende şöyle üstâd-ı sâhir imiş ki kemâl-i şöhreti ‘Arab u ‘Acem ve
Rûm’da mezkûr imiş. Ana binâen Sultân Mehem- med Hân-ı Gâzî ol ‘ârif-i şantrac-bâzı bî-
ihtiyâr İslambol’a getürmesine ikdâm idüp adam göndermiş. Getürdükde her fûnûnına bin
akçe in’âm eylemişler ve mezbûr ‘Abdülkâdir şatrancun gâibâne oynamasında ziyâde mâhir
ve nat’-ı zemînde esb-i fikri hayli cevelâna kâdir ve fi’l-hâl at salup hasmı mât itmede misli

nâdir ve kendü ihtira'ında üstâd imiş. Ol sebebdan geldükden sonra gâyetde ri'âyet-i küllîye mazhar düşmüşdür. Şatranc 'ilminde nice nice mansûbeler bulup risâleler yazmışdur ve mezkûr Nigârî zurafâ-yı rûzgâr ve şu'arâ-yı nâmdâr mâbeyninde Nakkaş Haydar dimekle ma'rûf ve fûnûn-ı reng-â-reng ile zâtî mevsûfdur. ve nakkaşlık san'âtında âhûlar resminde ve tasvîr yazmada mânend-i Mânî-i çihre-küşâ ve müddet-i medîd ve 'ahd-i ba'iddür ki pâdişâh-ı deryâ-dil Sultân Süleymân-ı 'âdil hazretlerinin re'islerindendir. Defa'ât ile 'azîm gazâlarda ceng-i azmâ ve altun fener ile kapûdân-ı deryâ ve 'ilm-i deryâdan geregi gibi habîr ü dâna ve cezâyir-i buhûra âşinâ olduğu ecilden **Dürer-i Deryâ** nâm bir kitâb-ı garrâ-yı sürûr-encâm nazm-ı âbdâr ile nakş u nigâr itmiş ki seyrinden dîde-i remed-dîdeye ve dil-i gam-dîdeye sürûr ırması mukarrer ve meşhûr-ı bahr ü berr olmuşdur. Letâyif-i şîrîn ve zerâfet-i rengîninden bi'l-küllîye hazz olunur. Şeh-zâde-i cihâniyân a'nî Sultân Selîm Hân'un dergâh-ı âsmân-bârgâhında makbûl ve pesendîde-i erbâb-ı 'ukûl olmuşdur. Bu gazel ile bir nice matla' u beyt anundur sebt olundu Gazel:

Sahn-ı gülzâr-ı cihân bir ulu dergâh ancak
Her konan göçmede bir özge güzergâh ancak

Şu'le-i dîrûd-ı leyle irişür kûyuna cân
Mürşid-i râh ana meş'ale-i âh ancak

Nâ-murâd itse beni çarh-ı sitem-kâr n'ola
Râh-ı maksûd uzak 'ömr ise gütâh ancak

Ta'n iderse n'ola erbâb-ı harâbâta gönül
Zühd ü takvâyı bilür zâhid-i gümrâh ancak

Başuma gün mi togar bu ne sa'âdetdür kim
Togar ay gibi Nigârî gülen ol mâh ancak

ve lehu eyzân:

Lezzetine la'lünün benzetdigiçün dâdını
Başın ezdük şekkerün alduk lebün dâdını

Diğer : Nigârün 'ârızî üzre görinen câ-be-câ hâlî
Degüldür her biri bir kûşede dil almadın hâlî

Diğer : Servden bâlâ-ter olmuş kâmet-i dil-ber bugün
Nâresîdem dahi bir açılmağ gonceydi dün

Diğer : La'l-i lebüm ısırdı diyü girme kanuma
Hiç ola mı Efendi kıyam kendü cânuma

Pâdişâhımızun 'Alî Paşa vezir-i a'zâmı oldukda bu târîh beyti hûb vâkı' olmuşdur budur
Târîh:

Ol ‘Alî’nün Kanberi Haydar didi târîh ana
Âsaf-ı Sultân Süleymân geçdi sadr-ı ‘âlîye [960]

NİSÂRÎ: Sirozî’dür. Kuzât zümresindendir. Tab’-ı dürer-nisârı nazma mâyl ü şâmil olmanın kesb-i fezâyil idüp ser-âmed-i emâsil olmuş. Üç zebânla şi’re kâdir ve her birinde şi’ri vâfir. Cümlesinden biri bu ki Dîvân-ı Hâfız’a nazîre dimişdür ey kâşki hiç bir dilde şi’r dimeye merdüm-i sühendân yanında tabî’at-ı şi’riyyesi gün gibi nice idüğü ‘ıyândur. Bu beyitler ana dâl ve şâhid-makâldür budur ki zikr olundu. Ebyât:

Be kasd-ı katl-i men bîçâre vü dil haste pür- kînest
Müselmânân şefkat kâfir-i zülfeş çi bî-dînest⁴¹⁶

Belâ-yı hatt-ı tu bîmâr-ı gam râ bester-i sincâb
Gam-ı zülfi siyeh dil-haste râ bâlin-i meskenest⁴¹⁷

NÂDİRÎ: Asl-ı pâk-nihâdî a’yân-ı şehr-i Bagdâd’dan ta’dâd olunur ve kendüleri Musul’da perveriş bulup yârân-ı safâ ile seyr ü sefer kılmagla ma’ârif-i dervîşândan bâ-haber ve fûnûn-ı şi’rden behrever olmakdan hâlî olmayup ekser-i şu’arâ-yı rûzgârînün eş’ârına nazîre dimede dilîr ve tevârih bilmede mâhir ve kendü vâdîsinde bî-nazîr kimsedür ve musâhabeti pâk ve kelimât-ı ferah-bahş u ferahnâk ve tarz-ı kıssada mânend-i la’lin-kabâ sâhib-edâdur. Bu bir nîce beyt anlarundur sebt olundu. Şi’r:

Sürmeyen âb-sıfât yirlere kûyunda yüzün
Ka’be hakkı sanemâ lâyı-ı dîdâr olmaz

Diğer : Hayâl-i mû-miyânunla tenüm hod mûya dönmişdür
Cemâlin ol perî-rû bilsem ey dil kim neden saklar

Diğer : Âteş bıraktı âhum nüh tâk-ı âsmâne
Korkum budur ki yana nâgeh bu kâr-hâne

ve lehu eyzan :

Olaldan Hak bilür ol serv-i gül-ruhsârdan mahrûm
Agardı çeşmüm oldum dîde vü dîdârdan mahrûm

ve lehu eyzan :

Lâle sanma ki sabâ hattuna öykündüğüçün
Darb-ı silleye yüzün kana boyadı çemenün

NÂTIKÎ: Musul’dan egerçi erbâb-ı sanâyi’ dendür lâkin evkâtın zâyî itmeyüp okıyup yazmadan merd-i kâyil ve zebân-ı Fürs’ü ‘Arab’dan kâm hâsıl idüp tekye-gâh-ı cihânda hem-dem-i dervîşân-ı dil-rîş ve hankâh-ı zamânda mahrem-i sûfiyân-ı sâf-kîş olup peyrev-i meşâyih-i ‘ızâm ve perverde-i fuzalâ-yı ferhunde kelâmdur. Esrâr-ı güftâr-ı evliyâ ile ‘ârif-i

⁴¹⁶ -Ben bîçâre ve gönlü yaralının katli için kinle doludur; ey müslümanlar şefkat edin onun kafir zülfi ne dinsizdir.

⁴¹⁷ Senin ayva tüylerinin belası gam hastası için gece yatağıdır. Siyah saçının gamı gönlü kırıklar için meskendir.

billah ve ma'lûmât-ı hakikat-nümûn ile fazl-ı Yezdânî'den âgâh olmak ârzûsıyla râh-ı şerî'âtde mu'în-i nefsiye refik ve turuk-ı hakikatde nutk-ı silsile-i siddîkdur. Ol dürr-i deryâ-yı fazla mâlik olan tevfiğ ile iletüp pesend-i ahrâr ve makbûl-i ebrâr olmuştur. Ebyât-ı hakikat-nümâsı yârân-ı mutasavvıf yanında mevsûfdur ve kelimât-ı sadakât-fezâsı musaddıkân-ı devrân önünde ma'rûfdur. Kendü vâdîsinde gazeliyyât-ı pür-nikât ile cihângîr ve terci' u tahmis ü müseddes ile lâ-nazîrdür. Bu gazel anlarundur.

Sirişkûn nakdin ey çeşmüm o sîm-endâme ter göster
Kef-i pâyne 'arz it mâcerâyı bir hüner göster

Hemîşe sîne sûzân ol dilâ nâr-ı mahabbetden
Hayâl-i yâre karşı çık şeb-i gamda fener göster
İrürse hançer-i müjgânı bî-bâk ol kaşı rânun
Er ol meydân-ı 'ışk içre siper tutma ciger göster

Kemend-i zûlf-i yâri tut mahabbet bahrine gavs it
Ne denli huşk-i leb olsan sadeğ gibi güher göster

Erbâb-ı nâzdan sermestdür ol gözleri âhû
.....ür sînede ey dil kebâb ol mâhazâr göster

'Adem eyle vücûdun Nâtıkî fikr-i dehân ile
Bu esrâr-ı nihândan gayre sakın bir eser göster

NÂMÎ: İstanbul'dandır. Edirne kâdîsı olan Kâmî Efendi'nün dânişmendidir. Ma'ârif-i cüz'î ve küllî ile ârâste vü pîrâste ve tabî'at-ı şî'riyyesi hûb ve ser-â-ser eş'arı mergûb ve şu'arâ-yı nâm-âver gibi hünerver ve nâm-ı nîk ile makbûl-i merdüm-i suhen-güster kimesnedür. Bu bir iki beyt anundur Nazm:

Âyîne-veş cemâlüne kılsam n'ola nazar
Gelmez Efendi 'âşıkâ dîdârdan zarar

Diğer : Sanma kim su içre 'aks-i mâh-ı nev ey âftâb
Hasret-i ebrûlarınla hançere düşmüşdür âb

Diğer : Geldi diyâr-ı Rûm'a görem diyü zülfünü
Aradı cümle şehri pir sokunı sokunı

NIHÂNÎ: Edirnevî'dür. 'Ubeydî Efendi'nün tilmiz-i dil-pesendidür. Gülşen-i ma'ârifün nihâl-i ser-bülendi ve bahâristân-ı 'ömrün tâze vü ter nahl-i ercmeni ve gülbin-i gülistân-ı ma'ânî ve şekeristân-ı edânun tûtfi-i şîrîn-zebânı ve sûz ü güdâz ile memâlik-i eş'arun Husrev-i zamânıdır. ve nazm-ı dürrer-bârı ve güftâr-ı âbdârı 'Ubeydî Çelebi himmetiyle selîs ü hemvâr ve bî-hadd ü bî-şümâr olmanın vird-i zebân-ı 'âşıkân-ı zâr ve zikr-i gül-'ızârân-ı rûzgâr olmuştur. Cümlesinden bu gazel-i pür-mesel ki vasf-ı cemâl-i mâh-rûyân-ı her-câyî ve hasb-i hâl-i 'âşıkân-ı şeydâyîdür. El-hak zamâne dil-berlerinün etvâr-ı nâ-hemvârına mutâbık u muvâfıkdur budur. Gazel:

Sevme şehri güzeli ger meh-i tâbân ise de
Virme hercâyiye dil mihr-i dırahşân ise de

Sana serkeşlik idüp gayrıye mâyl olanun
Geç hevâsından eger serv-i hırâmân ise de

Hâr ile hemdem olup bagrunı pür-hûn idenün
Gel e bakma yüzine bir gül-i handân ise de

Seni haste idüp el derdine tîmâr idene
Mübtelâ olma sakın âfet-i devrân ise de

Ey Nihânî dahi her cem'i münevver kılanun
Olma pervânesi ger şem'-i gülistân ise de

Bu bir kaç beyt-i âteş-bâr-ı âbdâr ki erbâb-ı 'ışkun sûz-ı nihânın âşikâr ve râz-ı derûnun okundukda târümâr itmeden hâlî degül ketb olundu. Matla':

Gördi 'abîr dûd-ı âhum agladı yâran bana
Seyr idüp sebîl-i sirişküm acıdı 'umman bana

Diğer : 'Arsa-i çeşümü kılun ko yaşum seyl-i pür-âb
Ta karar idemeye anda begüm 'asker-i h'âb

Diğer : Hâlün oldıysa gussadan düşvâr
Mey-i nâbun ayagina düş var

Diğer : 'Âşikun gönline 'ışkun odı mihmân olmuş
Anuniçün güzelüm yüregi biryân olmuş

Diğer : Eger agyârı satup kurtulur ise ol şâh
Varayın meclisüne didi selâmet olsun

Diğer : Atılan sanma şehâb âh-ı derûnum ey mâhi
Berk-i kâhini yile virdi felek hırmeninün

NAZMÎ Beg: Edirnevî. Sipâhi oğlanı tâifesinden idi. Fünûn-ı şî'rde üstâd ve hemîşe aksâm-ı nazm dimege mu'tâd nazm-ı belâgat-meşhûn ile şâkird-i Nizâmî ve 'işret-gâh-ı fasâhatde bende-i Câmî geçinür ve diyâr-ı Rûm'da sâhib-**Cami'ü'n-nezâyir** dimekle mülakkâb zîrâ ki şu'arâ-yı mütekaddimîn ü müteahhirînün bir birine nazîre vâkı' olan gazellerin cem' idüp ve kendü dahi her birine birer ve ikişer gazel-i bî-nazîr nazîre dimişdür. El-hak ol pîr-i deryâ-dil envâ'-ı nazma mâyl ve gazeliy- yât-ı âbdârı hasb-i hâl-i dil-i zâr diyü yigirmi dört 'adet dîvân rakam itmişdür. ve kasâyid ü tevârihi bî-hadd ü bî-şumâr ve her birinün vücûdı mânend-i 'adem zîrâ ki şütür-kürbe vâkı' olmuşdur. Hadd-ı zâtında makbûl-i hâs u 'âm olup şöhet-i tâm bulmamışdur. Bu bir kaç matla' u beyt anun eş'ârının hûb u mergûbıdur. Ebyât bu evrâkda sebt olundu.

Tutalum câm-ı dil anlar leb-i dil-ber yirine
Cânı kim anlaya ol rûh-ı musavver yirine

Dilde seyr eyleyeyin diler isen hançerüne
Dilemezsen sanemâ tîrûni gönder yirine

Diğer : Dehenünden gelen nahl-ı cânâ
‘İsî’den bir hitâbdur gûyâ

NEVÂLÎ-İ İSTANBÛLÎ: Dânişmend tâifesindendir. Rûz u şeb tahsîl-i ma’ârif ve esnâf-ı şî’re vâkıf olmak ârzûsı ile cidd ü cehd itmeden hâlî degüldür. Ümmîddür ki yârân içre meşhûr ve zihn-i pâkinün zekâsı pesend-i cumhûr ola. Bu bir iki matla’-ı dil-sûz ol şâ’ir-i gam-endûzundur sebt olundu budur. Nazm:

Vücûdum bir vefâsız dil-rübâ yolunda hâk itdüm
Dirîgâ kadrüm idrâk itmedüm kendüm helâk itdüm

Diğer : Bahr-ı eşkümde benüm ey âftâb-ı dil-berân
Dürr-i encümle tolu olmuş sadefdür bu cihân

NÂLİŞÎ: İstanbullı. Sâbıkan lisân-ı ‘Arab’a cüz’î ve zebân-ı ‘Acem’e küllî mümâreset idüp bir mikdâr hatt-ı nesta’lîkî meşk kılup peyveste-i silsile-i erbâb-ı ‘ışk olmagın ‘azm-i hankâh-ı Hazret-i Şeyh İbrâhim kuddise sirruhu itmiş. Müsâfirân-ı zamân gibi gûşe-be-gûşe derbeder düşüp âhir ol âsitân-ı kuds-âşiyânede bir nice müddet mücâvir olmuşdur. Hadd-ı zâtında dervîş-nihâd ve devr-i rûzgârda nâ-murâd kimesnedür. Ber-muktezâ-yı mahlas ol rind-i cihân ve bî-kayd-ı zamân ‘âşık-pîşe dem-be-dem sitem-ger-i cevânân bahr ile feryâd u nâlişe hem-nefes ve etvâr-ı ‘acîbe ve evzâ’-ı garîbe ile makbûl-i herkes ve hâlâ her an erbâb-ı ma’ârifetle sohbet itmededür. Tabî’at-ı şî’riyyesi gerçi nîkdür feemmâ musâhabeti gâlib-i şî’riyye ve erbâb-ı lehv ü la’b sohbetine râğıbdur. Bu bir iki matla’-ı âteş-bâr anundur. Şî’r:

Gör ne sihr ile yakar cismimi ol sîm-tenüm
Geh turur pirehenüm yandı ser-â-ser bedenüm

ve lehu: Serdâr-ı dehr milket-i ‘ışkun esîriyüz
Önünde can viren kulunun biz de biriyüz

Mezkûrun bir gözi kör ve birisi nûr-ı basardan dûr ve birinde çendân fer’ ile nûr olmamagın bir gün bir mikdâr çürük baklayı satun alup dest-mâle koyup rast geldüğü yârâne körâne teklif kılurken bu bende dahi yolda ihsâs idüp teklif kılurken su’âll itdüm ki bu baklayı kim satun aldı didi ben aldum ‘ale’l-fevr didüm bî-kusûr dimişlerdür ki çürük baklanun kör alıcısı vardur. Bu latîfeden gedâ-tab’ olmagın rencîde olmuşlardur.

NÂZÜKÎ: İstanbul kurbünde Yenihisâr’dan ‘İşretî’nün birâderidür. Tabî’at-ı şî’riyyesi pür-zîver ve eş’âr-ı nâzükî pesend-i cumhûrdur. Hadd-ı zâtında bu deyr-i kuhen içre da’imâ

musâhabeti nâzûk-edâ ile safâ-bahş ve kelimât-ı mestânesi bâde-i nâb gibi bî-gıışş ü dilkeş düşmüşdür. Cümlesinden bu gazel sebt olundu. Gazel:

Kanuma girmesün meded ol bî-amân tutun
Baglan yanında eylemesün tîgı kan tutun

İtse kıyâm gitmege kopar kıyâmet âh
Hey gitmesün o fîtn-e-i âhir zamân tutun

Yârün harîm-i kûyunı gülzâr-ı can bilün
Dil bülbüline işigini âşîyan tutun

Bir câme tâc ü hırkaya çeker yine zâhid
Lâyık görürse almaga pîr-i mugan tutun

Oldı gam-ı firâk ile bîmâr Nâzûkî
Ta ki düşer ölür meded ol nâtüvan tutun

NUSRETÎ: ‘Acem’dür. Müddet-i medîddür ki dârü’s-selâm-ı Bagdâd’da ikâmet-bünyâdın salmışdur. Bu matla’-ı şîrîn sâhibi

Musavvir er bekeşed nakş-ı ân büt-i çîn râ
Tevân-ı sûret-i u dâd cân-ı şîrîn râ ⁴¹⁸

Mevlânâ Zârî-i Şîrâzî’nün hemşîre-zâdesidür. Egerçi sâ’ir şu’arâ gibi sevâddan behresi yok lâkin hâtırında eş’âr-ı şu’arâ-yı zamâne çokdur. Zîrâ ki rûz u şeb yârân-ı safâ ile ihtilât idüp ebyâtına irtibât virmeden degül hâlî ve cümleten eş’ârı hasb-i hâlidür. Müdâm ol merd-i ‘âşık-pîşe vü nîk-endîşe ‘ışk-ı cevânân ile dil-rîş ve sevdâ-yı perî-rûyân ile hûb-kîşdür. Bu bir iki matla’ u beyt anlarundur.

Tâ dil berişte-i zülf-i tu beste îm
Târ-ı ta’alluk ez heme ‘âlem guseste îm ⁴¹⁹

Çünân der âsmân pîçide dûd-ı âh-ı men ez gam
Ki dâred rûz ü şeb der çarh-ı ân fânûs-ı gerdûn râ ⁴²⁰

Eger bendem dehân çun Nusretî ez nâle vü efgân
Çisâzem çâre-i sûz-ı derûn ü çeşm-i pür-hûn râ ⁴²¹

⁴¹⁸ -O çinli putun (güzelin) nakşını ressam çizerse, onun suretinin gücü ona tatlı can verdi.

⁴¹⁹ Senin saçına gönlümüzü bağladığımızdan beri bütün âlemden alakayı kestik.

⁴²⁰ Benim ahımın dumanı gamdan dolayı gökyüzüne öyle kıvrıldı ki gece ve gündüz feleğin fanusunun etrafında dönüp durmaktadır.

⁴²¹ Nusretî gibi ağlayıp figan etmeye ağzımı kapatırsam içimin yanışına ve kan dolu gözüme nasıl çâre bulurum.

Fî harfî'l-vav

VÂLİHÎ-İ Üskübî: Zümre-i mülâzimîndendir. Ahmed Çelebi demekle mezkûr ve kemâl-i ma'rifetle gün gibi 'âlemde meşhûr ve hadd-ı zâtında suhen-dân-ı 'ârif ve mecmu'-ı ma'ârif kimsedür ve ser-â-ser gazeliyyâtı pür-mesel ü hoş -âyende ve hûb ü rengîn ve manzûmâtı muhayyel ü musanna' ve mergûb ü şîrîn ve ma'lûmât-ı bî-nazîr ile şâ'ir-i metîn hemîşe tab'-ı şerîfi edâ semtine sâlik ve ol vâdîde hayli nâzûk elfâzla ma'ânî-i hassa mâlik râkım-ı hurûf Edirne ve İstanbul'da müddet-i medîd ve 'ahd-i ba'îd hıdmetleriyle müşerref olmuşlardır ve ebyât-ı gün-â-gün mânend-i dürr-i meknûnların tettebbu' idüp der-gûş-ı hûş itmişdür. El-hak mazmûn-ı belâgat-nümûnı misâl-i hümayûn huceste vü meymûn vâkı' olmuşdur. Cümlesinden bir iki gazel-i bî-bedel mâsadak-ı hâl ve şâhid-makâl diyü ol vâlih-i cevânân-ı sâhib-cemâlündür sebt olundu. Gazel:

Gözüm pür-nem dil-i sad-pâre mihnet pâymâlidür
Beni fîrkat deminde â cemâli aglamalıdur

Dokunmaz dost um öz onmaduk başına dermânı
Ne çâre zahm-ı dil bir agzı açık bağlamalıdur

Şerâr-ı nâr-ı âha sâk-ı 'arşı yakdıran yir yir
O mâhun gerden-i sîmîni üzre saçma hâlidür

Sana dil kıssa-i Mecnûn'ı takrîr eyledi sanma
Nezâketle begüm 'arz itdi kendü hasb-i hâlidür

Dolaşırsa eger kim Vâlihî zencîr-i zülfünle
Sen ana kılma bir dîvâne meşreb-i laubâlidür

ve lehu eyzan:

Dil-i 'âşık diyâr-ı gamda hicr-i derd ü fûrkatdûr
Degüldür üstühân-ı sîne emvâc-ı mahabbetdûr

Degül beyzâ ser-i Mecnûn'da yir yir âşiyân içre
Zamâne başına yagdurduğı seng-i melâmetdûr

Gubâr idüp tenüm râh-ı melâmetde belâ vü gam
Anı ber-bâd iderse rûzgâr ol bana rif'âtdür

Çeküp sahbâ-yı şebnem bâgda zerrîn kadehlerden
Gezer mestâne hurşîd-i felek pür-şevk ü hâletdûr

Tabîbüm Vâlihî çokdan sefer iderdi kûyundan
Tutan ol hasteyi ammâ teb-i mihr ü mahabbetdûr

li-mü'ellîfihi Eyzâni'l cevâb

Sakın Mecnûn'ı sanman merd-i meydân-ı mahabbetdûr
O bir 'avret zebûnı olmuş erlik ana töhmetdûr

Dehânun eylemiş bir harf ile ‘uşşâkunı teshîr
Mahabbet-nâmesinde var ise mîm-i meveddetdür

Bizümle haşre râzı olmayup gitdi yine ol büt
Gelür turmaz ‘azâb eyler gören dir bu kıyâmetdür

Görüp göz merdümünde dâne-i eşküm gam-ı ‘ışkun
Dil-i virânuma mihmân olan sanur ‘imâretdür

Kef-i pâyun koyup ‘Ahdî baş egmez tâc-ı Dârâ’ya
Na’lçen şekli Sultânun başumda dâl-i devletdür

Bu bir nice matla’-ı rindâne ol şâ’ir-i yegânenündür sebt olundu. Şi’r:

‘Âlemin gördüm bu gün câm-ı şarâbın sâkiyâ
Ger ana dirsem n’ola âyîne-i ‘âlem-nümâ

Diğer : Virmeyelden tûtiyâ-yı hâk-i pâyinden habîb
Aglayı aglayı bir kalmış durur çeşm-i rakîb

Diğer : ‘Arz iderken dile mir’ât-ı cemâlin dil-ber
Ger sanursa leb-i câmını safâ-yı diğer

Diğer : Gark-ı seyl-âb-ı belâ bir ‘âşık-ı gam-ı dîdedür
Semtden hâriç degül Mecnûn kûye vâdîdedür

Diğer : Vir nice jâle-i peyâmın dehân-ı cânânun
Su sepdi yüregine gonce-i gülsitânun

Diğer : İşiginde yaturdum açdı pâyin çıkdı ol meh-rû
Didi bir ferde açılmadı sana açılan kapu

Diğer : Ger bana mektûb-ı dür-bârın gelirse ey nigâr
Gonca-i zambak gibi başumda anun yiri var

Eyzan li-mü’ellifihi fi’l-cevâb:

Ger bana gam taşını yagdursan ey gül-i jâle
Gül gibi her birisinün başum üzre yiri var

Bu beyitler anundur

Nice bulsun safâ mir’ât-ı dil kim
Gubârı eksük olmaz rûzgârın

Diğer : Nâm-dâr olsa ‘aceb midür muhayyel sözlerün
Vâlihî ancak mu’ammânun hemân bir adı var

Diğer : Vâlihî’ye âteş-i âh-ı ‘adû itmez zarâr
Ahmed’e te’sir ider mi hiç nâr-ı Bû Leheb

Diğer : Olup sârî sakar yanından eksük olmadı mârun
‘Acebdür Vâlihî firça süzülmezse eger altun

Diğer : Egerçi şâ’ir-i nâzûk çok ammâ Vâlihî’nün de
Letâfetden iğen hâriç degüldür tarz-ı eş’ârı

VÂLİHÎ-İ Edirnevî: Kurd-zâde demekle meşhûr ve pîşe-zâr-ı ma’ârifde şîr-i jiyân gibi dilîr mezkûr ‘ilm-i zâhire rûz u şeb iştigâl gösterirken bende-i tâlib-i vecd ü hâl olup tasfiye-i bâtın-ı pür-me’âl ârzûsıyla müsâfir-i bahr ü berr ve mücâvir-i hankâh-ı meşâyih-i mürîd-perver olup her birinün hıdmetinden fûnûn-ı ‘ulûmı tahsîl ve rûmûz-ı **Mesnevî**’yi Mevlânâ-yı Rûmî’den tekmîl itmiş ve nice müddet şehr-i mezbûrda vâ’iz-i huçeste-kelâm ve nesâyih-i havâs u ‘avâm itmekle mev’izede benâm olmuştur. Feemmâ hoş-tab’ u rind-i lâubâli hûb-rûyân-ı cihânun vâlih-i cemâlidür. Kuvvet-i şî’riyyesi hûb ve tasavvuf-ı eş’ârı çok ve zebân-ı Fârisî’de ebyât-ı mahabbet-engîzine hiç söz yok. Ehli yanında mergûb vâkı’ olmuştur. Bu beyt ü matla’ anundur. Ebyât :

İncinür bana güzeller disem ol şeh yegdür
İncinürlerse dahi gam yemen Allah yekdür

Diğer : Olmadan kâlib-ı cisme dahi bu rûh-ı revân
La’l-i cân-bahşunı idinmiş idüm rûh-ı revân

Diğer : Kanlar saçılup penbesine dâgımun ey gül
Bu kâse-i ser toptolıdır saçma karanfûl

Diğer : Marîz-i ‘ışkunam dermân bana sen şâha kalmışdur
Yetiş kim derd-i hicrûnle işüm Allâh’a kalmışdur

Diğer : Merdân-ı ‘ışk içinde olunmaz o kimse ‘add
Kâyide bikirrî ulâ bâlin-nişin cûyed⁴²²

VAHDETÎ: Bi’l-asl Bosna sancagında Yenibâzâr’dandur. Evân-ı ‘âlem-i fânîde ve ‘unfuân-ı cevânîde ‘ulemâ-yı dehrün mütecerr-i hıredmendi olan merhûm Fevrî Efendi’ye dânişmend-i dil-pesend ve Fârisîdânlar içinde bî-mânend ve tab’-ı dil-küşâsı nazma mâyil ve lisân-ı sihr-nümâsı kâbil olup semt-i kitâbete kefi deryâ-müessiri câri ve lisân-ı nükte-güzârı selîs olmagla ümerâ-yı zamâna kâtib-i dîvân ve erkân u a’yân içre nümâyân olmuşlar. Âhir bir tarîk ile kûşe-i vahdet ârzûsıyla terk-i huzûzât-ı dehr-i fânî idüp dervîşlik yolundan râh-ı fazl-ı Yezdânî’ye sâlik ve fasl-ı dil-küşâ-yı câvidânîye mâlikdür. Ehl-i da’vet içre vâhid ve kendü vâdîsinde mezîd olmuş sene sitte ve semânîn ve tis’â mi’ede Bürç-i Evliyâ’ya gelüp ziyâret-i eimme-i kirâm kılup züvvâr-ı vâlî-i ‘âlî-makâm içre benâm olmuşlar. Âhir hevâ-yı Hicâz ile Basra’ya varup makâm tutmuş ve şehr-i mezbûrda paşa olan Mehmed Paşa’ya dîvân kâtibi olmuşlar ve mezkûr paşa ile yine meyl-i diyâr-ı Rûm idüp gitmişler. Tabî’at-ı şî’riyyesi

⁴²² -Bakire kıza yanaşmak ve yastığa oturmak ister.

dervîşân arasında rûşen ve zihn-i pâki şu'arâ-yı zamân yanında mübeyyendür. Bu gazel ile bir nice beyt anlarundur. [Gazel] :

Bâg-ı 'âlemde şehâ sensüz olur mı 'âlem
Rûh olmasa kurı kalıb olurdu âdem

Hîç engüşt-i tahayyür deheninden gitmez
Mihr-i la'lün görelî ey sözi güher hâtem

Ravza-i hüsnün ile çeşme-i la'lün var iken
Yire geçsün kim ölüp âb-ı Hızır-ı bâg-ı İrem

Serv-i Mecnûn ideli kaddün eyâ Leylî hıram
Âşiyân idi anun başına murgân-ı harem

Ehl-i fazlun ayagı topragıyuz Vahdeti'yâ
Tarz-ı şî'rü n'ola Bâkî'den olursa muhkem

Diğer : Eşk-i çeşmüm sana çok dürr-i güher gösterdi
Mâcerâsı hele bin derd ile ter gösterdi

VÂLİHÎ-İ Bagdâdî: Zümre-i erbâb-ı kalem ve hem-nişin-i ashâb-ı kerem tâifesindendi. Rûz u şeb mülâzemet-i erbâb-ı ma'rifet itmekle tahsîl-i 'ulûmı nefsanî ve tûtî-i şeker-sitân-ı ma'ânî olmuş. El-hak ol yâr-ı mahabbet-endûz 'ale'd-devâm 'ışk-ı perî-rûyân-ı zamâneye şöhret-i tâm bulup vâlih ü hayrân ve suhte-i dâg-ı lâle-'ızârân idi. ve inşâ ile mu'ammâdan habîr ve âdâb-ı musâhabetde bî-nazîr ve Türkî ve Fârisî'de eş'ârı pâk ve her biri vasf-ı hâl-i 'âşıkân-ı sûznâk vâkı' olmuşdur. Cümlesinden bu matla' behredür diyü ve anundur dinilüp sebt olundu. Şî'r

Leb-i can-bahşunı sordum ki yarar eme seme
Nüktedanlar didiler çâre budur def'-i gama

VAHDETÎ: İstanbulî'dür. Babası pâdişâhun bende-i makbûllerinden ve kendü sipâhi oğlanı bölüğünde iken hâliyâ vilâyet-i Yemen'de bölük agası olmak ârzûsıyla ol diyâra 'azm ve niyyet-i cezm itmiş. Ümmîddür ki menzil-i maksûdına yite. Mezkûr sâbıkan yârân-ı safâdan ve ihvân-ı vefâdan kûşe-i vahdet ve künc-i kanâ'at ihtiyâr idüp rûz u şeb okıyup yazmak semtine heves kılup Zarîfî Hasan Efendi'nün hankâhında mücâvir olup her bir hıdmetini cân u dilden edâsına ragbet gösterüp hâzır bulunup tarîk-i Halvetî'ye sâlık ve mülâzemet-i erbâb-ı sülûk itmekle fûnûna mâlik olmuş. Zebân-ı Fârisî ve 'Arabî 'ulûma ve 'ilm-i hey'et ü nücûma vâkıf ve pesend-i ehl-i ma'ârif kimsedür. Tabi'at-ı şî'riyyesi revân ve eş'ârı hasb-i hâl-i dil-i nâtüvân vâkı' olmuşdur. Şî'r

Hâlûme nisbet ile cümleten erbâb-ı kubûr
Arkası üzre yatur her birisi ehl-i huzûr

Diğer : Desti yegdür dime sürâhîden

Vahdetî şâyed incine şîşe

VEZNÎ: İznîkî'dür. Her an aksâm-ı nazmun fûnûnına müdâvemet ve taklîd-i ma'rifet kılup zû-fûnûn olmak üzredür. Aslında şûh-tab' u hoş -sohbet esnâ-yı musâhabetde etvâr-ı 'acîbe ve evzâ'-ı garîbesindenbi'l-küllîye hazz olunur. Zîrâ ki güftârı gün-â-gûn ile zümre-i rûzgâr ve nedîm-i şîrîn-kâr ve vezn-i eş'âr-ı dürer-bârı temâm 'ayâr ve bî-hadd ü bî-şümâr ve ma'ânî-i garîbesi gerçi çokdur. Bu beyitden özge eyüsi yokdur. El-hak bu matla'-ı bî-nazîr gâyetde dil-pezîrdür şöyle ki mütâla'asından dîde-i gamgîn dûrbîne nûr dil-i gamgin-i hazîne sürûr ırması mukarrerdür. Beyt:

Cilâ vir çeşm-i câne hâk-i pâ-yi dil-rübâ ile
Sakın kehhâller gözün boyarlar tûtîyâ ile

VECDÎ: Tire'dendür. Hâk-zâde dimekle ma'rûf dânişmend zümresinden mevsûf olan yârândur Dem-â-dem tahsîl-i kemâl idüp mâyl-i ashâb-ı vecd-i hâl olup vâdî-i nazma cân u dilden tâlib ü râgıb olmanın her an tettebbu'-ı tedîvân-i erbâb-ı 'ulûmı kütüb-i Fârisî ve Rûmî ol yâr-ı nîkû-hisâl cüst u cû itmeden hâlî olmayup fikri akrân mâbeyninde pesendîde-i pîr ü cevân ve eş'âr-ı dürer-bârı der-gûş-ı 'âşîkân olmaga sezâ-vârdur ve gül gibi âbdârdur şî'ri budur. Bu ebyât cümleden sebt olundu. Beyt:

Vasf-ı ruhsârunda gül mecmu'a-ı zer-kârdur
Leblerün medhinde her bir gonce bir tomardur

Diğer : Seg-i kûyuna sifâli içün olaydı me'mûr
Üstühân-ı serüni kâse ideydi fagfûr

Diğer : Şöyle gâlibdür dilâ za'fî bu cism-i lâ-gârun
Üstine düşseydi mahv olmaz hayâl-i sagârun

Diğer : Aldı gönlün gülşen-i hüsnün gül-i ra'nâları
Kime feryâd eylesünler bülbül-i şeydâları

Diğer : Kondı bir serv-i ser-efrâze gönül şehbâzı
Görünüz nîce bülend eyledi ol pervâzı

Diğer : Can çekişme eger ol hûnî seni kılrsa helâk
Yâre bir câne nedür çık bu kadar 'arbedeler

Mezkûr Vecdî evâil-i hâlinde Vecdî tahallüs itmişler sonra o ma'nâdan şehbâz-ı tab'ı pervâz idüp ve nâmı dahi 'Abdülkerîm olmak münâsebetiyle ve esmânun müsemmasından tesir olup kirâmdan olmak arzûsıyla sahîfe-i rûzgârda nâmum Nâmî olsun diyü Kirâmî tahallus itmişdür. Hâliyâ Kirâmî tahallusı ile mezkûr olur.

Vecdî'yâ şol denlü gâlibdür tenümde za'f kim
Üstime bir pîşe konsa sanurum bil duman

VASLÎ Efendi: Sofyevî-i mu'arîfdür. Rûz u şeb 'ilme müdâvemet gösterüp ta'rifden müberrâ ve tavsîfden mu'arrâdur. Zîrâ ki kemâl ehlinün kademine yüz sürüp kesb-i ma'rifet itmişdür. Ol yâr-ı nîk-nâm 'ale'd-devâm sîm-endâm dil-berlerün hayâl-i hâmiyle serây-ı visâllerine vüsûl ve hıdmetlerine ırmege yol bulmak ârzûsında ümmîddür ki her birinden maksûd olan ma'hûdına irişüp vâsilînden ve ma'ârifinden ola. Kuvvet-i şî'riyyesi Fârisî dilinde pezir-i hûb ve Türkîde mergûbdur. Bu bir kaç matla' u beyt anundur sebt olundu. Şî'r:

Nice teşbîh ideyin kend'özüme mâh-ı nevi
Za'fuman kuvveti var kuvvetimün za'fı kavî

Diğer : Ruh-ı âlündeki humret güneş üstinde şafak
Ya mekr-i âteş-i ruhsârunun olsa 'alevî

Diğer : Vaslî-i sûhte-dil 'izzünü maksûd idinür
Okıyup ruhlarının şevkine mıs bâh sanur

Bu kıt'a dahi anundur. ve lehu Kıt'a:

Telef kılma be-gâyet sakla malı
Ki zîrâ mâli gâyet saklamalı

Kemâl ü fazl olupdur gerçi matlûb
Kemâlün dahi mâl oldu me'âlî

VUSLATÎ-i Sofyevî: Tâlib-i 'ilm ve bende-i ashâb-ı hilm ve ol bülbül-i gülşen-i cân vuslat-ı gonce-dehânân-ı zamân ile hemîşe 'ayş u huzûr ile şâd ü handân ve çâker-i kemîne-i erbâb-ı 'irfân kimesnedür. Tabî'at-ı nazmiyyesi pür-ziver ve eş'âr-ı dürer-bârı pesend-i gûş-ı cumhûrdur. Bu bir kaç matla' u beyt-i âbdâr teskîn-bahş-ı dil-i zâr anun güftârındandır sebt olundu Şî'r

Gülzâr nedür eyle ruh-ı yârı temâşâ
Hem câna safâlar vire hem yârı temâşâ

Nazîre li-mü'ellifihi el-cevâb

Seyrümde dün itdüm gül ü gülzârı temâşâ
Kûyunda idem gibi bugün yârı temâşâ

Diğer : Dilâ peykân-ı hicründen yürek kim gark-ı hûn olmuş
Dehân-ı goncesi fikrine varup ser-nîgûn olmuş

VİSÂLÎ Çelebi: İstanbullı'dur. Çok zamândur ki semere-i şecere-i cevânî ve şecere-i semere-i 'unfûvani a'nî dürr-i deryâ-yı ma'ânî ve lâıyk-ı gûş-vâre-i taht-ı Sultâniye sezâ-vâr ve erzânî olanh-zâde-i zamân Sultân Selîm Hân hazretlerinün dergâh-ı keyvân ve âsitân-ı âsmân-mekânlarında hem-nişîn-i erbâb-ı ma'ârif ve hemdem-i ashâb-ı etâyîfdür. Anunçün müşârünileyh şeh-zâdenün nazar-ı kimyâ-eserlerine mazhar düşüp ol bâbda akrân içre rû-şinâs ve pesendîde-i enâs olmuşdur. ve bi't-tab' aksâm-ı nazma mâyil ve tarz-ı kasîde vü

gazelde pesend-i ehl-i dil olmanın zebân-ı Fûrs'ün durûb-ı emsâl zabtına cidd ü cehd kılup geregin gibi edâsına kâdir geçinür. Eş'ârı her dilde vâfir. Bes bu gazel ve bir matla' anundur. Gazel:

Bir menzil alsa tîr-i murâdum nişâned
Olsam halâs cevri-i kemân-ı zamâned

Tahsîn-i şâhbâz-ı hümâ-âşiyâne kim
Rûhânîdür gıdası degül âb u dâned

Ser-pâ bürehne 'âşık-ı âbdâl olup sana
'Üryan dâg-ı 'ışkun ile dogdum anadan
'Ankâ-yı çarh-ı beyza-yı mâh ile dogmadan
Murg-ı dili uçurmuş idüm âşiyâned

Tîr-i cefâyı bagrına mızmar çeküp dimiş
Çekmek Visâlî adımızı yâr yâned

Diğer : Şemşîr-i 'ışk-ı yâre sînen sîne-çâkiyüm
Bir kâmeti kıyâmet efendi helâkiyüm

Bu bir nice beyt anların bir Fârisî kasîdesindendir kendü i'tikâdıyla yazılmışdır ta ma'lûm ola. ve lehu eyzan fî nazmi'l-Fârisî:

Fikr-i şâ'ir gülşen ü her şî'r-i rengîn gulist
Bûlbûlân-ı 'ışk-ı turâ ez her gül-i u sad enîn ⁴²³

Kıssa-i şakku'l-kamer porsîdîm ez Ahmed be-h'âb
Kerd işâret sû-yı ebrû-yı tu hayru'l-murselîn ⁴²⁴

Şî'r-i mevzûn siyeh çerde nigârest hâldâr
Cilvegâheş meclisî mahbûb-ı rabbu'l-'âlemîn ⁴²⁵

VÂHÎ-İ İSTANBÛLÎ: Cüzî ve küllî tahsîl-i ma'rifet ve tekmîl-i haysiyyet itmek üzre iken 'ışk-ı cevânân-ı âteşîn-ruhsâr ile âh u vâha hem-nefes ü hemdem ü mahrem olup 'ışk ile perîşân-rûzgâr olmadın âhir 'avn-i İlâhî ve mu'avenet-i takdîr-i nâ-mütenâhi irişüp sâhib-sa'âdetlerin nazar-ı kimyâ eserlerine mazhar düşüp evkâf-ı müteferrika tevliyyetine mahall ü sezâ-vâr olmuş. Hâliyâ şehr-i mezbûrda cem'iyet-i hâtır ile zindegâni ve 'ayş ü 'işretle rûzgârın kâmrânıdır. Kuvvet-i şî'riyyesi hûb u pür-zîver ve bu bir iki beyt ki vâsf-ı dil-berân-ı şehr-aşûbdur sebt olundu. Nazm:

⁴²³ -Şâirin fikri gül bahçesi, her şîir renkli bir güldür. Senin aşkının bûlbüllerinin onun her gülünden yüz inlemesi vardır.

⁴²⁴ -Rüyada Ahmed'den ayın ikiye bölünüş hikayesini sorduk. Peygamberlerin en hayırlısı senin kaşına doğru işâret etti.

⁴²⁵ -Vezinli şîir, benli esmer bir güzeldir; onun cilvegâhı, âlemlerin Rabbinin sevdiği bir meclistir.

İtsem ‘aceb mi derd ile feryâd muttasıl
Nâlem sıda o sîne ceres dil içinde dil

Diğer : ‘Aceb mi hançerün çâki benüm gitmezse sînemden
Bilürsün hâke yir eyler akar su mâ-tekaddümden

Diğer : Neler kıldı bana bilmez miyüm zülfün ne sâhirdür
Nice kez kanuma girmiş durur gamzen sana ferdür

Nazîre li mü’ellifihi :

Egerçi kim dil almakda gözün üstâd-ı sâhirdür
Beli kan dökmede ol gamze-i hûn-hâre mâhirdür

VÂLÎ: İstanbullî’dur. Dergâh-ı mu’allâ yeniçerilerindendir. Cemâl-i bî-nazîr ile reşk-i Yûsuf-ı sânî ve kemâl-i dil-pezi ile Mısır-ı hüsnün ‘azîz-i cihânî ve kişver-i cânun vâlî-i kâmrânıdır. Edâ-yı pâk ile hayât-bahş-ı ‘uşşâk ve râhat-resân-ı gamz-hâ-yı firâk zurafâ-yı cihân ve hemîşe şu’arâ-yı zamân ile ‘ahd-i visâk üzre olup mezkûrlarun tâkatlerin tâk itmeden hâlî degüldür. Bu gazel-i âbdâr ki vasf-ı eyyâm-ı bahâr vâkı’ olmuşdur ol şâ’ir-i lâle-’ızârun güftâr-ı dürer-bârındandır sebt olundu. Şi’ri bu gazeldür ma’lûm-ı ‘uşşâk-ı çâpâr ola. Nazm:

Taht-ı zümürdüzre geçüp Husrev-i bahâr
İtdi şukûfe dirhemini ‘âleme nisâr

Diğer : Sünbül benefşe rûy-i gülistânı kıldı zeyn
Rûy-i nigârı nite ki bu zülf-i müşk-bâr

Benzer diyü çemende nihâl-i bülendüne
Serv ayagina geldi yüzün sürdi cûy-bâr

Bir goncenün gamıyla çü ‘uşşâk-ı bî-nevâ
Şâh-ı gül üzre nagmeler itmekdedür hezâr

Gark oldı bahr-ı eşküme Vâlî-i haste-dil
Ol serv-i mû-miyânı dahi itmedi kenâr

VASFÎ: Haleb’den ve zümre-i ehl-i tarabdan zamân-ı şebâbda ve bu sarây-ı harâbda matlûb-ı erbâb-ı ‘ukûl olan İstanbul’a müteveccih olup yârân-ı safâ ile ve hılân-ı vefâ ile buluşup ‘ale’l-husus şu’arâ-yı sihr-âferîn ve ümerâ-yı huceste-âyîn ile hem-nişîn ve mukarreb-i meclis-i ‘ulemâ-yı dîn olup zebân-ı Fûrs’i tekmîl ve lisân-ı ‘Arab’ı tahsîl itmiş. Hayfâ ki hod-râyî ve her zih-i hotend olmanın ‘izz ü temkînden behremend degül gâyet ile ter-mizâc olduğu bî-ilâcdur. Degme kimse ile imtizâc idemez feemmâ âvâz-ı pür-sûzı halet-bahş-ı ‘uşşâk-ı bâ-nevâ ve nagâmât-ı dil-efrûzı sûz-endâz-ı dil-i ümerâ ve musâhabet-i latîfi makbûl-i suhen-güzerân-ı cihân ve ebyât-ı şerîfi pesend-i yârân-ı zamândur. El-hak evsâf-ı mecâlis-ârâlığı kalem-i dü-zebân ile beyâne gelüp vasf olunmaz. Bu güftâr-ı ‘âşıkâne ol yâr-ı yegânenündür.

Meded öldüm bana bir çâre didüm didi o yâr
Mübtelâ-yı marîz-i ‘ışk olana çâre mi var

Diğer : Bâde-i gül-rengsiz ‘âlemde bir dem degül
Bezm-i ‘âlemden haber dâr olmayan âdem degül

Diğer : ‘Uşşâka cefâyı o perî bî-sebeb eyler
Agyâra velî mihr ü vefâyı ‘aceb eyler

Bu gazel-i bî-bedel-i pür-mesel dahi anlarundur.

Dil-i dîvânenün ıslâhına tedbîr olmaz
Ser-i zülfün var iken boynına zencîr olmaz

Müddet-i ‘ömrde dil yâr gamın çekdüğünü
Şerh itmek dilesem kâbil-i tahrîr olmaz

Ol kadar bezm-i hayâlünde bu şeb mest oldum
Zevke dâ’irdür anı sorma ki ta’bîr olmaz

Tutalum eyleye tasvîr musavver yârimi
Lîk nâz ile hırâm itmesi tasvîr olmaz

Yâr Vasfî’yi helâk eylerin en sonra dimiş
Söylen ana ne turur hayr işe te’hîr olmaz

Fî harfî’l-hâ

HÜDÂYÎ Çelebi: İstanbullı’dur. Musallî Çelebi demekle meşhûr ve ahlâk-ı hamîde ile efvâhda mezkûr ve bir mikdâr ‘ulûm-ı ‘Arabiyye kavâ’idinden habîr ve fenn-i pür fevâid-i Fârisî’de bî-nazîrdür. El-hak ol tûtî-i şeker-hâ ve ol bûlbül-i gülzâr-ı vefâ ‘ilm-i mûsikîde usûl-bend-i zamân ve her bir türkîsi pesend-i zurafâ-yı cihân nagâmât-ı dil-keşi gâyetde hoş ve terennümât-ı hoşı ziyâde dil-keş ve aksâm-ı şî’rûn fûnûnından behrever ‘ale’l-husûs tarz-ı gazelde fusahâ-yı ‘Acem gibi edâ-yı bülend ile dil-pesend ve kasîde vü müseddesi rengîn ü selîs ve murabba’ u tahmîsi lezîz ü nefîs tarîkında mübdi’ ve tarzında muhteri’dür. Burc-ı rif’atinde tâbân olan kevkeb-i nazm-ı nûr-efşânı ve necm-i hâdî-i mânend-i rahşân olan ma’ânî-i nâzûk-beyânı pertev-endâz-ı her merzbûm olalı makbûl-i tab’-ı zurafâ-yı Rûm olmuştur. Bu bir gazel ve bir kaç beyt-i bî-misl sebt olundu. Gazel:

Ey kaşı yâ hadeng ile sînem nişâne dik
Nâzûk misâl-i servdür ol bâg-ı câne dik

Tîrûnle sînemi yeter itdün delik delik
Şimdengirü ‘asâ-yı dil-i nâtüvâne dik

Ey cân tabîbî tîg-ı gamun sînem itdi çâk
Gel sûzen-i müjenle yine nâzûkâne dik

Gül dikme bâga ‘ârız-ı dil-ber yiter diyü

Serv ü çenâr geldi yine bâgbâne dik

Niçün kebâb-ı bezm-i nigâr olmadun diyü
Geldi horos cür'et idüp hâk-i pâ yine dek

‘Uşşâk içinde eyle Hüdâyî’yi ser-firâz
Ey Yûsuf-ı zamâne başın kes sinâne dik

Diğer : Didüm yoluna nisâr itdi sîm-i eşk gözüm
Didi ol şâh-ı cihan hayli terlemiş merdüm

Diğer : Belâlarun dil-i ‘uşşâk-ı dil-fikâre gerek
Belî ‘inâyet-i rahm et güneşkâre gerek

Sipihri gör ki çeker sînesine bir mâhı
Heman felekde begüm tâli’ ü sitâre gerek

Diğer : Komadı suda safâ ‘ârız-ı âlem-tâbun
Çekilüp döndüğü andan bu imiş dolâbun

Cûylarda degül ey Yûsuf-ı sâni girdâb
Reşk-i çâh-ı zekânun bagrını deldi anun

Diğer : Gitdi ‘aklum gibi ol rûh-ı revânun gelmez
Yine haşır olmayacak sîneye cânun gelmez

Diğer : Tagıtsa sabâ turesin ol silsile-i mûnun
Ditrerdük sevdâsı kamu ehl-i cünûnun

Reyhan hatı sünbül saçı gül-ruhları bûyi
Elden koma dirler bana destini sebûnun

Diş yâreleri var leb-i sâkîde sanasın
Ter-mîvedür ol kim tokınur zahmı tolunun

Diğer : Bir mâhı çeker sîneye şol kim gicelerde
Rûşen dil olur hâle gibi devr-i kamerde

[Gazel] : Leylâ elinde kâse-i Mecnun ‘âmiri
Sûretde sındı ma’nâda yapıldı hâtırı

Ben sâbitem kapunda güneş şehri seyr ider
Bir görme benden ile şehâ anda sâiri

Şehlâ gözün gözetmeyeli oldu dil harâb
Vay ol ‘imâretün ki ‘alîl ola nâzırı

‘Arz itme yâre kaddüni dîvâr-ı bâgdan
Ey serv bir iş eyleme haddünden aşırı

Togruluk ile eyler elif kâmetine meyl
Anunla bâtını ile bir ola zâhiri

Dîdâr-ı yâre bak heves-i bâg-ı huldı ko
Hoşdur Hüdâyî her kişi hoş görse hâzırı

HÂTİFİ: Mevlid-i latîfi Ankara ve nâm-ı şerîfi ‘Abdurrahman’dur. Kuzât zümresindendir. Ol yâr-ı huçeste-hısâl rûz u şeb mahrem-i erbâb-ı ma’ârif olup tahsîl-i kemâl idüp ser-âmed-i akrân u emâsîl olmuş. Zîrâ ki ‘ulûm-ı ‘Arabiyye’yi gereği gibi bilmiş ve zebân-ı Fûrs’ün müşkilâtına esb-i hâl kılup durûb-ı emsâl ve lâzım olan me’âlin zabt idüp tekellümüne müdâvemet gösterüp makbûl-i ehl-i ma’rifet kimesnedür. Tab’-ı nâzüki elsîne-i selâse nazm-ı dil-küşâyâ kâdir ve her birinün edâsına şâ’ir-i sâhir ‘ilm-i edvârda mâhir ve letâyif-i ferah-fezâsı vâfirdür. Bu bir nice matla’ ve bu bir nice beyt anların nazm-ı dürer-bârlarındandır. Ebyât:

Yaş ile gözlerüm müjemi pür dür itdiler
Bilsem ki bu kadar düri kandan düretdiler

Düşmüşdi halk ayakdan iricek meh-i sıyâm
‘İyd oldu sâkîler meyi yine türetdiler

Miskin gazâl nice bırakmıya nâfesin
Gîsûların şehâ katı kanın kurutdılar

Kaddün görüp sanavber ü serv oldılar hacil
Gerçi ki görmeden anı hayli sorıtdılar

Nâr-ı cahîmden yûri havf itme Hâtîfî
Ol kûşeyi ulular için hep kurutdılar

HÂTİFİ: Nigde’dendür. Dânişmend-i hûşmend tâifesinden hemîşe muttasıl tahsîl-i ‘ulûm itmege evkât-ı ‘azîzin sarf idüp hemdem-i erbâb-ı kemâl ve musâhabet-i ashâb-ı ‘izz ü ikbâlle mahrem geçinüp ve hadd-ı zâtında ma’ârifle beyne’l-akrân ‘ârif-i zamân ve kemâl ile yârân yanında mükemmel-i devrân ve nazm-ı dürer-bârı ma’ânî-i latîf ile ârâste ve eş’âr-ı âbdârı mazmûn-ı hâs ile pîrâste ve ol tûtî-i şîrîn-makâlün ve ‘andelîb-i ferhunde-me’âlün egerçi gazeliyyâtı çok degül amma sözleri rengîn ü şîrîn ü bî-misâl idüğine söz yokdur. Bu gazel-i pür-mesal ol yâr-ı bî-bedelündür. Gazel:

Meger ol la’l-i şeker-hâya tûtî dil uzatmışdur
Urup dest-i kazâ agzını burnını kanatmışdur

Göreliden dâglar ile sînemün zeyn oldugun cânâ
Uşup evrâk-ı gül sahn-ı gülistânı tonatmışdur

Olaldan ‘âşık-ı şeydâsı bed-ter sâbice tıflun
Külâhın âhumun dûdı kebûdı göge atmışdur

Leb-i la'l-i 'arak-nâkine öykünmüş diyü sâkî
'Arakla bâde-i nâbı biri birine katmışdur

Şeb-i târyek-i gamda öykünürmüş rişte-i eşke
Şehâbun Hâtıfı çarh-ı felek ipin uzatmışdur

HELÂKÎ Çelebi: Karamanî'dür. 'İlm-i zâhire meşgûl ve 'ulemâ içre makbûl olmak üzre iken ferâgat eyleyüp ehl-i cihet ve muktedâ-yı ehl-i sünnet-i cemâ'atdan olmuşdur. Nihâl-i tab'-ı ser-bülendi şi're mâyl ve zebân-ı Fârisî bilmede üstâdân gibi kâbil eş'âr-ı hoş -âyendesi efvâhda bî-kıyâs ve mezkûrun ebyât-ı bî-misâli beyne'n-nâs meşhûr bu eş'âr anundur sebt olundu. Beyt:

Egleyen gönlümi gerçi mey-i câm olsa gerek
Dostum bana lebünsüz o harâm olsa gerek

Pertev-i mihr-i ruhun zerrece eylerse tulû'
Mâh-ı bedrûn işi ol günde tamâm olsa gerek

Diğer : Eşk-i çeşmüm aksa tan mı rûy-i zîbâdan yana
Meyl ider insân olan elbet temâşâdan yana

Gerçi nâzükdür Helâkî sûz-ı üslûb-ı hasen
Nâle-i 'ışk içre dem-sâz olan eyidür bana

Diğer : Libâsın ol büt-i sîmîn-beden çün itdi sefid
Sanasın ebr-i sefid içre togdı bir hurşîd

HİLÂLÎ: İstanbulî'dür. Zihn-i selîmi pâk ve tevsen-i tab'-ı mustakîmi cüst ü çâlâk evsâf-ı hamîdesin gûş kıldığımız şu'arâdandır. Hayli nâzûk ü bârik ve kendü de za'f ile misâl-i hilâl-i zâr u bî-mecâl imiş lâkin şâ'ir-i metin ve sâhir-i sihr-âferindür. Şi'r-i dil-sûzı mânend-i nazm-ı Husrev ve ma'ânî-i dakîk ile mâh-ı nev gibi nâ-peydâ ve bî-hemtâ vâkı' olmuşdur. Cümlesinden bir iki beyt sebt olundu nazmı budur.

Gurûr-ı hüsn ile dil-ber ki nâze yüz tutdı
Belâ-yı 'ışk ile 'âşık niyâze yüz tutdı

Hazer kıl ey gül-i ra'nâ niyâz-ı bülbül den
Hezâr dest ile ol bî-niyâze yüz tutdı

HİLÂLÎ: Mevlidi İstanbul ve ismi Ramazan'dur. Dergâh-ı mu'allânun silâhdârî zümresindendir. Kaşı Hilâl demekle meşhûr-ı zamân ve ma'rûf-ı cihân ve müşârünileyh bi'l-benân kimesnedür. Âdâb-ı musâhabeti şîrîn ü latîf ve letâyif-i nâzüki rengîn vâkı' olmuşdur. Sâbikan 'Arabî'den cüz'î habîr ve zebân-ı Fârisî'den dil-pezi olan eş'âr-ı şu'arâ-yı 'Acemi tettebbu' itmede bî-nazîr ve kuvvet-i şi'riyyesi ma'lûm-ı yârân ve makbûl-i pîr ü cevân olup bu bir nice beyt anundur. Şi'r:

Halka-i câm-ı müselsel ne 'aceb dâm ancak

Murg-ı zîrekleri devrânun ana râm ancak

Diğer : Bu gün meyhânelerde dūd-ı âhumdan ‘alem çekdüm
Gönül gam-hânesin pâk itmege çârûb-ı gam çekdüm

Diğer : Beni ‘üryân u biryân itdi bir dellâk-i sîmîn-ber
Ki kuzgun müştêrsidür anun mihr-i sabâ-güster

HİMMETÎ: Sofyevî’dür. Mülâzimîn zümresindendür. Himmet-i ‘âlîyesin rûz u şeb kesb-i fezâyil itmege mebzûl idüp geregi gibi ‘ulûmı ve zebân-ı Fârisî’yi hâsıl kılmışdur. Bu bir nice beyt anundur zuhûra gelüp mestûr u mezkûr olundu. Şi’r:

Çün hâke gün gibi ider ol mehlikâ nazar
Hikmet nedür ki zerrece itmez bana nazar

Manzûr-ı ‘âlem olmasa âyîne ruhunu
İtmezler idi sûretüne dâimâ nazar

Diğer : Lutf itmese yâr ‘âşıkun işi başa varmaz
Allah onarmadugunu kimse onarmaz

HÂTİFÎ: Gelibolı mukâbelesinde Labseki dimekle ma’rûf kasabadan zümre-i mülâzimîndendür. Rûz u şeb mülâzemet-i erbâb-ı devlet ve hıdmet-i ehl-i ma’rifet idüp akrân içre meşhûr ve ma’ârif-i cüz’î vü küllî ile makbûl-i cumhûr ve zebân-ı Fûrs’dan behreverdür ve tabî’at-ı şi’riyyesi tâze vü ter ve makbûl-i ehl-i hüner olmadan hâlî degüldür. Bu bir iki üç beyt anundur zikr olundu şi’ri budur. Şi’r:

Her kaçan ‘âşık mahabbet ‘âleminden ursa lâf
Aslı vardur anı sen ey müdde’î sanma güzâf

Vasf idicek kâmet-i şimşâdunı gülşende bâd
Lerze tutdı ‘ar ‘arı vü serve geldi inhirâf

Bagrına basar tekellüfsüz alup ma’şûkını
Kangı ‘âşık kim ola âyîne gibi kalbi sâf

HEMDEMÎ-İ ‘Acem: Tebriz’ dendür. Tâlib-i erbâb-ı kemâl ve bende-i pîrân-ı vecd ü hâl ve hıdmet-i erbâb-ı hüner ârzûsıyla terk-i diyâr idüp seyâhat tarîkıyla üftân u hizân ziyâret-i âsitân-ı latîf Hazret-i İmam ‘Alî ve Hüseyin ve tavaf-ı Ka’be-i şerîf ve ravza-i seyyidü’s-sakaleyn ‘aleyhisselatü ve’s-selâm kılup müsâfir-i bahr ü ber geçinüp her kûşeden sâhib-tûşe ve her vâdîden hâberdâr ve hatt-ı nesta’lîk yazmada peyrev-i Mir ‘Alî ve pâdişâ vü efşân kesmede bî-hemtâ ve nefsinde rind ü lâubâli vü ‘âşık-pîşe ve fikr-i cevânân-ı suhendân ile sâhib-endîşe olmagın rûz u şeb şu’arâ-yı mütekaddimînün eş’ârın ve fusahâ-yı müteahhirînün güftârın tettebbu’ idüp ve her birinün ebyât-ı güzîdesin ve kelimât-ı pesendîdesin bir mertebede ezberlemiş ki erbâb-ı ma’ânî olan zurafâ-yı rûzgâr ol yâr-ı suhendânı Ayaklu Cönk lakâbıyla ser-efrâz u nâmdâr kılmışlar ve kendünün dahi tabî’at-ı şi’riyyesi hûb u

mergûbdur. Nazm-ı ‘âşıkânesi çokdur bu üç dâne matla’-ı Fârisî ki nazîri yokdur anlarundur sebt olundu. Matla’:

Men-i gam-dîde râ Mecnûn mihnet-dîde ger dîdî
Nihâdî poşt-ı dest ü dilber bihter ez hîsem pesendîdî ⁴²⁶

Kunûn geh ki sâhib hüsnî zi rûy-ı dil-dârî
Çi kem şevd zi tu ger hâtîrî be-dest ârî ⁴²⁷

Ân râ ki tarîk-ı Hemdemî nîst
Bâ u me nîşîn ki Âdemî nîst ⁴²⁸

Fî harfî’l-yâ

Efsahü’l-fusahâ ve emlehü’ş-şu’arâ a’nî Hazret-i **YAHYÂ**: İstanbul’da neşv ü nemâ bulmagla şehir-i mezbûrdan ta’dâd olunur. Mukeddemâ ol şâ’ir-i nîk-nihâd pâdişâh-ı dîn-ârâ ve Sultân-ı kişver-küşâ ve hâkân-ı keyvân-rif’at ve şâhenşâh-ı hûrşid-menzilet hazretlerinin hemîşe himmet -i ‘âlîyeleri ile dergâh-ı murâd-bahşlarında ‘âlî ze’âmete mutasarrîf ve sâhib-sa’âdetlerin âdâb-ı sohbet-i hâslarına künhüyle vâkîf ve meydân-ı belâgatde rahş-ı tab’ı şî’rûn vâdîsine cüst ü çâlâk ve herkesden öndül almada bî-nazîr ve ‘arsa-i fasâhatde şu’arâ-yı zamân içre zebân-âver ü bî-bâk ve geregi gibi dilîr ve tarz-ı mesnevîde şâ’ir-i muhterî’ ve sâhir-i mübdî’ olduğu gün gibi ‘ayân u rûşen ve edâ-yı hoş-âyende ve güftâr-ı pesendîde ile fusahâ-yı mütekaddimîn ve şu’arâ-yı müteahhirîn gibi sâhib-hamsedür. El-kıssa bu devrde zurafla-yı Rûm ve erbâb-ı ‘ulûm içre eş’âr-ı nâzûk dimede şâ’ir çokdur lâkin üslûb-ı **BE143b** mesnevîde ana mânend yokdur zîrâ ki kitâbları ma’ânî-i dil-firîb ile bî-nazîr ve ser-â-ser hikâyât-ı garîb ile dil-peziîr ‘ale’l-husus **Şâh u Gedâ** sı makbûl-i şâh u dervîş hasb-i hâl-i ‘uşşâk-ı dil-rîşdür. Hadd-ı zâtında ‘âşık-pîşe ve nîk-endîşe olmanın gazel-i bî-bedelleri cümleten ‘âşıkâne ve ser-â-pâ edâ-yı nâzûk ile rindâne ve her biri meşhûr-ı zamâne olmuştur. Bir iki gazel ile bir kaç beyt anundur sebt olundu. Gazel:

Hammâm gibi odlara yakup bu çâkeri
Kanuma girdi girmedi hammâme ol perî

Bir himmet eylen ola ki hammâme gire yâr
Ey başı kaba yalın ayak Rûm erenleri

Halvetde nûr görmek ise kasdı zâhidün
Hammâm içinde görsün o mâh-ı münevverî

Hammâm içini benzedürin cây-i mahşere
Kim olur anda şâh gedânun berâberi

Yahyâ su dutmag için ayagına ol mehün
Gûyâ ki tas idindi felek mihr-i enveri

⁴²⁶ - Ben gamlıyım, çile çekmiş Mecnun görseydi; beni tebrik edip kendinden daha iyi görürdü.

⁴²⁷ -Madem ki sen şu anda güzellik sahibisin, gönül almak için bir hatır sorsan neyin azalır?

⁴²⁸ -Hemdemlik yolundan uzak olanla birlikte olma, çünkü o insan değildir.

- Gazel : Derbân-ı pâdişâh idüp ol serv-i kâmeti
Devran yine kapuya getürdi kıyâmeti
- Süzüni süzüni varayın âsitânına
Dergâhdan süre beni hışm ile gâyeti
- Çok zulm idüp dururbana ben şöyle sanurum
Dîvâne varan anda ider hep şikâyeti
- Çâk itdi kapusına beni şöyle hemân
Gün gibi çın seherde görünce ol âfeti
- Yahyâ bakınca ana heman kendüden geçer
Derdâ ki hicr-i yâr ile tâk oldu tâkati
- Diğer : Dâr-ı dünyâ delü gönlüm gibi vîrân olsa
Ne cihân olsa ne cân olsa ne hicrân olsa
- Kâşki sevdigümi sevse kamu halk-ı cihân
Sözümüz cümle hemân kıssa-i cânân olsa
- Bir demür tagı delüp boynuna almag gibidür
Her kişi ‘âşık olurdu eger âsân olsa
- Diğer : ‘Aklum almakdan ise cânımı al didüm ana
Ol perî güldi didi ‘aklun alan cânun ala
- Diğer : Dilbendüni nâz ile zarîfâne sararsın
Meydân-ı mahabbetde gezüp ‘âşık ararsın
- Sen gonce gibi gâh yeşil gâh kızıl giy
Üftâdelerün berk-i hazân gibi sararsın
- Diğer : Subh-ı sâdık gibi ey gâfil agardı sakalun
Haberün yok seni ne ile bogazlar ecelün
- Diğer : Belli sevdügümi taşa tutar yârini
Ana şâdum ki dirîg itmez elinden geleni
- Söyler ammâ deheni cân gibi nâ-peydâdur
Hâtıf-ı gayb durur var ise yârün deheni
- Yâre mey sunma rakîbâ bana kan aglatma
Câm gibi tutar âhir gözümün yaşı seni
- Diğer : Gamundan öldi bir ‘âşık senün ‘ömrün ziyâd olsun
Mezârın gel ziyâret eyle bâri rûh[ı] şâd olsun
- Cihânda yahşi adıdur hemân bâkî kalan ancak
Gerek Ferhâd-ı ‘ışk olsun gerek Keykubâd olsun

Diğer : Ahşamlayup o meh-rû ben nâtüvânda yatmaz
Ana ta'accüb itmek dil-ber yabanda yatmaz

Diğer : Bir senün gibi Efendinün kulu kurbanıyuz
'Âlemün Sultâniyuz mülk-i cihânun hânıyuz

Diğer : Şevkümden ölürin yüzünü kim görem senün
'Arz-ı cemâl idersen efendi kerem senün

Diğer : Kimsenün gördüğüne râzı degül cânım seni
Görmeyeydi kâşki kulun Sultânım seni

YETİM 'ALÎ Çelebi: İstanbulludur. Babası dergâh-ı 'âlî bendelerinden yeniçeri tâifesi içre Zagarcı başı ve kendü de yeniçeri bölüğünde 'ulûfeye mutasarrıf iken rahş-ı tab'ı ol semtten geçüp ferâgat tarîkın tutup dânişmend-i hûşmend olmak temennâsıyla 'ilm-i zâhire müdâvemet gösterüp âhir hâtır-ı deryâ-müessiri tasavvufa mâyl olup hıdmet-i meşâyihe irâdet-i sâdık gösterüp tasfiye-i bâtın idüp seyr ü sülûka sâlik ve etvârün rümûzundan çok nesneye mâlik olmuş. Hadd-ı zâtında dervîş-sıfât ve âdemî-hılkat kimesne imiş. Zikr-i hayrın ve eş'âr-ı güzîdesin görüp işitdigümüz şu'arâdandır. Ol mâlik-i hüner zâhiren müsâfîret-i bahr ü berr kılmagla deryâ-yı 'ilmden gâyetde bâ-haber olmuş. Ol cihetden yeniçerilerin ıstilahâtın zabt idüp ol dil ile bir güzel kasîde-i bî-bedel peydâ kılmış ki ebyât-ı dürrer-bârı mânend-i dürr-i yetim pesendîde-i gûş-ı tab'-ı selîmdür ve tarz-ı gazelde şâ'ir-i muhteri'-âyin ve cevâhir-i nazmı reş k-i dürr-i sîmîn vâkı' olmuşdur. Bu bir kaç matla' u beyt anundur sebt oldı. Beyt:

Cünûn vâdilerin gûşe-be-gûşe cümle benden sor
Diyâr-ı 'akl-ı dûr-endîşi var kendin bilenden sor

Diğer : Taşı taş üzre koma bu diğ-i vîranda sakın
Yurd idinme bu hevelnâk-ı beyâbanda sakın

Diğer : Göz yaşı gibi suyu gam gibi âteşi var imiş
Kays'a Mecnûn dimenüz 'akl-ı ma'âş-ı var imiş

Diğer : Post kaydın kuvvetini penbe-i dâgun bürüsün
İki yapragla yûri 'âleme çal yuf borusun

Post-ı pûşun ikisin komadı şeh bir yirde
Kürk-i lâ-büd tagıdur görse koyunun sürüsün

YÛSUF: Vardar Yenicesi'ndendir. Hayretî'nün birâderidür. Sîne-çâk dimekle meşhûr ve etvâr-ı rindâne ile mezkûr 'ilm-i bâtında ma'ârif-i İlâhî ile 'ârif-i billâh ve sûret-i zâhirde merdûd-ı halk lâkin ma'ânîde makbûllullah ve hemîşe bâde-i tevhîd ile mest ü lâubâli ve dem-be-dem neş'e-i tecrîd ile harâbât ehlinün sâhib-kemâli ve 'arsa-gâh-ı mihr ü mahabbetde

vegâ meydânının ‘âşık-ı bî-bakı ve şemşîr-i şevkûn sîne-çâki kimse imiş. Eş’ârı muvahhidâne ve güftârı rindâne vâkı’ olmuştur. Gazel:

Biz tâc-ı ribâ-yı ser-i şâhân-ı cihânuz
Biz hâk-i kefi pâ-yi gedâyân-ı cihânuz

Biz dinlemezüz gulgulünü bülbül-i bâgun
Biz nagme-serâyân-ı gülistân-ı cinânuz

Âfâkı bütün tutmuş iken nâle-i âbdâl
Bu turfe durur kim yine bî-nâm u nişânuz

Bî-nâm u nişânuz bu ‘aceb kavs ü kazâdan
Her tîr-i belâ kim atılır ana nişânuz

ve ma’lûm-ı erbâb-ı hünerdür ki Yûsuf-ı Sinân dirler böyle olsa bu makta’ ki ehl-i mahabbetle ashâb-ı hased hakkında dimiş zarâfetden hâlî degül. Makta’:

Erbâb-ı mahabbet bizi Yûsuf bilür ammâ
Ashâb-ı hased gözine ey dost sinânuz

Bu matla’-ı derd-nâk dahi ol yâr-ı sîne-çâkündür ve lehu eyzân:

Ehl-i derd olmayan anlar mı safâsın elemün
Bana sor lezzetini ben bilirüm derd ü gamun

Dir mi mihr ü vefâya gönül ayrık ey dil
Zerrece alabilen zevkîni cevri ü sîtemün

YAKÎNÎ: İstanbullî’dur. Dânişmend-i hûşmend zümresinden evân-ı cevânîde ‘ulûm-ı zâhir ve hüsn-i cemîl ile sa’y-i küllî idüp ‘ilme’l-yakîn ü ‘ayne’l-yakîni tahsîl ü tekmîl itmeden bir zamân hâlî degül ve her an erbâb-ı fazîlet ve ashâb-ı ma’rifet olan suhen-pervere yakîn olmagla ma’ârifet mazhar düşüp beyne’l-akrân pesendîde-i pîr ü cevân ve makbûl-i ehl-i ‘irfân olmuştur. Tab’-ı vekkâdı aksâm-ı nazma şâmil olduğına zebân-ı Fârisî’yi cüz’î iltifâtla hâsıl kılmıştır. El-hak ol bülbül-i gülzâr ve tûtî-i şeker-güftârın gazeliyyâtı bî-dil ü rengîn ve manzûmâtı güzel ve ma’lûm-ı şu’arâ-yı sihr-âferîn ola ki mezkûrun kelimâtı lezîz ü şîrîn olmanın âhirde zikr olundu. Zîrâ ki hoş-tab’ân-ı zamân dimişlerdür ki *Helvâ ez âhir horend* ⁴²⁹ Bu gazel-i pür-mesel anundur. Gazel:

Yine vird-i ruhına bir leb-i can-perverdün
Sad-hezâr âh eyle bülbül-i dil-i can derdün

Ber-murâd eylemez insânı cihân-ı bî-minnet
Er isen çekme dilâ minnetin ol nâ-merdün

⁴²⁹ Helvayı sonradan yerler.

Tâlib-i sîm ü zer olma gam-ı dünyâyı çeküp
Tîre nakd-i sirişkûn ile bu rûy-i zerdün

Maraz-ı ‘ışk ile dir idün figân eylemeyim
Şimdi dehri iniletdün nedür ey dil derdün

Bezm-i mihnetde Yakînî bes idi efgânum
Bir yana sînede çü ney nâle kılup n’eylerdün

Bâg-ı ‘âlemde Yakînî önlük hicr ile
Dem-be-dem nây-sıfât nâle kılup n’eylerdün

Diğer : Az mıdur yohsa bahâ-yı leb-i la’lün çok mı
Behey âfet biricük söyle agızun yok mı

Bu matla’ı Bâkî hakkında dimişler nezâketden hâlî degüldür. Matla’:

Nâm-ı Bâkîyle gazel rengîn ü hoş -ter güster
Zaglansa nitekim şimşîr-i cevher-güster

HATÎME-İ KELÂM

Şükr kîn nâme-i ferhunde kelâm
Şod be-kâm-ı dil-i ahabb temâm ⁴³⁰

Elhamdülillah ki bu nâme-i kirâmı bu denlü esâmî ile bir üslûb-ı hâs ile tamâm oldu. ve zikr-i esâmî-i Ravza-i Evvel⁴³¹

Müretteb-i **Gülşen-i Şu’ârâ** diyü mülakkab olup husûsâ hâmî-i İslâm u peyrev-i şeri’at-ı Seyyidü’l-enâm ‘aleyhi’s-salâtü ve’s-selâm olan şâh-zâde-i rûy-i zemînün nâm-ı huçeste-encâm ve nazm-ı belâgat-nizâmları ile ihtirâm bulup ve bu ‘asrda vâris-i ‘ulûmü’l-enbiyâ-yı ve’l-mürselîn olan ‘ulemâ-yı mütecerrînün elkâb-ı ferhunde-fercâm ve nefîs kelâmları ile ihtimâme irişüp ve bu devrde zuhûr iden peyrev-i fusahâ-yı mütekaddimîn geçinen şu’arâ-yı müteahhirînün selîs beyânları ile murâda irişüp ve hâliyâ hayâtta olan zurafâ-yı suhen-âferînün serv-i ser-encâmlarıyla itmâm buldı. El-hak anların eş’âr-ı âbdârının yüzi suyına hürmetle şöhet-i tâm ve makbûl-i hâs u ‘âm ve pesendîde-i cevânân-ı gül-’ızâr ve vird-i zebânân-ı bülbülân-ı zâr ve zikr-i pîrân-ı nîk-şi’âr oldu. Mesnevî:

Lillâhi’l-hamd ki în nâme-i men
Şod pesend-i dil-i erbâb-ı suhen ⁴³²

Yâft ikbâl be-nâm-ı şeh-i dîn
Ger be-nâzem ne bûved dûr bedîn ⁴³³

⁴³⁰ -Şükürler olsun bu kutlu sözlü kitap ahabbın gönlünün istediğince tamamlandı.

⁴³¹ - Bazı nüshalarda (F, S) Şairlerin ravzalara göre bir listesi veriliyor, fakat bu liste bütün nüshalarda olmadığı için biz bunu burada vermedik. Liste bittikten sonra gelen kısımdan itibaren yazdık.

⁴³² -Allah’a hamd olsun, benim bu kitabım söz erbabının beğenisini kazandı.

⁴³³ -Din şahının adıyla ikbal buldu. Eğer övünürsem (bu) dine uzak olmaz.

Çün ne yâbet heme câ ‘izz ü ‘alâ
Şod müzeyyen be-kelâm-ı fusahâ ⁴³⁴

Kıt’a : Bihamdillah kitâbum oldı ‘Ahdî
Cihanda mu’teber mânend-i dil-ber

Yaraşur hıl’at-i zer giyse ana
Olupdur iltifât-ı şeh ser-â-ser

Ümmîd-i sâdık ve recâ-yı vâsık oldur ki bu gavnâs-ı deryâ-yı ma’rifetün ve bâb-ı şeh-i fazîletinde derbeder olan kem bizâ’etün bu resme **Gülşen-i Şu’arâ** ve **Tezkire-i Erbâb-ı Vefâ** olan hazef-pâre-i bî-bahânun ser-geştân-ı vâdî-i ma’rifet ve kûşe-i nisyân şeh-i mahabbet ve sarrafân-ı bâzâr-ı güher ve cevheriyân-ı çarsû-yı ruh-perver nazm-ı dürrer-bârinun mi’yâr-ı bî-mikdârına ve nesr-i leâli-âsârınun kelimât-ı müsecca’ u murassa’ ve terkebât-ı perîşân- etvârına nâzır oldukda sehv olan elfâzın iltifât-ı bî-nihâyet ve eltâf-ı bî-gâyetlerinden rakam-ı muslih ile ıslah idüp ashâb-ı halâsdan bulup kerem-i vâfirlerinden kalem-i ‘afv çekeler. Şi’r :

İltimâsum bu ki erbâb-ı salâh
Kıla lutf ile hatâsın ıslah

‘Avn-i hakk ile bu nâme oldı
Nazm ü nesr ile çü dürr-i meknûn

Yaraşur gûşına dürr itse anun
‘Ahdî’yâ her birin erbâb-ı fûnûn

Hudâvendâ be-hakk-ı Âl-i Ahmed
Be-nûr-ı pâk-i ashâb-ı Muhammed

Be dest-i herkesî kîn ravza üfted ⁴³⁵
‘Azîz ü muhterem kon belki emced

⁴³⁴ -Her yeri yüceliğe nasıl erişmez; çünkü fasihlerin sözleriyle süslenmiştir.

⁴³⁵ Bu ravza kimin eline düşerse.

S O N U Ç

Ahdî'nin Gülşen-i Şu'arâ adlı tezkiresi üzerinde tamamlanan bu çalışma ile aşağıdaki sonuçlar elde edilmiştir:

Tezkire, ele alınıp tertip tarzı değiştirildiği için, yararlanmak açısından, mutlaka karşılaştırmalı metne ihtiyaç vardı. Çünkü her tertipte değiştirmeler, ilaveler ve çıkarmalar mevcuttur. Bu yüzden bu ihtiyacın giderilmesi gerekiyordu. Bu gerekçe ile karşılaştırmalı metin hazırlandı.

Araştırmalarımız sonucunda, Gülşen-i Şu'arâ'nın yedisi yurt dışında olmak üzere yirmi nüshasını tespit ettik. Mevcut nüshalardan Konya'da bulunan Koyunoğlu nüshası eksik (toplam 36 varak) bir nüsha olarak karşımıza çıktı. Diğer nüshalardan yurt dışında bulunan üç nüshayı görme imkanımız olmadı. Bu çalışma ile Yugoslavya nüshası ile İstanbul Divan Edebiyatı Müzesi'nde bulunan nüsha ilk defa tarafımızdan gün ışığına çıkarıldı.

İncelemelerimiz sonucunda Gülşen-i Şu'arâ'nın en az üç kez tertip edilmiş olduğu kesinleşti. Dört ravzalıları üçüncü tertip olarak değerlendirdik. Karşılaştırmalı metne esas aldığımız B ve S nüshalarını ikinci tertibe dahil ettik. BE ile W'nin de ilk tertibe ait nüshalar olduğu tescil edilmiş oldu.

Metin kurulduktan sonra metin tahlili diyebileceğimiz çalışmalar yaptık. Bu çalışmalar başlıca iki grupta toplandı. İlk grup, eserdeki şairle ilgili tespit ve değerlendirmelerdir. Bu bölümde şair hakkında tezkiredeki Biyografik Bilgi ve Değerlendirmeler ile Edebî Kişilikle İlgili Bilgi ve Değerlendirmeler ana başlıkları altında çeşitli bilgi ve değerlendirmeler yer aldı. Bu tetkiklerin sonucunda Gülşen-i Şu'arâ'nın devrin diğer tezkireleri ile gerek üslup gerekse bilgi verme açısından bir farkı olmadığı tespit edildi. Bu manâda farkın sadece şair kadrosunda olduğu görüldü.

İkinci grupta ise, bu zamana kadar yapılmamış bir çalışma gerçekleştirildi. Bu bölümde tezkiredeki şiirle ilgili tavsif ve değerlendirmelere yer verildi. Alfabetik olarak verdiğimiz bu çalışmanın sonunda ortaya çıkan kelime ve tabirlerin bir kısmının terim olabileceği, büyük bir kısmının da sadece beğenme, takdir etme gibi durumları anlatmakta kullanılan bir sıfat olduğu kanaatine vardık.

Bu değerlendirmeyi yaparken zaman zaman devrin diğer tezkirelerine de mukayese amacı ile müracaat ettik ve bunları ilgili yerlerde dipnotta gösterdik. Çıkan sonuç tezkireler arasında bir terminoloji ve değerlendirme birliği olmadığı kanaatini bizde uyandırdı.

Gördüğümüz bütün nüshaları şair kadrosu bakımından inceledikten sonra nüshalara göre şairler listesini çıkardık. Ayrıca diğer tezkirelerle bu bakımdan bir karşılaştırma yaptık. Bu karşılaştırma sonucu 175 şairin ilk defa Gülşen-i Şu'arâ'da yer aldığını gördük. Bunu da ilgili yerde liste halinde verdik.

Çalışmamızın sonuna koyduğumuz Nüsha Farkları bölümünden çıkan sonuç şudur: Ahdî, eserin ilk tertip tarihi olan H.971'den sonra boş durmamış ve eserine genişletmiştir. Bunda esere yöneltilen tenkitlerin yanı sıra yazarın bizzat kendi tasarrufları da rol oynamıştır. Yine bu bölüm için şunları da söylemek lüzumunu hissediyoruz: Üç ravzalılardan dört ravzalılara, hatta birinci tertipten ikinci tertibe geçilirken bazı bölümlere hiç dokunulmamış, bazılarında ise ekleme ve çıkarmalar yapılmıştır. Gelibolulu Âli ve Keşfi Beg biyografilerinde olduğu gibi. Bu da eserin belli bir program çerçevesinde yeniden ele alınmadığını düşündürüyor.

Gülşen-i Şu'arâ hakkında (bu çalışma için) söyleyeceğimiz nihaî şeyler şunlardır:

1- Eser, 16.yy.da Anadolu'da yazılmış bir tezkiredir.

2-Bu eser devrin diğer tezkirelerinden farklı olarak, o zamana kadar bilinmeyen 175 şairi Türk Edebiyat dünyasına kazandırmıştır. Bu şairlerin büyük çoğunluğu da devletin doğu tarafında yaşamaktadır.

3-Eser, yüzyıllara mukavemet etmiş, bilinen 20 nüshası ile aranılan bir eser olma özelliği göstermektedir.

4-Araştırmalar sonucunda, tezkirenin bilinmeyen üç nüshası bilim dünyasına sunulmuştur. Daha da nüsha çıkacağı ümidi kuvvetlenmiştir.

5- Tezkire yazarının eserine aldığı şairleri seçerken özel bir ölçüsünün olmadığı tespit edilmiştir. Ahdî, şiirini gördüğü veya duyduğu, kendisinde şairlik istidadını hissettiği kişileri vb. eserine almış ve bu şekilde 381 şairi bize tanıtmıştır.

Bütün bu özellikleri ile Gülşen-i Şu'arâ, tenkitli metni ile bilim dünyasının hizmetine sunulmuştur.